
This is a reproduction of a library book that was digitized by Google as part of an ongoing effort to preserve the information in books and make it universally accessible.

Google™ books

<https://books.google.com>




This is a reproduction of a library book that was digitized by Google as part of an ongoing effort to preserve the information in books and make it universally accessible.

Google™ books

<https://books.google.com>





5.8.199

PETRI ABBATIS

CELLENSIS

Qui post deinde S. Remigij Remen-
fis Abbas, & Episcopus
fuit Carnotensis,

EPISTOLARVM

LIBRI IX.

*Item Alexandri III. Papæ ad Petrum eundem
& alios Epistole LVI.*



J.B.



LVTETIÆ PARISIORVM,

EX OFFICINA NIVELLIANA.

Sumptibus SEBASTIANI CRAMOISY,
via Iacobæa, sub Ciconiis.

M. DCXIII.

CVM PRIVILEGIO REGIS.

34.





RELIGIOSISSIMIS DEIQVE
AMANTISSIMIS
DD. PRIORI ET PATRIBVS
CARTVSIAE MONTIS DEI
IAC. SIRMONDVS SOC. IESV S.



*VM mihi nuper ex
Lotharingia redeunti
aditus ad celeberrimæ
domus vestrae septa pa-
tuisset, Patres religiosissi-
mi, liceretque iam propius intueri, quæ
multorum de ea sermonibus & scriptis
predicata memineram : miratus sum è
vestigio, quocumque animum oculosque
conuerterem, supra famam opinionem-
que nostram excellere vniuersa. Sed vt
quod res est dicam, neque ita me loci fa-
cies cepit, quamuis eximia, & naturæ in-
genio, cultûque amœnissima, neque sa-
cellorum, totiusque ædis sacra ornatus at-*

ã ij

que nitor oculos sic affecit, ut animum
sanctissimi istius cœtus vestri conspectus
& admiratio. Quid enim (mecum ipse
reputabam) honestius? quid maturius?
quid ad pietatem aptius esse queat? aut
quanam alia fingi, si hac non est, forma
integra & absoluta æmulanda religio-
nis? Nimirum hoc erat, cuius gratia
iam olim tanto studio visebatur Mons
Dei: hoc philtrum atque illex, cur has
sedes vestras summi viri tantopere ad-
amarent. Propterea S. Bernardus, cuius
signatam vestigiis cellulam, sacrâsque
vestes hospitalitatis vestræ indices non
immerito retinetis, istuc libens interdum
relictâ Clara-valle properabat. Inde
Bernardus alter ex Abbate Prænестinus
Episcopus, vitæ mortisque ornamentis
clarissimus, Montis-Dei latebras Ro-
manis deliciis, & Cardinalitiis quæ de-
lata fuerant infulis anteponebat. Petrus
vero S. Remigij Abbas noster, post deli-
batam semel congressus, consuetudinisque

vestræ dulcedinē, quid habuit antiquius,
quàm ut ad vos idētidē, quod eius Episto-
la testatur, aut re ipsa cūm posset, aut vo-
tis certē, si re non liceret, animoque &
cogitatione recurreret? Qui nūc omnes si
cælo delapsi ad vos redirent, nihil, ut equi-
dem cēseo, impensius gratularētur, quàm
eundem hunc apud vos disciplinæ florem,
quem primæuum viderant, illibatum in-
tegrumque post tot sæcula permanere.
Quamquam cur ego Montis-Dei praci-
pua laudem faciam, quæ communis est
omnium ubique Cartusianorum? Vestri
enim ordinis, RR. Patres, familiæ ve-
stræ proprium est decus, inconcussam ævo
etatem ferre, annorum vices nescire, tem-
porum detrimenta non sentire. Itaque
laborant alij ut ruinas suas instaurent:
vos ne patiamini. Illi ut antiquam origi-
nis suæ dignitatem intermortuam exsu-
scitent: vos ut quam hætenus non dege-
neres tuemini perpetuò conseruetis. Quo
mihi quidem, cūm instituti vestri vitæque

*præclara sint omnia, nihil admirabilius,
nihil ad nominis vestri gloriam illustrius
videtur. Erunt quos alia fortasse Ordinis
vestri ornamenta moueant. qui plena
stuporis exordia suspiciant: domos pluri-
mas non sine celestibus prodigiis funda-
tas: Episcopales cathedras aut fortiter à
vestris hominibus, Brunonis exemplo
repudiatas, aut sanctissimè, cum reniti
non possent, ab Hugonibus, Anthelmis,
Stephanis administratas: alios rursus di-
uersarum Ecclesiarum clarissimos Anti-
stites, neque hos solùm, sed ipsos etiam
summæ potentie dignitatisque Princi-
pes, cum Guillelmo Niuernensium atque
Autisiodorensium Comite, abiectis coro-
nistiarisque, cilicioli vestri asperitatem
vel suscepisse, vel optasse. Innumerabiles
præterea religiosissimorum ac pietate do-
ctrinaque præstantissimorum patrum
turmas: quorum alij virtutum suarum,
mirandorumque operum fama oras om-
nes complerunt, alij saluberrimis lauda-*

tissimisque scriptionibus Ecclesiam illustrarunt. Magna hac profecto, nec sine admiratione memoranda. Sed horum aut pleraque aut omnia suis quoque laudibus alij Ordines adnumerant. Vestra est, & sine exemplo, ista quam dixi antiquae disciplina perpetua stabilitas & constantia, tanto ceteris gloriosior & illustrior, quanto supra humanam conditionem est, in hac rerum quam patimur mobilitate atque fluxu, gradum figere, atque invariabilem beatarum mentium perseverantiam imitari. Hinc ergo me, ut vobis, R.R. Patres, hospitij gratiam his potissimum Epistolis redderem, causa non una permouit. Primum quidem, ut earum auctorem vel hac ratione compotem voti facerem: ut qui ad Montē Dei libenter itare solitus est dum vixit, eò nunc etiam qua potest sui parte reuertatur. Tum vos deinde in maiorum vestrorum, quam ob oculos ponet, imagine, praesentia felicitatis vestrae bona, qui iisdem vestigiis in-

*ceditis, agnoscatis. Me denique inter ad-
siduas diuinarum laudum, distinctas
actu, variatas temporibus, sed nunquam
intermissas excubias, quibus dies noctes-
que insistitis, dum precum vestrarum
beneficium orbi Christiano impenditis,
admiratorem veneratoremque vestri, in
tanti si placet muneris partem aliquam
venire iubeatis. Valete.*

TESTIMONIA VETERVM
DE PETRO ABBATE
CELLENSI.

PETRI CELLENSIS, cuius Epistola nunc primum eduntur, alia quadam Opuscula, De panibus, De Tabernaculo, & De Conscientia iam olim prodierunt, ex bibliotheca Nic. Fabri V. C. cuius in obitu nuper litterati omnes iacturam suam non ficto dolore testati sunt. plura lucem adhuc expectant studio atque industria D. Nicolai Camuzatij Ecclesia Trecentis Canonici. Et quoniam eius diligentiam qua ad auctoris quoque vitam spectant non effugient ut speramus: nunc satis sit monuisse, cum Petrus Cellensis primum, deinde Remensis S. Remigij Abbas fuerit, ac demum Episcopus Carnotensis; & Epistolas eius, & Testimonia, quae sequuntur, ad diuersa ipsius tempora titulosque pertinere.

*Nicolai monachi Clareuallensis epistola xxv.
quam Prioris sui nomine scripsit ad Hen-
ricum Episcopum Trecentem.*

ABBAS CELLENSIS vir religiosus ac timens Deum, homo bonus & testimonium bonum habens à bonis, vita & litteratura conspicuus, nobis quoque tanta familiaritate deinctus, ut non sit vnus de ceteris, sed prae ceteris vnus. Omnia nostra sua sunt, & sua nostra sunt: nos in illo, & ipse in nobis. vnus est de ordine suo, in quo domino Abbati nostro (S. Bernardo) amico vestro multum complacuit, &c.

*Ioannis Saresberiensis epistola CLXXII.
ad Henricum Comitem.*

QUAS quæstiones cùm mihi Albericus Remensis, quem cognominant de porta Veneris, quæ vulgo Valesia dicitur, nomine vestro, adhibitis aliquot litteratis viris proposuisset, vt verum, Domine, fatear obstupui: nec quærenti potui habere fidem, donec venerabilem virum, fidelissimũ & deuotissimum vobis, Abbatẽ S. Remigij adduceret, qui & ipsas proponeret quæstiones, & ad eas cum multa precum instantia pro amore vestro & suo peteret responderi: pro certo affirmans vobis in vita nihil esse iocundius, quàm cum litteratis viris & de litteris habere sermonem.

*Kalendarium Ecclesiæ Carnotensis
IX. Kalend. Martij.*

OBIT piæ recordationis D. Petrus Carnotensis Episcopus, qui prius fuerat Abbas S. Remigij Remensis: qui antiquam banni consuetudinem Theobaldo Comite assentiente reformauit.

Petro Abbati de Cella scribunt Bernardus epistola CCXCIII. Ioannes Saresberiensis epistola LXXV. LXXVII. XXCI. &c. & Nicolaus Clarenall. epist. xx. XXIV. XXVIII. &c. Eidem Abbati S. Remigij Saresberiensis idem epist. CCXXC. & Alexander Papa III. passim. Episcopi vero Carnotensis meminit Stephanus Tornacensis epistola CXXXVI.

I N D E X

EORVM AD QVOS SCRIPTAE *sunt* Epistolæ Petri Abbatis Cellensis.

A BBATI de S. Aegidio	Vvillermo	120	
164	Senonensi Hugoni	8.9.11	
de Beldevvas	Vvillermo	91.120	
de Bullencurte Roberto	36	Cardinali S. Chrysogoni P.	
Cluniacensium Petro	28	128.130	
Hugoni	29.30.31.32	Cardinalium vni	92
Theobaldo	160	Cartusienſium Conuentui	77.
Hugoni	168	80	
SS. Crispini & Crispiniani		Caziacēſibus monachis	41.42
Bern. 69.70.71.76.89.151		Cellenſibus	49.75
S. Edmundi	83.99	Cisterciensi capitulo	165
de S. Huberto H.	74	Clareuallensibus	53.54.55
Latinacensi	86	Cluniacensibus	157
S. Medardi	89	Episcopo Auenionensi	136
de Maiori sylua	85.106.108	Autissiodorensi	22
Molismensium A.	34. T.	Bellouacēſi Henrico	24.26
102.127		Carnotensi Ioanni	134.138.
Pruliaci H.	35	139	
S. Richarij	115	Cestrenſi	122
Stabulensi E.	78	Excestrenſi B.	72
Villariensi	116.117	Exoniensi	34
Abbatissæ Fontisebraldi M.		S. Maclouij Ioanni	15.16.
37.38		17.18.19.20	
Alberto Cardinali	90. Can-	Noniomenſi Balduino	25
cellario	143.147.148.149	Parisiensi Theobaldo	21
Alexandro Papæ	1.2.3.4.5.87.	Prænestino	155.158.159
95.142.144.145.146.150		Tusculano	163
Archiepiscopo Cantuariensi		Eugenio Papæ	6
Thomæ	10.12	Gerardo Puellæ	115
Richardo	133	Grandimontensibus	50.741.
Coloniensi Philippo	13	156	
Lundenſi Eskilo	23.73.104.	Haltingjarú ſacerdoti G.	52
118.125.129.135		Henrico Comiti Palatino	33
Abſaloni	153.154	Ioanni Cancellario & Rob.	
Remensium Henrico	14	Cantori Compend.	96

Ioanni Saresberienſi 59.60.
 61. 62.63.64. 65. 66 67. 82.
 88.100.101.114
 Meritonæ Canonico R. 137.
 140.161
 Molifmenſibus 126
 Monacho de S. Bertino 131.
 Monacho de Reddinges 111
 Montis Dei fratribus 43.44.
 45.46.47.48.79.81
 Nicolao 94
 Nicolao monacho S. Albani
 93. 112.167. Nicolai ad Pe-
 trum 166
 Nicolao monacho Clareual-
 lenſi 56.57.58
 Petro monacho Norvviçēſi 68
 M. Presbytero 15.119

Priori Cātuarienſi 98.107.132
 Cartuſiēſium Baſilio 77.80
 Priori ſuo 39
 SS. Crisp. & Crispiniani 152
 de Lapelee 162
 Molifmenſi T. 40
 Montis Dei Simoni 79.81
 De valle S. Petri 103
 Vvigornenſi 110.121
 S. Petri Pruuinienſis Sacerdo-
 ti A 51
 Regi Sueonum 97
 Richardo Canonico regulari
 82.88.100.105.109.124
 Rolando Cancellario S. Rom.
 Eccleſiæ 7
 Thomæ Cancellario regis
 Angliæ 27

INDEX EPISTOLARVM ALEXANDRI III.

ABBATI Clareuallēſi 45
 Corbeiēſi 33
 S. Dionysij Remenſis 52
 S. Medardi 8
 S. Nicaſij Guidoni 28.56
 S. Remigij Petro 1.2.3. 4.5.
 & alia paſſim.
 Archiepiſcopo Remenſi Henrico
 17.44
 Senonenſi Vvillelmo 54
 Vpfellenſi 19.22.25
 Trundenſi 26
 B. Archidiacon. Remenſi 34.37 39
 Dacia fidelibus 20.21
 Epifcopo Ambianenſi 14.15.32
 Bellouacenſi Bartolomao 1

Lingacopenſi Colon. 23
 Siluanectenſi 8.30.31
 Stranenſi Guillelmo 24
 Strauengarenſi 26
 Tornacenſi 32
 Fulconi canonico Remenſi 2. De-
 cano 4.6.9.10. & alia paſſim.
 Gothiſ fidelibus 21
 Guthermo Duci 25
 Lingacopenſibus 27
 Norvvegenſibus 21
 Propoſito & Decano Remenſi 42
 Presbyteris & Clericis Eccleſia-
 rum S. Petri de Montibus 53
 Priori S. Martini de Campis 41
 Radulfo Canonico Remenſi 28

P E T R I



PETRI ABBATIS
CELLENSIS
EPISTOLARVM
LIBER PRIMVS.

¶ EPISTOLA I.

*Domino suo Alexandro Dei gratia summo
Pontifici G.*



IN gratuissimis quæstio-
nib. sicut olim ad Moy-
sem, sic nunc, pater ve-
nerande, ab omni Ec-
clesia Dei recurritur ad
beati Petri & vestram
sedem. Tam enim com-
muniter communis im-
ponitur vobis sollicitudo omnium Ecclesiã-
rum, quàm singulariter & specialiter Petro
videtur dictum, *Et tu conuersus confirma fratres*
meos. Vt tamen compendium de prolixo ne-
gotio vobis faciam, Ecclesia nostra Deruen-
sis de manu potentis G. non liberabitur, nisi
per manum omnipotentis Dei, nisi in arcu

Lucæ
xxii. 32.

A

vestro, & brachio extento. Clamat itaque de angustia & afflictione sua ad vos, quia salus eius in manu Dei & vestra est. Non enim respicit ad adiutorium hominum, quorum vana spes, promissio cassa, nulla confidentia. Vobis autem sine dubio & sermo potens ad liberandum, & virtus sufficiens ad redimendum. In umbra itaque vestra aut est ei viuendum, aut sub umbra mortis, videlicet G. deficiendum. Dic verbo, sancte pater, & sanabitur Ecclesia vestra. Ecce languore desperatissimo iam diu ægrotat. Appone malagma: ut cuius est filia ex se languida, sit per te deuotissima ancilla & redempta. In ore huius nuntij nostri posuimus & quæ dicat & quæ faciat. Rem ut est latius ipse exponet, siue quomodo iustitiam in præsentia Episcopi Catalaunensis subterfugerit; siue quomodo apud Remensem Archiepiscopum sola frustratione causa dilationis appellauerit: siue quomodo interposita fide in domnum Héricum Trecentem Comitem compromiserit, & postea resilire temptauerit. Capite vulpem quæ demolitur vineam nostram. Petitio nostra hæc est, ut sub tali tenore ad Archiepiscopum Senonensem remittatur causa, quod vel compromisso suo stare cogatur, aut possessio siue inuestitura nobis restitatur, quam Ecclesiam nostram aliquando habuisse probare poterimus.

EPIST. II.

*Domino suo & patri Alexandro summo Pontifici, Fr.
Petrus humilis abbas Cellensis debitam subie-
ctionem filij & deuotionem.*

CVi præter sinus paternos alia non suppe-
tunt refugia, instantius eadem requirit
in necessitate suffragia. Ad vos, pater sanctis-
sime, à multis quæ circundant nos tribulatio-
nibus, & principum nostrorum oppressioni-
bus merito confugimus, cuius studio & sol-
licitudini regendam Ecclesiam suam in mun-
di fluctuationibus commisit Christus. Iam
enim perimus, nisi respexerit naufragia no-
stra benignus Deus. Iustitia, ratio, veritas, lex
& æquitas de die in diem à nostris finibus ex-
terminantur, & earum memoria absque mo-
do & misericordia extinguitur. Proinde res-
piciat, quæsumus, super nos misericordia ve-
stra, ut viuere possit anima nostra. Vale.

2.

EPIST. III.

*Domino & patri carissimo Alexandro summo Pon-
tifici, Fr. Petrus Cellensium fratrum minus ido-
neus abbas seipsum cum deuotione.*

VBi causæ postulandæ perorare per se suf-
ficit prærogatiua, solet rogantis etiam
minus idonea recipi persona. Supplet namque
dignitas petitionis insufficientiam postulan-

3.

A ij

4 PETRI ABB. CELLENSIS
tis. Prædecessorum vestrorum privilegiis & beneficiis abbatiam Fontis Ebraldi sublimatam & communitam vbique diuulgatum & notum est in partibus nostris. Episcopus autem Pictaueusis, cum rigare debuisset & fauere plantationi dextræ Dei & vestræ, nititur libertatem huius Ecclesiæ diminuerè, & contra priuilegium consuetum abbatissam cogit professionem sibi & obedientiam promittere, quam sibi sedes Petri retinuit. Gloriam itaque vestram alteri non detis: sed omni remoto mediatore, propria benedictione & protectione & abbatissam & abbatiam ut dignum est foveatis.

EPIST. IV.

*Domino & patri carissimo Alexandro vniuersalis
Ecclesiæ summo Pontifici filius suus Petrus Cellen-
sis indignus abbas cum omni dilectione obedien-
tiam, voluntariam subiectionem.*

4. **D**E multa bonitate vestra plurimum confidens, etiam pro negotiis aliorum vobis aliquando scripsi. Nunc verò in propriis vestrum, pater sanctissime, cogor expetere primum auxilium. Est autem huiusmodi pro necessitatibus Ecclesiæ nostræ negotium. Habemus prioratum apud Cantumerulam, in cuius cimiterio ius sepeliendi omnes qui de castello sunt, & de quibusdam aliis villis hactenus dignoscuntur habuisse. Constat etiam antiquitus non fuisse cimiterium in

privilegiis &
 aldi sublima-
 iuulgatum &
 Episcopus au-
 buisset & fa-
 vestra, niti-
 diminueret, &
 n abbatisam
 dientiam pro-
 retinuit. Glo-
 detis: sed om-
 benedictione
 c abbatiam vt

EPISTOLARVM LIB. I.

5

castello, dum ibi essent Canonici sæculares. Cùm autem successissent regulares, ab antecessore nostro impetratum est, interuenientibus comite Theobaldo & Hatone Episcopo Trecensi, quatenus ibi fieret cimiterium, tantummodo ad sepulturam Canoniorum & conuersorum suorum. Abbas autem cum Canonicis suis contra pactum veniens, illos etiam, qui tam iure quàm pacto in cimiterio nostro sepeliri debuissent, sepeliuit. Cùm de his vtrinq. altercatum in curia Trecensi & ad iudicium ventum esset, appellauit Abbas. Pro huiusmodi, pater dulcissime, benignitatem vestram obsecramus: supplicantes vt & nuntium nostrum benignè suscipiatis, & petitiones nostras efficaciter exaudiatis.

EPIST. V.

dro vniuersalis
 s Petrus Cella-
 Etione obedi-

*Venerando patri & domino Dei gratia vniuersalis
 Ecclesie summo Pontifici, Frater Petrus Cella
 sancti Petri Trecensis humilis abbas,
 quicquid potest.*

trimum con-
 aliorum vo-
 ò in propriis
 or expetere
 iusmodi pro
 negotium.
 numerulam,
 i omnes qui
 n aliis villis
 e. Constat
 niterium in

Q Vi nostram humilitatem alicuius momenti apud sublimitatem vestram reputant, vtinam spei suæ fructum in effectu precum suarum inueniant. Hinc enim & vestra benignior apparebit dignatio, & nostra confortabitur de vobis gloriatio, & amicorum pro impetratis gratiosior erit exultatio. Amici nostri, immo veritatis & honestatis, sunt isti, R. Archidiac. & magister H. qui pro

5.

A iij

Præpositura Sueffionensis Ecclesiæ D. Guillelmo concedenda, pietatē & prouidentia vestra adeūt. Guillelmus verò iste quā de magno genere, immo quā de bono sit, vel cuius filius fuerit, exprimerē, nisi virtutes & probitatem patris eius in omni genere virtutum adhuc in curia Romana spirare sperassem. Certè quod optabilius est, nec ramusculus ipse à radicis pinguedine paternā degenerat. Talem itaque inscitare in Ecclesia Dei cū omnino expediat, quia multi insurgunt aduersus eam dicentes, Non est salus ipsi in Deo eius; non respuat dextera Dei & B. Petri, & vestra: quia faciet fructum iuxta genus suum, quod omni obsequio & obedientia semper obtemperauerit præceptis curiæ Romanæ & summorum Pontificum. Habet autem & duo brachia præclara & fortissima, quibus poterit releuare incuruantem, & rebellare refrænantem, quibusque vmbraculum Dei protegat à turbine & à pluuiā. Comes Henricus, & Comes siue dapifer regis Theobaldus, hi fratres eius sunt, & erunt ei in omni auxilio & consilio. Valete.

Magister H. vir apud nos probatæ honestatis magistrum I. clericum nostrum & amicum nostrum docuit, & multa bona ei fecit. Hunc vobis attentissimè commendamus.

EPIST. VI,

*Domino & patri Dei gratia summo Pontifici Eugenio
humilis conuentus sancti Meuenni humilem
cum omni subiectione salutem.*

AD finum vestræ pietatis qui debita humilitate recurrit, non solum maternæ lenitatis blādimēta, sed & paternæ sollicitudinis solet inuenire indubia tutamina. In manu namque vestra est post Deum pax omnium simul Ecclesiarum & nostra. Vestram itaque, pater piissime, rogamus adesse beniuolētiā pauperculæ Ecclesiæ nostræ: & ne longiori tempestate conuellatur, diuinitus indulta auctoritate ventis & mari silentium placeat vobis maturius imperare. Vt itaque vehementius & celerius vestra erga nos moueatur clementia, nostra breuiter noua & antiqua intinamus pericula. Religionis disciplina & feruor monachici ordinis, tam nostra quàm abbatibus negligentia, olim in Ecclesia nostra in vnum intepuerat. Zelo itaque zelatus pro domo dei Israël sanctissimę memoriæ Lucius prædecessor vester mādauit humilitati nostræ, & venerabili Episcopo nostro Ioanni, studiosius ordinem reformare, disciplinam renouare, & insolitam tumultuationem refecare. Eius itaque nos tam præcepto quàm grāta exhortatione ad obediendum inclinati, vt verum fateamur, ad radicem arboris securim extendimus; & abbatem negligentem excidi volumus, vt vigilantio rem recipere mus.

A iiij

Sic domine & venerande pater fuerat, nisi totius malignitatis repertor Satanas rursus aduersaretur, & nisi domini Archiepiscopi Turonensis facies & sententia iusta circa hoc negotium peruersè mutaretur. Namq. electionem nostram prius laudauit, & vestra auctoritate confirmauit. quorundam verò malignantium postea ductus, ne dicamus seductus, machinationibus, nulla rationabili existente causa, aggrauauit erga nos & pastorem nostrum consilium suum, volens & consulens illi gregem dimittere sibi commissum. Grauumen itaque iniuste sibi imminens abbas dum attendit, vestram rectè audientiam appellauit. Post hanc autem appellationem, quidam de familia Archiepiscopi & de mensa eius, insecti & persecuti sunt abbatem nostrum, ita vt vnum de monachis, vnum de clericis suis cum equis & quibusdam caperent, & turpiter tractarent. Eapropter vestram efflagitamus, pater & pastor vniuersalis Ecclesiæ, gratiam, vt oculo pietatis nostram, attēdatis miseriam, & causam nostram sinatis, immo precipiatis tractari non in Archiepiscopi curia, sed in qua ex æquo nostra audiatur & eius iustitia, seu iniustitia. Excuset autem Abbatem nostrum, quòd nequaquam vobis se præsentaauerit, tam illata iniuria, quàm corporis grauis infirmitas.

EPIST. VII.

*Domino & patri carissimo Rolando Cancellario
sanctæ Romanæ Ecclesiæ Frater Petrus in-
dignus abbas Trecensis monasterij, id
modicum quod est &
quod potest.*

N Vllis meritorum suffragijs subnixus, sed 7.
sola bonitate vestra confisus, nostris ve-
stram adesse dignationem petitionibus depo-
sco. Artius siquidem verbum promissionis ve-
stræ per nuncios nostros acceptum in corde
reponens, tanquam mihi obligatam ipsorum
iure personam vestram teneo. Vt itaque in
causa de Ecclesia de Villa Mauri contra in-
iustitiam Canonorum pro nobis valenter
assistatis, non remordeat vos conscientia ve-
stra, quia iusta est causa nostra. Valete. Parisiën-
sis Episcopus exponet vobis tenorem facti.

EPIST. VIII.

*Venerabili domino & patri carissimo Hugoni
Senonensi Archiepiscopo, Frater Petrus Cel-
lensis humilis abbas seipsum
cum deuotione.*

V In ea Christi deuastatores vuas, siue eius 8.
ouilis oues lupi rapaces toto die deuo-
rant, pede conculcant, manu dilaniant, & ve-
stra, benignissime pater, vigilantia obuiare

diffimulat? Quare non attenditis quid pro officio, quid pro sponſione, quid pro dilectione, ſummi paſtoris ouibus magnus paſtor debetis? Certè deſenſionem, certè inſtructionem, certè ſollicitudinem. Sed qualem, vel quantam? Sine dubio quantam Chriſtus, qualem Petrus. Chriſtus enim diligit uſque ad mortem: paſcit Petrus ſecundū triplicem paſtionē. Verbis namque, exemplis, & miraculis paut animas fideles Petrus. Non omnino cuilibet paſtori impoſſibile eſt, pabulum diuini verbi ouibus ſuæ curæ apponere, exempla bona demonſtrare: ſed graue valde eſt, miracula antiquorum reſuſcitare. Quòd ſi ſupra homines huius temporis ſit patrare miraculum, ſufficit nobis fidele propugnaculum. Vobis ſiquidem in Petro dictum eſt, *Paſce agnos meos*, ſana ſcilicet doctrina. Vobis ruruſum dictum eſt, *Confirma fratres tuos*, bono utique exemplo. Nihilominus clauſes regni cœlorum tenetis, ut hœdōs excludatis, & agnos admittatis. Interim in agro mundi, dum agnus & hœdus ſimul habitant, hœdus iniuſtior extollitur, agnus innocentior opprimitur. dum enim ſuperbit impius, incenditur pauper. Quam obrem Sara, id eſt patientia Eccleſiæ, aduerſus Abraham, id eſt paſtores ſuos, conqueritur, quòd Iſmael ſecūdum carnē ludat cum Iſaac promiſſionis filio. Cuius querimonix diuinum iungitur mādatum, *Ejce*, inquit, *ancillam & filium eius*. Vtinam amantiſſime pater, Iſmael noſtrū iuxta domini Papæ præceptum eieciſſetis! fiat tamen non mea, ſed veſtra voluntas. Sacrarium nempe

Ioan.

xxi. 15.

Luc.

xxii. 32.

Gen.

xxi. 10.

secretorum vestrorum impudens perscrutator nō attingam, sed humilis supplicator. Fortassis longa temporis dispēdia resarciēt plena & perfectā iustitia. Si ad diem illam datā probationes vel testes ducere mecum debeam, si placet, remandate. Valete.

EPIST. IX.

*Venerabili domino & patri Hugoni Senonensi
Archiepiscopo, Frater Petrus humilis abbas
Cellensis seipsum cum deuotione.*

SI patienter dominus meus seruo suo, vbi
Spœna debetur, plagas amicales admoueret,
& vbi iustitia debetur, præmium rependeret,
tam facile confiterer culpam, quàm securè
spërare veniam. Prius tamen quàm pela-
gus formidabilis censuræ ingrediar, an accu-
sem, an deplem sortem, qua huc delatus
serenitatem vestram, siue meritò, siue imme-
ritò, obnubilatam in me audio, satis anxie de-
libero. Quomodo enim non accusare vel po-
tius execrari casum illum debeo, per quem
tantum casum sentio? Pereat omnis casus, à
quo amicitia infertur occasus. Sit solitarius,
nec laude dignus, qui venas interrumpens di-
lectionis inimicitiarum conglomerat virus.
Rursus deploranda fortè potius est fors illa, quæ
cogit vtrumque in præcipitium: vt scilicet
vel pruinam fugiens incurrat, vel arcū creum,
iuxta illud Amos, *Dies, inquit, Domini tenebrae & Amos.*
non lux. quomodo si fugiat vir à facie leonis, & occurrat v. 19.
ei versus, & ingreditur domum, & innitatur manu
sua super parietem, & mordeat eum coluber. Ecce

9.

amici & domini offendo maiestatem, si stetero pro Petro de Tornella. Ecce iterum frater dissipantis opera sua appellor, si quod bona fide, titulo iusto, & more Ecclesiastico à me factum est dissimulaui. Hinc ciuile ius, inde ius naturale de me conqueritur. Sed quid? Ciuilia nunquam naturalia corrumpunt. Dicitur ergo mihi, immo non mihi, sed de me dicitur: Hæccine est Cellensis religio? hæccine est veritas? hæccine est fama? Ecce quomodo adulterium, immo incestum fouet: ecce quomodo carnem suam diligit, canones & Euangelium contemnit: ecce quomodo iniquitati patrocinator. Non à vobis, sed à vestris, carissime pater, ista aduersum nos dicuntur. Vicem quidem mentiendo, & certè vera dicendo, reddere possem: sed infrænat linguam meam sanctissimæ reuerentiæ vestræ auctoritas, & conscientia meæ professionisque non rumpenda integritas. Victoriosissimo enim triumpho tripudiat aduersarius, si de castris patientiæ & humilitatis ad cuneum me prouocat impatientiæ & falsitatis. Tunc certè solummodo me superatum æstimo, cum irritatione quacumque terminos religionis transgredior. Audiant igitur, audiant obrectatores mei. Carnem quidem meam diligo, sed post spiritum carnem diligo, sed secundum Apostolum: carnem diligo, sed non supra modum. *Carnem tuam*, ait scriptura, *ne despexeris*. Beatus quoque Gregor. dicit: Sunt quidam qui diligunt, sed per affectum cognationis & carnis, quibus sacra eloquia non contradicunt. Et Apostolus,

Esa.
LVIII.
7.

Nemo vnquam carnem suam odio habuit. Nos, in-
 quunt æmuli mei, diligendam carnem con-
 cedimus: sed nō cōtra iustitiā. aduersatur au-
 tem prorsus iustitiæ adulterium siue incestus.
 Nihil verius. Sed ego incestum ignoro, ma-
 trimonium legitimè factum agnosco. Con-
 uocaui namque seniores, quos coniunctim &
 separatim, publicè & priuatim diligentissimè
 examinaui, nec impedimentum coniugij ad-
 uertere ex verbis eorum potui. Testes quo-
 que qui nunc proferuntur, alter est minus
 idoneus propter apparens odium, alter pro-
 pter causam reticendam vsque ad suum lo-
 cum. Non itaque Euāgelii seu canonum con-
 temptor iniquitatem patrocinandam susce-
 pi, qui de lege Domini iota vnum aut vnum
 apicem pro temporis oportunitate volens
 non præteriui.

Ephes.
 v. 29.

EPIST. X.

*Domino & patri carissimo Thomæ venerabilī
 Cantuariensi Archiepiscopo, Frater Petrus
 abbas sancti Remigij ex toto corde
 deuotissimam salutem.*

Sollicito reuoluens animo quam potius
 materiam assūmā cū vobis scribere vo-
 lo, vix occurrit, non deficiendo quid dicatur,
 sed reuerentia eius comprimente manum cui
 dicatur. Nihil enim dignum vestri animi for-
 titudine dicere possum, nihil addere constan-
 tissimæ tolerantia vestra, nihil denique do-

10.

cere omnia à longè prospicientē, atque fines rerū & caularū futurarum plenissimè dimetiētem. atque palearum aceruum vt quid anteponerem præsepio, cui adhæret bos adipe & pinguedine opulentissima satiatuſ & ſagina- tuſ: Equidē hoc mihi ad miniſterium aliquod impendendum in obſequio veſtro non indi- gnè reſeruatum reperio, ſi muſcas abigere poſ- ſem veſtram ſanctitatem oblatratione inui- dioſa pungere volentes, vel ſaltem interpreta- tione peruerſa denigrare ſinceritatē fidei ve- ſtræ inſiſtentes. Planè muſcæ iſtæ morientes, quæ in Ægypto abundant, & Pharaonem re- gem Ægypti, tanquam virum muſcarum cir- cundant, Deo opitulante, non perdent ſuavi- tatem vnguenti. Seruabitur namque in diem ſepulturæ Ieſu, & prædicabitur in generatio- ne & generationem, quòd Archiepiſcopus Cantuarienſis murum ſe opponens pro domo Iſraël, veſtigia ſanctorum antiquorum imita- tur, dum Chriſtum in cruce nudum penden- tem nudus ſequitur. Quomodo ergo cū Abra- ham potero abigere eaſdem muſcas contami- nare volentes illibatum domini ſacrificium, niſi ſancto ventilabro de authenticis ſcriptu- ris, quo vel feriantur, vel ſaltem effugentur? Dicunt enim, Non debet Archiepiſcopus tam inſtanter ſua repetere à rege Angliæ, vt dimit- tat reconciliationis pacem pro amiſſa pecu- nia. Fallūtur ſpē veri, vel adulatione falſi. Qui ſpē veri decipiuntur, inſtruendi ſunt: qui ad- ulatione falſi, repellendi. Simplicitas enim re- uocāda eſt, malitia prorſus abiiciēda. Ceterum

penſandum eſt in omni tam contractu quàm actu, quid propter quid faciendum vel dimittendum ſit. Penſanda etiàm ſunt tempora, & diuerſi ſtatus temporũ, ſecundũ quos mutatur merita cauſarum. Nam in primitiua Eccleſia ſola patiẽtia locum habuit, vt auferenti tunicã dimitteret & palliũ. Alius enim erat, & alibi, id eſt extra Eccleſiam, qui perſequebatur, alius & alibi, id eſt, intra Eccleſiam qui patiebatur: Modò verò iam adulta Eccleſia, non licet filijs Eccleſiæ quod aliquando licuit inimicis. Decet enim matrem corrigere filium, ſicut decuit pupillam tolerare aduerſariũ. Diſtinctus namque ſapphiris legitur venter ſponſi. & quemadmodum ante paſſionem ſuam Ieſus dixerat, *Qui non rennũciauerit omnibus quæ poſſidet, non poteſt meus eſſe diſcipulus*, & ſimilia: in paſſione dicit Apoſtoliſ, *Qui non habet gladium, vendat tunicam, & emat*. Verba quidem bona, verba conſolatoria non immeritò exigeret cauſa iuſta in oculis Dei, in oculis autem inſipientium dubia & infirma: niſi virtus patientiæ omnem transcenderet conſolationem, & plus gauderet de conſolatione, quàm malleus feriens proficeret de percuſſione. Ferrum ferro acuitur, & de malitia regis Angliæ virtus veſtra inuincibilis clariùs illuſtratur. Quo fortiùs premit torcular oliuam, eo profuſiùs oleum producit. Candelabrũ ductile de auro puriſſimo nõ facit Beſeleel in tabernaculo Domini, niſi productis laminis contritione limæ & mallei. Nondũ contritus eſt

Luc.

xiv. 33.

Luc.

xxii.

16.

16 PETRI ABB. CELLENSIS
 malleus vniuersæ terræ : adhuc necessarius vt
 suppleat quæ defunt passioni Christi in cor-
 pore vestro. Sed quem moneo ? quem ex-
 hortor ? cui calcaria adhibeo ? Sine dubio qui
 fræno indiget , qui paratus est plus ambulare
 quàm via extendatur , qui etiam metas velo-
 citer transcurrere nullis retardatur periculis.
 Procul enim odoratur bellum. exilium re-
 putat patriam , quia omne solum forti patria
 est. Sine labore laborat , sine fame esurit , sine
 dolore patitur , sine amaritudine felle & ab-
 sinthio cibatur. Vir est in milibus vnus. cùm
 gigantes gement sub aquis , ipse ridet , & irri-
 det fortunam cum inuersione rotæ suæ.
 Vale.

EPIST. XI.

*Carissimo domino & patri Hugoni Senonensi
 Archiepiscopo, Frater Petrus humilis abbas
 Cellensis spiritum gratia & precum.*

- II. **S**I patientiam monemur pro contumeliis
 Srependere, quid pro gratia nisi gratiã tum
 lege naturæ , tum præcepto ipsius gratiæ de-
 bemus reddere ? Et si inimicos iubemur ama-
 re , amicis quid habemus facere ? credo tan-
 quam ipsam animam nostram suscipere. Cer-
 ta verò perfecti amoris hæc est testificatio , si
 amicorum vtilitati omnis postponatur occa-
 sio. Sic, sic magister M. non obliuiosus factus
 beneficiorum vestrorum , ne vobis materia
 scandali fieret , & iram regis vestra sublimi-
 tas

necessarius ut
 risti in cor-
 ? quem ex-
 e dubio qui
 ambulare
 metas velo-
 periculis.
 cilium re-
 orti patria
 ruit, sine
 lle & ab-
 us. cum
 , & irri-
 a suæ.

tas persentiret, tulit in se periculum inimici-
 tiarum, & ab honore interim, donec iniquitas
 transiret aduersarij, gratia vestri cessauit. Fo-
 ueat itaque pietas, quem sic inuenit non in-
 gratum alumnum experientia vestra, & con-
 temperet malitiam molestiarum, quia spem
 habet in protectione alarum vestrarum. Te-
 neriùs namque, immo secretiùs dicitur dili-
 gi, cui nihil carius fuit pace benefactoris sui. Fa-
 cite ipsi pacē, qui nec paci suæ pepercit pro-
 pter vestram pacem.

EPIST. XII.

*Domino & patri carissimo Thoma Cantuariensi
 Archiepiscopo & Apostolica sedis legato,
 Frater Petrus Cellensis qualiscum-
 que minister, seipsum.*

mensi
 as

eliis
 tum
 de-
 na-
 un-
 er-
 si

a-
 s
 a

FActi sumus sicut consolati in consolatio-
 ne sanctitatis vestræ tam affectuosa, tam
 pia, tã plena dulcedine & caritate. Reddat vo-
 bis Spiritus paracletus consolationem suam,
 quia respicere voluistis misericorditer defo-
 lationem nostram. Suscitauit siquidem corda
 nostra & si non emortua, iam tamen elãguida,
 susceptio litterarum vestrarum. Dominis &
 amicis nostris hanc vestram dignationem &
 consolationem ostendimus, & in spe viua ex
 consilio eorum fratrem nostrum peregrinari ad
 vos destinauimus. Excipite illum: & quia vix
 in terra sua habet, vbi caput reclinet, interim
 sub vmbraculo vestro militet, & stipendia ad

12:

B

nos condigna reportet. Confidimus equidem in bonitate Dei, & in liberalitate animi vestri, quam iam prægustauimus, quia quamuis in baculo suo transeat mare vestrum, tamen sit rediturus in turmis multarū benedictionum. Discretionē sanctitatis vestræ fratres nostros & nuncios disponendos committimus. Dominum quoque & confratrem in omni oratione & beneficio omnium vestrorum vos annumeramus. Valete.

EPIST. XIII.

*Domino suo & patri carissimo Philippo Colonienſi
Archiepiscopo Frater Petrus humilis abbas
ſancti Remigij salutem cum
omni deuotione.*

13.

FRequenter cum beato Remigio patrono nostro vestræ sublimitati humiles porreximus preces, si quo modo animum sine culpa nostra, vt credimus, hætenus implacatum nobis ad misericordiam faciendam flectere possemus. Denique iterum atque iterū quanta humilitatis supplicatione potest tota congregatio nostra appellat, si qua sunt in vobis viscera misericordiæ, ne adhuc extenta in flagello nostro perseveret manus vestra. De clementia namque Dei indultum est, vt potestatem habetis & bene facere & malè nobis si vultis. Nō ite obliuisci, quia limites, quos dominus conuincationi vestræ posuit, certi & finiti sunt in prædestinatione Dei. Vt imini ergo potestate vobis concessa semper ad bonum,

nunquā ad malum. nam indubitanter vtriufque sequitur retributio æterna. Pro Iesu itaque amore, & per Christum Iesum contestamur vos, quatinus misereamini pauperū cōpeditorum, quibus nec ingredi, nec egredi licet, nisi sub manu & cum licētia pastoris. Boues sunt triturantes, nocte & die pro peccatis suis & totius mundi Dominum deprecantes. Ne obturetis ora eorum, subtrahendo alimoniam à prædecessoribus fideliter pro remissione peccatorum suorum eis concessa. Certè nō erit famæ, & gloriæ vestræ augmentum, nec cumulus diuitiarum, nisi tantūmodo peccatorum. Respondemus itaque pro præbendis de Marna, de quibus mandastis, vt de manu nostra eximendo quibuslibet personis eas daremus, quòd nullatenus in sæculum sæculi, id facturi sumus. Prouoluti etiam genibus vestris, ne id vltius à nobis exigatis, exoramus. Valete.

EPIST. XIV.

*Venerabili Domino & patricarissimo Henrico Remensium Archiepiscopo Frater Petrus humilis
abbas sancti Remigij seipsum
deuotissime,*

CUm semper præsentia vestra nobis & toti prouinciæ Remensi necessaria sit, quia nunc solito increuerūt & intumescunt tribulationes, quæ circumdederunt nos, omnino postulantes rogamus ne moram faciatis redire ad nos. In absentia enim vestra continua sibi assumunt inimici vestri & nostri,

14.

B ij

adeo vt non sit pax ingredienti vel egredienti. Indifferenter ingrediuntur rapere, vastare, & deuorare omnia, in quibus manus iniicere possunt. Monacho, clerico, laico, pauperi, viduæ, nullique conditionis miseræ parcunt. Placeat igitur, pater amantissime, sollicitudini vestræ inclinare animam necessitatibus & angustijs terræ vestræ, quæ clamat ad vos & post vos.

EPIST. XV.

*Domino suo carissimo & præcordiali Ioanni Episcopo sancti Maclouy & Mag. presbytero,
id quod est & potest.*

15. **C**ARITAS patiens, quod mirum dictu est, pene ad impatientiam me impellit. Vidi nuncium vestrum litteris vacuum. Quid hoc est? Est ne tanta penes vos chartarum caritas, an sic vestra abbreviata est caritas? Quæ tam importuni silentii causa? quæ ratio tam mutæ & silentis dilectionis? Est-ne inquam in Britannia consecutium, vt vbi sterilitas panis, sequatur & defectio cordis? Et panis quidem inopiam audiebam, sed famem ex hoc virtutum succedere non credideram. Certè farina & lecythus olei apud Sareptenam, ex quo Helias noster Dominus Maclouiensis de his gustauit, non defecit. Certè non defluit amor noster, sed influit, atque effluit. Et Episcopum quidē excusat instantia laborum, sollicitudo Ecclesiarum, compassio afflictorum, reconciliatio dissi-

dentium. Clericum quid vetat scribere, quid impedit amicales litteras componere? Desidia? sed hanc studium excludit. Insuperantia? sed est ei litterarum peritia multa. Ignorantia nuncii venientis? sed mihi nudam salutationem detulit. Festinatio properantis? sed plura sigilla pluribus attulit. Restat igitur condemnanda in amicis negligentia. Quia igitur oleum non misistis, aculeum sumitis: & ideo pungi meruistis, quia vngerem noluistis. Valete. Si valetis, bene est nobis.

EPIST. XVI.

Domino & patri carissimo, Ioanni Episcopo sancti Martini Frater Petrus Cellenses indignus abbas cum Apostolo in labore & ærumna.

ETiam in amaritudinibus nostris congratulatur anima mea: quantomagis in consideratione gloriosæ remunerationis? Reminiscor siquidem, quia iusti in paucis vexati, in multis bene disponentur, & quia reddet Deus mercedem laborum sanctorum suorum: atque ideo non vana est expectatio, ubi tam certa, tam grata, tam larga speratur remuneratio. Certa, propter veritatem promittentis: grata, propter consummationem desideriorum recipientis: larga, propter exuberantiam bonorum cœlestium in communicatione diuinitatis. Hæc reposita est in sinu nostro, hæc inter vbera commoratur, hac quælibet insipida

B iij

Deut.
xxxii.
34.

condiuntur, & gustui nostro commodissimè aptantur. O animæ meæ dulcedo, quid putatis Dominum non attendere miseras compeditorum suorum? non librare in statera æternorum iudiciorum pœnas filiorum? *Nonne*, inquit, *hæc condita sunt apud me, & signata in thesauris meis?* Miror vos scripsisse destitutum patrocínio sanctissimi patris nostri Bernardi, cum sancta eius anima nexibus expedita mortalitatis non caritatis, corruptionis non afflictionis, necessitatis non voluntatis, liberius aures nunc appellet pijssimi conditoris pro necessitatibus populi sui. Non mihi contingat de gratia ipsius diffidere, de orationibus eius desperare. Nimio vobiscum loquendi tentus desiderio vix finem facio. quem enim sine fine diligo, nunquam satis ei scribere, nunquam satis loqui valeo. Conuentus noster vester est populus, noster populus vester est, anima mea vestra est Vtinam viderem vos antequam transiretis ad montes illos, ubi tot sunt, sicut audiui, pericula. Valete.

EPIST. XVII.

*Domino & patri carissimo Ioāni Episcopo S. Maclouij,
Frater Petrus Cellensis humilis abbas salutem.*

17.

NVllius ponderis esse in vera dilectione pomposa & vacua verba, nouit qui caritatis medullam vel semel degustauit. Vanum certè & abiiciendæ simulationis reputo, replicare quotidie elemēta amoris, ex quo fideliter

& firmiter inhæserit radicibus cordis. Metuentis quoque aut diffidētis est, semel natos amores sermonibus velle renouare, quasi vetustas temporis soleat veros affectus antiquare. Nō est imaginis Dei ab inceptis deficere. Non est virtutis vacillare, non est solij gloriæ Dei in diuersum se.vertere. An non anima ad imaginem Dei, an non caritas virtus Dei? an non pura conscientia thronus Dei & sedes diuinæ maiestatis? Vt ergo filius, qui est imago patris, quæ creauit semel, semper gubernat & regit: vtque virtus Altissimi quæ operatur cōfirmat & perficit, ac denique incommutabiliter manet incommutabilis Dei sessio æternitatis: sic radicata caritas & fundata de corde puro & conscientia bona & fide non ficta ignorat occasum, corruptionem abominatur, mortē in æternum nō gustat. Hæc interno coagulo suo coniunxit nostros adinuicem affectus. hæc inter nos mediatrix, vnico amore dulciter, fortiter, & sapiēter animas nostras cōglutinauit. Hæc in me vestrum tenaciter amorem effudit, & ad vos non dissimiliter me ipsum totum diffundendo contulit. Ad vnicum itaque & specialem amicum singulari spe & vnica rogo accedat vestra sanctitas. Non diffidat suum esse, cuius veraciter affirmat se esse. Nisi autem iusta occasione inuenta ad nos veneritis, satis de integritate amoris nostri diminuetis. Valete.

B iiij

EPIST. XVIII.

*Domino & patri suo carissimo Ioanni Episcopo S.
Maclouij, Frater Petrus humilis abbas Cellensis
quicquid est & potest.*

10.

Miramur plurimum tanto nos tempore
in salutatos à vestra paternitate quasi
neglectos fuisse. Non credimus ex negligencia, sed fortè ex ineuitabili occupationum
vestrarum pondere sic oppressum siluisse. Clamamus tandem post vos. Volumus enim suscitare compassionem in vobis passionibus nostris. Neque enim superbè est ab amicis celandum fortè subrepens infortunium, nec contumaciter aut inuerecundè petendum necessarium suffragium. Præcauendum vtrūque, sed maximè alterum. Vitium vtrumque, sed alterum patienti grauius, alterum roganti ignobilius. Malum namque absconditum vrget acrius, indecenter prolatum nocet apertius. Exoritur aliud à nobilitate naturæ, aliud à necessitatis propagine. Semper enim natura suis est contēta limitibus: necessitas verò nullis reprimitur legibus. De ventre igitur necessitatis primogenita importunitas exorta, cum sit molestissima, quia manus eius contra omnes, & manus omnium contra eam, amicorum nunquam fores cum tædio pulsare, nunquam aures debet aggrauare. Quamobrem propensata deliberatione apud meipsum decerno potius quantiscumq; malorum confodi iaculis, quàm quieta carorum silentia.

interrumpere congestis clamoribus & lacrymis. Suggestere tamen eis, quorum fides certa, amicitia indubitata est, non recuso tam dolores nostros quàm necessitates, vt & satisfaciam proprię conscientię propter compendiosam insinuationē, & non lædam amicum propter contemperatam inordinationem. Vtrumque siquidem suggerens operatur, & necessitatem nō tacet, & amicitiaē leges retinet. Nam amicum vel non habet vel habere se non credit, qui fortunam suam quamcumque dubitat aperire, aut instat tanquam ab inuito aliquid extorquere. Amicus nempe tam omnium consiliorum dicitur esse conscius, quàm coadiutor in omnibus voluntarius. Nolo igitur aures vestras implere vastissimis querimoniis: quia stultum est verbis velle explicare, vbi videtur res fidem dictorum excedere. Hæc idcirco diximus, quia nobilis beati Aigulfi Ecclesia cum omnibus appendiciis suis prorsus ita combusta est, vt nihil præter libros & sanctorum reliquias ab incendio seruaretur. Præterea & domos quamplures in cineres redegit, vt sic appareat in oculis nostris tanquam gallina depilata, nec pennas habens quibus pullos suos protegat, nec cibos quibus alat. Non aliquid aliud exigimus à vobis, nisi compassionem, orationem, & consilium. Necesse est autem, qui non habet vbi caput reclinet, Aigulfum peregrinari apud amicos & vicinos, & rogare quod solebat rogatus & etiam non rogatus præbere. Si venerit ad partes vestras, suscipite

26 PETRI ABB. CELLENSIS
illum, tanquam illum. Nostis enim quis sit,
& quo honore dignus sit. Ad episcopum Carno-
tensem super hoc scribite, & ad alios qui-
bus visum fuerit. Valete.

EPIST. XIX.

*Domino & patri suo carissimo Ioanni Dei gratia Epif-
copo sancti Maclouij frater Petrus humilis abbas
Cellensis quicquid est & potest.*

19. **V**Alet Dominus meus? viuit ne? Vt cre-
do, aut est alteratus Episcopus sancti
Maclouij, aut alter à meo est substitutus. Si
alter est, mirari, sed non dolere desino, tacuisse
qui loqui non poterat. Nam surrexit nouus
rex, qui non nouerat Ioseph. Si alteratus,
nollem tantam fuisse alterationem, quæ pene
accedit vsque ad alienationem. Alienum ab
amico equidem est, posse dissimulare æquè &
simulare. Non simulat amicus propter verita-
tem, non dissimulat, sed propter respirantem
ardorem. Non simulat, quia sine adulatione:
non dissimulat, quia efficacissimæ naturæ exi-
stens: sepulcrum reputat latibulum, & non
apparere existimat nō esse. Non simulat, quia
nescit: non dissimulat, quia non potest. Hoc
ignorat, illud non potest. Quid enim non no-
uit sapientia? quid non potest caritas? Quod-
cūque est, scire nouit sapientia: quodcūque
est posse, potest caritas. Non est scire, scire
adulari: non posse, posse obliuisci. O amice &
domine carissime! Obluioni an negligentiae

vestræ obliuisciam quòd abstinuistis tam à visi-
 tatione, quàm à salutatione amicorum ve-
 strorum vltra tempus & modum? Est ne
 obliuio? Si est, digna est morte, digna exilio,
 quæ diadema tulit de capite Episcopi, quæ de
 pectore rationale sustulit. Obliuio delet &
 quod præcipuum est in honore, & quod for-
 tissimum est in robore, id est, sapientiã & me-
 moriam. Rea ergo crimine tantæ maiestatis
 capite plectatur, & non memoretur vltra. Ne-
 gligētia quid? Non sit dissimilis in pœna, quæ
 præcessit in culpa. Talis etenim soboles tali
 de matre nascitur, ex negligentia scilicet obli-
 uio. Doleo, pater, excessum memoriæ vestræ
 iam per biennium suspensæ, decessum quoque
 amicitiae quatríduanæ multo tēpore quasi se-
 pultæ. Nuncium saltem suæ salutis, si viuit,
 mittere debuit amicitia, cuius naturæ est
 semper odisse absentiam & appetere amico-
 rum præsentiam. Fortè occupata est; sed non
 est grata quæ semper est occupata. Mansio
 est, immo possessio, non occupatio, quæ iugi-
 ter retinet. Quis ergo ita præoccupauit, quin-
 immo possedit amicitiam, ne libertate, ne
 ingenuitate sua vtens radios suos ad nos vs-
 que expanderet ab annis prioribus? Sūnt-
 ne montes interiacentes? Est ne mare inter-
 iacens? Est ne chaos magnum firmatum inter
 nos & vos, vt hi qui volunt hinc transire
 non possint, neque inde huc transire? Sed
 caritas omnem altitudinem exuperat,
 sed aquæ multæ non possunt extinguere ca-
 ritatem: sed non est qui se abscondat à

calore eius, sed attingit vsque ad finem fortiter, & disponit omnia suauiter. In Episcopo nostro, immo sancto & Dei famulo quis te, ô dilectio, debilitauit? quis obumbravit? quis hebetauit? quis commutauit? In aliis quidem non ignoro superueniente iniquitate virtutem tuam debilitari, obliuione lucem tuam obumbrari, negligentia acumen tuum hebetari, totam substantiam posse odio commutari. Sed in sancto quæ iniquitas? in studioso quæ obliuio? in viro forti quæ negligentia? in pleno caritate quod odium? Si quâdo enim tepescit, si quando flaccescit, si quando hebescit in sancto caritas, ea quæ extrinsecus sunt accusanda, non quæ intrinsecus. Obstacles enim opposita mentiuntur veritatem superpositæ lucis, caloris & aciei. Oppone gladio ancipiti durissimum ferrum vel lapidem, retrocedit vis impenetrabilis. Murum spissum oppone igni, tardius calefacit. Candelæ accensæ suppone modium, in luce non gaudebit. Non est proinde putandum non lucere candelam, non ardere ignem, non secare gladium, sed contrariis obstaculis imputandum. Sic sanctorum virtutes à radice sua non euanescent, sed plerunque propter sabbatum Iudæorum conticescent. Aromata enim sua interim & in secreto distillant & repensant, vt cùm dies oportunitatis illuxerit diluculo in effectû desiderati operis prorumpant. Equè tamen repensatur & desiderium ardens in otij quiete, & opus feruens in actione. Acceptat namque Deus opus propter af-

fectum, non affectum propter opus. Magnus, immo longus nobis est iste dies sabbati, cuius ferias non feriales vel solennes, sed ferales & olentes reputamus. Negligentia siquidem male olet, diligentia semper bene redolet. Iners Iudaizantium pigritia nō diligit sabbatum quia sanctum, sed quia otiosum. *Iesus* Ioan. vero stabat in die magno festiuitatis & clamabat, Si VII. 37. quis sitit, veniat ad me & bibat. Verè magnus est dies festiuitatis. Magnum habet clamorem caritatis. Iam non taceat caritas vestra, iam iam loquatur, immo veniat, & immo accurrat. Desiderat vos anima mea: desiderant vos amici vestri. Ostendite faciem vestram, sonet vox in auribus. Episcopos diuites multos habemus, pauperem Episcopum quærimus, qui non habeat vbi caput reclinet. Adhuc penes nos reclinatorium non aureum, sed luteum, in quo aliquādo quieuiſtis habemus. Et de his hæcenus.

EPIST. XX.

*Domino suo & patri carissimo Ioanni Episcopo sancti
Maclouij, frater Petrus Cellensis qualiscumque
minister salutem quæ est in
Christo Iesu.*

SPes quæ differtur affligit animam. Verus 20. Samor in patientia sui desiderij quandoque non irascitur commendabiliter superari. Nihil enim pene aliud est in vita hominum, quod quadam arte mitigari non possit. Spes

itaque aduentus vestri nuntiati quanto vberius amicum lætificauit, tãto amplius ex mora dilationis hæctenus affligit. Æstuat siquidem animus in reuolutione fortuitorum casuum, nunc hoc, nunc illud reformidãs contrarium subito accidisse. Quid plura? Cogitatio præterit, & cogitatio aduenit: morarum verò dubitatio nec ad punctum animo recedit. Alia inquit, iam iam venit; alia, fortè non valet. Ista incommoda temporis replicat, illa intolerabile negotiorum pondus anxia suspirat. Ecce quanta caligo, quanta suspicionum tumultuatio. Vbi veritas? cuiusnam supradictarum cogitationum verior sententia? An forsan error est, vbi latet quod verum est, & non sententia? Sed adhuc sub iudice lis est. Ex multis enim ambiguitatibus, aut vix, aut nunquam certum aliquid sine doctoris demonstratione elicitur. Renunciate ergo amicis diuinæ circa vos miserationis operam; vt omnimodè soluto dubitationis vinculo, indubitãter aut viam sinistram compassionis, aut dexteram apprehendamus congratulationis. Satis enim iniuriosè deturpatur nobilis animus, si se non præparat mutuis obuiare beneficiis saltem æquis passibus. Turpe etiam æstimo, non omnimodo cauere superari beneficio. Vnicum quid & singulare natura, siue creator naturæ, tanquam speciale priuilegium imagini suæ hoc impressit, quatinus commodius & præstantius haberet stricta æquitatis ratione dare quàm accipere. Hanc vobis formam nec rubigo exi-

lij, nec paupertatis tinea excussit. Ex hac prodiit, quòd magna pro paruis, pro vilibus cariora magnificè rependistis: quinimmo solenne donum absque præcedentis comparatione obsequij misistis. Species quidem doni carius æstimanda: sed affectio donatoris potius incomparabiliter est compensanda. Quicquid namque aliud datur, in comparatione sublimis animi vilipenditur. Valete.

EPIST. XXI.

Domino & patri suo carissimo Theobaldo Parisensi Episcopo frater Petrus Cellensis humillimus salutem.

Q Vi transuadari non potest fluuius occursantium causarum, tam ab executione mandati vestri me inhibet, quàm ab impletione desiderij nostri. Sermones enim de aduentu Redemptoris vt componerem vobis, in mandato acceperam: sed malitiæ sollicitudinis suæ etiam raritatem lucis dies præsens adiunxit. Breues enim sunt dies isti ad lucendum, grandes & graues ad occupandum: ita vt non sufficiat diei malitia sua. Nouit prudentia vestra, non concurrere quietem cōtemplationis & distensionem mentis per occupationes sæculi. Coangustatum est pallium, vtrumque operire, immo vtrumque operari non valet. Quamuis enim in fronte duos quis habeat oculos, tamen ab vno eos officio diiūgere non valet,

21.

vt altero cœlum, altero contueatur terram: quantominus vnâ rationis & ingenij aciem simul ad tam diuersa porrigere poterit, vt eadem mente cœlestium myſterialiter & terrenorum cauſas diſcutiat? Sic domine, ſic pater cariffime, ſaltem niſi clauſero, ne dicam ſi eruerò oculum, qui me ſcandalizat (ſcandalum enim eſt mundus quærētibus dominum) reuelata facie gloriam Domini, ſiue faciem moyſi ſplendidam non contemplantur. Quale verò aut quàm credibile eſt eius testimoniũ, qui nec viſa, nec audita loquitur? Immo reſellendus & repellendus tanquam ſomnia narrans, qui cæcus & manu temptans ſicut talpa, non de ſcripturarum contemplatione aſſerit quæ dicit, ſed idola cogitationum & phantaſmatum ſuorum in templo Dei audet ſtatuerè. *Non eſt*, inquit pròpheta, *idolum in Iſraël*. quia qui in lege domini die ac nocte meditatur, & legis veſtigia ſtriçto pede obſeruat, non diuinationes cordis, ſed mentem legis quando ſcribit interpretatur. Hæc ad excuſandam non meam inertiam, ſed oppreſſam miſeriam prælibauerim. De his quæ circa me ſunt credere Magiſtro debetis. Ipſe verò narrabit de commotione iræ Comitæ, quam nobis ſuſcitauit latro ille potius Barrabas quàm abbas, ſiue de aliis. Tres ſermones de aduentu Domini, & vnum de natiuitate orditus ſum vobis. Valete.

Num.
xxiii.
21.

EPIST.

EPIST. XXII.

*Domino & patri suo carissimo Alano Antisiodorensi
Episcopo frater Petrus indignus abbas
Cellensis salutem.*

22.

Verum est quia caro & sanguis regnum Dei non possidebunt. Scio, nec de ignorantia excusor. Ambigo tamen, virtus pietatis in vna eademque causa cum affectu carnis concurrens vtrum æquè ponderet vel præponderet ad meritum. Sine merito namque est sola carnis affectio. aliquando tamen cum exuberat, oneratur merito, sed vtique malo. Sequax denique cum fuerit pietatis, honoratur merito, sed bono. Vbi autem præuia, tunc in ambiguum replicatur sententia. Semitas cordis mei ad plenum inuestigare obstante varietatum caligine nequeo, quantominus apprehendere? Sic adstantur phantasmatum cordis mei audit in interioribus, sic refert foris sensibus rem vt est exquirentibus. Adquid hæc quasi parabola, vel potius ænigma? vt his qui foris sunt, & de his quæ intus sunt iudicant, satisfaciam: neptis nostræ causam non affectu solo carnis me fouere, sed in spiritu veræ pietatis & iustitiæ. Absit à sc̃su meo, immo à vestro, propter carnalem supradictæ neptis copulam, meam æternis condemnare ignibus animam. Quod procul dubio facerem, si matrimonium illegitimum defenderem. O Domine, & semper pater, quando

C

autem volueritis, amice carissime, quâ ascendit spiritus ille infidelitatis ad sanctam animæ religiosæ sedem, ut fidem duobus inhonestissimæ vitæ & famæ haberetis, & de amici expressa vobis veritate hæsitaretis? quæ spes amicitiae in me potuit subsistere, cum mihi non crederetis, & contra me testes falsissimos reciperetis? Planè contra veritatem, quam retinere me iam in aure persuaferam, eorum recepistis verbum, certè qui pro vino venderent iustum, & pro buccella venderent si haberent primogenita? Sic læsistis amicum? Sed dicitis, Non est amicus, qui obstitit in via veritatis. Planè, inquam; ita est ut dicitis. Sed ubi est veritas? In numero? Plures enim fuerunt. In ebriosis & impudicis? Tales siquidem sunt in conductis gratia, pretio, & timore. Ita esse, & si modò non affirmo, saltem præsumptione maxima in hoc credere attrahor. Pessimus inimicus & aduersarius est nepti & marito eius auunculus, qui equitaturis suis & sumptibus fortè illum deduxit. Archiepiscopus abbati, ut Canonicos mitteret scripsit: rebelles & inobedientes serò præcedenti abbati ad tempus reconciliauit, donec fieret iniquitas. Est ne hîc veritas, vel saltem species veritatis? Fitne tædiosa vobis hæc nostra relatio? Certè ut saluo gratiæ vestræ residuo dicam, tædiosius in sententiam processistis. Dilationem cur negastis? Quæ lex, quis canon hoc docuit, ut vel vna dilatio in hoc articulo negaretur?

Ne dicatis, quòd eam habuerim: quia ante à vobis nec petij, nec impetraui. Prolati namque in iudicio vestro, ita vt supputatio matrimonij fieret, nunquam fuerant. Excessistis, domine, excessistis. Presumptuosus nimirum in hoc videor, quòd sic ad vnguem Episcopum abbas, dominum seruus de viis suis redarguere, immo ab eo ei illatas iniurias referre præsumo. Non facerem hoc, nisi auroram resurgentis amicitiae per concessam & recognitam in literis vestris culpam aspicerem. Nunquam petenti venia dene-ganda, nunquam pœnitenti culpa imputanda. Satis est. Mittite gladium in vaginam. Valet.

EPIST. XXIII.

*Domino & patri suo carissimo Eskilo Lundensi
Archiepiscopo frater Petrus Cellensis
abbas omne bonum à do-
mino Doo.*

DE superabundanti bonorum caelestium gratia eatenus tam vultus quàm manus vestrae resudant, vt nisi verecundia his temporibus ab humana regione se subduxisset, suffunderentur maximo rubore noti & amici vestri in benedictionũ vestrarum largitione. Equidem malim dicere in dando vos pluere quàm seminare. Nam qui seminat primum in spe percipiendi fructus seminat, deinde non

C ij

fundit, sed spargit. Postremo non nisi cultæ terræ semen suum credit, Horum nihil imitatur pluuia: sed seipsam vt sic dicam perdit in terræ visceribus, vt postea reurgens cum maxima frugum prole afferat fructum tricesimum, sexagesimum, & centesimum. Aliud rursus caritatis indicium in pluuia reperio: quia sine delectu rigat fœcunda & infœcunda, fertilem agrum & sterilem, granum electum & germen reprobum. Est ne virtutis, an vitij, hæc bonitatis & beneficiorum prodigalitas? Sed hoc Dei, nec aliud in eo inuenitur vitium, nisi quod benignus ad ingratum, largus ad auarum, pius ad impium existit. Ista sua vitia comparant mansuetissimo innumera conuicia. Aliquando moti sunt pedes nostri mitissimi Dauid, quia eruperat pluuia mansuetissimi Dei super malos & iniustos, ita vt diceret, *sine causa iustificauit cor meum, & laui inter innocentes manus meas.* Exciderat à mente quod in libro Sapientię dicitur. *Tu autem Deus noster suauis & verus es & sapiens, pater & in misericordia disponens omnia. Etenim si peccauerimus, tui sumus, scientes magnitudinem tuam. Et si non peccauerimus, scimus quoniam apud te sumus computati.* Ecce cuius imitator reprehenditur, qui de bonitate, siue largitate redarguitur. An non Ecclesiastes in conuictione sua proprio decreto & sententia, hoc malum æstimat sub sole, vt cui dedit Deus diuitias & substantiam & honorem, non habeat in eis potestatem, sed extraneus illas rapiat? Ad quid hæc vobis verborum conge-

Psal.

LXXII.

13.

Sap. xv.

1.

Ecclef.

vi.

ries? Ut ignis perpetuus de sancto altari cordis vestri non deficiat: sed hac congerie magis ac magis cōualeſcat, donec holocaustū vestrum pingue in nebula in qua habitat Deus suscipiatur, & à cineribus omnium superfluitatum facies altaris eiusdem expietur. Ostiolum per quod aditus ad sancta sanctorum patet, delignis est oliuarum; quia procul dubio iuxta sacræ fidei tenorem non ei negabitur sanctorū ingressus, qui ab operib. misericordiæ non fuerit alienus. Suppresso pudore in auribus domini mei id persuaserim, non mea tamen præsumptione, sed alterius persuasione. Nequaquam tamen difficilis ad persuadendum extiti, faciei vestræ, sermonis, & totius gestus insignia penes me retinens: nec me in humilitate similem reperisse de filiis hominum coniiciens. Non igitur ei scribere vereor, quem nisi malis & superbis verendum non reor. Et de his hæcenus. Ceterum culpari non debet seruus de contemptu mandati, cuius mens & voluntas nulla negligentia reuocatur ab impletione voluntatis domini. Ex vestra dignatione in mandato ab anno præterito accepi, quatenus Carthusienses fratres expeterem, & de maturando negotio vestro eos commonefacerem. Erat autem negotium, sicut scitis, quatinus ad vos mitteretur frater Rogerius, ad locum ordini illorum in partibus vestris perquirendum & præparandum. Disposuerat namque in animo vestro plena & perfecta caritatis effusio noua seminaria de omni genere sacro-

rum ordinum seminare prouinciam vobis à Deo commissam, vt exinde fructus, qui permanent in æternum, susciperetis; & manipulos iustitiæ de laboribus eorum ad æterna tabernacula reportaretis. Iam non solùm in herbam, sed in spicas Cisterciensis siue Clareuallis ordo ibi multiplicatione fratrum excreuit: nihilominus & religio Præmonstratensis. quia igitur gustauit & vidit prudentia vestra, quòd bona sit negotiatio ista, ad vltiora manum porrexistis, & de illo ordine, qui quasi Cherubin, siue Seraphin, immediate residenti agno, qui habet oculos septem & cornua septem, in throno gratiæ accedunt, gazas vestras exornare voluistis. Ecce factum est vt imperastis. Adquieuit sanctus Carthusiensium fratrum conuentus iustis petitionibus vestris. Equidem res impetrata difficilis, sed quis vobis negaret, quod fortè spiritus Sanctus in sancto templo suo suggererat? Certè nec illi, nec nos diffidimus, seruum suum fidelissimum & amicum Domini vos possidere, cuius famam & opera tam præclarissima reclamatione mundus. Quod cœpistis tam sanctè, tam auidè, tamque quodammodo intemperanter præ desiderio animæ, sic effectui mancipate, vt melior sit finis orationis, quàm principium. Valete.

EPIST. XXIV.

*Domino & patri suo carissimo Henrico Dei gratia
Episcopo Beluacensi, Frater Cellensis
abbas salutem.*

PLus satis egena est beneficiorum recordatio, cuius titulus non inscribitur saltem verbotenus gratiarum actio. Proinde stylo ferreo in vngue adamantino profundæ memoriæ mandauī manipulos liberalitatis vestræ, vt nulla capitis vertigine vacillare, nullo temporalis reuolutionis diluuiū absorberi, nulla denique obliuionis rubigine valeant obfufcari. Clarum, nouum, & recens penes me retineo semper beneficium acceptum. Quo animo gratiofus cū acciperem ferebar in dati & dantis deuotionem, eo in illa senefcentis gloriæ defæcatione mutato, robustiūs præparor ad obsequium, vtrius eliquesco in amorem benefactoris totum animi balsamum. Superaccessit dono vestro vultus hilaris, animus gratus, modus honestus. Et manus quidem larga in beneficium totam se expandit, sed voluntas in circumstantiis doni se supermensusurauit. Quid enim fuit conuocare diocetaneos abbates & priores? quid iterum indicij amoris expressit tam benigna personæ & negotij nostri commendatio? Quis non est admiratus tam despectam personam à fratre regis sic honorari? ab

C iiij

Episcopo Beluacensi sic amplecti ? à tanto homine tantillum monachum sic nominari ? Non sustinui quæ de me supra efferebantur, præ ruboris verecundia : immo pro veritatis conscientia, quæ admonebat me non esse illum de quo talia dicebantur, fugi, recessi, sed non longè, quia maiora pati cogebar instanti necessitate. Necessitate reuera pallium erubescentiæ reieci, cùm amicorum fores vt acciperem intraui. Certè accepi à multis multa, sed à nullo tanta, quanta à domino meo. Vicit notos, vicit alios amicos, vicit omnes vicinos & summa doni, & modus donandi. Non sum locutus, sed quia veni, optimè recessi locutus. Non enim beneficium rogando, sed veniendo consecutus sum. Præuenit spondens lingua rogantis linguam. Percipit regia nobilitas teneritudini frontis citò se in ruborem verecundiæ conspergentis. Hæc omnia beneficia tua, domine, signata sunt in thesauris meis. Quid ergo retribuam domino meo pro omnibus his quæ mihi tribuit ? me ipsum sine dubio, non contra legem me liberum in seruitutem distrahendo, sed seruum amicitiae tuæ in libertatem vendicando. Potius enim libertate ista gaudeo, si seruus tuus sum munere amicali, quàm libertate qua sum alienus ab officio seruiendi tibi. Valete.

EPIST. XXV.

*Domino & patri carissimo Balduino Dei gratia
 Nouiomenſi Episcopo, Frater Petrus abbas
 Cellenſis non auferre ſal ſæderis Dei
 ſui ab omni ſacrificio.*

Scriptum est, *honor regis iudicium diligit.* Angeli autem Dei in cœlo sicut sunt ministri diuinę voluntatis, vt fiat sicut in cœlo & in terra, sic æquissimi moderatores sunt diuini honoris, vt vtrumque pedem regis sui, misericordię scilicet & iustitię, sic vestiant cum digno honore, ne altero neglecto vocetur palatium eorum domus discalciati. Iam pene in terra nostra conqueritur iustitia aduersus misericordiam, dum agrum iustitię nemo velit excolere, neque pondus diei & æstus pro conuentione denarii diurni portare. Conſtitunt autem glomeratim viri diuitiarum & deliciarum ad amœna prata misericordię, & nō verē, abscondentes manum sub ascella, & folia ficus suę turpitudini consuentes, & consulentes, dicentesque, pax, pax, & non est pax. Hęc domine & pater carissime, non ex supercilio Pharisæorum, sed suauitate litterarum vestrarum dulciter commonitus rescripserim vobis. Valete.

25.
 Psal.
 xcviij.

EPIST. XXVI.

*Domino & patri carissimo Henrico Dei gratia
Beluacensi Episcopo Frater Petrus Cellen-
sis abbas zelo zelari pro
domo Dei Israel.*

26.

HActenus in palæstra prælium ignaue vi-
res non deposcebat egregias Satis fidum
erat equitare sine lorica, sine lancea, sine gla-
dio. Sed nunc qui habet gladium tollat simili-
ter & lorica. Ecce tempus, ecce dies, ecce
causa, vbi fortissimi Israël gladio accingi de-
bent super femur potentissimè. Nam ecce
Philistiim, qui secundum carnem in baculo
arundineo ambulant, de foueis occultæ mali-
gnitatis erumpentes, castra innumerabilia, ca-
stra fortia, castra fulgurantia posuerunt. Oкта-
uianus princeps est militiæ, ne dicam malitiæ
huius: qui sine Deo, vt dicitur, pro Deo vult
regnare. Ecce ipse non velum templi, sed tu-
nicam Christi, non saccum mortalitatis, sed
focum maiestatis in Christo & Ecclesia ite-
rum rescindere nititur. Hoc abominabilius
reputat vnitas Catholicæ fidei, quàm perfos-
sionem lateris, pedum confixionem & ma-
nuû Christi. De perfossione namque redem-
ptio, de confixione comparata est nostra libe-
ratio. Sed quid de scissione, de diuisione, de
schismate, nisi anathematis vibratio, animarû
damnatio, morum deprauatio? Ecce aqua
contradictionis, vbi iurgati sunt filii Israël.

Tu vero, domine mi, quid? Sta cum Iosue, immo cum Iesu euaginato gladio, dic omni transeunti, *Noster es, an aduersariorum?* Habes Alexandrum, immo Petrum, aut potius Christum, qui habet ministros Petrum, & Alexandrum. Quis timere poterit cum Alexandro potentissimo? quis vacillare cum Petro supra petram fundato? quis non superabit cum Christo, cui data est omnis potestas in cælo & in terra? Noui in te regiam animositatem, noui contra inflexam iniustitiam inflexibilem cœruicem: noui ardorem zeli. Age ergo pro dignitate officii, pro sublimitate natiui sanguinis, pro religione ordinis, pro debito Christianæ professionis, quod debes & potes. Multum enim debes; nihilominus & plurimum potes. Satis dictum est sapienti. Sanum & incolumem te custodiat manus dexteræ Dei. Vale.

EPIST. XXVII.

*Domino & amico suo carissimo Thoma Cancellario
regis Angliæ Frater Petrus humilis abbas
Cellensis se & sua.*

Quem fortuna non extollit prospera, magis pro humilitate quàm pro sublimitate est admirandus. Gloria in vobis cum prosperitate, vt accepi ab his qui viderunt & nouerunt, ambitiosius quàm contentiosius contendit: nec confundit aliquando superata, nec ynquam insolescit de victoriâ. Cedit gloria

27.

44 PETRI ABB. CELL. EPIST. LIB. I.
prosperitati, sed gloriosè, sed prosperè. Quæ-
libet obtineat, humilitatem ceu moderatio-
nem non amputat. Gloria accedit, sed non su-
perba: prosperitas venit, sed non effusa. Inde
est quòd de nube tantæ sublimitatis ad lati-
bulum nostræ paupertatis misistis, quia veni-
re non potuistis. Rogastis de familiaritate &
amicitia. Quod rogastis, si admitteretis, admi-
rationi procul dubio habèdum esset, pro ine-
quali rogantis & rogati fortuna. Quæ enim
proportionalitatis habitudo inter abbatem
Cellensem & Cancellarium regis Angliæ?
Pene non est comparatio, vbi non est existi-
mationis adaptatio. Secundum post regem in
quatuor regnis quis te ignorat? Primum in
miserijs fratrum nostrorum quis me non re-
putat? Dicā de compendio, quia quantum de
vobis excellentiora, tanto de me sentio & scio
viliora. Nullo igitur modo ad ingressum ami-
citiae manum porrigo: sed si vel de grege ac-
cidentalium amicorum fuero, bene mecum
fecisse dignationem vestram æstimabo. Pri-
mitias autem illas non mitto, quia ampliorem
gratiam facere propero. Non habebam ser-
mones illos magistri G. sed quæro, & statim
scriptorem cum omni instantia huic operi ad
opus vestrum designo. Valete.



PETRI ABBATIS CELLENSIS

EPISTOLARVM

LIBER II.

II.

EPISTOLA I.

*Domino & patri suo carissimo Petro Dei gratia
venerabili Cluniacensium abbati, Frater Pe-
trus humilis Cellensis
abbas seipsum.*



Gniculum scintillantis in me
spiritus vestri cineres nostri
tenaciter euaporant, & car-
bones Seraphin nunquam ex-
tinguendos assidua medita-
tione renouant. Tetigistis, fa-
teor, in me non labia oris, sed venas cordis.
Aculeus siquidem collocutionis inter nos
habitæ nostras interiores medullas perfora-
uit, ac in consideratione sui omnia animæ in-
teriora coegit. Reuera sermo ille efficax fuit
ad torpentis animæ excitationem, ad vitæ hu-

28.

ius momentaneæ inspectionem, ad regularis professionis obseruationem, ad angelicæ puritatis æmulationem, ad summæ & ineffabilis Trinitatis expeditam contemplationem. Viuus, quia de vera vita: purus, quia de puritate summa: verus, quia de veritate æterna. Non parcit malis, sed placet bonis: remordet vitia, virtutes suadet. Adducit in lucem obscura: tanquam speculum perlucidum vultus prospicientium renuntiat. Fateor, in huius conuitu rugas meas inspexi, & quod in interiori homine pulcrum prius æstimaueram, deforme reperi. In lucerna ista accensa domum euerti, & in peculio multo minus quàm computaueram accepi. Marcidum inueni quod floridum credidi. Et quid plura? Fætores niduli mei vix fero, quia ibi reptilia, quorum non est numerus aspicio. Vitiarum ibi punctiões, spīnarum compunctiões, veprium cōplicationes, & tam paliuri sollicitudinum, quàm cardui affectionum non parcentes exstiones. Quid namque peccatum, quid pœna peccati, nisi stimuli mortis animam cruentantes, lacerantes, & dilaniantes? Misera miseriis suis depascitur anima, *Mors*, inquit Psalmista, *depascet eos*. Vnde Esaias. *Dilatauit, inquit, infernus animam suam absque vllō termino, quia non habuit populus sciētiā*. Nimum, nimumque certè se infernus dilatat, cū etiam quōsdam in corpore viuentes gehennalibus conscientiiis iam iam exruciat. Sed vsque ad ostium, ceu hostiam crucis, & non vltra, cruciatus isti per-

Psal.

XLVIII.

14.

Esa. v.

14.

tingunt. Cetus namque iste, qui etiam Ionam deuorat, omnia rapit, vniuersa deuastat: in gutture & ventre malitiæ suæ quicquid extra arcam inuenerit includit. At quàm felicius & quàm iocundius anima capientem se caperet, deuorantem se absorberet, persequentem se triumpharet? Draco enim sic illuderetur, sic denique mors interficeretur, sic anima liberaretur. Vtinam sic se vindicaret anima de aduersario suo, immo vtinam infernales sic absorberet in præsentī miserias, vt nullas in crastinum futuri iudicij dimitteret pœnarum reliquias! Vtinam, inquā, reliquias saluationis, quæ diem festum agent, potius expectaret anima mea, quàm reliquias fœcis, quæ subsidunt in calice, qui est in manu domini vini meri plenus mixto! Reliquias prädiorum tuorum, domine Iesu, suspiro. Vēter meus absque spiraculo en totum se expandit, & de micis siue reliquijs tuis repleti appetit. Quæro etiam vinum, quæro & vestimentum. Opto quoque à sanguine peccati, sanguine tuo mūdari. opto lineis tuis, Iesu, vestiri, quibus in sacris visceribus virgineis insignitus ad offerendas preces & munera pro nobis processisti. Hanc sacrosanctam in sancto cœnæ conuiuiο exuisti, in cruce conscidisti, in resurrectione innouatam resumpsisti, in ascensione vultibus paternis in propitiationem nostram repræsentasti. Laua me à sordibus, sana à doloribus, mundator filiorum Leui, reparator filiorum Dei.

Quòd si manum iam glorificatam clementissimè ad tam vlcerosa officia inclinare, propter defluentes ægroti assiduas rheumatizationes refugis: habes aliam inferiorem manū, sed bene doctam, sed satis gratiosam, sed similem nobis passibilem, cui si dederis, immo si iusseris, facilè curationes animarum nobis propinabit. Cluniacensem tuum loquor, cui dedisti in corde sapientiam, in ore facundiam, in sermone gratiam, in vultu auctoritatem, in operatione virtutem, in intellectu subtilitatem. Dedisti ei & licentiam, vt secundum cor tuum operetur, & laborantium officinas ingressus manibus tuis confectam medicinam pro cuiusque valetudine dispenset fideliter, & minimum gratiæ pro gratia operæ dispensationis reportet. Grauaris quidem, domine carissime & pater, in hac administratione tantæ multitudinis, tam spatiosis decursibus, vt modò ad cælorum fines curribus igneis amore auido contendas: modò ad terræ inferiora & partes vltimas sollicitudine populi proni in culturam vituli comedentis fœnum resiliat: modò tam procul, modò tam propè, modò supra nubes, modo iuxta Goel etiam infra ciues, modò supra spiritum, modò infra te ipsum cogaris te leuare & deponere. Laboras si non amas: laboras, sed si fructum non videas: laboras, sed si finem non speras: laboras, sed si retributionem non consideras. Et de fine quidem scriptum est, *quia ecce finis venit, venit finis*. Denique appensum est in statera laboris tempus, & inuentum est minus habens, quàm retri-

Ezech.
vii. 2.

retributionis denarius. Non in dies & annos
 producitur labor, quia in modico, & in breui
 fiet laborum retributio. Iterum de fructu vi-
 dendum est, quia fructus tuus, fructus subli-
 mis est, fructus lucis, fructus benedictionum
 domini, fructus innumerabilis. Dinumera
 stellas cœli, dinumera arenam maris, & dinu-
 merare poteris fructum horti domini, scilicet
 Ecclesiæ Cluniacensis. Quid dicam de dile-
 ctione? An non amas, pater amantissime, dile-
 ctum ex dilecto vulneratum caritate in ligno?
 Noui, noui ego, nouit & Angelus tuus dile-
 ctionem tuam, flammescens in Deum for-
 titer, recalescentem in proximum non me-
 diocriter. Denique pius & largus remunerator
 non solum operum, sed & affectionum, ante
 faciem tuam Christus Iesus accinctus plena
 manu percurrit, in latere claro vultu concur-
 rit, & post tergum extenso brachio succurrit.
 Præcurrit ut peruius, concurrit ut socius, suc-
 currit ut medicus. Præcurrit ut imiteris, con-
 currit ne lassaris, succurrit ne labores. Præcur-
 rit prædestinatione, concurrit vocatione, suc-
 currit iustificatione. Iacob in utero matris
 præuium habuit, cum non ex operibus,
 sed ex vocante dictum est, *Iacob dilexi*, Rom.
Esau autem odio habui. Angelica quoque na- IX. 13.
 tura in confirmatione suæ stabilitatis cōcur-
 rent enim gratiam habuit. Saulo in languore
 suæ infidelitatis nonne gratia de cœlo succur-
 rit? Post hunc currens non deficies: cum isto
 vadens ad omnia sufficies: huic toto totus in-
 nixus omnia te posse non desperes. *Omnia, in-*

Philip.
IV. 13.

Ioan.
XIV. 27.

quit Apostolus, *possum in eo qui me confortat.* Pennis quidem paternæ, nec non & maternæ generationis reuolat iste filius Dei, & præuolat ad sinus paternos: sed tamen gressum retardat, sustinens lassos. Itineris quoque duriora & asperiora sibi nō ignarus, sed benignus discernit. Non enim est dolor, sicut dolor eius, & nobis planiores semitas, lapides de via tollēs, proponit. Vnde ait: *Pacem meam do vobis, pacem relinquo vobis.* Quasi guerræ vestræ & debiti pœnalis discrimina persolui, & pacis integræ remedia indulsi. Partē, inquam, suam meliorem, non molliorem fecit, quia simul molliorem & meliorem in mundo, vbi pressuram promittit, neminem posse habere docuit. Volo quidem ego meliorem, sed ex gratia eligo sæpē molliorem, sed ex humanitatis natura. Non sic verò, non sic legit Deus. Diuisit enim aliter. Seorsum, sed sursum posuit meliorem. Homines autem tanquam molliores, infirmiores, ceu inferiores, adhuc limum plasmationis præ oculis habentes, molliora & dulciora, non meliora & duriora appetūt. Optioni siquidem nostræ relinquitur, vtrum accipiamus meliora, sed duriora; an molliora, sed deteriora. Video autem humanitatem meam frequenter & diu in hoc discrimine vacillare. Modò enim tentat & attrectat durum propositum, quia melius; modò relabitur ad molle, quia delectabilius. In istius contractu placet emptio, sed displicet conditio: in alterius contractu facilis conditio, sed vilis emptio. O anceps, ô dubia negotiatio! Superflua carnis

equidem delectatio non vsque quaque est omni homini odiosa, sed multum quæsitâ, multum appetita, multumque à multis amplexata. Sed quousque? Modica est, transitoria est, etiam cum esse videtur, non est. Seipsam consumit; seipsam destruit, in se crudeliter sæuit. Acerbius tamen damnum quod naturam lædit, quàm quòd seipsam interimit. Intrat huiusmodi delectatio, & natura fugit. Rerum omnium domina ancillam istam velut pestem refugit, velut mortem euitat, velut infernum cauet. Nunquam enim aut raro in vna sede morantur, vix aut nunquam operantur. Semper namque alia est operatio necessitatis, quæ & naturæ, alia superflue delectationis. Verbi gratia, cum sepelitur aliquis vino, cibo vsque ad nauseam ingurgitatur, enervatur luxuria, nonne hinc luget natura? nonne egrotat? nonne grauer laborat? Citiùs procul dubio deserit hunc flos ætatis, & morbi, siue mortis intempestiue accersuntur nuntij. Hæc tamen opera carnis esse, siue superflue delectationis quis ignorat? Natura verò his gaudet abstinere, & vt ait Seneca, paucis contenta est. Et ratione quidem ista regitur, illa verò abusione. Illa in veritate ambulat: monstri verò huius facies blanda vt decipiat, sed in posterioribus circumfert aculeum scorpionis, vt perimat. Mentum simplicium apprehendit, sed inguina ferit. Cohors & Tribunus Synagogæ peccantium huius principatum sibi assumit in caput & regem, & respuit super mulam regis verum Salomonem. O

peccatum! ô iniquitas! Pater mi, pater mi, currus Israel & auriga eius. non fileat saltem more vestro spiritus iusti Nathan, non sinat fieri tantum nefas in Israel Dei. Sceptrum namque regni superflua carnis delectatione obtinente, quæ pax super Israel? immo, quæ iura non subuertuntur? quæ leges non obli- rantur? quæ ratio non exulatur? quæ virtus non confunditur? quæ boni species non suf- focatur? quod genus erroris non extollitur supra omne quod dicitur dominus, aut quod colitur? Hæc radix est peccati. totius hone- statis tinea, fouea vitiorum, puteus dæmo- num, vorago animarum. Recludite, obse- cro, recludite feram istam pessimam, quæ de- uorat Ioseph nostrum, vel potius filios Iacob & Ioseph. Certè nimium efferatur, & rupto propositi ac religionis repagulo vsque ad san- cta sanctorum Cluniacensis ordinis imperij sui fines propagare conatur. Vbi enim sine li- centia comeduntur carnes, nonne Adæ præ- uaricatio renouatur? nonne voti & sanctæ in- stitutionis paradisus violatur? Nonne legitur, quia *Inebriabo sagittas meas sanguine, & gladius meus deuorabit carnes?* Sanctitatis opprobrium, religionis abominatio est, non quidem carnes edere, sed cum sanguine inobedientiæ. Vnde à sanguine & suffocatis iubet lex absti- nere. A suffocatis non abstinet, qui furtim edere non timet. Periculo namque prælato- rum fiunt transgressiones commissorum. Va- forum custodes sacrorum puniuntur, cum negligentia sua de templo domini asportan

Deut.
xxxii.
42.

tur, & vsque ad manus concubinarum regis Babylonis humiliantur. Sapientio rem me non doceo, sanctio rem non instruo, feruentio rem non excito, studio sio rem non pro uoco, sed timores meos manifesto, sed dolores aperio, sed consilium quero, sed euadendi semitam interrogo. Audio principes populi suspensos in patibulis, & affixos contra solem propter peccata populi, & somno vacare valeo? Dicentem Iacob ad Laban in summo articulo iudicii lego, *Oues tuae & caprae steriles non fuerunt. Arietes gregis tui non comedi, nec captam à bestia ostendi tibi. ego damnum omne restituebam: quicquid furto peribat à me exiges. die nocteque astu urebar & gelu, fugebatque somnus ab oculis meis. sic per viginti annos in domo tua seruiui tibi.* Hæc, inquam, lego, & non inconsolabiliter inertiam meam lugeo? Vbi namque oves curæ meæ? vbi capræ non steriles? Qui enim à pueritia sua in claustris regulariter eruditi sunt, & tunicam vitæ atque conuersationis suæ immaculatam seruauerunt, oves domini sunt. Qui de sæculo foetorem luxuriæ, fugientes pœnitentiæ habitum sumunt, capræ domini nihilominus sunt. Sed vbi Iacob, vbi abbas tam sedulus exhortator, tam feruidus redargutor, tam cautus prouisor, tam beneuolus persuasor, tam contra rabiem luporum potens, tam contra morborum pestilentiam sapiens, tam ad aeris intemperiem patiens, tam ad latronum insidias prudens, tam fidelis in com-

D iij

missio, tam vigil in euitando damno, tam perseuerans in incepto seruitio? Damna domini mei video, sed quomodo resarciam ignoro. Esset quidem iusta recompensatio, si numero numerum æquarem, si pretium par pari pretio restituerem. Nunc verò cum non sit mihi nisi vna anima, si perierint per culpam meam tres aut quatuor, quid faciam? Anne triplicatam vel quadruplicatam pœnam persoluiam? Quod si quoquo modo pœnam istam pati possem, centuplicatam fortè qua patientia sustinerem? Ista attendens miror me non mirari, expauesco me non expauescere. Certè non est somnus simplex: sopor aut lethargia est, que me tenet. Obsecro mittite antidotum.

EPIST. II.

*Domino & patri suo carissimo Hugoni Dei
gratia Cluniacensi abbati, Frater Petrus
humilis Cellensis abbas seipsum
cum deuotione,*

29.

SErenior post nubila dies succedit: dulcedo
screscit ex amaritudine præcedenti: ruina
statum amplius commendat. Sic in auditu
commotionis magnæ, quæ in Cluniacensi
electione facta est, non parum concussa sunt
viscera nostra, sed rursus in concordia læ-
tata est anima nostra. Ab occasu enim san-
cti patris nostri prædecessoris vestri, catenus

tanquam parturiens erat, donec reciperet virum alium, qui consolaretur eam ab operibus suis. In dolore suspirabat. sed ecce iam non meminit pressuræ propter gaudium, quia & libertatem recepit, & vnum de filiis vteri sui cum principibus populi sui collocauit. Filij alieni mentiti sunt ei, & claudicauerunt à semitis suis: quia non ex ore domini, sed ex propria usurpatione & consilio Achitofel regnare attentabant. Odiosa nimirum præsumptio. Cluniacensem tam castam matronam prostituere, tam religiosam publicare, tam honestam deuenustare. Reprimenda temeritas matrimonii, leges tam petulanter infringere, vt non voluntas nobilissimæ puellæ quæratur, sed violentia inferatur, torus immaculatus non cum reuerentia poscatur, sed impudicè exigatur. Prorsus inaudita miseria, si hac necessitate mater familias addicatur, vt non tanquam libera, cui vult nubat, tamen in domino, sed cui respuit nolens succumbat famulari, immo concubinatus obsequio. Vbi est, *Non vos me elegistis, sed ego elegi vos?* Vbi est, *Non sumat quisquam sibi honorem, sed qui vocatur à Deo tanquam Aaron?* An non ista libera est, liberam habens electionem in libertate spiritus, cuius & ancilla & sponsa est, ancilla vtique ex deuotione, sponsa ex caritate? Vbi, inquam, reuerentia sponsi, sponsæ gloria, quam Ioannes baptista reformidat, Moyses velat, Rebecca operit pallio, Cherubim gloriæ obumbrant;

D. iiij

Ioan.
xv. 16.
Hebr.
v. 4.

I. Cor.
xv. 50.

& quam caro & sanguis si contingit, vt fumus
 euanescit? *Caro*, inquit Apostolus, & *sanguis*
regnum Dei non possidebunt. Idcirco Moyse sol-
 uit calciamentum de pedibus suis, ne si fortè
 in terra sancta curis carnis impeditus consi-
 steret, faciem in rubo radiantis Dei offende-
 ret. Non æstimo leue dispendium, flammeum
 gladium atque versatilem nuda manu acci-
 pere, vel cæcis obtutibus fornacem iracundiæ
 inconsultè transilire. Culmen huius honoris,
 vel potius oneris, tam est pendulum ad ca-
 sum, quàm debile ad flatum. Vrit sollicitu-
 dine, pungit timore, vrget inquietudine. For-
 tuna si vtrinque & vndique versata discuti-
 tur, plus mœroris & minus lætitiæ refert. Iu-
 giter si quidem ratiocinatio supputanda, tam
 accepti muneris, quàm soluendi debiti. hinc
 æquitas iudicis, illinc difficultas iniunctæ ad-
 ministrationis pensanda. Venia etiam spe-
 randa, si non obstiterit punienda negligentia.
 Tempus numerandum, vsura replicanda,
 fructus computandi, & summa totius di-
 spensationis colligenda. Si minus inuentum
 fuerit, danda ante articulum supremum
 pecunia ad mensam, renouandus ad nummu-
 larios virtutum siue fidei cursus. Gratia pro
 grauitate discriminis imploranda: arbitrium
 pro posse impendendum, legatio excusatoria
 pro impossibili mittenda. Ex æquo enim si
 ad pugnam congregiatur, nulla proportio-
 ne ad dominum homo miser & mualidus
 subsistet. Ponderis terræ, cœli infinita spatia,
 diffusiones aëris, & maris profusiones intra

pugilli angustias facilius coartabis, quàm Deo cœli paria respondere possis. O abbas Cluniacensis, attende quia fecit tibi magna qui potens est, & sanctum nomen eius. Fecit tibi Deus vt Deus, vt pius, vt bonus. Exaltauit humilem, deposuit potentem. Ecce itaque oculus monachorum factus es, speculum & exemplar huius ordinis. Si oculus tuus simplex fuerit, totum corpus monachorum, quod est congregatio Cluniacensis, lucidum erit. Si autem nequam fuerit, etiam corpus tenebrosus erit. Vide ergo ne lumen quod in te est tenebræ sint, vt sic loquar. Facit audere, quod vestibulum familiaritatis tuæ aliquando penetraui, & religionis tuæ sancta deuotio. Sed de his hactenus. Cæterum more nostro obediens amantissimo, & piæ recordationis viro, domino Petro abbati, fideiussi cum abbate Arremarensi pro eo multam pecuniam aduersus Hulduinum de Vendopera. Priores quatuor proinde secundario, vt regressum ad eos haberemus, accepimus fideiussores. Hi sunt *

EPIST. III.

Domino suo & patri carissimo Hugoni abbati Cluniacensi, frater Petrus Cellensis salutem.

Iustitia nostra superabundare debet iustitiæ Scribarum & Phariseorum, & non subiacere. Miror iustitiam hanc quis nouus legiolator vel vnde attulit, vt non restituatur

30.

à principali debitore pignus fideiussori à debitore detentum. Miror & nouam benignitatem vestram, quæ nec semel respondere voluit iam secundo vocanti. Durius hoc silentio quàm damno permoueor. Ad damnum enim leuius ferendum cooperatur patientia, cùm illud noueris refarciendum amici bona & noua gratia. Silentium verò post beneficium mortui beneficij repræsentat sepulcrum. Malum tanquam abortiuum amici primogenitum facere: cùm potius semper obsequij memoria vigere debeat, & viuere apud amicos. Et damnum, & damni hæcenus patientiam præstabam, sed amicis, sed dominis, sed veracibus monachis, qui & si me ipsum vellent inuadiare possent. Sed quid dicam? Planè minus dicam, ne fortè & cum pecunia amicos perdam. Dicam prorsus, dicam. quicumque fortè hoc audieritis, quòd Cellensis simplicitas sic elisa, ne dicam elusa, sit ab amicis suis carissimis, pro quibus & se, & omnia sua ponebat, nolite annuciare in Geth, neque in compitis Ascalonis. Hoc potius & si non veriùs dicatur: Abbas vetera non nouit debita. Nam cùm audierit & creditoribus satisfaciet, & fideiussores liberabit, & gratiam amicis æqua lance repondet. Valete.

Ecce calami nostri valde fatigati pro labore suo mercedem reposcunt, bibere in calice, post æstum & hyemem.

EPIST. IV.

*Domino & patri suo carissimo Hugoni venerabili
Cluniacensi abbati, P. humilis abbas Cellen-
sis cum omni deuotione.*

VNa eademque hora, denique & ore vno, 31.
saporis dulcedinem à medullis episto-
læ vestræ accepi, & reciproco munere ma-
num ad scribendum deflexi. Semper namque
nescio quid plus dulcedinis habet res præsum-
pta primo voluntatis appetitu, quam post de-
siderij tempus. Nolui igitur oportunitatem
tāquam recalefaciendam in horas differre; vn-
de fueram quasi monitus ipsa tantæ maiesta-
tis dignatione. Et primum quidem moram
damnosam, sed bene compensatam, hac satis-
factione remitto. Deinde negligens inueniri
apud vos in huius officij munere præcaueo.
Chartam, & chartæ scripturam satis eleganter
compositam suscipiens, semel non aspicio, sed
diligentiam hominis, etiam in paruissimis re-
bus non prætereundam in memetipsum cum
admiratione replico. Exemplū est certè com-
positionis intimæ, refiguratus quandoque ha-
bitus in exteriori homine: & vini boni-
tas calicis accrescit idoneitate. Suggestit ipsa
sux faciei venustate, quod & exhibuit in le-
ctione, magnum quid in absconditis suis repo-
situm apportare. de paradiso, de Ægypto, & de
quibuscūq. locis scripturarum tam pretiosas

merces & margaritas plenis marsupiis ex se re-
fudit charta vestra, quòd ad ipsam coartata sit
intelligentiæ nostræ arca. Sed quid mirum, si
dominus abbas Cluniacensis de thesauris suis
tot & tanta proferat, quot & quanta Cellensis

Esaia

xxxvi.

88.

vix efferre valeat? Nonne sic à quodam di-
ctum legimus, *Ex te non poteris prabere ascen-
sores equorum, quos ego dabo tibi?* Ambulant vo-
biscum innumerabiles fortè sicut monachi,
sic & sententiæ. Certè sic est, negari non
potest. Res in euidenti. Quis sic ad manum,
sic ad nutum cogere tantum exercitum phi-
losophicorum exemplorum tam citò potuit?
O vena diues? Beatus qui vigilat ad postes
ostij tui. Mane panibus, vespere carnibus ede-
re poterit. Pullaui, & aperuistis. Vnum locu-
tus sum, quod dixisse me non pœnitet. Vna
siquidem & modica punctione tetigi vos,
quinimmo tetigi aceruum Mercurij, siue no-
uarum frugum, sed non modica æstimatione
excepi thesaurum multarum sententiarum.
Quid? mensuram bonam & confertam, &
coagitatam, & supereffluentem remisistis in
sinum nostrum. Proinde exulto ad dignatio-
nem vestram, stupeo ad eloquentiam, curro
sicut ceruus sitiens ad fontes historiarum, ad
profunditatem sententiarum, ad suauitatem
exhortationum. Interea duo proponitis, sum-
pta à nomine vno, quod est Petrus, fortitu-
dinem scilicet & agnitionem. De vtraque ex-
emplificatis non auarè. Honestò deinde mo-
do qualis esse debeam instruitis: & talem esse
dicitis, qualem fieri vultis. Modus hic sua-

dibilis ad docendum. Naturale siquidem est animæ rationali, voluntario motu occurrere de se bene opinanti, & humeros inclinare indubitata affectioni. Pronum quoque sibi redhibet animum ad obediendum, qui prius amicitia fidem fecerit, & de probitate persuaserit. Crederem vobis, si mihi conscius in contrarium non essem. utinam sicut à caritate vestra profertur, sic à vobis in veritate perficeretur. Sed ut verum fatear, rara in nobis nominis vestri interpretata veritas. Vnus enim est, & secundum non habet, cui dicitur, *Secundum nomen tuum, ita & laus tua in fines terra.*

Quod hoc nomen? Iesus. Quæ ista laus? *Saluabit Dominus populum suum à peccatis eorum.* Reuera hic Iesus, in cuius manu salus nostra est. Hic nomen habet, quod est super omne nomen. Hic denique virtutem nomine suo non inferiorem implet: quin immo & tempore & pondere excellentiorem. Parum dixi, tempore: melius enim dicerem, æternitate. Virtus hæc ab æterno, nomen hoc ab æuo. Virtus sine tēpore, nomē ex tempore. In pondere nihilominus omnia virtus diuinitatis operatur, ipsum quoque nomen Iesu. O pondus nominis Iesu! quis appendere, quis dinumerare, quis æstimare valeat hoc nomen in pondere? Nunquam sine pondere nominandus est Iesus. Pondere utique sanctuarij, quia nemo potest dicere Dominus Iesus, nisi in Spiritu sancto. Et in lege Moyse sic dicitur: *Non assumes nomen Dei tui in in vanum.* Paulus Apostolus ne in vanum curreret, ut po-

Psal.
XLVII. 9
Matt.
I. 21.

Exod:
xl. 7.

Rom.
VIII. 18.
Gal. VI.
17.
Philip.
II. 9.

tuit in vinculis, & in catenis per passiones quotidianas, hoc nomen semper apposuit & apprehendit. Hoc enim est quod ait, *Non sunt condignæ passiones huius &c.* & alius de eodem pondere, *Stigmata*, inquit, *Iesu porto in corpore meo.* Alibi dicit: *Dedit ei pater nomen, quod est super omne nomen, &c.* Præponderat hoc nomen quodcumq. creaturæ nomen est. Hoc compendiosè dixerim, vt solùm designarem, quis scilicet nomen habet & virtutem. Rursus inflecto intuitum ad epistolam, quæ sicut turris ædificata est cum propugnaculis: mille clypei pendent ex ea, omnis armatura fortium. Ad quid tantus apparatus? Opinor voluistis in me aut terrere sensus hebetes maiestate sensuum, numerositate exemplorum, perplexione rationum subtilium; aut inertem prouocare æmulatione studiorum; aut inertem consolari pulcritudine sermonum; aut indoctum edificare persuasione adhortationum; aut satisfacere oportunitati meæ abundantiori gurgite auctoritatum. Sed quodcumque horum attenditis, optabile & valde earum habeo, quòd occupationibus vestris succensetis, & sicut Rebecca hydriam de scapulis lassitudini nostræ inclinaueritis. Refluente quippe procellarum reuolutiones, quibus interdum ascenditur vsque ad cælum & descenditur vsque ad abyssum, quis vel ad modicum credat abesse Abbati nouo Cluniacensi? Quis de abyssis terræ vel post tertium diem non miretur emergere? Quis non compatiatur gementi sub aquis? Scribere quomodo valet, quem de-

grandinat sollicitudo continua, & nunquam quieta? Sed vbi obstaculum ægrius, ibi necesse est se expediat ingenium egregius. Procul dubio animi elegantis est, curæ sæcularis oneribus indignari, & per medias interpellantium acies ad lectionum amœnissima prata & solitudinem liberam velut solitarius onager euolare. Contra hanc vim à Prætore nullum proponitur interdictum. Hæc vis probabilior, quam desidiosa patiëntia. Vis inquam hæc non improbabilis, si rumpantur noui funes contexti & concatenati nexibus caufarum, tanquam à profundo maris emergentium. Est & aliud consilium, vt vbi non sunt vires ad vim faciendam, adsit ingenium ad furtum committendum, de quo tamen non nascatur actio furti. In Euangelio enim commendatur mulier, quæ tangens Iesum, virtutem à simbria vestimenti eius furto subripuisse commemoratur. Furtum prorsus commendabile, si te ipsum tibi ipsi & Deo tuo ab incurfu concursantium subduxeris. Aquæ enim furtiuæ dulciores sunt, & panis absconditus suauior. Valde saporabilis lectio, quam interpellata sorbet animæ intentio. Studium, lectio, & oratio turbam non amat. Impediuntur plerunque peregrino superuenti, quia vix patitur non se partiri aduenienti nobili animæ consolatio. Fortè onera graua & importabilia, quæ nec digitis tangere possum, humeris vestris impono. Quo enim modo Dominus meus Cluniacensis poterit hæc vnquam vel experiri? Immo viuere

quomodo poterit, si hæc non fecerit? Si post omnes habiturus est, quando se habebit? Rursum si eum non habuerint qui sine eo vivere non debent, quanta pestis & iniquitas! Expedit potius ut unus moriatur homo, quam tota gens pereat. Sed rursum quid prodest, si totum mundum lucretur, se autem ipsum perdat & detrimentum sui faciat? Ecce ut attenditis res in arto posita est. Neque ad dexteram pro se, neque ad sinistram pro aliis excedendum est. quid igitur? Medium eligat, & si non potest omnem diem, saltem diem inter diem habeat. Habeant eum alij: sed ipse habeat seipsum. sed & alij. Non diuidat infantem viuum, ut decreuit Salomon. habeat eum vel mater, vel non mater: immo semper habeat mater. Non sibi viuatur tantum, non aliis tantum; sed sibi & aliis, ne ipse pereat; sed aliis & sibi, ne oues sine pastore succumbant. Et de his hæctenus. Præterea non id indigne- tur dominus meus, si dixero quod sentio. Dicam, sed cum licentia dicam. Quid? Quia deest semper aliquid culturæ Dei. Hoc fortè apud vos prouerbum est. sed faciam verbum de prouerbio. Laqueum debiti quadam per- plexione ratiocinando differtis, ita scribendo

- „ in epistola: Si redditum est, non debemus
- „ super hoc inquietari. si propter reddendum
- „ quæstio aliqua ventilatur, debet iudiciario
- „ ordine diffiniri, & partium allegatione & iudi-
- „ cis sententia terminari. Bone Domine, bene docuit vos magister noster proponere: utinam sic bene soluere. Soluere dico debitum, non syllo-

sylogismum. Videritis non extensa disputatione, sed compēdiosa relatione, & potius ratione, inter quos quæstio hæc versari dicitur, cui cōpetat actio, & aduersus quē detur. Principalis profectò debitor & suus creditor adinuicem habent actiones, alius directam, alius vtilem. Sed quid ad fideiussorem? Semper liberandus fideiussor proposita actione pignoratitia à principali debitore contra creditorem, soluto prius duntaxat debito ad restituēdum pignus, & ad liberandum fideiussorem. Hoc fecit dominus Vvintoniēsis, sed non effecit. nam creditorem conuenit, sed nobis pignus non restituit. Idcirco dixi quòd curta est res, donec restitutum sit nobis quod tenetur pro vobis. Est & aliud notatum in epistola vestra: quia suspēsiuè & indefinitè dixistis quid agendum esset, sed non quando. neque diem, neque horam posuistis: fortè quia non est nostrum scire tēpora, quæ in potestate sua habet Vvintoniensis. Scio domine mi, scio, quia in multiloquio non deest peccatum. Ignoscite si quid egressum est de labiis nostris, quod minus rectum appareat in oculis vestris. Ut verò hoc auderem, vos occasionem dedistis. Valet.

EPIST. V.

Domino & patri carissimo Hugoni Cluniacensi Abbati, frater Petrus Cellensis abbas salutem.

PRO amicis nostris, immo pro amicis iustitiae, amico nostro, veritatis immo amico,

E

32.

nunquam refelleremus scribere. Etenim illa amicitia in diuersis amicorū causis debet interuenire, quæ non plus iusto vergens se in fauorem alterius, æquitatis rectitudine pensat negotium, non fauoris, aut odij iniqua inflexione. Quamquam igitur vobis & excellentem prærogatiuam dilectionis debeam & honoris: huic tamē abbati sancti Laurentij Leodiensis nouo confœderatus amicitiz pacto, propter Christum quem in ipsum suscepi, me ipsū nihilominus concedo. Cū igitur vtrunque Christus in causa sit, vtrumque ad debitum honorem rependendū medijs ipse commoneo. Vos quidem, vt quāto magnus dignitate, prælatione, & nomine estis, tanto abundantiori humilitate illum suscipiatis. Illum vt secundum excellentiam maiestatis vestræ cogitet qualiter summam in summo viro humilitatem excipiat, & obuiis, vt dicitur, brachijs deuexam bonitatem sustentet. Vos, vt honestatem personæ & iustitiam quam habet ad vos, æqua libratione appendatis, & personæ honorem, causæ iudicium reddatis. Vidi personam, & amaui: audiui causam, & approbaui. In persona prudentiam, religionem, litteraturam, simplicitatem notaui: in causa retentionem pacis, malitiæ exterminationem, simultatis repressionem, & iustitiæ tenorem animaduerti. Qui de tam longè quærit pacem, nonne amat quod quærit? Qui tempore tanto & tali à sancta fratrum suorum congregatione peregrinatur, quibus putas stimulis affectionum remorde-

tur, vt vaccæ illæ reclusis vitulis mugientes, vincentes sanctitate propositi vſitatum & conſuetum affectum carnalitatis. Sed gratias Deo, quia illorum damnum quibus abſuit, & ſuus dolor recalcitrans qui abſuit, nobis in lucrum verſum eſt quibus affuit. Moueant itaque & commoueant pia viſcera veſtra quæ auditis, & intendite viro bono, viro pacifico, viro honeſto, immo veſtris monachis & fratribus, quibus valde credimus vtile, ſi pacem tenuerint, inhoneſtum & inutile, ſi à pace reſilierint. Valete.

EPIST. VI.

*Domino ſuo Henrico Comiti Palatino frater
Petrus de Cella humilis abbas
bene regnare.*

A Collateralibus veſtris à nobis quæſitum eſt, quid vobis daremus, & dies capiendi ſuper hoc conſilij præſinita. Primo itaque miror quid ego fecerim mali, quod ſic ſemper à me faciem veſtram auertitis, quod venire ad eam, vel rogare, aut nunquam aut rariffimè poſſim. Secundò vtrum ab illa tenaciſſima veſtra memoria exciderit, quòd nondum expletus ſit curſus anni, quòd LX. libras tam vobis quàm veſtris perſoluerim. Tertiò non parum doleo, quòd noſtra paupertas & debita propter præſentis anni negotia, tum de itinere Romano, tum pro Eccleſia de villa Mauri, tum pro infirmaria fratrum

E ij

quam fecimus, tum pro multis aliis, ad aures pietatis vestræ non potuit peruenire. Videat itaque benignitas vestra, & condescendens necessitatibus nostris parcat, & his non addat grauamen, sed leuamen. Valet.

EPIST. VII.

*Venerabili domino & patri A. Molisemensium
abbati frater Petrus humilis abbas
Cellensis salutem.*

34. **I**N omni possessione præcellit amicorum possessio. Potest enim parari, sed comparari non potest amicus. Nam quod incomparabile est comparari quomodo potest? An non verò incomparabile est, quod nondum habitum emi non potest, perditum æquè redimi non valet? Talem amicum frequenter quæro, nec inuenio, etiam in grege amicorum. Egregium, non de grege gregalem desidero amicum. Numero gaudeant amicorum, qui vnum nesciunt habere amicum. Vt enim ait Seneca, plura habeant hospitia, raras amicitias. Non aliter amicis vtuntur quidam, quàm hospitibus. Si nocturnum bene se præbuerit hospitium, mane laudant, & abeuntes commutant; & quot dies erunt peregrinationis, tot numerabuntur releuationes itineris. Ad tempus occurrit hospitium, nec sui causa petitur, sed tantum vt fessi releuentur. Non ita perfunctoriè amicus fortè occurrens recipiendus, sed cum labore quærendus, cum deliberatione admittendus, cum studio re-

tinendus, cum omni vigilantia læsus reconciliandus, cum instantia fortè elapsus prosequendus & reuocandus. Non possideas amicum, tanquam prædium. Nam infructuosum respuis, aut alienas à te prædium, lucrosum studiosius colis, & ad possidendum audidiorem intendis animum. Ita qui in amico requirit non animum, sed aurum, non fidem, sed faciem, non mores, sed vestes, non naturam, sed fortunam, causa propriæ utilitatis, non naturalis bonitatis amicum quærit. Repentina quoque non omnimodo approbāda est amicitia, sed quæ germinat cognitione, crescit familiaritate, frondescit consuetudine, germascit cordis amplitudine, fructificat perfecta identitate. Hic arbor fici plantanda, & circumfodienda est, vt dulcedinis fructum in agro amicorum afferat. Hic triplici filo contorquendus est dilectionis funiculus, ne facile rumpatur. Funiculum hunc torquebo vt potero, cum ad me per obsequium, per recompensationem, per vicissitudinem fortè torquendus occurrerit. Verso enim pollice de amicitia scribendo filum contorqueo. Si placet pactum coagulandæ societatis, præfigantur termini arcentes præsumptionem odiosæ præuaricationis. Liceat tamen metas transire sine reprehensione proficientem, sed impunè non liceat deficientem. Illa namq. bona est transgressio, cum vltra æstimationem amare accelerauerit inchoata dilectio. Illa quàm bona est non transgressio, sed progressio, cum iustam mensuram impleuerit amicorum adin-

uicem fidei promissio? Semper in amicitia minus pollicendum, amplius præstandum. Iam ergo amico loquar ut amico. Amice carissime, gratiæ suæ Deus addidit nouam gratiam, cum te de Priore Abbatem, de oue fecit pastorem. Recole statum, reminiscere meritum, attende donatorem, & datum donum Dei Deo resignes, non homini. Tanquam de summo Dei vertice coronam auellit, qui quod à Deo datum est, ab homine recognoscit. Idololatria est, Deo debitam homini rependere gratiam. Noui quorundam blanda lenocinia: noui vanitates & insanias falsas. Quidam sic, si molestum fuerit claustrum, dicit: *Ego nocte & die ad Deum manus, ut hanc tibi potestatem concederet, expandi, & singulibus continuis, donec id efficeretur, aures diuinas pulsavi.* Alius autem sic: *Ego ille prolocutor, ego persuasor, ego aliorum monitor, vniuersorum animos ad te inclinaui, & modo quod volo impudens negas?* Alius *Te deum laudamus*, recinit: alius nominationem à se vel concessionem factam improbè meminit. Sic plures sunt tui abbates, quam quorum tu sis abbas. Non ita, Domine & amice carissime, fiat, ut quod ab vno habes, à multis te habere credas. Non monachus qui orauit abbatem constituit, sed Deus qui concessit: non qui voce nominauit, sed qui cordibus intimauit. Non ista scribens ad ingratitudinem prouoco, ut immemor sis beneficij: non in arrogantiam extollo, ut non respicias deuotionem congregationis te sibi præfici rogantis. Hoc enim non esset amicum

instruere, sed destruere, non veraciter bona suadere, sed nequiter vitio nequissimo subdere. Ad quid ergo ista præstruxi? Ut vana loquentes compescas: ut statum dignitatis & officij tui importunitate aliquorum non minuas: ut solum Deum auctorem huius tuæ sublimationis recognoscas, & ad eius gloriam & honorem omnia facias. Obnoxium te habeat congregatio pro deuotione sua, sed cum auctoritate tua: monachus te propitium inueniat pro deprecatione sua, sed cum integritate tua. Sis beneuolus, sed & rectus: sis pius, sed & discretus: sis compatiens infirmitati, sed impatiens mali: sis bonis consentiens, sed inordinatis non parcens: sis humilis, sed non deiectus: sis largus, sed non prodigus: sis prouidus, sed non avarus. Sis in tēplo Domini basis argentea per patientiam: sis columna marmorea per inflexibilem iustitiam sis capitellum habēs sculpturam liliorum, per cōtemplationem assiduam. Sis arca testamenti: per abundantem gratiam: sis virga Aaron, per disciplinam: sis mensa Domini, per doctrinam: sis candelabrum, de auro mundissimo per bonam famam: sis propitiatorium per misericordiam: sis tabulæ testamenti, per veteris & nouæ legis scientiā: sis cortina per caritatem, sis saga cilicina per humilitatem: sis templum Domini, per continentiam & castitatem. Non habitet iuxta te malignus, non audias vocem sanguinis, non sermonem susurrij. Fortissimi in Israel & doctissimi ad bella, id est, honestissimi & probatissimi

E iiij

monachi, lectulum tuum ambient propter timores nocturnos. Malæ suspicionis homines non tibi cohabitent, non coambulent, nisi fortè rarò & secretiùs corrigas & benigniùs corripias. Aliquando enim sic emédantur mali, dum pietate reuocātur pastoris. Quæ namque cum aliis, vel saltem post alias oues, non recurrit ad ouile, si ex infirmitate, portanda, si ex malignitate, cogenda est. Ad te confugientes per humilitatem inueniant matrem, à te resiliētes per contumaciam, sentiāt seuerum patrem. Non sis præceps in iudicio, non mutus in consilio, non verbosus in conuiuio, non arrogans in publico, non detrahens in secreto, non avarus in proprio, non prodigus in alieno, non contumeliosus in capitulo, non negligens in monasterio, non effusus in refectorio, frequens in oratione, discretus in cōfessione, assiduus in lectione, profusus in lacrymarum effusione, largus in pauperum miseratione, ardens in contemplatione, affabilis in hospitum susceptione. Pauca & vera sint eloquia oris tui. Procul à te simulatio, dolus nunquam in corde, fraus nunquam in ore tuo. Præ oculis timor diuinus, præ manibus beatus Benedictus. Extra Deum nihil agas, extra Benedictum nihil præcipias. Vale.

EPIST. VIII.

*Amico suo carissimo H. abbati Pruliaci, Frater
Petrus Cellensis abbas, accipere de
spiritu Moyfi.*

A Micorum monita eo affectuosiùs susci- 35.
piuntur, quo ambitiosiùs animorum
compago adinuicem consolidatur. Nescit
mutui amoris vestri coagulum, qui familiari-
ter non est admissus ad secreta ipsarum me-
dullarum. Ab ipsius, igitur medullis verbum
amicæ consolationis mutuans, æquè vsque ad
tui cordis secretiora rogo vt admittatur, &
vice mei fungatur officio dilectionis, & sup-
pleat dispendia solitæ confabulationis. Quid
est, domine, immo frater & amice? nondum
enim dominum redoles. quid est? De statione
quietissimi portus ad marina discrimina tran-
stulerunt amici tui, aut vt verius fatear, ad
molam te posuit benignissima manus Dei
tui. Quid igitur facies? Planè tolle molam,
& mole farinam, de qua subcinericium facias
in conuersione peccatorum, vt conuertantur
à viis suis pessimis, & viuant. Similaceum ni-
hilominus in exhortatione bonorum, ne
peccent, & non recordentur iustitiæ eorum
quas fecerant. Reuera, carissime, ad molam
positus es, qua in spiritu vehementi conteras
alios in malis, & ipse conteraris in afflictio-
nibus. Sed attende diligenter, quia mola orbi-
culari motu nunquam & nusquam excedens

orbem persequendo superficiem grani suppositi extenuat in minutissimæ farinæ speciem, vnde conficiatur panis in escam hominum. Sic nempe omnis labor & vexatio tua, quæ tibi dabit intellectum, æquitatis rotunditate circumuoluatur, vt ne quid nimis facias, vel feruentius agendo quàm toleret complexio tua, sine infirmitas tibi commissorum, vel remissius quàm expédiet ordini & officio tuo, siue quàm permittat regula & regularis consuetudo. Rotundo itaque perge cursu in omni negotio tuo, modestiam seruans in his quæ ipse geris, & in his quæ aliis ingeris. Appende mores temporis cum hominum moribus, & versa ex hoc in hoc: quia calix in manu domini plenus mixto. Nondum eliquata est natura, nondum defæcata, nōdum fæx corporeæ grauedinis exinanita. Corpus quod corrumpitur aggrauat animam. Parcendum itaque interim corpori: nec danda licentia animæ, vt suis excurrēs appetitibus in ipso itinere tardum & lassum reijciat corpus. Spiritus enim promptus est, caro autem infirma. Iugale suum ferre debet anima, non interficere. Moueat se quidem semper spiritus ad meliora, sed ægotantem equitaturam suam calcaribus cruentis supra modum non vexet: ne fortè cæde lacerata obeat, & sanguinem eius de manū immoderati spiritus dominus requirat. Nemo vnquam carnem suam odio habuit: sed fouet eam, sicut & Christus Ecclesiam. Procedat & præcedat anima carnem, sed stationem faciat, quo saltem serò man-

sionem possit assequi subsequens caro. Morandum tamen, non remanendum est propter carnem. Non erit molesta mora, si sit modesta. Quousque respiret caro subistendum, non quousque expiret. Sciat se caro vti itinerarijs recreationibus, non mansionarijs delectationibus. Si de itinere grauatur, festinet ad mansionem. Erit enim illi mansio & grata pro requie, & certa pro æternitate. Huc applicuit nos orbicularis motus.

EPIST. IX.

*Roberto abbati de Bullencurte, Frater Petrus
Cellensis abbas salutem.*

INfra robur animi tui, quæ à me prodire possunt consolationes residere non ignoro. Commendabilis illa solum fortitudo est, quæ fatigata robustior, oppressa liberior consurgit. Leuat namque fortunæ importunas sine molestia sarcinas, portat sine pondere, deponit sine lassitudine. Accrescit fortè cumulus ponderis, sed & virtutis. Iacet enim virtus sine palæstra. Vbi deest lucta, virtus videtur quasi discincta. Mollis & tenera est, cum in lectulo prosperitatis extenuatur. Sumit verò suum habitum, immo seipsam, cum obuiauerit quod euincendum sit. Exerta concurrit, ubi de victoria palmam reperit. Prouocata melior, lacerata recentior, subito deprehensa & moderatior & cautior efficitur. Non

36.

turbatur repentino incurſu, non frangitur hoſtium coaceruato exercitu. Non ſeneſcit debilitate, ſed conſeneſcit maturitate. Deſerit quem in ſe non conuerterit. Vtitur ſiquidem hæc aliter iſto, aliter illo homine. Aut enim ſe tibi contemperat, aut ſe tibi informando cõparat. Nec eſt minor, ſi minus in alio; nec amplior, ſi amplius in alio. Proficere dicitur, cùm ex ea proficitur. Hæc à corporea natura diuerſum fortitur, & quod eſt ab origine & quod efficit in homine. Origo eius à creatore, ſed ad vtilitatem creaturæ. Quid enim eſt virtus hæc, de qua loquimur, niſi vapor & emanatio virtutis Dei? Vaporatur ſubdita Deo anima vitali tam calore, quàm odore, quatinus calore iuſtificetur, odore glorificetur. O gloriæ odor! ô calor vitæ! Tam nemo ſine altero beneviuit, quàm nemo ſine altero beatè. Beati ex alio Angeli, ex alio homines boni. Sic autẽ Angeli beati, vt & boni, quia nec beati eſſent, niſi boni fuiſſent, ſicut odor ſemper cum calore. Nam ſine calore nihil olet, calet tamen aliquid, quod non olet: ſicut & bonus quandoque inuenitur, qui nec dùm beatus eſt. Eſt verò arra beatitudinis bonitas, quam qui non deſerit, eius conſecutiuo carere non poterit. Vale.

EPIST. X.

*Venerabili abbatissa Fontisebraldi Mathildi,
Fr. Petrus Cellensis abbas, suus in Christo
amicus, gratiam & gloriam
sponsi aeterni.*

INSPECTOR conscientiarum Deus & te- 37.
stis nouit quibus dignationem vestram
præcordiis exceperim : quàm incomprehen-
sibiliter ad confœderationem mutui amoris
exultauerim : quamque incomparabiliter
omni auro familiaritatem vestram prætule-
rim. Vnica siquidem & purâ me vobis prius
conciliauit gratia, tum deinde ampliandi
amoris multiplex superuenit causa. Vbi enim
nulla operum præludia, nulla præcedunt of-
ficiorum blandimenta, vnde amorem dixe-
rim procedere, nisi ex gratia? Hæc enim ope-
ratur motibus propriis & spontaneis in corde
hominum sine pœnitentia, cum multa reue-
rentia, & absque inuidorum calumnia. Hæc
aufert suspicionem, confert affectionem, de-
fert honorem, refert pudorem. Hac interue-
niente soluantur malignantium susurria, con-
solidatur bonorum concordia, & prorsus adi-
muntur insidiantium machinamenta. Hæc
spirituum coagulum, ac indissolubile bitu-
men animarum, diuersitates morum ad vnâ
consonantiam reducit, & meritum inæqua-
litas ad æqualitatis contemperantiam pro-
portionaliter recolligit. O gratia gratiosa!

sine te omnia mala, tecum omnia bona. Sine te, inquam, inanis vniuersa creatura, & à te repletur Angelica cum humana creatura. Tu reformas deformia, lapsa reparas, confirmas debilia, clausa referas, congregas dispersa, & obscura illuminas. Tuum est quòd sum, quòd viuo, quòd sapio, quòd sanctorum vestigiis deuotus procumbo: tuum, inquam, tuum est quòd te in templo sancti tui nominis, quòd in sanctuario tuæ glorificationis videre & adorare te merui. Si enim sanctiùs adoraris in animabus sanctis, quàm in templis lapideis & manufactis, quanto magis in sacris visceribus virgineis? Nihil enim est tibi his carius, acceptabilius nihil, cùm æthere nitidiùs, firmamento reluceant iocundiùs, cœloque sublimiùs. Vbinam tale quid inter homines reperies? Credo in illa tua Fōtisebraldi Abbatissa, quæ nobilitate carnis nemini secūda, spiritus generositate in multis celeberrima, castitate præcipua, humilitate conspicua, liberalitate profusa, feruore religionis est decenter succensa. Reprimo stylum, ne assentatoris sustineam periculum. Parciùs enim laudare amicos, ampliùs amare debemus. Seueriùs quoque mala eorum corrigere, quàm malè sana palmando contrectare. Condemnatur verò non minus desidiæ, qui vano timore gloriam Dei reticet, quàm inuidiæ, quem alterius fortuna contorquet. Solem etiam de mundo tollere non immanioris æstimo sceleris, quàm dotem naturæ & gratiæ à creatore in creatura collatam obumbrare silentio malignitatis.

Virtutum namque prædicatio, Dei est glorificatio: nec tutum est cuiquam senescire quod habet habere, cum damnum exinde citius possit euenire. Nos, inquit Apostolus, *non spiritum huius mundi accepimus, sed spiritum qui ex Deo est, ut sciamus quæ à Deo donata sunt nobis.* 1. Cor. II. 12.

In filiis huius sæculi hæc comprobatur prudentia, si res familiaris frequenti supputatione creuerit multiplicata. Itidem cœlestium negotiator mercedum quotidiana emolumenta assidua ratiocinatione debet compensare, & quæ minùs ad thesaurum sufficiunt omni instantia perquirere. Vnde Psalmista: *Notum fac mihi, domine, faciem meam, & numerum dierum meorum quis est, ut sciam quid desit mihi.* Psal. XXXVIII.

Quomodo namque potest scire is quod sibi deest, cui non constat quod adest? Itaque requirat sarcinulas, marsupia excutiat, pecuniam appendat in statera, cogitet sumptus, drachmas computet, domumque euertat, ut sciat quid desit sibi. Si desunt agri primitiarum, fertilis videlicet caritas supernarum virtutum: si paradus malorum punitorum, scilicet plenitudo bonorum operum: si fons hortorum, hoc est vena sanctarum deuotionum: si reclinatorium aureum, quod est requies omnium affectionum: festinet, discurrat, transmigret per nundinas, per marina discrimina, & per regiones remotas, quia ubi non sufficiunt propria, succurrunt aliena. Præterea & puella querat lanam & linum, ut ex vno calidam,

ex altero faciat candidam tunicam. Martha calida vtatur, Maria cādidā. Hæc enim actio-
ni, illa contemplationi aptatur. hæc orat, illa
laborat: sedet ista, sudat illa: hæc quiescit, illa
currit: exit ista, illa intrat: ista inchoat, illa con-
summat. Felix anima, cuius promptuarium
talīa resudat vnguenta, cuius dolium talia re-
fundit libamina, cuius virgultum eiusmodi
stillat balsama, cuiusque horreum simillima
continet aromata. Felicem dixerim & locum,
vbi tales comparantur species, vbi gemmæ
væneunt incomparabiles, vbi exiguo pretio
res acquiruntur valde desiderabiles. Vidi, vi-
di in foro speculum non, alteri quā filię re-
gis congruum: vidi monile non alterius
quā intactæ virginis collo appendendum.
Hoc speculum castitatis est, virtutis, & humi-
litis: quæ terra nostra in publicis contracti-
bus hæctenus habere non consuevit. Res si-
quidem pretij est inæstimabilis, raro inueniēs
venditorem, rariùs emptorem. In eius certè
comparatione cælestes exhauriuntur thesau-
ri, negotiatores requiruntur ditissimi & diui-
nissimi, comparatores quoque liberalissimi.
Cæleste siquidem commercium supercæle-
ste desiderat pretium. Quid nempè virgini-
tate cælestius? humilitate quid excelsius? In
diademate Salomonis prefulget altera, in the-
sauris regiis pretiosior est altera. Ex vtraque
tamen omnium artifex sapientia monile
composuit, & vñale proposuit. *Qui potest,*
Matt. 21. 12. *inquit, capere capiat.* Ad hoc manus adolescen-
tularum satis ambitiosè quasi tētantes emere
circum-

circumuolitabant, sed audito pretio statim omnes resiliēbāt. Ad extremum pene iam desperato negotio, virguncula quādam, Andegauensis Comitiss filia surrexit, manum ad fortia misit, & noua commutatione pro rege Anglorum regem commutauit Angelorum. Hæc gloriosa dicta sunt de te, carissima domina. Indulge autem mihi, quod sermone diffusiore te plus iusto detinuerim, & credas ex abundantia amoris copiam protulisse sermonis. Ora ergo pro nobis. De componendis autem quibuldam sententiolis sermonis tui non sum oblitus, sed tam citò implere non potui pluribus impeditus. Vale.

EPIST. XI.

Dominae suae seruus suus spiritum rectum.

QUOD filius hominis non venerit pacem mittere in terram, sed gladium, & quod Spiritus sanctus super principes nostros in igne descenderit, quodque Isaac ignem pœnæ & ligna disciplinæ nostræ portauerit, scienti refero. Hæc etiam fortassis ratio, quare Iacob in benedictione filiorum Ioseph manus trāsuerfauerit: quatinus singulorum non natiuitatis ordo aut priuilegia, sed meritorum & morum attendantur officia. Virtute namque discretionis seruata, & misericordia in sua triumphat patria, & iustitia congruè disponit totius regni gubernacula. Cū itaque palatium ingredimur misericordiæ, flores & fru-

38.

F

ctus decerpimus oliuæ. Cùm ad tribunal iustitiæ assistimus, palmam reportamus, & de pomis lunæ & solis satiamur. Hæc in reginæ nostræ vestimento delectabilis varietas, & ad tollenda fastigia filiorum non solum hominum, sed & Dei immutabilis immutabilitas & æterna æternitas. Ioannes in aqua tantum baptizat, nec vulnus originalis peccati sanat. Christus Iesus in spiritu iudicii, & spiritu ardoris, & cælum reseat. *Omnia*, inquit Aposto-

Hebr. IX. 22. *lus, mundantur in sanguine, & non fit remissio nisi in sanguine.* Neque itaque vestimentum mixtum sanguine sit in combustionem propter peccati transgressionem. Christus septies contra velum sanctuarij proprio digito suum aspergit ad emundationem criminum nostrorum sanguinem. Hoc nos docuit vnus magister noster qui in cælis est, hoc legislator in figura monuit, *Non auferes*, inquiens, *sal fæderis Dei tui in omni sacrificio.* Satis dictum est sapienti. Priorem illum sancti Aigulsi excuso, quia quod facere potuit & debuit, fecit. Si aliquid vel aliter fecisset, offensam nostram incurreret. Vale. Proderit tamen peccanti præcedente pœnitentia oratio vestra & sancti conuentus vestri. Iterum vale.

Leu. II. 13.

EPIST. XII.

Priori suo suus abbas.

REs humanæ qualiter in mente diuina
pensentur, conspectibus hominum in hac
volubilitate mundanorum absconditur. So-
lummodo angelica puritas his prout datur
admiscetur arcanis, ac de profundo mysterio-
rum edocta quibus dignum videtur reuelare
sufficit. Interim temeritas nostræ sic in se ipsa
obscurata confunditur, vt nec remota sensi-
bus aliquatenus apprehendat, nec saltem vici-
na cognitione perfecta contingat. Digna hæc
vltio in præsumptorem, vt & de præteritis
arguatur, & à futuris coerceatur. Timore
huius periculi, mi dulcissime, admonitus,
de præsentibus quidem angor, & tamen
futurorum præsentiens caliginem vias inco-
gnitas reformido. Gratia verò diuini auxiliij
si affuerit, nec profunda pelagi pertimesco,
nec etiam quæque intentata arripere dif-
fido. Et si enim parum roborata trepidet af-
fectio, poterit sine dubio consolidari insu-
perabili superni luminis patrocinio. O
Iesu! cui vanum fuit ad te confugere?
cui malè cessit te & inter vepres hærentem
cornibus quærere? Te quidem nec pietas de-
serit, nec omnipotentia: atque ob id tuis nec
pium ferre reculas suffragium. Sua potius pe-

F ij

392

rit quicumque periclitatur diffidentia, quàm tua inclementia. Nostro si dignaris obsequio, mentem nostram compunge tactu interno, & in funiculis amoris tui reduc à sæculo, & deduc in eremo. Tumultus non quiescat, donec tanquam spumam ad littoris quietam nos eijciat. Fiat, fiat super nos misericordia tua, domine. Non conuertatur amaritudo passionis, nisi omnia expurgauerit superflui humoris. Honoris ambitio, carnis delectatio, amicorū confabulatio, consanguineorum visitatio, subiectorū prælatio, maioris potestatis ostentatio, vt quid? Nonne his anima compeditur, ne ad superna euadat? Nonne his complicatur, ne virtutum pennis cælestia petat? Et horum quidem finis erit, sed sine fine pœna durabit. Alterum horum fieri necesse est, aut vincere hæc, aut ab his vinci, aut superare, aut subdi, aut fugere, aut includi. Sanius est igitur nudum enatare, quàm vestitum submergi: solum effugere, quàm cum multis periclitari. Quid cor humanum expauescis? quid refugis? fructus solitudinis non est quidem mollis, est, tamen fortis. non est pinguis, est tamen dulcis: est durus, sed in cortice: est acerbus, sed in superficie: est noui saporis, sed inchoantibus: est conterens dentes, sed non consuescentibus. O cor humanum, cur times renouari? cur abhorres reparari? Velis, nolis, hinc abire compelleris: velis, nolis, sine mora emigrabis. O cor excors! cur non curris ad dominum cordis? Cur omnia colligis, & te ip-

sum non colis? Dignitate præcellis, potestatem excedis, auctoritate quicquid creatum sub cælo est euincis. Nobilitatis tuæ progenies quanti sit, obignobilem conuersationem non attendunt, qui post corpus suum te ponunt. exemplar tuæ formationis non meminerunt, qui inter corpus & spiritum quæ sit differētia non animaduertunt. Natales tuos relege, & de quàm spectabili sis genere recole. Generi tuo maculam seruitutis noli irrogare, quia seruitus tibi non à te debetur. Etenim tu in loco sublimi sedere, cæteri verò tibi debent assistere. Tuum est mandare, cæterorum ad mandatum venire, & pro contemptu vindictam excipere. Tuum est iniungere, subiectorum sine discrimine iniuncta effectui mancipare. Soli Deo si dignum præstiteris obsequium, tuum ad omnia valebit imperium. Hoc interim confabulatorium omittam, & tempus & locum constituam, quo narrationes, rationes, & allegationes vtrinque liberius audiam. Valete.

EPIST. XIII.

*Frater Petrus Cellensis abbas T. Priori
Molismensi salutem.*

40. **S**acratissimæ passionis & resurrectionis
Dominicæ solemnes feriæ, dies cum suis
horis, membra cum suis officijs non immeri-
tò hætenus vendicauerunt. Quid enim digi-
tis meis cum calamo scribere in die, quo di-
stenditur in cruce dilectus ex dilecto, qui fa-
ctus est sponsæ suæ fasciculus myrrhæ? Ma-
n^o domini tornatiles, aureæ, plenæ hyacinthis,
clavis perforantur, & manus meas ad aliud
quàm ad distillandum myrrham probatissi-
mam occupabitur? In vno oculorū, & in vno
crine colli sponsæ vulneratum cor eius, & cor
meum inania & superuacua meditabitur? Po-
tius resignet dies hæc in affectu Christiani af-
fectum morientis Christi, compassionem in
membris, mortificationem in concupiscen-
tiis, expiationem à vitiis, conformationem in
officiis caritatis. Ecce cur non responderim
epistolæ tuæ die sequenti postquam eam
accepi. Acepi namque eam, cum de vi-
tuli saginati pelle detrahenda & de agno as-
sando iam ageretur, & manus ac pedes iunio-
ris filij Rebecca parabat superuestire vesti-
bus Esau valde bonis, id est sacramentis Ec-
clesiasticis. Iesus vestimenta sordida nō pro-
pter peccati contaminationem, sed propter
mortalitatis contaminatam conditionem

deponebat , & sacram manuum ac pedum
ablutionem , non carnali depositione for-
dium , sed conscientiae bonae interrogatio-
ne in Deum intitulabat. Iam ex odore vn-
guenti à peccatrice , sed poenitente , in caput
vel pedes saluatoris effusi implebatur do-
mus : iam conuiuium pinguium , conuiuium
medullarum apponebatur , vinum mera-
cissimum crateris infundebatur. O bone
amice , quis scriberet , immo quis non bi-
beret ? Comedite amici , & bibite , & ine-
briamini carissimi , continuabatur , & de mor-
ticinis pellibus atramento liniendis cogitare-
tur ? Ecce quare statim non respondi , cum
libentius illis pulmentis intenderem , quam
de responsione vestra cogitarem. Quid de
sabbato dicam ? Quid , inquam , dicam , nisi
quia sabbatum est ? Sabbatum reuera sed de-
licatum , sed sanctum , sed gloriosum. Non
licet igitur digitum extendere , & loqui quod
non prodest. Deinde die sequenti , resur-
gente & cum spoliis multis Domino re-
deunte , aliquid de præda , pretiosissima ve-
niens in occursum depono. Rursum in-
tueor triumphum , excipio renascentia si-
dera : post solis ortum & auroram nascentem
in thesauris meis consigno , vt hæc
spes reposita in sinu meo doceat , quod *fle-
bile principium melior fortuna sequeretur*. In his
diebus nemo alius scripsit , nisi tantum Pi-
latus. quinimmo destructum est quod ad-
uersum nos erat chirographum. Post hæc ve-

rò tandem, cùm exiuit homo ad opus suum, & ad operationem suam vsque ad vesperam, recogitauit seriem somniorum atque sermonum epistolæ tuæ, & extrahens eam de tenebrosis ad lucem, apprehendi non esse meam. Vbi enim mea, quæ de me in principio narrat super id quod vidit, aut audiuit ex me? in medio fingit me dixisse vel fecisse quod non est verum? in fine comparat se illi qui sine peccato non est? Non sibi conuenit imago epistolæ tuæ, bonæ frater & amice. Primum vinum ponis, deinde acetum supponis, ad vltimum mixturam myrrhæ & aloes apponis. Non reiicio vsquequaque laudem mihi propinatam, amplectens dicentis beneuolentiam, non dicti conscientiam. Languor enim ille fortissimus, quo sub sole vniuersa vanitas hominum laborat, & me cum aliis corripuit, quatinus suaues illas aurium modificationes necdum propulsare didicerim. Naturale est hoc vitiū, & vt ait Seneca, naturalia corporis aut animi vitia leniri arte possunt, deleri non possunt. Hoc animi scabies est, sed differenter occupat. Inuadit quandoque inferiora, quandoque superiora, quandoque totum simul, & superiora & inferiora. Superius est in animo, quod ad rationem pertinet: inferius, quod ad sensualitatem: totum quod ad destinationem, siue deliberationem. Fallaci igitur suppositione: dum aliàs animus fortè ad quædam maiora & meliora occupatur; subintrat inanis gloriæ

amor, & foliis ficus turpitudinē suam obumbrans, in latibulo anguli sedet, vt cum domina sua ratio absens fuerit, viro, id est naturali appetitui sese misceat, & ex tali concubitu Ammonitæ & Moabitæ, qui non inrrant in Ecclesiam Dei, vsque ad tertiam & quartam generationem, procreantur. Quod enim ab initio conceptionis & generationis vitiosum erit, ad innocentie gloriam quo modo intrabit? Nūquam igitur opus vanæ gloriæ numerabitur in remuneratione veræ gloriæ. Ideo Abrahæ dicitur, *Eiice ancillam & filium eius.* Gen. *Non enim erit heres filius ancillæ cum filio liberæ.* XXI. 10. deinde quod periculosius est, ascendit sursum hæc scabies, & tangit ipsum verticem sanctum animæ, vbi est imago & similitudo Dei. Quærit suam non Dei gloriam, abutitur voluntate diuinæ tam generationis, quàm regenerationis. non nominat filium suum, id est opus, Iohannem, sed Zachariam. Hæc iam non celat, & non velat, sed reuelat turpitudinem suam, & iuxta sapientissimum, contra animam suam Adonias petit Abylac Sunamitem, quæ regi David solebat obsequia præstantissima & incentiuu castissima præbere. *Vnum est,* inquit 3. Reg. *ac si regnum petat.* II 22. Adonias cupidissimus regni, est ratio infecta amore priuati boni. Ambitistè Abisac sibi assumere, cum tota ratio absorbetur à voragine cenodoxie. Sed occiditur, quia à Deo separatur. Hoc malum sub sole est. Adhuc amplius malum est, cum tota hominis intentio & operatio ad hanc iniquitatem & negationē contra Deum

se incuruat. A laqueo sic contorto triplici funiculo caue tibi, ô amice: quia malum est oblatiis honoribus delectari, peius negatos appetere, pessimum pro sublatiis in iram proficere. An erat meum abbatiam illam dare cui vellem, subtrahere cui vellem? Et quis ego? & quid ego? Præcipue comparatione tanta: Archiepiscopi scilicet Lugdunensis, Episcoporum quoque Lingonensis & Augustudunensis: abbatum etiam Molismensis, sancti Iohannis, quintiacensis: quid ego, nisi puluis & cinis? Cælum & terram cum istis testes inuoco, nisi fortè euanuit à sensibus meis, quòd de persona tua nil inhonestum, nil criminofum in eorum auribus deposuerim. Reuera non statim acquieui, & abiit sermo in regionem lōginquam. Nominatus est iste. non dissimulaui dicere quod audieram, vel videram: reticui tamen quod ignorabam. Nominatus est Petrus de Viuariis. heu mihi! pro quo contra amicos, & Episcopos & clericos & familiares, alia vice fortissimè steteram & constantissimè, nunc quoque vt potui steti. quia non potui vt esset abbas, vertit ad mecum quibusdam suorum terga, & non faciem. Hoc anno multa horum similia, non per visum, sed per sensum & experimentum passus sum. Amici quondam mei à longè steterunt, & iam non ambulant mecum. quid itaque faciam? Non ibo? sed inobediens ero. Non ibo? sed superbus apparebo. Tacebo? sed conscientiam timeo. tacebo? sed pecuniam Domini abscondo. tacebo? sed

callidus, vel stultus reputor. Vtrique parti placebo? Sed hoc erit simulatio. sed hoc erit impossibile. quid igitur? Dirige domine Deus meus in conspectu tuo viam meam. quid inquam? Da sermonem rectum & benefonātem in os meum. Hucusque satis. Nam parietem litterarum fodere, ne dicam impugnare, parco. Rimas tantum & quasdam scissuras per circuitū obambulans designo, sed & resigno. Nam quod fractum est, si quid tamen fractum est, malo resarcire, quàm noua damna facere. Fiat pax.

EPIST. XIV.

*Frater P. Cellensis abbas, dilectis fratribus, filiis
& amicis Caxiacensibus, sapientiam
scribere in tempore otij.*

PRæter solitum, nec non & votum meum, 41.
in virga non in spiritu mansuetudinis scribere vobis proposui, qui paterna præcordia aculeis litterarum vestrarum absq. misericordia perfodere non timuistis. Mouet me & commouet plurimū pia senectus in patre, miseranda compassio in fratris abiectione, seria & intemperata oratio in paginarum serie. Dissimulare, nec tam manifesta redarguere, pars eiusdem criminis videtur esse. quis enim iste impetus? quæ ista ebrietas? quod suffugium mentis & sensuum, fratrem abdicare, patri contradicere, ius monastici ordinis sic perturbare? dura & dira, fratres mei, æmulatio vestra, morte tristior, inferno inferior, saxo durior, amarior absinthio, felle acetosior.

Quid enim? pietas negatur, necatur misericordia, honor paternus conuitiatur, infimulatur amor fraternus, societas repellitur, regula violatur. O irreligiosa religio! ô ficta sanctitas! ô inuidiosa caritas! Siccine, fratres mei carissimi, siccine Christum didicistis? Nonne Deus noster, Deus pacis est, & non dissensionis? O stulta vecordia illorum, qui pacem suam dicunt, si fratrem non receperint: mortem, si viderint: prosperitatem, si socium exterminauerint; deuotionem, si opus deuotionis condemnauerint. Hæc in te pestis, Ioseph, grassatur: hoc in tuum caput infortunium sine culpa refunditur. Vendere enim te fratres volunt, quem videre nolunt. Paternæ gratiæ impedimentum sibi credunt, quia patri gratiosum sentiunt. Sic sic fratrum ingritudinem mercatur gratitudo patris. Si defuerit, inquiunt, amatus filius, ad nos resiliet paternus affectus. Dum Ioseph visibus sistitur patris, rarior ad nos deflectitur dulcedo paternitatis. Tollamus fratrem, & habebimus patrem. Quàm iustiùs & iocundiùs faceretis, si vobis filialem deuotionem inuisceraretis. Hoc nempe affectum multiplicaret, non deuastaret. Boni fratres & amici carissimi, currebatis bene. quis vos fascinauit sic patri scribere, sic fratrem proscribere. quid enim Tes. mali fecit? quid tam atrocis iniuriæ dignum perpetravit? quod tam immanißimum suum facinus, vt sic contra legem sine lege vestro iudicio nõ rediret? Vbi sunt misericordiæ vestræ antiquæ quibus ve-

niam criminosis indulstis? quibus sceleratis commissa facinora remisistis? O quanto impurioris, quantoque indignioris vitæ pluribus & locum misericordiæ impetrastis, & gratiam immeritam prorogastis! Vbi fornicationes T. vbi inordinatæ comestiones? vbi ignominiosæ operationes? vbi innominandæ confusiones? Opera lucis, non tenebrarum opera T. opera diei, non noctis: opera prædicanda, non præiudicanda. O liuor! ô inuidia! quo ausu ingressa es sanctuarium Dei, cubile altissimi, thronum Regis æterni? qua tyrannica præsumptione sanctorum præcordia rupisti & irrupisti, quinimmo & dirupisti? Ecce pondere gemitum & clamorem validum de corde amicorum pressisti. Vnde namque vstio illa cordis, vnde angustia mentis, nisi te succendente, nisi te constringente? Prorsus vsque ad internecionem animæ combureris, & ex hoc paupertas & angustia cordis. Non fratres, non aduersum me ira, siue commotio vestra exardescat. Nequaquam enim tacere vobis debui insipientiam vestram. Acquiescite tamen consiliis meis, & quod inconsultè factum est, consultò corrigere ne differatis, quàm citius ergo poteritis, ad pedes Domini abbatis simul procumbatis, satisfaciennes pro erratu non leui: neque surgatis nisi benedictionem ab ore paterno reportaueritis. Mihi quoque, si in aliquo excesserim, obsecro indulgeatis. Diligo enim vos, Deus scit. Valet.

EPIST. XV.

*Fratribus, filiis, & amicis suis carissimis Cuxia-
censibus, frater Petrus humilis abbas
Cellensis salutem.*

42. **N**on leuitas, aut leuis necessitas ut loquat
suadet, patris languorem, matris deso-
lationem, fratrumque attendens commotio-
nem. Verum est, verum est, fratres carissimi,
illud Euangelicū: *Percutiam pastorem, & disper-*
gentur omnes gregis. Quid autem horum grauius,
percurssio pastoris, an dispersio gregis? Equi-
dem diuisum sine dubio alterum latis graue:
simul verò vtrumque pene damnum intole-
rabile. Immorabor igitur plangendo patris
passionem, an consequar reuocando fratrum
exterminationem? Sed ut verū fatear, vtrum-
que, si vtrumque contigerit, lugebo. Sed alte-
rum affectuosiùs, alterum ambitiosiùs. Nam
patri vberius lacrymas profundam laboranti
in defectu naturæ: fratribus emittam inten-
sius redargutionū sagittas propter excessum
culpæ. Morbis namque naturæ compassio-
nem, corruptioni animarum debemus repre-
hensionem. Condolendum, non imputan-
dum est seni, quòd egreditur mundum: im-
putandum vel potius amputandum in Chri-
stiano, si rumpere tētet dilectionis vinculum.
Re integra, fratres carissimi, nondum immi-
nentia lucrosiùs euitantur pericula, si affuerit
oculus prouidentiae, & manus vigilantis cau-

Matt.
xxvi. 31

telæ. Casus fortium terrere debet fortunam pauperū. Nam tua res agitur paries dum proximus ardet. Quātumlibet potētissima, quātumlibet opulentissima regna in breui contentionum molestia succensente corruunt. Mundi ipsius machina stare non poterit, si se elementorum incontinentia conturbauerit. In proximo Cluniacensis Ecclesia antiquitate senior, religione feruentior, rerum abūdantia plenior, mūltitudine numerosior, quid fecit? Scandalum paruulis, piis mœstittiam, religiosi verecundiam, amicis pudoris iacturam, vniuersæ Ecclesiæ velamen opprobrij. Vbi enim ambitur honor sæcularis sub tegumento religionis, quando ab eodem arcebitur crudus animus in maturitate dilectionis? Si ita fauus mellis acescit, 'quid absinthij amaritudo, quid aceti faciet acedo? Proverbium est, Suauiter corrigitur, qui exemplo aliorum emendatur. Maneant igitur in vobis vnitas, pax, & concordia, vt id ipsum dicatis omnes, & non sint in vobis schismata. Quādiu patrem vestrum, immo nostrum, vobiscum retinere poteritis, alium ne cogitetis. At vbi inuitabili cogēte necessitate aliter disponendum fuerit, spiritus paracletus inuocādus, cœtus sanctorum conuocandus, & vir bonus religiosus, discretus, litteratus, pius, & in sancta religione enutritus, qui patris vestri imitator sit, omnimodo inuestigandus. Valete.



PETRI ABBATIS
CELLENSIS
EPISTOLARVM
LIBER III.

EPISTOLA I.

*Dominis suis & patribus Priori cum ceteris de Monte
Dei, Frater Petrus Cellensis indignus abbas
vsque ad montem Dei Oreb.*

43.



Aliud materia, aliud suadet
scribere vestra reuerentia.
Et materia quidem, quæ
est carissimi filij nostri
translatio ad vos, potius
semper filere, vel instan-
tius flere, quàm scribere
admonet. Sanctitatis autem vestræ reuerentia
sancta & digna exigit. Itaque non quælibet le-
uitia & secularia, sed fortia & cœlestia debet
assumere, qui vobis proponit scribere. Quid
autem caritate fortius, quæ fortis est vt mors?
quid cœlestius, quæ etiam omnem exuperat
sensum

senſum? Et de hac quidem, quantum ad noſtrum ſe inclinare dignata eſt ſenſum; *Maiorem hac dilectionem nemo habet, ut animam*

Ioan.
xv. 13.

ſuam ponat quis pro amicis ſuis. Quanti igitur apud meam humilitatem veſtra profecerit dilectio, æſtimare poterit, qui quod pro ea re-poſuerim pretium diligenter penſauerit. Certè non aurum, ſed virum ſecundum cor meum: certè non argentum, ſed quem habebam quaſi vnigenitum: certè non lapides pretioſos, ſed lapidem, quem mihi tẽxerant in ſpecialis amoris titulum, in hoc propoſui commercio. Scio, nec prorſus dubito, quod ſi omnem ſubſtãtiam domus mee dederim pro ſancto amore veſtro, nihil tamen in comparatione illius attulerim. De Monte namq. Dei non amor mundi, ſed amor cœli deſcendit: non carnalis amor, qui tanquam nubes matutina pertransit, ſed æterna caritas quæ nunquam excidit. Non enim recipit æſtimationem, quod omnem excedit accidentium licitationem. Diuini ſiquidem amoris ſuauiſſimam ſanctarum animarum pius redolet amor. Et quid humana paupertas dignum reſcripſionis, non dicam ad ſupernum amorem, ſed ſaltem ad quãlibet ſanctorum dignationem, in omni theſauro inopiæ copioſe abundantis reperire poterit? Sanè nil ſanioris mihi videtur ad hoc conſilij, quàm vt gratiam rependat pro gratia, ad illius imitationem, qui potius ex abũdanti, quàm ex indigenti, non aliud quidem ſolet dare pro gratia. Itaque & ego gratiæ veſtræ gratias ago, non tamen vacuas,

G

non vacuas, sed vltra facultatum mearum sufficientiam largas & diuites. Non enim de arca, sed de conscientia, non de fundo marsupij, sed de intimo cordis, non de supellectili domus, sed de intimis viscerib. profero quod accipitis. Si enim aliter fieri posset, si aliud pretium, quantūcunque magnum, vestra sanctitas exposceret, si aliquam commutationem commerciū illud admitteret, ô quam libenter darem! ô cum quanta gratiarum actione numerarem! O Deus cordis mei, quanta animæ meæ vsque ad mortem in hoc partu angustia, quàm importabilis! nisi tu mecum portaueris in separatione ista, affectionis semper duratur ærumna. Iesu bone! indubitanter pro te aliquid me fecisse iam deinceps fateri non erubesco. Sed quid aliud facerem? Tuus est ille, tuus sum ego. Et vtinam sic tuus ego, sicut ille tuus! Et qua fronte tibi de tuo tuus contradicere præsumam? Non resisto voluntati tuæ contumaciter, vt tu adstas desolationi meæ misericorditer. Vide humilitatem meam & laborem meum, & dimitte vniuersa delicta mea. Domine, domine, nonne totam mitius à me tolleres animam, quàm partem dimidiam? Placeat tibi saltem non deferre partem residuam, quia tibi assumis præcipuam. Verè nunc experior, quòd separare veneris hominem aduersus patrem suum. Verè hic gladius Salomonis viuus & efficax, & penetralior omni gladio ancipiti, pertingens vsque ad diuisionem animæ & spiritus. quare propter te diuisa est maceries animorum præ-

fentia corporū? Tu mediator, tu lapis angularis, tu disperfos Israel cōgregas, tu Deus vnus, ad te & in te vtraque faciens vnum. quare sic facis, vel si non facis, quare pateris vt careā baculo meæ debilitatis? vt suam colūnam deserat basis? vt sine Aaron non Moyſes, sed tuus miser cogatur sustinere quæstiones siue molestias huius talis & tantæ multitudinis? Pie Iesu, non sustineat pietas tua sine consolatione meam diutius fragilitatem cōquassari, sine visitatione fatigari. Quid est hoc? vobis cœpi scribere, vobis loqui, & sic in mediis sermonibus, cum tanta mora meas miseras misericordissimi Dei conspectibus explicui. Certè vt videatis, certè vt intelligatis, quis sit dolor filium dexteræ amittere, & nec saltem, sublato Ioseph, Benjamin retinere. Quinimmo vt Deum totius consolationis meis compatiendo mœroribus dulciùs & obnixiùs pro me exoretis. Est enim benignus piorum exauditor, largus pro se aliquid faciētibus remunerator. Orate itaque, vt & istum, quem quasi in vinculis Christi retinetis, non amittam, & vt optando scripsistis, pro Samuele nostro prophetam non inferiorem recipiam. Sic enim dote bona ditatus, consolationem aliquam vestris orationibus accipiens, potero expectare illam veram & æternam, pro qua desolationem suscipio temporalem & transitoriam.

Valete.

EPIST. II.

*Dominis & patribus suis de Monte Dei, frater Petrus
Cellensis dulcedinem gratia quam repro-
misit. Deus diligentibus se.*

44.

EXultat spiritus meus in Deo salutari meo, tum quia videre & audire vos vel semel merui, tum quia familiaritatis gratiam, gratia superna largiente, inueni. Aecedit hinc beatitudini meæ dulce adinuicem commercium litterarum, unde & amaritudinibus meis mitigatuum paratur electuarium, & inquietudini sopituum medicamentum, & hebetudini non mediocre æruginamentum. Deniq. quotiens formam & vultum inspicio sermonum vestrorum, magna virtute veneniferos morsus euado rugientium curarum, inundationes contempero influentium occupationum, assultus reprimō internarum & veterinarum inimicitiarum. Placet sensus profunditas, dictorum veritas, morum informatio, errorum redargutio, amputatio vanitatum, condemnatio ambitionum. Plus medullæ farinæ, minus corticis & furfuris habent. Facile ex his perpendi potest, quid in se de se anima religiosa sentiat, quid supra se de creatore suo obstupescat, quid infra se de peregrinatione mundi & tentatione carnis pertimescat. Planè ad seipsam conuersa cōturbatur, ad factorem suū suspensa dilatatur, ad corpus reuerſa confunditur. Quid enim corpus, nisi terra inanis?

quid anima, nisi abyſſus impenetrabilis? quid Deus, niſi lux incomprehenſibilis? Igitur vt caro ſterilis & infœcūda imprægnetur, ieſuniis & vigiliis affligatur: vt anima tetra & tenebroſa clarificetur, priſtinis vitiis & phātaſtica ignorātia exuatur. Caro abſtinēdo fiat paradīſus deliciarum, anima orando & contemplan- do efficiatur ſereniſſimum cœlum. Cuſtos & operator paradīſi deputetur ratio: protector & inhabitator animæ ipſius creator. Adhibea- tur corpori diligens diſciplina, ne tanquam puer immaturus in perniciem ſui efferatur: cultura impendatur, ne velut ager neglectus mala-prole vrticarum inutiliter occupetur: vomere & ſarculo conſcindatur, & bono ſemine impleatur. Nam huius naturæ eſt hoc corpus, vt quo magis opprimitur, eo amplius multiplicetur. Terra huius carnis, niſi aratro diſciplinæ conuulſa fuerit, quaſi clauſa vulua inutilis erit. At vbi fortiter concuſſa vel con- ſciſſa ſemen domini exercituū exceperit, ger- minare ſecundum genus ſuum incipiet. Deni- que ſecundò vulnerata, tanquam gladio an- cipiti, amore videlicet & timore, vberes fructus iuſtitix, largiſſimas aquas internæ compunctionis, immo ſanguinem & aquam in redemptionem præuaricationum ſuarum, & emundationem originalium delictorum, in vitam æternam ſaliendo profluit. Atteratur itaque contritione valida, ne inſoleſcat, & pro frumento bonorum operum ſpinas & tribu- los deſideriorum malignorum afferat. Fodia- tur, immo confodiatur lancea Saluatoris,

ne animam in sepulcro vitiorum defossam æternis addicat incendiis. Duobus funiculis Dauid admetiatur, vno ad mortificandū, vno ad viuificandum: vt quod naturæ est conseruetur, & quod vitij, destruat. Sic, sic quantumcunque lapidosa fiet mollis & tenera: quantuncunque salsuginis plena, fiet dulcis & bona: fiet inquam de benedictionibus cœli frugifera, fiet quasi horti iuxta fluuios irrigui, quasi areolæ consitæ à pigmentariis, quasi mons coagulatus & pinguis, tanquam vallis nemorosa, velut terra sancta & vberima. De hac solummodò oritur veritas, in hanc iusticia de cœlo prospicit, hanc inhabitat & inambulat sanctitas: ferrum de hac tollitur, malleus vniuersæ terræ & securis suggestionis diabolicæ in ea non auditur. Hæc terra benedictioni proxima est. Hæc inquam accipit, tanquam lac diuini vberis, primam benedictionem in iustificatione, secundam in glorificatione. Omnis igitur iuxta Apostolum qui lactis est particeps, velut ab vberibus maternæ gratiæ, exsugat ab ista lac sanctificationis, ab illa consolationis. Hoc enim

Rom. VI. 21. est, quod ait Apostolus: *Habetis fructum vestrum in sanctificatione: finem verò vitam æternam.* Sic, sic viuatur, & in talibus vita spiritus. Sic viuunt paruuli tui, domine Deus, ab vbere præsentis visitationis, sic ab vbere futuræ expectationis. Hæc duo, sicut duo hinnuli capræ gemelli, quia ex abundantia diuinæ iam prælibatæ dulcedinis, & ex indubitata certitudine sequentis remunerationis, iam ad

Deum, sicut ceruus, inæqualitatem aduersitatum transcurrimus, iam super montes aromaticum mundarum orationum præalacritate transilimus, exclamantes cum Apostolo, quia *non sunt condignæ possessiones huius temporis ad futuram gloriam quæ reuelabitur in nobis*. Cuiusmodi autem lac fratres esuriatis, hæsito: quia ad humanos usus non simplex, sed aliud ouinum, aliud caprinum, aliud vaccinum à Deo creatum perpendo. habet & humana infantia lac proprium, & ætati suæ congruum, mamillarum maternas. Ex qualitate verò vberali vniuscuiusque lactis, cui magis personæ, vel ætati quodlibet horum competat, non est differere. Est namque caprinum parum nutritium, sed satis digestium: vaccinum multum nutritium, sed durum ad digerendum: ouinum ex his mediè cōtemperatum. Quamobrem ex alio serui, ex alio filij, itemque ex alio pascuntur domini. Qui domini, nisi qui dominantur in vniuersa Ægypto carnis suæ? Qui filij, nisi qui de ventre nati sunt gratiæ? Qui serui, nisi quorum manus seruierunt in cophino veteris vitæ? Serui necessitate indigentia, filij suauitate indulgentia, domini deliciarum plenitudine lac edere solent. Vtinam mihi peccatori indulgeatur lac veniæ, vobis iam expiatis lac gratiæ, tandem expiatis lac gloriæ! O clarum lac! ô suaue! ô iocundum! Clarum, quia per veniam transferimur de regione tenebrarum ad lucem gaudiorum. Suaue, quia per suauitatem

Rom.
VIII. 18.

G iiij.

Esa.
VII. 21.

gratiæ, ab amaritudine tentationum ad dulcedinem deducimur immarcessibilem delectationum. Iocundum, quia per gloriam à sæculi tristitia euadimus ad æternum & incommutabile gaudium. O abundans iocunditas! ô iocunda abundantia? *In die enim illa nutriet homo vaccam boum, vt ait Isaias, & præ vbertate lactis comedet butyrum.* Quæ namque est vacca boum, nisi anima consors naturæ & gloriæ cœlestium spirituum? Quam homo Christus nutriet, non sicut nunc in vmbra sacramenti obumbrati veritate, sed in declaratione veritatis, & in detectione refferati per clauem David mystetij de mensa corporis, & de vino pretiosi sanguinis, de vestimentis gloriæ, & de lacte matris gratiæ, quod præ vbertate misericordiarum vertitur in butyrum dulcedinum: quia omni fluxibilitate & mortalitate de medio sublata, omnimoda commutatione transformabitur à claritate in claritatem, & sic in Deum. Tunc enim erit omnia in omnibus. Quid hoc butyro pinguius? quid hoc melle dulcius? Hoc mel cœleste est, non campestre, non denique siluestre. Ioannes in solitudine mel siluestre edit satisfactionis: Ionathas in procinctu belli campestre iustificationis: puer Iesus in virgine & de virgine mel cœleste incorruptionis. Sufficit enim lucernæ quæ lucet & ardet, in campis siluæ poenitentiam prædicari, & quando fugiat à ventura ira, populum edocere. Iuueni, qui in agone fideliter & viriliter decertat, in virgæ, videlicet iustitiæ, summitate

futuram dulcedinem prægustare. At verò Christo Iesu, qui lux est illuminans non illuminata, creatrix non creata, propter altitudinem diuitiarum sapientiæ & scientiæ thesauri absconditi, parum est vt sit prædicator, non sit & dator, non solum veniæ, sed & gratiæ. Denique vt de maximis ad minora trahamus exemplum, cor cuiusque religiosi ad similitudinem baptistæ Domini à strepitu sæculi quietum, in baptismo deuotionis emundatum, in mortificationem carnis præparatum, in amore verbi Dei confirmatum, in religione Angelorum stabilitum, & si nondum cœlestem mel pleno ore & ventre eructat, siluestre saltem prægustat. Aliter enim gratia sapit in patria, aliter in exilio: aliter rara, aliter larga: aliter continua, aliter interpolata: aliter in corpore mortali, aliter in immortalis: aliter inuisibiliter data, aliter visibiliter administrata. Calore igitur caritatis liquefacta, & colatorio discretionis eliquata, nihilominus & infusorio exquisitæ veritatis infusa homini gratia, asperitates faucium in confessione mitigat, stomachum receptium innumerabilium cogitationum mundificat, discretiuam cerebri rationem ad certam mensuram modificat, & vitalem venam ad veram immortalitatem cordi subministrat. Hic autem interim nos cum turba tanquam in campatribus ad gratiam suspiramus: ibi velut in monte contemplationis glorificatam Iesu faciem suspicimus. Hic expectamus, ibi spectamus: hic petimus, ibi accipimus: hic rogamus, ibi ero-

gam^o: hîc inopes, ibi locupletes: hîc pauperes, ibi diuites: hîc cum Ioanne in deserto, ibi cum Iesu in regno: hîc in carcere herodis, ibi in palatio æternæ hæreditatis. Hîc ad reparationē gratia commodatur, ibi ad refectiōem præstatur: hîc in mensura, ibi supra mensuram: hîc in vtre, ibi in ventre: hîc in cortice sacramenti, ibi in manifestatione summi & incircumscripti luminis. Ecce lac, immo butyrum, ecce mel, vel potius fauū mellis offert seruus vester mensē dominorū suorum. Ad quid iterum vobis vas aquæ cum amphora vini? O domini & amici carissimi, puteus altus est, & lapis superpositus, quem mihi Angelus nondum reuoluit, Iacob nondum amouit, & quomodo dicam, bibe domine, & camelis tuis potum tribuam? O ardens desiderium! Fossoria habetis, venas aquarum viuentium possidetis, puteos quos fodit Abraham & filii eius, Isaac & pueri eius, habetis, & adhuc aquam de cisterna quæ est in Bethleem suspiratis? Equidem hæc aqua, & si bona ad bibendum, sed difficilis ad inueniendum. Iter prolixum & obfessum, locus remotus & ignotus, vires paucæ & raræ, vndique hostis & ensis, nox instans & præ foribus tenebræ. Nisi itaque ad incomparabilem thesaurum obtinendum tanti labores non sunt insumendi. Quid dicam? Memento tamen sui hæc purissima gutta superat omnem laborem, quia sitim satiat, sordes lauat, æstum temperat, humectat arida, dura emollit, sterilia fœcundat. Ex hac lagenas oculorum suffusas in libamētis vestris effunditis, &

cum hac altissimo Deo vota placabilia offer-
tis. Hæc ignem extingubilem extinguit. Hæc
rigorem iudicis ad pietatem inflectit. Hæc
Cherubin, & flammæum gladium atque ver-
satilem, ne lædant compescit. Hanc in vinum
conuertit : & suo more potiora exhibet in
benedictione , quàm in creatione. Procul
dubio sunt nobis plures fortes ad bibendum
vinum, & ad miscendam ebrietatem: ad hoc
autem poculum quis idoneus? Verus Noë
noster , qui requiem nobis dedit ab operi-
bus mortuis, hoc vino debriatus, turpitudi-
nem humanæ infirmitatis in cruce denuda-
uit, & à medio filio, qui neque calidus est
neque frigidus, irrisiōnem sustinuit. Ideo
pauci procedunt ad emendum, pauciores ad
possidendum, paucissimi ad bibendum, fe-
re nemo ad ebriandum. Potens potator hu-
ius vini fuit filius fabri. Post hunc emigraue-
runt ad vineas Engaddi qui bibebant vi-
num libaminum. Quia igitur nunc non est
relictus in Sion, & residuus in Hierusalem,
qui de manu Domini calicem vini meri su-
scipiat, accedite vos qui estis de domo Dei,
& de monte Dei, & bibite & inebriamini,
carissimi.

EPIST. III.

*Dominis & amicis suis Priori, & ceteris fratribus
de Monte Dei, Frater Petrus Cellensis
brauio diurni denarii
non fraudari.*

45.

SVauissimi saporis buccellas, quasi panis
Soleati, auido ore in mensa litterarum ve-
strarum prægustans, iocunditatem spiritus
cœpi eructare, & iterum atq; iterum præ deside-
rio spiritum bonum attrahere. In crassitudine
quippe animæ bene pastæ, in abundantia dul-
cedinis Dei scripsistis, & sicut adipe & pin-
guedinē spiritualis lætitiæ fauces meas reple-
stis. Sermo namque vester non est talis, qui
adulterinis formis superinductis speciē pieta-
tis repræsentet, & virtutem abneget. Hoc
enim illorum est, qui in corde & corde lo-
quuntur, vel qui molliant sermones suos su-
per oleum, cum ipsi sunt iacula. Non autem
verbum vestrum sic insulsum, sic infatuatum,
sic sale salitum, sed gratiæ plenitudine con-
fortatum viscera replet sanctorum, vires re-
parat animarum, languores sanat ægrotan-
tium, fortitudinem conseruat sanorum. Præ-
terea delicatorem sufficit gulositati, & nau-
seantium medetur reiectioni. Pascit vt panis,
vt vinum lætificat, vt paradysus deliciarum
exuberat in omni suauitate, vt templum spe-
ciosissimum refulget in omni pulcritudine.
Planè suadibilis ad commonendum, rectus ad

componendum, efficax ad commouendum, potens ad corroborandum, dulcis ad emulcendum, ardēs ad inflammandum. Cū enim purē de puro vase purus effunditur sermo, quid ad emundandū aptius, quid ad informā- dum apertius, quid ad omne opus bonum vti- lius? Sanē verbum bonum de bono Dei ver- bo frequenti meditatione decoctum, exerci- tatione corporali & spiritali tanquam mola inferiori & superiori molitum, continua exa- minatione cogitationum accusantium aut etiam defendentium cribratum, humilitatis ossibus confert medullam, spiritui contrito medelam, & animæ esurienti adhibet satieta- tem bonam. Decoquitur verò panis iste aut in clibano profūdi mysterij incarnationis Chri- sti, aut in sartagine viuificæ crucis, aut in cra- ticulo mortis & sepulcri: cū vita vestra, lo- cutio vestra, cogitatio vestra commoritur & concorporatur, vel consepelitur Christo nouo genere viuendi. Videte panem de cli- bano, *Memor esto dominum Iesum resurrexisse a mortuis ex semine David.* Comedite panem de craticula, *Cū adhuc peccatores essemus, Christus pro impijs mortuus.* De sartagine frixum apprehendite, *Cū iniquus deputatus est: &, verē languo- res nostros ipse tulit, & infirmitates nostras ipse por- tauit,* in corpore suo super lignum crucis. Pa- nis iste triplex itinerantibus per desertum ad viam trium dierum non deficit: quia etiam tertium cælum petentibus seu penetrantibus fides incarnationis, passionis, & mortis, tan- quam scala Iacob, vehiculum existit. In in-

2. Tim.

II. 8.

Rom.

V. 6.

Luc.

XXII.

37.

Esa.

LIII. 4.

troitu verò tabernaculi non manufacti, idest, non huius creationis, quod scilicet fixit Deus & non homo, porrigitur panis de duabus decimis similæ, id est consolatio æterna pro legis & Euangelii consummatione, nec non pro carnis perfecta incorruptione, & vera sanctitate animæ. Hastam aut gladium ad quid petitis? quem interficere vultis? quem ferire? Vbi est vel quis est aduersarius vester? Nonne vos confugistis ad tutissima loca Engaddi? Nonne Christus est vobis petra refugii? nonne turris fortitudinis? nonne omnis armatura fortium? nonne inattingibile propugnaculum? nonne gladii duo, scutum, arcus, & sagitta? O fortissimi milites Christi, hastam protensam habetis in orationibus continuis, gladium in mortificatione carnis, panem sanctum in spe æternæ glorificationis. Hasta vestra non est auersa in aduersitatibus mundi, quia rectos facitis gressus ad cælum: gladius non declinat in conflictu desideriorum & impetu suggestionum, quia ante Dominum est omne desiderium vestrum: panis non inueteratur ex dilatione præmiorum, quia reuirescit caritas certa spe promissorum bonorum. In calore namque suo perdurat panis, quia caritas non tepescit in cordibus vestris. Non hebetatur acies gladii, quia non deferuescit rigor disciplinæ ac sancti propositi. Hasta non infringitur, quia oratio vestra acumine suo cælum penetrans nullis obstaculis reuerberatur. O bellum grande, & graue, in stationibus dissimile, in viribus inæquale, in armis incomparabile! O

rector & moderator omnium, quàm nisi à te fieret ridiculosa pugna vermis & gigantis, hominis & dæmonis, animalis terreni & acrii, velocissimi & tardissimi, stultissimi & callidissimi, antiqui & moderni, mortalis & immortalis? Stat ille in superioribus, iacet iste in inferioribus. Pennas ille habet, iste nec pedes. Videt ille quē persequitur, iste sentit nec attendit à quo tam crudeliter verberetur. Mole carnis molestat ille: bonitate creatoris ex creatione sua libero volatu quolibet deuolitat ille. Vtitur hostis mundo isto vt decipiat: vtitur homine aduersus hominem vt occidat: vtitur eodem aduersus eundem vt absorbeat. Sensibus suis tanquam proptiis armis triumphat, & transgulat captiuum, cū spiritus in seruitutem non redigit mortale corpus suum. O pestis iniqua! ô sors hominū misera! non est tibi in te virtus, non in arcu virtutis tuæ, neq; in hasta liberi arbitrij tui saluat dominus. Sic collisa inter scopulos, sic cōtracta inter populos, habes tamen prælium cum filiis Enachin, quibus comparata videris quasi locusta: habes capitale duellum cum principibus tenebrarū, victori vel victo proposita morte & vita. Nō resurget, nō qui ceciderit, sed qui cesserit: non addet qui destiterit: non rursus accedet, qui lapsus fuerit. Primò victus primus homo, quia secūsus venit de cælo, habuit in cœno subleuantē se: denuo si succubuerit, nō reparabitur, quia alius deinceps nō generabitur ex virgine Dei filius. Voluntariē enim peccantibus, non relinquitur hostia pro peccatis. Instantiū

itaque agendum, ne vrgeamur redire, cum inclusi in morte iterum non sinemur tunicam oblitam repetere. Tunicam enim pœnitentiæ qui neglexerit in corpore, opportunitatem nullam habebit post transitum vitæ. Ecce, domini mei & amici carissimi, statim ut vidi angelum vestrum, cucurri ad armentum cum Abraham, vocavi Saram memoriæ, puerum cordis, & misui vobis farinam, ut facerem subcinericium. Habetis itaque cili-
cium vestrum, habetis & subcinericium nostrum. Cooperantur hæc duo ad extrahendam peccati rubiginem, ad delendam pruriginem, ad extergendam sorditiem. Idcirco sana & sancta potuit veraciter exclamare cōscientia, vasa puerorum munda esse. O gemma pretiosissima & præclarissima, pro qua si dederit homo omnem substantiam domus suæ, tamen nihil æstimatur in comparatione illius. Detineo sancta corda, mundos oculos, puras manus, plusquam debeam à pabulo vitæ, ab introitu gloriæ, à contemplatione faciei Iesu iam glorificatæ & deificatæ. Sed nunc iam remitto: & ut me commemoratione pia in humeris vestris perferatis ad thronum gloriæ deponco. Valete. Fratrem Simonem lumen oculorum meorum, partem viscerum meorum, attentius vobis commendo.

EPIST.

EPIST. IV.

*Suis de Monte Dei suis Petrus Cellensis à
claritate transferri in
claritatem.*

Venerunt filij vsque ad partum, & tempus
non est pariendi. Manus ad rescribendum
parabatur, animus ad dictandum, locus ad se-
dendum: & ecce ventus occupationum nun-
cij vestri vela occupans nauigij nostri ad por-
tum silentij retorfit. Quid enim? Nonne io-
cundiùs & voluptuosius paulatim vinum bo-
num, quod seruatis vsque adhuc, per tempus
& tempora degustabitur, quàm vno haustu
cum damno optandæ suauitatis deglutitur?
Et si enim in transitu desidero vos videre, sal-
tem nolo in transitu scribere, Gustavi & vidi,
quia bona est negotiatio vestra. Nequaquam
manus vestræ in cophinis seruiunt: nequaquã
ciuitates Ægypti in luto & latere construunt:
sed quæque pretiosa & speciosa requirunt: sed
fufum & colum ad nendum siue contextendum
rationale & superhumeralè, & cætera summi
pontificis insignia ornamenta apprehendunt.
Hinc est quod non de stuppis Synagogæ
peccatorum grossiora vestimenta animæ ve-
stræ delicatæ apponitis, neque contra legem
ex lana linoque vestimento induimini: sed ab-
dicantes occulta dedecoris, faciem lanatis, ca-
put vngitis, & de velleribus ouium vestrarum
venientes ab Aquilone calefacitis, cum etiam

H

46..

de confessione vestra integerrimæ simplicitatis exempla sumuntur sanctę religionis. Sic est, dilectissimi, sic est. Accedit homo ad cor altum, & exaltabitur Deus. An non in luna cum lumini solis appropinquat sic euenit, vt eo à suo fulgore videatur deficere, quo fuerit effecta vicinior? Cæci domus nō ideo pulcra, quia deformitatem eius non videt: non ideo sana, quia vbi ventrem faciat non considerat. *Cani*, iuxta Prophetam, *in Ephraim effusi sunt, & ipse ignorauit*. Doletis fœtorem Lazari, truncum iam emortuū miramini reuiuiscere, muros Hiericho non patimini cōsurgere. Facitis namque quod ait Naum prophetam: *Aquam propter obsidionem hauri tibi, intra in lutum, & calca, & subigens tene laterem*. Intelligitis obsidionem principis huius mundi. aqua de cisternis sicut nec de cellis deficit. Lutum carnis vt fortius prematis, & validius calcetis intratis, si subigendo tenere laterem memineritis. Non itaque vsque ad internecionem desæuiat mucro vester. *Tolle*, ait dominus, *grabatum tuum & ambula*, id est, corpori indulgeas, non seruias. Quam suauiter in impetu spiritus euehor, dū vobis scribo, tam ægrè fero, dum in medio itineris subsistere cogor. Ad quæstionē respondere parco, quia nō perfunctoriē eam tractare dispono. Valete. Destitutus spe vltiūs procedendi subsederam non volēs, sed propter eū qui quasi media via me deserebat. Interim flauit spiritus bonus, & dū illius cassauit propositum, nostrum cōpleuit desiderium. Moram procul dubio timebā, & temporis siue portatoris importunitatē ad meā referri ignauiam

Osce.
VII. 9.

Nah.
III. 14.

Ioan.
V. 8.

fatis pertinaciter deuitabā. Vt itaque meam insipientiam oculis amicorū & dominorum meorum simpliciter prodā, nō quod ex promptuario aridi pectoris, sed quod de horreis Ioseph in saccis filiorum Iacob mutuaui proponam. Apponam verò prius in mensa ista panes propositionis vestræ, vt cum his sumantur legumina decoctionis nostræ. Quosdam vestrorum ita scribitis sentire de verbis Apostoli, vbi ait: *Renouamini spiritu mentis vestre*, & alibi, *Et si homo exterior corrumpitur, sed qui intus est renouatur de die in diem*, & de paradiso deliciarum in quo Adā positus est, siue etiā hoc, quod homo ad imaginē & similitudinem Dei cōditus alleritur, vt sub eodē sensu omnia ista accipiātur. Addūt etiā, hæc bona deliciosa bifariē debere accipi, scilicet secundū substantiale bonū & accidēs: referētes ad essentialia dona imaginem, similitudinem verò ad ea quæ adesse & abesse possunt. Priusquā his bonis coloribus & a doctis pictoribus imaginē sensuum istorum compositā in sacrario Dei statuam, quæro de origine, de auctore, & de virtute, vel etiā vtilitate eius. Vt enim religiosum sit quod adoratur in tēplo, non noua, non ignota, non deniq; ficta debēt esse numina. *Israel*, ait propheta, si *me audieris, non erit in te Deus recens, neque adorabis Deū alienum*. Nō minūs abominabile est simulacrum in Ecclesia Dei viui, quā de sancta scriptura sensus peruersus in anima Christiani. Delectus tamē & hīc habēd⁹ est. In his siquidē, quæ ad S. Trinitatis, vel incarnationis fidē, seu sacramētorū ecclesię ptinēt errare, periclitari

Ephes.

iv. 23.

2. Cor.

iv. 16.

psal.

xc. 7.

est. De multiplici verò sēsu scripturarum, vel iudiciorum Dei, quæ nunc plura fiunt, quasi diuersa, non tamē contraria, à fide sentire, non est exorbitare. Hic enim sonus est alarum animalium in Ezechiel se adinuicem percutientium : quia sanctæ animæ de thesauro sapientiæ & scientiæ Dei largiter accipiunt, vnde corpus Ecclesiæ in augmentū corporis Christi diuersarum gratiarum compagine satis eleganter componunt. Itaque frater ille suo bono quidem sensu domum sibi eburneam fabricauerit, & bicameratam, siue tricameratam arcam in diluuiū aquarum multarū præparauerit. Miror illum tamen tantum ædificium paruis sumptibus extruxisse: & cum illud fundamentis solidissimis Apostolorum & prophetarum firmare, floribus doctorum fulcire, malis martyrum stipare, vt sapiens architectus debuisset, oblitus paxillos æreos auctoritatum veteris, & funes argenteos noui Testamenti inferere, quasi clypeis denudauit parietem. Sed vt de proprietate huius nominis, quæ occurrunt in instanti edisseram, sciendum est, quòd proprie imago relatiuè dicitur ad aliud, cuius similitudinem gerit, & ad quod repræsentandum facta est, sicut imago Cæsaris, quæ ipsius similitudinem præferebat. Improprie autem imago dicitur id, ad quod aliud sit, sicut exemplum : quod similiter proprie dicitur exemplum, exemplar à quo sumitur. Tamen abusuò aliquando alterum pro altero ponitur. Secundum istam rationem proprie imago patris dicitur filius. Iuxta alium

verò modum, quo vnum nomen pro alio ponitur, dicitur homo imago Dei: quia videlicet imago Dei in eo est. Sicut imago dicitur tabula & pictura, sed propter picturam quæ in ea est, simul & tabula imago appellatur. Ita propter imaginem Trinitatis, etiam illud, in quo est hæc imago, imaginis nomine vocatur. Homo itaque imago, & ad imaginem: filius imago, non ad imaginem. Volo denique si placet, & in quo similitudo differat ab imagine, breui exemplo signare. Pono animam lapidem pretiosum, & imaginem aliquam in eo expressam, à qua similitudo secundum imaginem impressa ostendatur. Nonne est aliud imago exsculpta, & aliud similitudo ab imagine redempta? Sit igitur bonitas Dei causa huius similitudinis: quia cum benevolentia sua, quæ spiritui sancto attribuitur, Deus Deum hominem, vel post Deum facere vellet, & naturaliter id fieri non posset (non enim naturaliter Deus est, nisi is, qui Deus natus est, non factus, concessit ut saltem similitudinem Dei haberet. Quæ similitudo Dei ut sedem, vel receptaculum haberet, imago siue figura substantiæ Dei, quæ est filius, animæ hominis impressa est, ut à suo sancto spiritu prædictam similitudinem reciperet: quomodo pretioso lapidi foramen aperitur, per quod gracilem auri virgulam recipiat, qua constringatur & teneatur. Ad imaginem itaque secundum naturales animæ virtutes, memoriā scilicet, intelligentiam, & dilectionem, ut optimè dixit tractator vester, & ad similitudinem, secundum

I. Ioan.
III. 2.

innocentiam & iustitiam, quæ in mente rationali potius naturaliter quam accidentaliter insunt, conditus est homo. Stupeo siquidem me audiuisse, quod nollem vel somniasse, similitudinem Dei donum esse accidentale: quod non accidentale, sed veraciter substantiale, immo supersubstantiale nouit qui Apostolum intelligit. *Scimus*, inquit, *quia cum apparuerit, similes ei erimus, quia videbimus eum sicuti est.* Quid est, similes erimus, nisi similitudinem eius habebimus? Quam enim similitudinem in creatione accepimus, eandem in resurrectione prima, denique & in secunda, sed aliter habituri sumus. Nam in creatione ita collata est, quod amitti potuit, cum etiam peccare potuit, vel potius deformari: sed in vera immortalitate, cum nec mori nec peccare homo poterit, de similitudine Dei æternaliter gaudebit. Quid igitur? Itane summa illa beatitudo, & gloria sæculorum accidentaliter erit, ut possit adesse & abesse præter subiecti corruptionem? Hoc enim accidentis est. Vbi es homo? Nonne in mortalitate, vel potius in morte? quare? Nonne quia amisisti Dei similitudinem? Quid enim Deus? Nonne vita? Et quæ est similitudo vitæ, nisi vita? aut quæ dissimilitudo, nisi mors? Mortem namque inuenit, qui similitudinē Dei amiserit. Quod si ideo dicitur accidentale similitudo Dei, quia auferri potuit, non vera est consequentia. Sic enim sequeretur, quod accidentaliter viueremus, quia mori possumus. Naturæ siquidem accidentis est, ut possit adesse & abesse

præter subiecti corruptionem. quod quis sani cerebri, vel cordis affirmare audeat de virtute iustitia, bonitate, & amore virtutis in anima? Prorsus, ut ait Augustin⁹, ut vita corporis anima, sic animæ vita Deus. Vera quoque virtus, vera bonitas, vera iustitia, immo ipsa veritas est Deus. Sine his igitur si fuerit anima, moritur, & dicis esse accidentaliter dona? Vertēs iterum oculos, & relegens apices vestros, inueniensque non donum, sed bonum accidens, maiores phantasias admiror. Nonne enim similitudo Dei Deus est? equè bonū dei nūquid aliud à Deo est? Clamat Augustin⁹, Quicquid de Deo dicitur, Deus est, & nihil secundum accidens dici de Deo: & dicis, secundum bonum accidens similitudinem Dei dici. At inquis, quod dico similitudinem Dei donum esse accidens, non ad Deum dantem, sed ad hominem accipientem respicio. Mihi verò videtur satis ex superioribus probatū, neutrum esse verum. Hæc sufficiant de similitudine. Nunc reuertamur ad imaginem, & audiamus quid nobis dicat imago vera. Sic enim loquitur, *Qui me videt, videt & patrem*. In quibus Ioan. xiv. 9. verbis desiderantibus faciem patris videre omnino simillimam & in nullo disparabilem imaginem semetipsum repræsentans, desideria cordis eorum de bonis suis satiare voluit. Rursus hæc eadem imago renouare volens imaginem suam in imagine sua, aliās dicit, *Sancti estote, quia ego sanctus sum*. Tanquā bonus pictor animarum Deus primam animam in primo homine cum omni benedictione spi-

Leu.
xi. 44.

rituali, ad quam meliorem & formosiores inuenit imaginem, nō in iam creatis, sed in nō creatis pingendo creauit, & creando depinxit. Creauit inquam in anima imaginem suam, vel potius animam ad imaginem suam. Depinxit iterum in anima similitudinem suam, vel magis animam ad similitudinem suā. Fumo autē iniquitatum & transgressionum suarū decoratam, & vsque ad extremam deformitatē fœdatam, auctor & amator suus voluit eā reparare. Et quia æquē idoneus pictor, neque in cœlo Angelus, neque in terra homo iustus, neque subtus terram aliquis spiritus inueniebatur, accessit imago ad imaginem, formosā ad deformē, iusta ad iniustū, nobilis ad ignobilem, pia ad impiam, æterna ad transitoriam: venit reparare quod perierat, venit reficere quod defecerat. Hæc imago Dei inuisibilis filius est altissimi. De filio namque ait Apostolus, *Qui est imago Dei inuisibilis*. Sanius verò mihi credite, nihil dicitur, quā vnā esse imaginem totius Trinitatis, patris videlicet, filii, & spiritus sancti. Vnde Beda, super. *Faciamus hominem ad imaginem & similitudinem nostram*: In eo quod dicit, faciamus, vna operatio triū personarū ostenditur: in hoc verò quod dicit, ad imaginē & similitudinem nostrā, vna & æqualis substantia triū personarum monstratur. Ex persona enim patris hoc dicitur ad filiū, & spiritum sanctū, non vt quidā putant, angeli: quia Dei & angelorū non est vna & eadem similitudo vel imago. Propriè itaque filius dicitur imago patris: Trinitatis essētia minùs propriè,

Col.

1. 15.

homo impropriè. Sic autē homo dicitur imago Dei, quia similitudinē eius in se gerit, sicut imago Cæsaris, quæ similitudinem eius præfert. Hucusque satis dilatauerim phylacteria mea, & magnificauerim fimbrias. Si qua tamen durius dixerim, obsecro indulgeatis. Valete, & orate pro me.

EPIST. V.

*Dominis suis de Monte Dei, suus Cellensis portam
atrij interioris penetrare.*

ET si apices salutationum à vobis mea humilitas accipere non meretur, mereatur saltem munera orationum. Vtrumque quidem si fieri posset, satis gratanter acciperem: alterum tamen ambiciosius deponco, si ad vtumque non valeo. Lætificarent me litteræ, si scriberetis: sed iuuant orationes, si pro me eas funditis. Insipientia mea indiget bonorum instructione: infirmitas animæ meæ deuota & assidua oratione. O vtinam perspiceretis plagas animæ meæ miseræ & desolatæ in vastitate hostili! certè si eam diligeretis, super eam lugeretis. O domini & patres carissimi, cur non liberatis animam, quamuis miseram, tamen vestram? cur non eruitis de ore leonis iam semipastam? cur non redimitis sub vinculo captiuitatis vsquequaque humiliatam? Sufficiat vobis ad commouendos pietatis affectus recordatio antiquarum miserrarum, à quibus redimit vos qui passus est pro vobis. Ultra extenditur cumulus peccatorum

47.

122 PETRI ABB. CELLENSIS
meorum, & nisi Dominus iuuerit sanctissimis
orationibus vestris interpellatus, iam inferno
appropinquat. Valere.

EPIST. VI.

*Carissimis dominis & fratribus de Monte Dei, Priori
cum ceteris sanctis, frater Petrus Cellensis
indignus abbas salutem.*

48. **F**ORTÈ sicut pulli de nido non auolantes
paternas esuriunt escas, sic vos filij caris-
simi, qui in nidulo vestro plumescitis, vt cum
tempus venerit in altum euoletis, dignum
faucibus & stomacho sanctitatis à me refundi
expectatis. Sed quid coruus ad pullos gallina-
rum? Non enim eisdem aluntur cibus. Coruus
pascitur cadaueribus putredinis: columba
vescitur granis puris tritici electi. Noui, noui
quibus apud vos per dimidiū temporis alitus
sum cibus. Si dixero, noui quibus modò vsque
ad nauseam onerer, parum profecto dixerim?
cū sapientia vincat scientiam, & plus sit te-
norem saporis in ore retinere, quā præte-
rita ad animum reuocare. Anxior igitur in his
& gemo: & quorum gustu vehementer affi-
cior, nolo ruminatione reiterata refricare
dolores præteritos. Sufficiat enim diei mali-
tia sua; sufficiat gustui amaritudo sua amaris-
sima. Vos denique, fratres & filij carissimi,
simplicitate ciborum contenti sicut didici-
stis Christum, sicut gustastis & vidistis, quia

bona est negotiatio vestra, sic perseverantes non quærat aliam mensam, non aliam escam. Bonam enim mensam, bonam utique habetis & escam, qua viuit anima vestra. Quid ipse dicere possum de mensa mea? Certè ex quo descendi de sancto Monte Dei mei, aut rarissimè, aut nunquam data est mihi mensa, ut cum amicis meis epularer. Statim quæ in insidiis expectabant egressum meum sollicitudines, rapuerunt & absorbuerunt me continuo refluxu, super caput meum redundantes. Satis immisericorditer vindicatum est in me, si quid otij, si quid boni in requie illa habuerunt caro mea, & cor meum. Seueriùs in me exarserunt, & ne spiraculum quidem incedit per ea. Apud vos, carissimi & desideratissimi, conqueror de me ipso contra me ipsum. Hæc certè, immo multo peiora merui, qui de pœna non emendior, sed cum pœna & culpam multiplico. Orate pro seruulo vestro, qui vos omni die desiderat, umbram vestram suspirans, & faciem videre sitiens. Valete.

EPIST. VII.

*Fratribus & filiis dilectissimis, frater Petrus
humilis eorum dictus abbas spiri-
tum dilectionis & pacis.*

QUAM vnica & singulari erga omnium
& singulorum vestrorum salutem affe-

etione & sollicitudine tenear, vnicus ille spiritus nouit, qui scrutatur etiam profunda dei. Non ignorat hoc ipsa quoque anima mea: quam vtinam sicut est intueretur oculus mentis vestræ, & sine dubio compateretur doloribus suis. Præsumo etiam, in conscientiiis quorundam manifestos nos esse, quibus idem suadet puritas sua & veritas mea. Nullis vos circumuenire adulationibus, nullis allicere fomentationum fallaciis, fratres carissimi, volo: sed vt pax vestra firma sit ad Deum, & me non æstimetis à cordibus vestris alienum, hæc scribo. Ceterum si quis aliter sapit, desipit. Itaque resipiscat animam suam lædere, immo damnare, qui pacem vestram & meam querit perturbare. Non designo aliquem, vel impropere cuiquam stultitiam suam. Sufficit enim accusatio propriæ conscientiæ, & ad tormentum pro malis, & ad præmium pro meritis bonis. Prorsus nemo ex hoc inter vos conturbetur: quia inanis nunquam erit pœnitentia, duntaxat si fuerit vera. Filio virginis castas mentes præparate: filio altissimi humiles animas exhibete: Angelo sanctitatis habitacula cordium vestrorum emundate. Valete.

EPIST. VIII.

*Carissimis patribus & dominis suis de Grandi Monte, frater Petrus Trecentis abbas
fideles orationes.*

50. **S**Cio quia in consilio iustorum & congregatione magna opera Domini. Idcirco,

fratres carissimi, longè licet à vobis remotus, tamen animæ meæ intentionem & supplicationem in præfenti conuentu transfero: quatinus portiunculam cuiuslibet cœlestis benedictionis referat, vnde consoletur & longo tempore cōfortetur. Credo enim, si vel vnam oratiunculam Angeli illi vestri, qui faciem patris semper vidēt in cœlis, ad ipsum patrem luminum, & ad thronum gratiæ filij eius, ab ore, & corde vestro pro me detulerint, quòd faciet fructum sursum, & germē ponet in terra deorsum. Hinc verò fructus vitæ & spes misericordiæ egeno & pauperi erit. Manus igitur illas vestras puras ab omni sanguine & crimine, & oculos columbinos ad fenestras cœli, per quas ad propitiatorium & ad sancta sanctorum intrare soletis, leuate: nec aliquo modo deponatis, donec vos exaudierit qui desiderium pauperum exaudit Dominus. Vester sum: sed tunc digniùs & affectuosiùs. Valete.

EPIST. IX.

*Frater Petrus Cellensis abbas, venerabili A. sacrodoti
sancti Petri Præuincensis salutem.*

Non immeritò illi præsumo scribere, 51.
quem non præsumo non diligere. An
impune non diligerem, quem ad prime hono-
randum vtinam vel simpliciter suscepissem!
Sed quid tantopere laudo, quem vel rarissi-
ma visione cognosco? Sed plus hunc fateor

cognosco auditione, quàm visione, plus fide, quàm confabulatione, plus religione, quàm familiari cohabitatione. Audiui enim viri non elatam sæculi pompam, sed electam doctrinæ formam: non ebrietatem, sed sobrietatem: non vanam pecuniarum sollicitudinem, sed variam scripturarum meditationem: non curiositatem formarum & pulcritudinem faces gehennales accendentes, sed emundationem, deformitatum propriæ conscientiæ iuxta diuini speculi illuminationem. Hæc, bone iuuenis, de te ab aliis cum desiderio audiui, cum fide accepi, cum gaudio aliis enarraui. Nihil itaque mirum, si tali scribo, quem talem describere non vereor ex relatu eorum quibus firmiter credo. Huius tamen ardentius cum auditate faciem viderem, & vocem audirem, quàm mortuis apicibus mortua verba ederem: vt cuius amor viuit in animo, eius præsentia scintillaret in oculo. Applicat enim calorem latentem in remotis admixta facula scintillantibus venis. Mutuo namque se se ita fouent, vt vterque ignis alium ad se trahendo confortet & confortetur: quatinus interior eo magis ferueat, quo exterior ei appropinquat: & exterior eo clariùs luceat, quo ei interior vehementiùs participat. Huius exempli similitudine, quem amas absentē, incipis superamare præsentem. Crescit enim in oculis amor: reuehitur meatu aurium cordi diligentis vox dilecti expressa charactere dilectionis. Iam amor incipit esse cum gaudio, qui prius erat siue gaudio, aut cum tædio. Tæ-

det enim non habere quem tendit semper amare. Sine gaudio quoque est, qui eum non habet, sine quo gaudere non potest. Apponitur igitur amoris gaudium, cum amicus cernit suum amicum. Valete.

EPIST. X.

*Petrus Abbas indignus Cella monasterij, G.
sacerdoti Hastangiarum spiritum
salutis.*

NON in præsumptione spiritus mei ad te 52.
transmarinum sacerdotem scribo, sed reiterata petitione R. quem tu quidem carne, ego vero spiritu per Euangelium in Christo genui. Is siquidem quos habet impari generatione patres, pari desiderat affectione coniungere fratres. Et me certè iam fratrem tibi constituit, nisi in oculis tuis mea fraternitas fortè propter vestem peregrinam sorduerit. Vix tamen apud sensatos tanta habetur vestium diuersitas, ut eorum exinde diuellatur identitas. Proinde nuda corda melius copulantur, affectius vniuntur, castius immiscentur. Cor namque iusti non induitur purpura & bysso, sed sapientia & consilio: non pannis & serico, sed virtutibus & Deo. His enim secundum creationis naturam in principio amictus, stolas non erubescibat angelicas, nec ipse increati candoris lucem reformidabat, quandiu diuinitus insitæ imaginis linamenta

incorrupta mutuo aspectu resignabat. At vbi huiusmodi splendoribus nocturnis dispoliatur, insidiis præ confusione atrocioris incommodi foliis cœpit circûtegi ficulneis. Venit Christus, vt reiteraret vestē cilicinam, saccum scinderet, & nudus nudis obtutibus paternis in carne nostra, immo sua, appareret. Filij itaque nudi Christi, nuda adinuicem corda pandamus, ac stabili compagine in Christo ea compingamus: fluant ad Christum, refluant ad cœlum, confluant ad trinum & vnum. O quàm bonum & quàm iocundum, frater, fratres habitare in vnum! Vnum est necessarium. Quid verò multa? non necessaria. quæ ergo vanitas est filiorum hominum vt multa quærant, & non curent vnum? Prius est vnum, quàm multa, & facilius consequimur vnum, quàm multa. Cùm ergo sine vno non subsistimus, & in multis deficimus, in multa tamen infania vnum postponimus, & multa cupimus. Desipit qui ad vnum verum esse non tendit: sapit qui ad incommutabilem beatitudinem contendit. Reuera solus ille sapit, qui vnum solum sapit: solus ille desipit, qui multa præter vnum sapere cupit. Vnde ait Apostolus, *Non multum sapere, sed sapere ad sobrietatem.* Solent homines terræ tuæ potius sapere ad ebrietatem quàm ad sobrietatem. Vitium ignobile, & inter cetera vitia ignobilius, ebrietas. Vbi enim sensus ebrii? vbi reuerentia in ebrio? vbi dignitas? Immemor est præteriti, futuri ignarus, præsentis nescius. Discretio confunditur, ratio hebetatur, sensus ligantur,

mens

Rom. XII. 3. *Non multum sapere, sed sapere ad sobrietatem.*

Solent homines terræ tuæ potius sapere ad ebrietatem quàm ad sobrietatem. Vitium ignobile, & inter cetera vitia ignobilius, ebrietas. Vbi enim sensus ebrii? vbi reuerentia in ebrio? vbi dignitas? Immemor est præteriti, futuri ignarus, præsentis nescius. Discretio confunditur, ratio hebetatur, sensus ligantur,

mens

mens ipsa sepelitur. Risui derisoribus exponit magis seipsum ridens. Ex hac viperea radice surgit, vel potius serpit, deuastans totius religionis animæ vigorem luxuria. Denique tanquam ex magno gurgite perditionis profiliūt non rara germina pestiferæ præuaricationis. Pes errat, labitur lingua, trepidat manus, labia tremunt, caligat visus, auditus surdescit. Adde his intrinsecus furias debacchantes, & miserum pectus miserabiliter lacerantes. O bone vir, nonne videntur tibi hæc principia mortis, fomenta ignis æterni, esca supplicij, illecebra damnationis? Vt igitur morsum colubri euadas, fugienda est ebrietas. Muscipula venantium capitur, qui vel semel inebriatur. Lusus dæmonum est homo ebrius. Tanquam prostibulum vitiorum reputatur, qui gulæ & ventris tyrannidi subiugatur. Mari commoto quid tempestuosius? excusso fulgure quid formidabilius? abyssu quid profundius? Nullum tamē horum nequius, quàm homo ebrius. Desistendum est à veneno, immo à vino, quod hominem vertit in truncum. Diuinorū lectio librorū præceptis & exemplis ostendit, quàm turpiter natura ex hoc dehonestetur, quàm crudeliter condemnetur, quàm interminabiliter crucietur, quàm immisericorditer à regno dei excludatur. *Neque ebriosi*, ait Apostolus, *regnum Dei possidebunt.* Diutius impressi stylum, si fortè refellerem, vel saltem reprimerem vitium. Interim collactaneam eius luxuriā eodem acumine potius pungamus, quàm pingamus. Pinguis namque & ista pinguißima de pingue-

I. Cor.
VI. 10.

dine terræ apud vos exuberat. Vbi namque iuuenum & puellarum forma decentior, aspectus gratiosior, cibus abundantior, potus crassior, aer salubrior, terra fertilior, amœnitas iocundior, prauus his enervatur animus. Satius est namque ei frui cupiditatibus vanis, quàm æternis bonis. Colore adulterino deceptus, quæ intus latet falsitatem non attendit. Mendax mendaciter mulier de specie vana se iactat. Certè pulcritudo illa nec vera est, nec sua. Si enim vera esset, semper durasset. Vnde quod semel est verum, semper est verum. Si sua, non in foro emeret. Fallax gratia, & vana est pulcritudo. Abijcienda est autem, quæ fallit grãtia: ambienda, quæ liberat. Vmbratilis postponenda pulcritudo, utilis appetenda. Communi hæcenus admonitione præmissa, vt tuæ vnica & singularis animæ curam maximam habeas, rogamus. Nemo enim de sæculo egrediens animam suam ulterius commutat. Hic locus, hinc tempus commutationis faciendæ: mores hinc commutandi & corrigendi. Cæterùm correptio, non correctio in futuro dabitur: fiet comminatio, non cõmutatio: nisi fortè de pœna in pœnam, de morte in mortem, de miseria in miseriam. Muta itaque vitam, dum viuis in hac vita, ne si fortè modò cùm potes distuleris mutare, tunc volens mutare cogaris tenere. R. timet sibi anima mea, timet & tibi. Pater meus es tu, & ego filius tuus. Et quia per te ingressus sum in vita corruptibili, vtinam per me peruenires ad disciplinam Dei. Non contingat me sine

te gaudere : contingat autem te & me cum Christo regnare. Vale.

EPIST. XI.

Suis carissimis amicis, H. subpriori, Thoma & Ascelino Clareuallensibus, frater Petrus humilis abbas Cellensis gratiam pro gratia.

QVibus gratiofiori affectu dulcius copulamur, eisdem non immeritò meliora & dulciora scribimus. Vt enim dignior animus quàm corpus, sic animi potiora sunt bona, quàm corporis. fidelis verò sui ipsius interpret est animus. Itaque & nos potius quæ ad animum pertinent colimus, quàm quæ ad corpus. Nam si de affectu non secū dum affectum scribis, utique mentiris. Igitur affectus cum de se loquitur, se & non alium loquatur. Est enim hypocritarum aliena tanquam sua, sua tanquam aliena dicere. Nihilominus & simulatorum est, neque simpliciter diligere, neque veraciter ad amicos loqui vel scribere. Quamobrem in Christo & in conscientia vera pronuncio, quòd erga me sincerio rem & puriorem habeatis affectum, ut credo, quàm ego ipse. Nam quo purgatio r est in vobis. oculus mentis, eo perspicacior est etiam in amicis diligendis: & quo expeditior ad clarè vidèdū, eo liberior ac iustior de omni causa decernendū. Solūmodo siquidē corporū nebula obstat, ne se vicissim meus & vester spiritus sublati impedi mētis clarè videat. Attamē ut in corpore

53.

I ij

mortali immortalia corda, & ad se per amorem accedere, & se se per mutua desideria possunt contingere: sic vnica & speciali dilectione, quotidiano recurſu à ſuis commeant regionibus, quatinus datur, ad ſe ſalutandos & oſculandos affectus noſtri. Quotiens enim vos recogito, totiens pedibus animi vos adeo. Itaque, fratres cariffimi & deſideratiſſimi, veſtras conſolationes & ſitienter ſuſcepi, & ardēter perlegi, & velociter compleui. Et attendite etiam in hoc quā bene coherēat, quā perfectē ſibi conſentiant conſcientiæ noſtræ. Quando enim ſcribebat dictante animo digitus veſter, cogitabat animus noſter: & quod ſcripſerat digitus, hoc elegerat animus. Planē priuſquam audirem obediui, antequam conſilium daretur adqueiui. Tanta dilectionis velocitas, vt audire non expectet quod facere debet. Lædi namque ſe æſtimat, niſi amicorum voluntates præcurrat. De merito ſuo plurimum ſibi præripi gemit, niſi etiam motum voluntatis vigilanter præoccupauerit. Tunc læta, tunc gratulabunda, cū præceſſerit veniendo, & quodammodo exceſſerit maiora faciendo. O exceſſus caritas! ô excedens caritas! Sola in omni genere virtutū excedendo non excedis, aſcendēdo nō corruis, deſcendendo aſcendis. Ad modum proprium cohibetur humilitas, terminos ſuos habet caſtitas, ad malum non laxamus obedientiæ habenas, ad fines ſuos, nec extra extēditur largitas, ad fines mendacij non accedit veritas. Sic denique & aliæ virtutes, curſus tantū ſuos ex-

currere, sed non transcurrere debent. Constituti sunt eis termini, qui præteriri non poterunt. At caritas usque ad cælum, immo & supra cælum, veluti cui lex non est posita, conscendit: usque ad infernum, & etiam in inferno ipso aliquando descendit. Amicos amplectitur, nec ab inimicis arcetur. Cum se extendit, non leditur, cum se superextendit, non rumpitur. Semper crescit, nunquam senescit. Anni eius non deficiunt, sed perficiunt. Quo enim vetustior, immo diuturnior, neque enim veterascit, eo & clarior. Sicut vinum Libani semper nouatur, semper confortatur, semper cumulatur. Vires semper accrescunt: splendor faciei eius nunquam deflorescunt. O virtutum virtus! semper in me sic excedas, vt nunquam decedas. Non finis decedere, in quo dignaris iustos excessus creare. Sic nouit Apostolus mente excedere, & cælum tertium penetrare: sic propheta in excessu mentis supra hominem de Deo sentire. Præ stupore Petrus in cōsideratione glorificatæ maiestatis sic excesserat, cum dicebat, *Faciamus hic tria tabernacula, Tibi vnum, Moyse vnum, & Heliae vnum.* Secundò etiam & tertio sic excessit, vel quando Christum non sustinens mori, dicit, *Abstine à te, domine:* vel quādo abscidit auriculam serui, vel etiam in captura piscium cum dicit, *Exi à me domine, quia homo peccator sum.* O quotiēs sponsa ad sponsum excurrit, aut vt verius dicam, seipsam & omne quod creatum est pro amore sponsi excedit! Quādocunq. enim vel de sponse vel ad sponsum loquitur, per excessum trās-

Matt.

xvii. 4.

Matt.

xvi. 22.

Luc. v.

8.

134 PETRI ABB. CELLENSIS
uolare dicitur. Hos saltus sine excessu non
nouit, nisi qui experientia didicit. Quapropter
de his mihi parcius loquendū, vobis idoneum
est latius & largius agendum potius, quā
differendum. Valete. Quam citius potero ve-
niam ad vos.

EPIST. XII.

Suo R. Clarenallis, suus Petrus Cellensis.

34. **S**Olet mima festinatio, etiam semicruda
quasi iam bene cocta, præ nimio appetitu
insumere, & tanquam famis necessitatem in-
terdum temperare. Instas, & ostiū amici velut
necessitate hospitis superuenientis inquietare
non cessas. Credo potius ex crassitudine ani-
mæ, vel ex nō necessaria pauperpate id te acri-
tare, vt neque importunitatibus tuis occupa-
tiones meæ satisfaciant, neque voluntati tuæ
solemnēs istæ feriæ silentium imponant. Quid
igitur? Experiō nunc quod in Isaia iam, ante
Esaie legeram. *Venerunt filij vsque ad partum, & tempus*
xxvii. *sive virtus pariendi non est.* Estuo siquidem noui
3. amici nouam & primam promissionem ad-
implere, sed contradicentium irruptiones vix
valeo mitigare. quis itaque, à quo, vel quid
petas mihi considerāti, offert ratio copiosam
fortunam petitoris, pauperem inopiam po-
stulati, difficultatem petitionis. quis, nisi qui
ambulat in medio lapidum ignitorum, nisi
qui cedrorum medullam consuevit lambere,
& præclara sententiarum stipendia de castris

philosophorum reportare? A quo, nisi ab eo qui inter sentes, ne dicam sententias, delicias reputat dormire? nisi ab eo, qui neque vngulam findit meliorum dictorum distinctione, neque ruminat si qua contigerit audire vel legere? quis à quo, nisi doctus ab indocto, nisi plenus à vacuo, nisi videns à cæco? Non leue & simplex fateor impedimentum sustineo, ne intrein in sanctuarium Dei, vt de manu Cherubin carbones consolatorios tibi accipiam. Obstat hinc flāmeus gladius atque versatilis sollicitudinū, vsque ad medullam animæ penetrantium, illinc caterua Philistinorum puteos meos, terra mortuorum replentium. Preter hæc, tanta certè confusio concurrentium ad me fit, cū incipio scribere, vt pene syllabæ singulæ noua cogantur habere principia. Ecce monachus confitetur, ecce alius diffitetur: ecce miles saltat, ecce clericus salutatur, ecce famulus inquietat, ecce nuucius coruum frequentius quàm columbam resonat. Mi dilecte, quam interim cor humanum congregare poterit sanctarum scripturarum meditationem? quod componere commonitorium? Sed fortè hæc ipsa non monendo monent, inquietādo suadēt quietē, in diuersum decerpēdo verum, id ipsum quærere admonēt. Sic enim esuriens panem quæro, aquam sitiens, algens ignem, caligans lucem, deficiens refectiōem. Verū tu aliud habens melius & verius commonitorium, rursus aliud mendicaris potius ex voluntate, quàm ex necessitate. Exemplo credo Apostolorum id facis,

I iiij

LUC.
xiv. 8.

qui cū I E S V M haberent, patrem nihilominus videre cupiebant. *Domine, inquit, ostende nobis patrem, & sufficit nobis.* Nōdum nouerant, quia cui filius non sufficit, nec patrem habere poterit. Plena etenim filij cognitio vniuersæ rationalis creaturæ est plenissima recreatio. O quam præclara Clareuallensium commonitoria! Quid enim lacrymæ huius, nisi compunctionis sunt incitium? Quid alterius continuæ orationes, nisi supernæ contemplationis adiumentum? Huius humilitas superbiam confundit apostatæ angeli, & hominis: obedientia illius, pendentis in cruce Christi emulatur obedientiam. Iste Iacob assimilatur in laboribus: simplicitas Ioseph hunc exornat: zelus ordinis in isto Moysen reddit. O David mansuetudo! ô feruor Helix! ô Danielis abstinencia! ô castitas Samuelis, & quod maius est, ô Christi caritas! ô Mariæ virginitas! Castra Dei sunt hæc. Quid vidēbis in Sunamite tua, in coccinea tua, nisi choros castrorum? Chorum alium videro procedentem aduersus phalangas vitiorum innumerabilium: dum iste non quærens quæ sua sunt, spiritum auaritiæ strangulat, iste mundi gloriam calcans principem superbiæ suffocat, iste carnem macerans luxuriæ caput detruncat, & cuicumque obuauerit quisque de aduersariis, sine misericordia fortiter in ore gladij enecat. Pluunt denique instanter post terga hostium sagittæ, vibrant hastas, frameam effundunt, & siue leones, siue vnicornes cum omni bestia saltus

exterminant. Non est in eis deficiens, neque laborans. In dextro cornu iterum considero alium in equis albis, chorum certantem non iam pro victoria, sed ad coaceruanda pretiosiora spolia. & iam prægustat alius mercedem laborum suorum, alius gratiam labiorum consequitur, alius de ligno, quod est in medio paradisi, superextensus in vltiora velaminis per obliuionem terrenorum & contemplationem cœlestium edit. Isti sunt qui stolas suas dealbauerunt in sanguine agni, resistendo vsque ad sanguinem vitiis, & pertingendo vsque ad patientiam agni immaculati. Hi docent te arcum & sagittam: hi sanguinem vuæ, & mori propinant. Arcum prauum isti non intendunt, sed spiritali subtilitate, etiam capillum minimæ cogitationis in arcu propriæ reprehensionis citissimè feriunt. Prorsus cōuersi sunt in die belli, quia neque in incerto currūt, neq; segniter viuunt. Ad hoc te mitto commonitorium. Omnia enim eorum commonent, siue confessus, siue incessus, siue sermo, siue silentium, siue ieiunium, siue prandium. Ecce mille clypei pendent non solum ad te commonendum, sed etiam ad munendum: & tibi post hæc, fili mi, vltra quid faciã? Habes quoque & alium paraclitum, tanquam aliud commonitorium, quod prope est in ore & in corde tuo: vnctionem spiritus, quæ te docet de omnibus. Habes sapiētiam, quæ non inuenitur in terra suauiter viuentium, quam filii Agar non inueniunt, de qua Philosophorum abyssus loquitur, Non est mecum. Liga

eam in corde tuo iugiter per amorem, describe illam in tempore otij tripliciter, cogitando, loquendo, operando. Discurre scripturarum amœnissimos campos: lege tanquam apes & reconde in alveolo memoriæ suavisissimi odoris flores, castitatis lilium, oliuam caritatis, patientiæ rosam, vuas spiritualium charismatum. Considera diligenter quæ apponuntur, quia quædam ad consolationem, quædam ad correptionem sunt. Alia ad sanitatem, alia ad satietatem, alia ad suauitatem. Spes præmij promissi mœrentem consolatur: corrigit comminatio æterni supplicij: medicamine pœnitentiæ sanantur omnes languores: præsentis iustificationis exultatio famelicum iustitiæ satiat: adueniens gratia virgam timoris amouet, & sua infusione animam lætificat. O Iesu! comminatoribus tuis quis sapor in faucibus? quis odor in naribus? quis splendor præ oculis? quæ auditus modulatio? quæ cordis iubilatio? Nihil infra votû, supra omnia abundant, immo superabundant, gaudia. Explicat & extēdit se voluntas ad volendum, vel etiam ad volandum, sed non sufficit. Supercurrit oleum, quia vasa deficiunt. Hic, hic manus dantis largior, & accipientis rarior. Sola hæc ministrorum indignatio, quia pauci sunt, quibus fiat cœlestium ferculorum distributio. Lōgos fac funiculos tuos, extende pelles tuas: ne parcas, quia dilataberis ad orientem diuinæ contemplationis, ad occidentem humanæ per Christum reparationis, ad septentrionem dæmoniacæ deiectionis, & ad austrû gloriosæ

ascensionis. Vale, nec sine recompensatione nostram paupertatem velis accipere. Carissimum nostrum Subpriorem ex toto corde, & ex tota anima, & ex tota virtute saluto, & ceteros amicos nostros.

EPIST. XIII.

P. Cellensis R. suo Clareuallensi.

EXcusationis meæ proœmium, siue velamentum rusticitati meæ superinducerem, si clerico scholari, non monacho Clareuallensi, si spumanti in sæcularibus, non sudanti in regularibus; si denique Sirenarum oblectamenta captanti, non aspera quæque per desertum sectanti scriberem. Nunc autem quia id solum quod honestum est bonum esse non dubito: omne verò verum honestum, si verum dixerò ab honesto non recedens, confusionem non timeo. Scio itaque manum te ad fortia misisse, & satis perplexum antiquo sophismate sophisma fecisse. Crede mihi, frendens & rugiens quærit soluere quod nequit ex ratione refellere. Callidus est & in arte peruersæ calliditatis potenter callens: utpote cui ab incomprehensibilitate retro labentium temporū annus, mēsis, dies, hora, vel breuissimum momētum non est elapsum absque huiusmodi conflictationibus. Quotiens vicit & victus est? deiecit & deiectus est? obruit & obrutus est? Non est ei pudor, timor procul abest spes euertendi semper adest. Fulminat timens, attrectat tremens, recedit sperans, accedit dubitans. O astutia simplicitatis inimica, malignitatis filia, vnica

55.

totius religionis tinea ! Patrem nostrum à paradiso exclusisti, in exilio detrusisti, in morte conclusisti: nos beatitudine spoliasti, miseriis cumulas, à Deo separas. Quid tibi & nobis? Cœpisti, & decepisti, sed non recepisti. Qui enim fecit, ipse reficiendo recepit. Seductor igitur, carissime, cauendus est, & laqueo suo capiendus, & gladio suo detruncandus. Sic fecit nobis, sic faciamus illi. Si malum est esse homicidam, sed non diabolicidam. Caput ergo eius contere, caudam apprehende, corpus medium scinde: & sic vespere & mane & meridie narrabis in confessione, annunciabis in satisfactione, exaudieris in oratione. Sophista iste malè proponit, peiùs assumit, pessimè cōcludit. Suggestendo praua proponit, ad delectationem trahendo assumit, in consensum deiiciendo concludit. Si itaque suggestionem prudenter præuidens scuto sacræ institutionis propuleris, delectationem fortiter memoria passionis Christi excusseris, consensum constanter timore & amore Dei negaueris, tendiculas eius tanquam fila araneorum abrumpens, coronaberis de capite Amana, de vertice Sanir & Hermon.



PETRI ABBATIS CELLENSIS

EPISTOLARVM LIBER IIII.

EPISTOLA I.

Suo sans.



T perniciosum optimis telum inuidiam nostrā proscribat epistola, communis exorat caritas. Satis namque superque quod mihi scripsisti dulce, vtile, & honestum fuit.

56.

Quid enim dulcius amore? Quid vtilius diuinarum & humanarum rerum subtili & compendiosa descriptione? Quid honestius morum salubri informatione? His nostrum torpens ingenium excitasti, causam non causandi de secularibus parumper præbuiisti, ac otiosa sollicitudinis vela relaxasti. Sic irrigant, inebriant, & tranquilliant scripta tua, dulcissime, animam meam. Sterilitati denique vbertate, tumul-

tuositati libera pausatione, occupationum insolentię renuncians ad remotiora secessione, Nicolai mei hoc agi contestor scriptitatione. Deficiente ergo spiritu, manu trepidante, repugnante ingenio, grandiora præsumo, prætentio fortiora, vix explicabilia attripio. Vtrinque enim spiritu vehementi ex quatuor ventis conglobato, cuius spei robore floris tenebritudo non euanescat, pulcritudo non deficiat, viror non emarcescat? Infidum est irato obuiare leoni: stultum nihilominus, emissam non declinare sagittā. Omnis armatura fortium tuis militat castris. Itaque congregi timeo. Nam cum propria satis armatura triumphare posses, quorumcūque etiam potentissimorum arma mutuaisti, vt superuinceret. Solo clypeorum aureorum fulgore deiicior. Exclamo tamen, Pone non tua. Nam plurimum intererit, vtrū maiestate irrefragabili auctoritatis philosophorum, an propriarū rationum & sentētiarum cōspicuitate castra nostra poteris debellare. Tibi an illis deputetur victoria, cum sine discriminis examinatione illorum vestigiis procumbam volens. contra te autē arma, sed pacis, feram, statim elucescet. Quid enim? vera sint philosophorū inattingibilia acumina, cum ingeniorum nostrorum vis sola quæritur, quid nostra interest? Profsus eorum cedo auctoritati. Non sic verò, non sic subfugiet pupillam oculi mei quod egressum fuerit de labiis tuis. Iure suo priuari se amicitia aliter cōquereretur, nisi res amicorū æquo libramine discuteretur. Decursis itaque & di-

scussis vernātis eloquentiæ tuæ sermonibus
 & sensibus, iterum iterumque tua reuoluēs &
 mea euoluere gestiens, timeo sub luce videri.
 Quid ergo? Periculū experiar? sed nō in filia.
 Loquar? sed vtinam non inania. Reprehendā,
 sed amici superflua. Laudabo? sed philosopho-
 rū ingenia. Hinc tamē nō progrediar, nisi pri-
 data manu initum fuerit pactum, prorsus ne-
 quaquam irasci pro aliqua contumelia. Ingre-
 diens itaque aggrediar, non veritatis domici-
 lia subuertere, sed amici, si qua est, propriā de
 præiacentibus verborū diuersitatibus calum-
 niam arguere, & quibus potero auctoritatum
 rationibus refellere. Video autē in vestibulo
 & in fronte epistolæ tuæ quod nimia formo-
 sitate sui curiositatem oculorum meorum sic
 allicit, vt vix eos eiicere & elicere valeam. Est
 enim quiddam, cuius nomen super omne no-
 men, cuius forma formosior omni forma, cu-
 ius statura & altitudo à fine superioris cœli
 vsque ad finē interioris inferni. Imago est in-
 imitabiliter nata, nō facta. Vnus est qui hāc de
 corde suo excogitauit & eruclauit, nō artifex
 huius, sed omniū, huius autē pater. Huic con-
 formari est reformari. Hanc loquentē & se ex-
 primentē, aptis coloribus renitentē, sceptro
 imperiali cūcta regentē, cœlicolas cū terrige-
 nis in brachiis coniungentē inueni, adoraui, &
 tenui. Decor eius inæstimabilis, dulcedo insa-
 tiabilis, claritas inaccessibilis. Tā suaue loqui
 de illa, quā admirabile amplecti illā. Ad hanc
 qui accedit, aut vix, aut nūquam recedit. Ocu-
 lus non satiatur visu, nec auris auditu. Qui
 edunt, adhuc esurient, &c. Hæc osculata

est me osculo oris sui. Hæc digito manus suæ tenens animam meam voce propria, ne declinarem ab ea. Huiusmodi attractus & delinitus blanditiis, an vltius progrediendum sit hæsito. Bonum enim est hîc esse. Tandem verò innuente & annuente vt irem non discedens, redirem permanens, aliam vidi visionem. Rubus ardens in interiora deserti apparuit. Suspensus intenta cogitatione, num, inquam, sicut Moyssi rubus ardebat & non consumebatur, sic meus iste reddit splendorem lucētem, non calorem vrentem? Amici enim increpatio, grata potius correptio est, quàm molesta exustio. Est autem. Vos venator tam verborum quàm sensuum, & conclusum retibus & percussum venabulo credidistis. Hic enim rubus ruborem ingerens, sed perfectæ & solidæ caritatis robur nescienti. Oculis pupilli pungeretur, vel etiam compungeretur, si spina huiusmodi confingeretur. Non verò contingat hoc oculo caritatis, cuius solius est colligere, immo producere rosam de spinis. Sic Iesus de spina passionis rosam protulit redemptionis. An non eius imitatione & tu reddis bona pro malis, qui mollia duris, dulcia amarioris, vera retribuisti vanis? Reuera tu simplex & domi habitans, vt dicis, in simplicitate cordis tui scripsisti. Animaduerto igitur ad thronum gratiæ miro pennarum iuuamine te conuolasse, & ibi, quia citra non reperisti, simpliciter simplicem Deum didicisse. quæro itaque, anne simplicitatem tuam ab illo fonte reportaueris, & vtrum tantum transeundo, quan-

quantum cœlicolæ manendo & stando ex-
 hauseris. quod si fieri non potuit, constat non
 iniuriosè inæstimabiliter illorum tuam præ-
 cellere simplicitatem, sicut & beatitudinem.
 Animam siquidem humanam naturaliter
 simplicem, Angelorum verò naturam, etiam
 simpliciter simplicem indubitabili fide cre-
 do & confiteor. quod vt euidentius appareat,
 nostra de simplicitate & tua sub oculis com-
 pendiosa annotatione volo colligero. Dixi,
 quia omnis res simpliciter simplex vna &
 vnum est. Non autem si vna, statim & sim-
 plex. Simplex enim respuit & refugit omnem
 prorsus admixtionem. Rem vero vnā con-
 uenientia duo simul, vel plura aliquando fa-
 ciunt, vt vnum corpus constans ex quatuor
 elementis. Ista, inquis, aut non intelligo, aut
 vos minus attenditis. Malo me minus inten-
 dere, quàm te non intelligere. Tamen parum-
 per attende, & de simplicitate si malè sensi,
 quia cœpisti, iterum corrige. Interim ipse vt
 decet consignatam tuis exhibens reuerētiam
 sensibus & sermonibus, meos etsi non verba
 sensus vallo veritatis communiam fortiùs.
 Omne igitur quod est, aut simplex, aut com-
 positum est. Compositum autem aut sub-
 stantiale, aut partiale. Substantiale, veluti cùm
 vna substantia alij substantiæ iungitur.
 Partiale, cùm vnus substantiæ partes con-
 iunguntur. Hoc autem compositum superiori
 simplicius est. Illud verò ex toto & naturali-
 ter dicitur simplum, quod caret & substan-
 tiali & partiali compositione. Anima itaque;

K

quia neque diuersarum substantiarum, neque eiusdem substantiæ diuersarum partium in se se suscipit coniunctionem, naturaliter est simplex. Non enim ex prius existente aliqua materia creata est, vt respectu materiei suæ composita dici possit, sicut in omni corpore id quod factū est dicitur respectu illius quod de eo factum est, simplum: sed de nihilo facta catholicè creditur. Angelica verò natura, quia hoc habet amplius, quòd nullis subiaceret corruptionibus, quemadmodum anima ex coniunctione corporis, liberiùs euolat ad secretissimos simplicitatis recessus. In hoc etiā fere omnes philosophi, consentiūt, quòd principium rerum est perfecta sapientia, lumen præclarum, substantia substantiarum, argumentum rerum vniuersarum. Id autē vnum & simplex, cuius simplicitas confert, non aufert simplicitatem. Neque enim creaturæ suæ suam inuidet simplicitatem, cui suam non negauit imaginem. Eo igitur in arce veræ & summæ simplicitatis illocaliter locato, rationalis participat creatura. Fiunt autem magis & minus simplicia magis & minus eo participantia. Ideo nāque simplex, immo simplicitas simplicium, sicut Deus deorum, in simplicitate iubet se quærere, cum simplicibus se dicit ambulare. Dat autem inuenire & habere, si quæratur quomodo iubet quærere. Aliter quærantibus, *quæretis, inquit, me, & non inuenietis.* quia itaque nisi in simplicitate non inuenitur, simplicitate autem simplicem fieri non dubitatur, quicumque eum per simplicitatem

Ioan.
vii. 36.

inuenit, participatione eiusdem simplicitatis simplicior efficitur. Inæquali autem proportionē participantes inæqualiter inueniuntur simplices. Ipsa autem simplicitas in se vera & summa est vnitas. Sciendum verò, quia sicut aliud est participans, aliud participatum: sic etiam aliud simplex, aliud simplicitas. Nec habet lingua & ratio hominis, nescio si Angeli, idem esse simplex & simplicitatem, sicut nec album & albedinem. Noli, noli simplicitati nostræ, immo tuæ risum insimulare. De Deo enim nihil habes opponere, cū quicquid ipse est legatur omnē sensū transcendere. Tamen quod bonus, quod pius, quod iustus, quod simplex dicitur, figuratiua locutione accipitur. Vt enim Plato ait, *Deum inuenire difficile est, inuentum dignè profari impossibile*. Nulla certè oratione, vel orationis parte, Deum potest aliquis describere, vel definire. Itaque de Deo nulla fiat oppositio, quia ipse est omnium conclusio, nihilominus & exclusio. Ex eius stabili simplicitate sortitur ordinem, causas, & formas, vt Boetius testatur, omnium generatio rerum, cunctusque mutabilium naturarum progressus, & quicquid aliquo modo mouetur. Eius natura in sua simplicitatis arce composita, regendis multiplicem modum statuit. Potius ergo bonitas ipse, & participatione eius creatura bona, potius pietas ipse, & consortio pietatis creatura pia, potius denique simplicitas, & possessione simplicitatis dicatur creatura simplex. Eiusdem

autem locationis genere quo Deus iustus, & nos iustitia Dei appellamur. Vide etiam utrum bona similitudine utatur Boëtius ad exprimendum non tantum simplicem aliquem fieri, sed etiam simplicitatem ex strictissima connexionem & societate simplicitatis. De providentia profecto & fato sic dicit: *Providentia est ipsa illa divina ratio in summo omnium principe constituta, quæ cuncta disponit. Fatum vero inherens rebus mobilibus dispositio, per quam providentia suis quaque necesse ordinibus.* Et post pauca. *Manifestum est immobilem simplicemque gerendarum formam rerum esse providentiam. Fatum vero eorum, quæ divina simplicitas gerenda disposuit, mobilem nexum atque ordinem temporalem.* Inducta itaque similitudine paulo post subdit. *Nam ut orbium circa eundem cardinem se se vertentium qui est intimus ad medietatis simplicitatem accedit, cæterorumque extra locatorum veluti cardo quidam circa quem versentur existit: extremus vero maiore ambitu rotatus, quanto à puncti media individuitate discedit, tanto amplioribus spatiis explicatur: si quid vero illi se medio conectat & societ, in simplicitatem cogitur, diffundique ac diffluere cessat. Simili ratione quod longius à prima mente discedit maioribus fati nexibus implicatur. Medium quod ait, siue media individuitas puncti, intelligitur veritas & simplicitas Dei. quod enim huic amoris consociatur, in simplicitatem cogitur. Divinæ igitur supernæque substantiæ, quibus & iudicium peripicax, & incorrupta voluntas, & efficax optatorum præsto est potestas, quid est quare non inhæreant illi summæ*

& vnicæ simplicitati? Cohærent procul du-
 bio, & dotantur largiori simplicitatis priui-
 legio. An ista reculas credere, & paras con-
 tradicere? Nequaquam, inquis, sed quod crea-
 toris est, creaturæ nolo attribuere. Quare?
 quia æmularis Deum, sed non bona æmula-
 tione. Quantum enim desipit, qui non à Deo
 collata munera propria vsurpatione rapere
 præsumit, tantûdem à pietate resilit, qui data
 negat, vel abscondit. Nos, inquit Apostolus,
non spiritum huius mundi accepimus, sed spiritum 1. Cor.
qui ex Deo est, ut sciamus quæ à Deo donata sunt no- II. 12.
bis. Datum est enim omni corpori, vt sicut
 iam dictum est, compositione sit multiplex:
 animæ, vt carens partibus naturaliter sit sim-
 plex, sed propter limi societatem, subiiciatur
 vanitati, quæ est multiplex. Supercœlesti
 quoque indultum est creaturæ, vt ultra sen-
 sum humanum, sed citra diuinum, & natura-
 liter & simpliciter sit simplex. Tu verò cor-
 pus multiplex asserēs, animam quoque com-
 paratione corporis non per se simplicem
 astruens, transuolas ad supercœlestes, & ex
 gratia, non ex natura imitationem tantum-
 modo simplicitatis indulges. O nimium sim-
 plex! Forsitan enim Angelus tuus hoc au-
 diens irascitur, & quòd dona gratiæ & naturæ
 suæ commutaueris, indignatur. Nam ipse
 quidē nihil minores gratias agit creatori na-
 turæ, quàm datori gratiæ. Gratia namque
 creatum, gratia beatificatum, gratia nouit
 se confirmatum. Ab eadem tamen gratia

aliud in creatione, aliud meminit se accepisse in beatificatione, siue in confirmatione. Quod accepit in creatione, dona sunt naturæ: quod meruit in confirmatione, dona vocantur gratiæ. Igitur aut multiplex est Angeli natura, quod soli conuenit corpori, aut simplex, quod tantum spiritui. quia autem nullum tertium est simplex, vt æstimo, concedas necesse est. Simplex itaque cum sit natura, & vicinitate, vt ostensum est, ipsius summi simplicitatis artiùs exprimitur, & imprimatur in eo radius simplicitatis, non iam tantum simplex est, sed simpliciter, vt opinor, simplex. Ministrando namque adsistit & adhæret diuinæ simplicitati. Ipsa autem diuina simplicitas non naturaliter tantum, non simpliciter tantum, sed singulariter & ineffabiliter simplex est. Iam credo satisfactum, quare dixerim, omnis res simpliciter simplex, vel quare dicere potuerim. Quod autem sequitur, vna & vnum; est inculcatio verborum. Tamen vt vel tenuiter sic distinguam, vna profectò est, quia vt Seneca testatur, diuinorum vna est natura, & nihil est diuino diuinius, cœlesti cœlestius. & Boetius, quia corū eadem est substātia, quorum diuersus effectus non est. Vnum idcirco, quia natura simplicium indissolubilis, diuersarum pluralitatem partium ad sui efficiētiā non admittit. Quod enim ex diuersis partibus compositum est, naturaliter solubile est. Omne autem simplex & incompositum vnum est, &

caret partibus resolutionis. Quæcumque igitur substantia tam simplex est & vna, prorsus non admiscetur, neque cum alia simplici & incorporea, neque cum multiplici & corporea. Nam ubicumque & quotiescumque substantiæ immiscentur, necesse est vt in se inuicem commutentur & transformētur. Rerum enim quarumlibet coniunctio nisi in se se transfundantur, & à propria forma transformentur, copulatio, vel adiunctio, vel aliquid huiusmodi, non autem admixtio, vel commixtio dicitur propriè. Vnde & Verbum assumptione carnis, & indifuncta vnione caro factum, ne substantiarum transfusio, scilicet carnis in diuinitatem adnihilatio, vel diuinitatis in carnem substantialis exinanitio ab hæreticis persuaderentur, non commixtionem passum dicitur, & ne rursum alius Dei, alius hominis filius crederetur, & vna in duas personas diuideretur, ilico sequitur, neque diuisionem. Si noua, & ideo cassa, me confingere arbitraris, & vera & vetera statim si placet subiunctis rationibus comprobabis. Non, inquit Boetius, *omnis in omnem rem. versi ac transformari potest.* Nam cum substantiarum aliæ sint corporeæ, aliæ incorporeæ, neque corporea in incorpoream, neque incorporea in eam quæ corpus est mutari potest. Nec verò incorporea in se inuicē proprias formas mutant. Sola enim mutari transformarique in se possunt quæ habēt vnius materiæ cōmune subiectū. Neq; hæc omnia, sed ea quæ in se & facere & pati possunt. Idq; probatur hoc modo. Neq.

enim pōtest æs in lapidem mutari, nec idē æs in herbam: nec quodlibet aliud corpus in quodlibet aliud transfigurari potest, nisi & eadem sit materia rerum in sese transeuntium, & à se & facere & pati possint, vt cū vinum & aqua miscentur. Vtraque enim sunt talia, quæ actum & passionem sibi communicent. Potest enim aquæ qualitas à vini qualitate aliquid pati. Atque idcirco, si multum quidem fuerit aquæ, vini verò paululum, non dicuntur immixta, sed alterum alterius qualitate corrumpitur. Si quis enim vinum fundat in mare, non mixtum est vinum mari, sed in mare corruptum, idcirco quod qualitas aquæ multitudine sui corporis nihil passa est à qualitate vini, sed potius in se ipsam vini qualitatem propria multitudine cōmutauit. Si verò sint mediocres, sibiq. æquales, vel paulo inæquales naturæ, quæ à se facere & pati possunt, illæ miscentur, & mediocribus inter se qualitibus temperantur. Atque hæc quidem in corporibus, neque omnibus, sed tātum quæ à se, vt dictum est, facere & pati possunt communi atque eadem materia subiecta. Omne autem corpus, quod in generatione atque corruptione subsistit, communem videtur habere materiam, sed non omne ab omni, vel in omni, vel facere aliquid, vel pati potest. Corporea verò, vel incorporea nulla ratione poterunt permutari, quoniam nulla communi materia subiecta participant, quæ susceptis qualitibus in alterutrū permutētur. Omnis enim natura incorpore substantiæ nullo mate-

riæ nititur fundamento. Nullum verò corpus est, cui non sit materia subiecta. Quod cum ita sit; cumque ne ea quidem, quæ communem materiam naturaliter habent, in se transcant, nisi illis adsit potestas in se & à se faciendi ac patiendi, multo magis in se non permutantur, quibus non modo communis materia non est, sed cum alia res materiæ fundamento nititur vt corpus, alia omnino materia subiecta non egeat vt incorporeum. Non igitur fieri potest, vt corpus in incorporalem speciem permutetur; nec verò fieri potest vt incorporalia in sese commixtione aliqua permutentur. Quorum enim communis nulla materia est, nec in se verti ac permutari queunt. Nulla autem in incorporalibus materia rebus. Non poterunt igitur in se inuicem admisceri, vel permutari. Iure igitur simplex res refugit omnem comixtionem, quia nullam in quamlibet creaturam recipit commutationem. Item quod à nobis ponitur, sumptum à nobis: rem autem vnam duo simul vel plura conueniētia aliquādo in sese recipere, & conuertere vt vnum sint, in exemplari quod manibus meis scripsi, sic habetur. *Rem vero vnam, conuenientia duo vel plura aliquando faciunt, vt corpus vnum constans ex quatuor elementis.* Hic nullius cauillationis locum, aliquatenus animaduerto, & ideo respondere parco. Itemque intulisse me scribis, deum magis propriè ex simplicitate quàm vnitatem. Miror calumniam. Nonne enim statim subiunxi, nihil de Deo propriè dici. Iam quia, mi dilectissime, dul-

cedo viscerum meorum, lumen amicorum meorum, pro me satisfeci: epistolæ tuæ sententias quasdam digna inuentione corrigendas, & lima correptionis explanandas, partim contemplandas reperi. Quid dicis, amor? Placetne quod loquor? Gratiamne tuam persequor? Quod vis iube, & faciam. Clauem oris mei custodi, ne læsio prorumpat amici. Constringe fauces maxillarum, ne profluant iocos Sirenarum. Aperi tamen aliquando labia, ut excludam grauamina mea. Nicolaus enim tuus, immo noster, gratias superuacuas agit gratiæ, ut asserit, meæ, quia verba, inquit, nostra vel ex parte recipitis, receditis autem in omnibus à Claudiano. Iudica, iudica iudicium meum, amor iuste. Quid enim? Pene neruorum & venarum fila nimis inflationis protensione intensa rumpuntur. Protestando iurant & contestantur intellectus, ratio, & memoria, falsum contra se latum testimonium. Vix patientiam persuadeo. Amicus est, inquires, facetus: lepido iocorum sermone urbanus. Sine itaque, & disceptatione inextricabilem labyrinthum rationibus suis intexentem, & nunc quidem quæ egreditur introeuntem, nunc verò quæ ingreditur exeuntem sustine, complicata eius explica, malè explicata replica. O dulcissime! dormiebas quando epistolam nostram legebas? Fortè eras occupatus, & ideo non es culpandus. In hoc tamen inexcusabiliter culparis, quòd gratiarum tuarum nimium prodigus, dum malè locas perdis. Illas meas enim gratias ubi deprehendisti, quibus

ingratosè gratias agis. Sed quid miror te mirabili & inaudita nouitate gratiam quæ non est gratia asserere; cum mutandi & permutandi rerum & verborum proprietates auctoritate iam pristina cœperis pollere? Quid non faciat Nicolaus, qui de nigro factus est albus? Credo ista ductus & edoctus auctoritate, verba quoq. & sensus verborum præsumis quandoque inuertere. Nigredinem tamen pristinam somniaſti, vbi me à Claudiano dissentire notaſti. Nempe sermonibus acquieui & acquiesco tuis, in parte contradixiſti & contradico. Vbi enim corpus viuere, animã viuam, Deum vitam esse negaui? Nusquam crede mihi, nusquam. Tantummodo enim assignationes proprietatum quas subiunxiſti, viuens videlicet ex vanitate, viuum ex simplicitate, vitam ex vnitatem aggressus sum reprehendere. Sed monachũ illum, qui cum amico in epistolæ tuæ principio contendebat & reticēs, has iam præ tædio emittere audio voces. Vtilius, inquit amor, claustra oris cōtinuiſſemus, quàm rescribendo tot exundantium impetus torrentum incurriſſemus. Redundant enim torrentes vanitatis, & distillant ab ore amici nostri sermones superflua garrulitatis, Totus profluit & pereffluit. Silentia nostra confundit; consuetudinis nostræ morem & ordinem conturbat & concutit: ad pompa & superflua quæque improbitate sua, si acquieuerimus, prouocat & attrahit. Deinceps itaque noli scribere.

EPIST. II.

Suo sumo.

57. **B**estia quæ tetigerit montem lapidabitur. Cacumina, dilectissime, litterarum tuarum in tantam nubium densitatem subleuata sese recipiunt, quòd vix conatibus difficillimis acumen luminum meorum quoquo modo admittant. Nunc enim volas & peruolas in sublimitate cedrorum, nunc nidificas in altissimis cauernis maceriarum, nunc ambulas super pennas ventorum, nunc denique curris & discurreis incomprehensibiliter super montes aromatum. Siue inuenias semitam per quam ambulauerit homo, siue non inuenias, non multum curas. Nec mirum. Nam tuis ille ceteris familiarior Seneca hominum ingenia per tria diuisit genera. Primum ponit vt tuum, vias sibi aperire, & quæque remota vi propria penetrare. Secundæ fortis ingenium non adeo ingenuû, quod præire nescit, sequi tamen non intumescit. Infelicioris tertium fortunæ dicit, quod nisi coactum, manu tractum, currui impositum, ab inertia sua minimè concalescit & exilit. Huic me larga manu natura, primum & etiam secundum mihi inuidens ingenium, quàm adstrictissime ni fallor obligauit, & funiculo suæ dimensionis in hæreditatem præclaram confirmauit, sigillóque communiuit. O dolor! Tibi quidem oculo nequam, nequaquam inuideo; attamen

mihi condoleo, quia quanto fors tua meæ vicina relucet splendidior, tanto ipsa sublucet obscurior. Dum ergo repagula ori induxisti, dum oculis dormitationem indulxisti, dum manum ad pharetram non adduxisti, magna maiorum celeritate verborum effabar, perspicacitate ingenij non adæquabar, locupletem scientia scripturarum me arbitrabar. At ubi fulgurare cœpisti tonitrua sententiarum, vibrare iacula argumentorum, pluerè monita dulcium exhortationum, tardior lingua, sensu pauperior, stylo rusticior inuentus sum. Video igitur paupertatem meam, mirantem, non migrantem in abundantiam tuam, suspicientem non susipientem scientiam tuam. Confortata est, & non possum ad eam. Quanta enim putas profunditate, caligine, obscuritate recondatur, corpus est viuens, anima viua, Deus vita? Demum abyssus abyssum inuocat. Viuens, inquis, ex vnitate, viuum ex simplicitate, vita ex vnitate. Hîc, hîc tenebræ, hîc vmbra ex nube, nubilosus aer in meridie. Sed quæ culpa solis, si non illuminor priuatus oculis? O dignum, fortasse inquis, risu hominem, qui diem noctem, vmbra lucem, tenebras autumat solem! Neque inquam solem, neque diem, neque lucem, sed planè palpabilem offendo obscuritatem. Cùm enim corpus ab anima, animā à deo, deū vitā habere à semetipso irrefragabiliter credatur, nōne & si rusticius, tamen veriùs diceretur, corpus viuificatum ab anima, animam viuificatam à Deo, & viuificantem corpus, Deum omnia

viuentia viuificantem, in se & ex se viuum & viuentem? Sed rursum quid est corpus viuens ex vanitate? *Corpus*, inquit Apostolus. *mortuum* Rom. VIII. 10 *est propter peccatum*. Quod ergo Apostolus mortuum vocat propter peccatum, tu viuens dicis ex vanitate? An non vanitas peccatum? An idem simplici sensu intellectum operatur mortem & vitam? Odit Deus obseruantes vanitatem. Dilectio autē Dei viuificat, odium mortificat. Non ergo est aliquid viuens ex vanitate, sed ex veritate. Quod factum est in illo, id est, Verbo veritatis, vita erat. In se & ex se profectò creatura nulla tetrestis vel supercælestis vita est, cū tamen in illo vniuersa siue viuens, siue vita carens, vitam suam habeat. Addis viuum, id est, animam ex simplicitate, vitam, id est, Deum ex vnitate. Istis non sic in spiritu vehementi offendor, sed nec penitus assentio. Nam anima ex vnitatem immortali & indissolubili, sicut & Deus suo singulari & alio modo immortalis est & indissolubilis, ex nihilo creata esse creditur. Idcirco namque ad imaginem & similitudinem suam creauit eam Deus. Per hoc etiam quod per omnes particulas corporis tota simul adest, nec minor in minoribus, nec in maioribus maior. Sed tamē vt Augustinus testatur, in aliis intensius, in aliis remissiùs effectus suos exercet, cū in singulis particulis corporis essentialiter sit, vnitati magis, quàm simplicitati obnoxia perpenditur. Omnis enim res simpliciter simplex, vna & vnum est. Non autem si vna, statim & simplex. Vnde dicitur

Deus simplex, non ob aliud, teste Isidoro, nisi quia non est aliud ipse, & aliud quod in ipso est. Rem verò vnā conuenientia duo simul vel plura aliquando faciunt, vt vnum corpus constans ex quatuor elementis. Anima itaque quamuis diuersarum compactionem partium in sui confectionem non recipiat, quia tamen aliud ipsa & aliud in ipsa est, secundum auctoritatem prælatam, potius vnitatem, quàm ex simplicitate conuenit ei esse. Hac etiam eadem rationis demonstratione Deus ex simplicitate dicitur magis propriè, cùm pene nihil aut prorsus nihil de eo dicatur, nisi impropriè. Quid enim est quod dicitur Deus ex vnitatem vel ex simplicitate, nisi Deus ex Deo pater scilicet à semetipso, filius à patre, Spiritus sanctus à patre & filio? An desipit ita quispiam, vt participatione simplicitatis simplicem, participatione vnitatis vnum, participatione bonitatis bonum existimet Deum, sicut sapiens participatione sapientiæ efficitur homo, & cetera huiusmodi? Quicquid in deo est, Deus est: sapientia in Deo est, & Deus sapientia est: potentia in Deo est, & Deus potentia est: bonitas in Deo est, & Deus bonitas est. Non magis ergo Deus ex vnitatem, quàm ex simplicitate. Iam extorsissem digitis stylum, & ori meo imperassem tēpestiuum silentiū, si non decreuissem expirare hīc quicquid de amico remordet animum Durius siquidem pungitur cor meum, dum vsquam pingitur filius medius inter patrē & spiritū. Prorsus idolum abominationis conflaret, qui sculptile quodlibet sic sculperet vel depingeret.

Consubstantialitas enim, coæternitas, coequalitas vnius Trinitatis & trinæ vnitatis, Patris, ac Filij, ac Spiritus sancti, non recipit prius ac posterius, maius & minus, inferius & superius: sed totus pater in toto filio, totus filius in toto patre, totus Spiritus sanctus sigillatim & comuniter in vnoquoque & in vtroque simul. Hæc sancta & semper cum tremore nominanda Trinitas vbique tota per essentiam & potentiam, non per gratiam diffusa, non spatiosa magnitudine, quemadmodum lux visibilis, vel aliud visibile, sed sicut sapientia in homine. Vides enim duos homines, vnum paruum & alium magnum corpore, in sapientiæ tamen participatione æquales esse. Sic diuina essentia vniformis & vniuersi modi est & in maximis & in minimis. Sicut denique incomprehensibilis est pro sui immensitate, sic etiam indiuisibilis pro sui simplicitate. Intellegamus, inquit Augustinus contra Arriū, deū quātum possumus sine, qualitate bonum, sine quantitate magnum sine, indigentia creatorem, sine situ pæsentem, sine loco vbique totum, sine tempore sempiternum, sine commutatione mutabilia facientem, nihil patientem. Iuras, credo, sic te nec aliter credere vel credidisse. Protestor & ipse in fide mea, si lingua quia in vdo est errauit, corde sic tenuisse, Simplex enim res refugit & respuit omnem adiunctionem, omne consortium. Ne diu tamen à cogitationibus conturberis, reuoluens ubi hoc dixeris, in sermone de sancto Victore scribis: Vbique autem est in medio. Nam & in

in illa deitatis essentia est medius filius inter patrem & spiritum. Meminisse debes nunc, quia mediator vnus non est: Deus autē vnus est, pater & filius, & Spiritus sanctus. Quòd si creatum, non increatum spiritum, ideo quia sanctum non subiunxisti, intelligendum aliquis æstimat, regulam Hieronymi de significatione huius nominis penitus ignorat. Vbi, inquit, spiritus sine adiunctione aliqua in scripturis ponitur, Spiritus sanctus rectè intelligitur. Si autem intellector iam dictus de creato spiritu dictum prorsus contenderit, nec minor abusio, quàm de increato superius ostensum est, remanebit. Qui enim pugillo concludens omnia, extra & intra, infra & supra est, qua ratione medius dicatur, qui comprehendat nemo est. Clamitas, totum me effudisse spiritum meum. quid ni? Cùm tibi effundo, non effundo, sed infundo.

EPIST. III.

Nicolao suo Petrus suus.

Mirabili conditas sapore litteras audivi- 58.
tati meæ componitis, quotiens scribitis. Vt enim veraci amico veraciter loquar, illud pene propriè proprium apud me habent, *Qui edunt me adhuc esurient, & qui bibant me, adhuc sitient.* Ipse autem & si imperitus sum Eccli. xxiv. 29. stylo rescribendi, non tamē scientia redamandi. Scio quem amare debeam, quare, & quantum, & quandiu. quem, nisi seruum Dei,

nisi qui diligit iustitiam, & odio habet iniquitatem, nisi deniq. qui in Deo manet & Deus in eo? Quare, nisi quia conseruus, & frater est, nisi pro quo Christus passus est? Quātum, nisi quantum me filius Dei, quantum me ipsum, quantum manus oculum? Quandiu, nisi vsq. ad mortem, nisi vsque in sæculum sæculi, nisi vsque in æternum & vltra? Generaliter sic afficiuntur qui non quæ sua sunt quærunt, sed quæ Iesu Christi, qui pleni caritate & dilectione in cubilibus & in hortis aromatum in meridie cubant & pascunt. Isti sunt tui, immo mei Clare-vallenses. Hi sunt qui non sicut ille negaturus Iesum à longè sequuntur, non sicut alij appropinquantēs stant, vel ab eo recedentes post Satanam redeunt: sed sindone reiecta nudi post nudum ambulant, agni vestigiis inherentes ad cœlum transuolant: & donec ad sedentem in throno accedant, & regi opera sua dicant, super montes aromatum transilire properant. Hi sunt cerui montium, capræ camporum, hinnuli sylvarum. Denique ipsi sunt lilium cōuallium, cedri libani, oliuæ vberes in domo Dei. Pulchræ sunt genæ eorum absque eo quod intrinsecus latet. Amplior virtus quàm fama, flamma non tantus ardor, laus eorum confortata est, nec possum ad eam. Verè & tu ex illis es. Nam & loquela tua & opera manifestum te faciunt. Si ergo vt prædixi mutua dilectione adinuicem specialiter afficimur, & quis & quare, & quantum & quandiu, firmiter conseruabi-

mus. Pene tanquam oculis captus non attendens, quis & cui scribam. Qua enim fronte insipientiam meam, turpitudinem meam, tarditatem meam non abscondo, non operio, non celo? Et si oculis insipientium illudo, caprea & lyncei oculos sic quoq. decipere posse præsumo. Sed ne decipiaris, plus in me aliquid quàm audis sensus & ingenij suspiciens, prorsus aperio paupertatis meæ inopiã. Nempe quia fodere non valeo, mendicare non erubesco. Aperi igitur manum, resera os, ut parturiat sapientiam. Quæro autem, quid sit quod ait Hieronymus in epistola ad Rufinum exponens iudicium Salomonis super quæstione duarum meretricum, Tertia die post quam ego peperit, peperit & hæc, *Si consideres*, inquit, *Pilatum lauantem manus atque dicentem*, Mundus ego sum à sanguine iusti huius: *si Centurionem ante patibulum confitentem*, verè hic erat filius Dei: *si eos qui ante passionem per Philippum dominum videre desiderant: haud ambige primam peperisse Ecclesiam, & postea natum populum Iudæorum, pro quo dominus precabatur, Pater ignosce illis, &c.* De Centurione, & de his qui dominum videre quærunt, quòd Ecclesiæ filij sint, non tam durum mihi videtur: sed de Pilato prorsus incredibile æstimo. Sequitur in eadem epistola: *Nulla*, inquit, *dubitatio est, quin cuncta quæ dicuntur, non Salomoni mortuo, sed Christi conueniant maiestati. Simulat ignorantiam, & humanos pro dispensatione carnis mensitur affectus, &c.* Si dominus noster Iesus Christus quicquid humanæ naturæ est præter peccatum assumpsit,

& humanos affectus non fallaciter, sed veraciter habuit; quomodo ergo mentitur humanos affectus?

EPIST. IV.

Suo suus semper suus.

59. **S**Tella quandoque de cœlo ad ima videtur, sed oculis insipientium, defluere: coagulis tamen naturæ, & diuini clauis mandati, sic defixa in æternum cœlo adhæret, vt sicut prius liber idem cœlum conuoluatur, quàm stella ab ipso diuellatur. Sic sic, mi carissime, ex quo Deus in firmamento cordis nostri stellam amoris mutui impressit, etsi fefellit oculum ignorantis leges amicitie repentina scintillatio instabilis fortunæ, non tamen cessit aut decessit igniculus stelle. Vnde & tunc, cum quasi lædebam, non quasi, sed reuera diligebam. & cum auertebam oculum, non auertebam animum. Deo autem gratias, quia in plenilunio suo reformata denuo, quasi viribus resumptis radios primos solito splendidiore, tanquam in inuidia prioris defectus, amplificato affectu remisit. Procul iam deinceps sit, tam noctis tenebrosa interpolatio, quàm diei nubilosa caligo. Sed de his hætenus. Quia verò minus iacula feriunt quæ præuidentur, mando & moneo, vt caueas tibi à labiis iniquis, & à lingua dolosa. Apud nos enim quædam de te disseminata sunt, quibus fortè nisi clypeum cautæ prouisionis opposueris, lædi

in curia poteris. Summi nempe quidam viri
cuidam de curia qui apud nos est, vt ipse au-
diui, infusurauerunt te de curia dixisse qua-
dam inhonesta, & te falsum Legatum domini
Papæ in his partibus gessisse. Quæ nescio
vtrum sint magis falsa, quàm maligna, vel
è conuerso. Sapiens es, esto tibi in his sa-
piens. Valete.

EPIST. V.

Suo suus semper & vnicè sum.

ECce in cineribus beati Aigulfi cum bea-
to Iob lugens & dolens, debéone studere
verborum elimatis splendoribus, exquisitis
facibus? Quinimmo, iuxta viscerum com-
motionem, lugubri, vt sic dicam, & fumoso
sermone afflictum represento animum. Mi ca-
rissime, curro & discurro quasi vagus & pro-
fugus, si fortè dispersos cineres à quatuor ven-
tis cœli recolligere possim. Hinc est quòd non
cineres, sed fruges pretiosas, etiam vbi non se-
minavi, videlicet de Anglia, metere volo.
Manipulos etenim eleemosynarum gentis
illius vt metat beatus Aigulfus, iniungo. Quid
mea interest falcem extendere, vbi nunquam
vel arare potui, vel seminare? Sed non vique-
quaque absurdum est quod facere propono:
quia etsi terram illam non colui, te tamen
quasi areolam aromatis pro tempore conseui
bonis speciebus, cum mecum fuisti, cum te-
cum habitavi, cum te amaui, cum te retinere

60.

L iij

promerui. O bone Deus ! quàm feliciter prosperata est bona ista area , immo pinguißima oliua ! quomodo sursum germinauit ! & radicem deorsum misit ! quomodo ramos suos extendit ! quomodo iam iam replentur famelici de fructu propagiuũ eius ! Gustavi & vidi , quia bona est pinguedo eius , & fructus eius dulcis gutturi meo . Non est conuersa in amaritudinem vitis alienæ . Iam in vmbra eius quam desideraueram sedeo : iam vmbacula eius ab æstu , à turbine & à pluuiâ me defendere sufficiunt . Dies illa sit benedicta , hora nunquam pertranseat , cum defectu temporis , qua Ioannem meum feci , qua talem & tantum amicum in filiis hominum apprehendi . Tibi Deus custos animæ meæ , tibi commendo illum , tu ei vitam , tu bonam vitam , tu prosperitatem dones , tu inter brachia tua , tu sub vmbra alarum tuarum semper illum conserues . Quid enim melius optari potest amico ? vt nihil aliud quæram vel mihi , vel amicis meis , isti quos nunc aspicio cineres monent . Retro paululum laquearia , trabes , postes , & ligna robusta erant , qui modo puluis tenuissimus & cinis vilissimus est . O munde , aut res mundanæ quid estis ? Immo quàm vanè nos decipitis ? Certè non estis quod esse videmini . Certè videtur in vobis pulcritudo aliqua , dulcedo , & vtilitas : sed veritate requisita neque pulcritudo , neque dulcedo , neque vtilitas vera est in vobis . Vera est , vera est de vobis sententia , quia cum sit in vobis vani-

tas, cor vanum facitis, quod possidere poteritis. Sed de his hactenus. Vt ad rem accedamus, scito amice quia pretiosum martyrem Aigulfum in vase non vili ecce ad peregrinandum in egestate sua destinamus. De manu mea in manum meam illum depono. Quodcunque volueritis, quodcunque disposueritis de nunciis, ratum habeo. Generalem administrationem & curam in his amicitia tua assigno.

EPIST. VI.

Frater Petrus Magistro Ioanni.

FAUUS distillans labia tua, mel & lac sub lingua. Vt vidi litteras tuas, cor meum iubilo, os meum impletum est risu. Miscuisti siquidem iocos seriis, sed temperatos & sine detrimento dignationis & verecundia. Sales tui sine dente sunt, ioci sine vilitate. Sic decurrit oratio tua, tanquam illa quae aliquando nubes capite tangit, aliquando autem vultum in terra demittit. Inuenit haec gratiam in oculis meis, mecum manebit, & apud me tota nocte erit. Est namque vox tua dulcis in auribus meis; & monitus tui satis amabiles in faucibus meis. Insurgit autem saepe ventus contrarius, imbrium turmae quatunt domum, & bruchus, locusta, eruca, & rubigo hortuli mei areolas deuastare tentant.

L iij

Sed angelus magni consilij surgit de naui, & facit tranquillitatem ventorum, serenitatem nimborum, exterminationem inutilium vermium. Cum enim Deus pro nobis, quis contra nos? Sunt certè mortis pericula, sunt in deserto serpētium venena mortifera, sunt prorsus amaritudines aquarum: sed serpens æneus, sed virga Moyfi, sed columna nubis per diem, & ignis per noctem, amarum vertit in dulce, eripit à morte, liberatq. à morfu. Sumus quasi nihil habentes, & omnia possidentes, quasi morientes & ecce viuimus. Hæc consolatio mea in loco peregrinationis meæ, quia nihil intulimus in hunc mundum, sed nec quid auferre possumus, quia volucres cœli non ferunt, neque metunt, & tamen pater cœlestis pascit illa. In baculo meo transiui Iordanem istum, & nunc cum duabus turmis regredior. Cum denique via sit brevis, locus prope quò tendimus, quare tot onera humeris debilibus imponimus? Quare incassum multa portamus? Certè si dominus Deus fuerit mecum in via ista, qua ego ambulo, non deerit mihi panis ad edendum, & vestimentum ad induendum. His paucis natura contenta erit. Tu autem, pars magna deliciarum mearum, in te opes meæ: tu capitis mei reclinatorium aureum. vtinam corporum eadem semper mediante Christo propinquitas esset, quæ animorum. Nolo vt piger sis, non valens manum ad os mittere, id est, bonum quod doces facere. Deliciosus enim & improbus monitor est, qui in eo quod alium docet, seipsum non docet.

EPIST. VII.

*Magistro suo I. de Saresberia Juns abbas Cellensis,
quicquid melius est in vita presenti
sue futura.*

MOre sitientis sub æstu, & præstolatione 62.
diu desiderati potus iam iam supra modum fatigati, vasculum litterarum, tuarum amanter suscipiens, ardens relegendus, frequenter resupinans, & quasi noui gustus iteratione, in dulcedinis abundantia ad fundum usque ebibo. Duplicatur, immo triplicatur legentis affectus, ubi materia gratitudine dilecti animi & styli iocunda lepiditate optatam narrationis seriem profert. Sensibus philosophicis quæ scribis condiuntur, rhetoricis coloribus vestiuntur, decentissimis legum ornamentis decorantur, columnis Evangelicis fulciuntur, & quod ad amicos attinet, mellito sapore decentissimè dulcorantur. Si lucrum quæro sententiarum, si doctrinam, si voluptatem, si verborum iuncturam, si amoris veritatem & dulcedinem, in litteris tuis hæc omnia abundè reperio. Navis ibi ad natandum, hortus deliciarum ad deambulandum, mensa plena & parata ad conuiuandum, lectulus floridus ad quiescendum, gymnasium ad philosophandum. Non est idolum mendacij, non fallaciæ lenocinia, non denique adulationis profunda vorago, non lasciuiose diffunditur ab exigua cordis vena ver-

bum promissuum iuxta illos qui dicunt & non faciunt. Sed quid? latior in corde, rarior in ore amor, ardet in fumo, currit sine spuma: mouet alas, sed silenter: petit ima, sed tam sublimiter pro animi generositate, quàm fortiter pro integritate. Accedit, sed non incendit. Nam calorem facit, sed non cinerem. Finem quidem nouit, sed cum termino consummationis, non consumptionis. Qualem loquor scribendo amorem, talem in amicum cogito, immo recognosco. Felix anima mea, quæ talem peperit, vel saltem reperit amicum. Domine Deus cordis mei, tuus erat Ioannes, & mihi eum dedisti. Proinde tuus sum ego, dicam amicus? utinam, vel seruus: certè seruus, sed emptitiuus. Siquidem redemisti me, dando pro me filium tuum: profectò & emisisti, dando mihi famulum tuum. Præcipua hæc, inter cætera beneficia, quæ & si modo reticeo, non tamen prætereo, non denego, non obliuiscor. Nam & ipsa consignata sunt in thesauris memoriæ. consepelio ad conuiuendum & ad commoriendum. Sine his enim nec viuere valeo, nec mori volo. Ad Ioannem meū accedo, quem à manu gratiæ accepi, tanquam gratiam à gratia, sed tamen non pro gratia. Vacuum namque gratia inuenit me gratia. denique & plenum, sed culpa & pœna. Iam pœnam extenuare, culpam verò euacuare cœpit, cùm Ioannem in amicum subrogauit, qui nescientem instrueret, laborantem iuaret, errantem corrigeret, pigrū excitaret, exulantem foueret, dolentem releuaret. Quem re-

spiciunt hæc munera? Te domine Deus, summè & principaliter: te carissime amice, secundariò & multipliciter. Sub modio humilitatis nostræ aliquando latuisti, iam lucerna ardens quidem conscientia, sed non adeo lucens fama. Posuit autem te Dominus in lucem gentiũ, vt sis oculus cæco, pes claudò, lingua stulto, manus manco, auris surdo, vt secundum nomẽ tuum gratia in prædictis suppleat quod natura minus poterat. Profectò licet doleat absentiam tuam, tamen in his consolabitur anima mea, iura publica non ignorans præferenda priuatorum vtilitatibus. Sic cœpisti. Caudam appone in sacrificiis Dei tui. Hoc iuxta capellã scripsi sancti Aigulsi, tibi oportunitate nuncii tui nunquam fraudari volens, quod aliquid rusticitatis nostræ ad rustican- dum mittam. Cras in decentissimo tumulto, videlicet capsa noua, reposituri sumus sacratissimum corpus domini tui beati Aigulsi, cuius caput & corpus habemus. Vale.

EPIST. VIII.

*P. Dei gratia Cellensis monasterij dictus Abbas,
Ioanni amico suo à Deo totius consolationis consolari.*

QUæris frater, à me scripta exhortationis, parum pensans torrentes nostræ occupationis. Quæris inquam consolationem, quia sentis desolationem: postulas auxilium, quia portas exilium: imploras remedium, quia ploras discidium. Quis ergo ego sum, qui tibi

63.

scribere possum unde fouearis, unde conforteris, unde consoles? Orare quidem pro te vix possum, perorare nullo modo possum. Filius vero olei, qui conceptus est de spiritu sancto, quē vnxit Deus præ participibus suis, cuius nomen effusum Christus Iesus, venit vt ipse dicit, consolari lugentes Sion. Vtinam secundum multitudinem dolorum tuorum consolationes eius lætificent animam tuam.

Osce.
VI. I.

In tribulatione, inquit, sua mane consurgent ad me. Et tu Iesu quid? quousque auertis faciem tuam? quousque non profers manum de sinu? quousque nubem opponis, ne transeat ad te oratio nostra? Tempus est miserendi. Conuertere, respice, & deprecabilis esto. Da auxilium de tribulatione, erue ab oppressione, protege à tentatione. Filij hominum cui supplicare habent, nisi filio hominis? quem interpellare, nisi mediatorem Dei & hominis? vbi confugere, nisi ad patibulum crucis? Hic, hic turtur pullos suos reponit, vultur audaciam ponit, columba gemitus promit. Hic betrus Cypri, flos campi, odor lilij, flumina paradisi, porta cœli, salus mundi. Ecce portus, vbi potus vini mixti, vbi cibus panis in ligno crucis decocti, à patre signati. Vbinam tāta oculorum delectatio, tantumque aurium mellos? Iuxta figenda sunt castra, nec infra remanendum, nec vltra progrediendum. Hic compone mores, depone mœrores, appone tuos amores. Nusquā alibi propitiatio, nō propitiator, neque Cherubim gloriæ obumbrantia propitiatorium. Oblitus-ne es Abraham ad

ilicem Mambre Angelos vidisse, sub arbore malo sponsum sponsam suscitasse, omnem aquarum amaritudinem tactu ligni in dulcedinem Moysen conuertisse? Omnibus itaque molestiis carnis, infestationibus antiqui hostis, machinationibus omnimodæ malignitatis oppone clypeum crucis. Manus Domini quæ tetigit te: recordare quia ipsa est quæ creauit te. Nunquid lutum dicit figulo suo, quare fecisti sic? Loquere potius in amaritudine animæ tuæ, & dic Deo: Misericordissime domine, & pater misericordiarum, posito in labore hominum da requiem Angelorum, eiectione à facie terræ da ingressum supernæ patriæ, consolatione destituto humana adlit diuina. Usque ad sedentem in throno vox hæc euolabit, si non doloris impatientia, vel cordis insipientia illam retardauerit.

Equidem, frater, dolores apprehenderunt te inter angustias. Quid mirum? Non est, inquit Iesus, dolor sicut dolor meus. quare? quia non peccaui, & pœnam peccati tolero; quia non rapui, & soluere exigor. Immo non est dolor sicut dolor meus, quia seruus emptus contemnit pati, quæ sustinet dominus eius. Filii hominum, usquequo graui corde? nonne cum essem dominus factus sum seruus? cum essem impassibilis, factus sum passibilis, mortalis cum essem immortalis? Vt quid fœnum recusat, quod cœlum, immo dominus cœlorum portat? Ex hoc mundo Iesus transiit, & fœnum manebit? Cœlum quoque & terra transibunt, & cinis & puluis habitabunt? Pro-

pterea, frater, consoletur te flagellū inundans, immo mundans. Hæc inquam tibi sit consolatio, vt affligens te manus dei non parcat. Sic ad purum scoria tua excoquatur, vt anima tua nunquam: ex auro obrizo cœleste vas cœlesti forma formetur. Filius fabri sedet confians & emundans argentum: & aliud quidem vas facit in honorem, aliud in contumeliam. Vis videre vas in honorem? Ad tertium cœlū rapitur Paulus vas electionis. Vbi ab vbertate domus Dei inebriatus exclamat, O domine calix tuus inebrians quā prælatus est? Sic inebriatus nec verberibus cedit, nec flagellis, nec plagis, nec doloribus, nec mortibus. Hic Ioseph scyphus est, in quo augurari solitus, præterita, præsentia, & futura genti suæ enuntiat. Ioannes Euangelista nonne regressus à

Ioan. i. cella vinaria, exfecatum nobis vinum propinat, *In principio*, inquiens, *erat Verbum*, &c. Ecce vas in honorem. Vasa quoque stulti pastoris vasa sunt contumeliæ, in quibus vini sapor in saporem vertitur aceti. Hæc exsufflantur à mensa regis, quia inflantur scientia carnis: hæc inquam per superbiam inflantur, per inuidiam siccantur, per iram crepant, per accediā franguntur, per auaritiam disperguntur, per gulam inficiuntur, per luxuriam conculcantur, & in lutum rediguntur.

EPIST. IX.

Suo clerico suus abbas.

Tibi an occupationibus tuis visitationum
tuarum raritatem imputare debeam, non
plenè discerno. Hoc vnum perpendo, quòd
litterarum tuarum ad nos rarissima peruenit
salutatio. Et fortassis fluctus marini hoc fa-
ciunt? Sed quas absorbuerunt? Ostende mihi
chartam caritatis deperisse, & non me causa-
bor oblitum fuisse. Rursus quem mittas non
habes? Et vnde hæc inopia, nisi fortè ex copia?
Certè ante te currunt plures, post te innume-
rabiles. Dicis huic, vade, & vadit, & alii veni,
& venit. Ignoras quòd me requirere debeas?
Planè in medio populi mei ego habito, non
in secessu sylvarum, non in voragine terrarū.
Potèstne te excusare & dicere, Domine Baby-
lonem non vidi, & lacum nescio? Sed hîc, hîc
tu mecum frequenter sedisti, dormisti, fuisti:
taceo quod aliquando præ multis aliis locis &
terris dilexisti. His verborum nexibus alius
quilibet irretitus & illaqueatus cessante excu-
sationum suarum ratione humiliter miseri-
cordiam peteret, & patientiam imploraret.
At tu cornū legum siue dialecticarum argu-
mentationum armatus, velut fila aranæ
ista contemnis, & alia exire via conten-
dis. Est, inquis, mihi dominus, sunt & alii
amici, quibus trahor, vel necessitate obe-
dire, vel caritate prouidere. Bene. Nonne

64.

prius & plus omnibus amaui? Nonne dexteras
societatis & ipse dedi? Equidem tibi fœcun-
diora lucra apud alios reperisti, sed non fidem,
sed non amorem. Plus quidem donare, non
tamen plus possunt amare. Communicaui
namque tibi non solum substantiam, sed &
animam. Non est occultatum os meum à te,
non consilium, non denique quantumlibet
remotissimum arcanum. Et tibi post hæc, fili
mi, ultra quid faciam? Addam si addi potest
ad animam. quid, inquis, quæris? Animam pro
anima, oculum pro oculo, dentem pro dente,
non eruendum, sed impêdendum, non extra-
hendum, sed conseruandum. Ad dominum
Papam appellatus pro cœmiterio sancti Se-
reni de Cantumerula, quod imminuere, vel
auferre. nobis nititur Canonicoꝝ & Abbatis
nimis præsumptuosa superbia, contra priui-
legium Anastasii Papæ, quod tu ipse vidisti, &
partim fabricasti, contra ius antiquissimum
nostrum, Lucæ Euangelistæ coartauit termi-
num, quem ipsi perduxerant in primam Do-
minicam aduentus Domini. Causa ista tua
est, cogita tanquam tuam, vel de tua. Non va-
dam, sed mittam iuxta consilium tuum. Vale.

EPIST

EPIST. X.

Suo Clerico suus Abbas.

Satis amœnum delegisti, mi carissime, exilium, vbi superabundant gaudia licet vana, vbi exuberat plusquam in patria panis & vini copia, vbi amicorum frequens affluentia, vbi sociorum non rara contubernia. Quis præter te alius sub cœlo Parisius non æstimauit locum deliciarum, hortum plantationum, agrum primitiarum? Ridendo tamen verum dixisti: quia vbi maior & amplior voluptas corporum, ibi verum exilium animarum: & vbi regnat luxuria, ibi miserabiliter ancillatur & affligitur anima. O Parisius, quàm idonea es ad capiendas & decipiendas animas! In te retiacula vitiorum, in te malorum decipula, in te sagitta inferni transfigit insipientium corda. Ita Ioannes meus sentit, & ideo exilium nominauit. Vtinam istam exilium verè sicut est deputares, & ad patriam non verbo & lingua, sed opere & veritate festinares. Ibi in libro vitæ non figuras & elementa, sed ipsam sicut est diuinitatem & veritatem oculo ad oculum cernereres, sine labore legendi, sine fastidio videndi, sine fallacia, vel errore intelligendi, sine sollicitudine retinendi, sine timore obliuiscendi. O beata schola; vbi Christus docet corda nostra verbo virtutis suæ, vbi sine studio & lectione apprehendimus quomodo debeamus æterna-

M

Matt.
xxv. 41.

liter beatè viuere? Non emitur ibi liber, non redimitur magister scriptorum, nulla circumuentio disputationum, nulla sophismatum intricatio, plana omnium quæstionum determinatio, plena vniuersarum rationū & argumentationum apprehensio. Ibi plus vita confert quàm lectio, plus prodest simplicitas quàm cauillatio. Ibi nemo concluditur, nisi qui excluditur. Vno verbo, omnis ibi soluitur obiectio, cum malè malam vitam obiiicienti respondetur, *Ita maledicti in ignem æternum qui paratus est Diabolo & angelis eius.* cum bene opponenti dicitur, *Venite benedicti &c.* Vtinam his melioribus studiis sic intenderent filij hominum, quomodo vaniloquiis, quomodo scurrilitatibus vanis & pessimis. Certè fructus exindè vberiores, certè fauores excellentiores, certè honores maiores meterent, & finem consummationis Christum, quem in his inuenturi non sunt, sine dubio perciperent. Valete.

EPIST. XI.

*Suo Ioanni suus Petrus abbas Cellensis bonum
quod est super omne bonum.*

66. **A**liter fit frequenter in rerum euentu, quàm perpendat hominis prouidentia. Ea præcipua est in causis, quare amatores veritatis quandoque loquuntur, & si non contra veritatem, tamen extra orbem veritatis. Vnde si huius rei in luce exprimatur cōtinentia,

nec mendaces dicendi sunt, quia contra veritatem non loquuntur, nec propriè veraces qui aliud quàm contingat opinantur. Itaque sicut præcipitium falsitatis vsquequaque deuitare volo, sic veritatis ripam etsi non contingo, saltem affecto. Reducor proinde à falsitate volens, à vero nolens: teneo autem medium, immo retineor à confinio huius& illius dolens, quia semper quod est, vel futurum est, tam vellem, amice, dicere quàm scire. Scio equidem non imputandum alicui malū, quod patitur, sed quod facit, vel meretur. Similiter æstimo asserendum in eo, qui tantum ex insidiis fortunæ fallitur, & nunquam ex proposito fallit, vt dignus sit compassione, non condemnatione. Hæc, amice carissime, præmiserim, quatinus noueris me retentum inuitum ab executione sponsionis, qua vel nuncios vestros, vel cineres beati Aigulsi mittere debui. Interuenerunt plurima, quæ huic præualidè obstiterunt. Vnum horum fuit, quod Vv. vester, immo verè noster, à Roma per nos redire debuit, & iuxta suum consilium disponere negotium illud distuli. Non autem per nos venit. Itaque mitto fratrem Vv. monachum nostrum, vt iuxta exemplar quod ab ore tuo detulerit, omnia faciamus. Ad nutum enim tuum semper facturus sum, præcipuè in Anglia, quicquid dixeris. Neque enim volo tibi esse oneri hoc genus negotij, quod omni honesto viro molestum esse non dubito. Cuiuscūque namque emolumentum lucra reportaturi sint, pro vilissimo stercore habiturus

M ij

sum, si vel ad modicum fides, vel pudor faciei tuæ contra senserint. Mando igitur, immo ad iuro amicitiam tuam sanctissimam, ne de statu rectitudinis tuæ propter me pedem moueas, sed quod iustum & bonum in oculis tuis fuerit, indubitanter remandes. Pace & patientia indissimili, iuxta verba oris tui, alterum quodlibet accepturus sum, scilicet mittere, vel non mittere prædicatores. De his hæcenus. Cæterum exultat spiritus meus in Deo salutari meo, tam de suauissimo bono odore opinionis tuæ, quam de prosperitatis tuæ. Unus es omnium mortalium, cui pene omnes inuiderent non immerito amici nostri, si quanta prærogatiua præ omnibus illis sedem tuam in principali nostro collocaueris attēderent. Inter tres priores tu princeps, & ad te nescio si aliquis peruenire possit. Magister Vv. & Magister R. amicitiam, quam ad te habent, in negotio Havvidis neptis nostræ comprobauerunt. Steterunt enim pro marito siue matrimonio eius, ne scinderetur, tam constanter in curia, quam fideliter. Non eis modicas grates referas. Dominum Archiepiscopum ex parte nostra saluta, & omnes amicos nostros sancti B.

EPIST. XII.

*Carissimo amico suo & magistro Ioanni de Saresberia
P. suus amicus & discipulus cum Iesu & in
Iesu semper in terra & in coelo.*

Nonit prudentia tua, quod granum fructi- 67.
menti cadens in terram nisi mortuum
fuerit, ipsum solum manet: si autem mortuum
fuerit, multum fructum affert. Granuli nostri
fructum centesimum spero me recepturum,
partim roris superni fecunda infusione, par-
tim agri quem benedixit Dominus lata fa-
cunditate. Prouenit namque numerosa pro-
les benedictionum ex accessu dati optimi, si-
ue doni perfecti, cum libero arbitrio boni ho-
minis. Vbi enim gratia saliendo cum impetu
aeternae emanationis influit, quid anima nisi
vitam refluit? Nunquam sterile, nūquam ina-
ne est coniugium gratiae & animae. Iesus, qui
saluat populum suum à peccatis eorum, fru-
ctus benedictus est huius copulae. Vbera non
habet arentia, non vuluam sine liberis, anima
cui adiungitur gratia. Parturit anima qui-
dem, sed non gemens: generat gratia, sed non
corrumpens: Suscipit semen anima cum de-
lectatione, sed non delicto: parit foetum de
spiritu gratiae, sed cum salute: venter non su-
perbia turgescit, sed crescit humilitate: lumbi
non opprimuntur grauedine, sed imprimun-
tur castitate: mammae non intumescunt la-
ctis recurso, sed extumescunt humanae fragili-

M iij

tatis decursu. Manus angelicæ obstetricantur in tam salubri partu, pannis virtutum inuoluitur fœtus, donec rapiatur ad Deum & ad thronum eius. Mater autem quid? fugit in solitudinem, vbi habet locum paratum à Deo, vt ibi pascant illam diebus mille ducentis sexaginta. Draco namque stat ante mulierem quæ est paritura, vt deuoret, cum pepererit filium eius. Non est occultatum à te, magister & amice carissime, qui astutias serpentis antiqui non ignoras, quid esuriat draco, quid fiat. Quid, nisi filium virginis? quid, nisi desiderium cordis? Quid, nisi prolem virtutis? quam obrem rapiatur non tantum à faucibus, sed ab aspectibus eius mentis propositum, & tota festinatione non deliberatum, sed illibatum mittatur ad Deum. Certè nisi subuenerit vel præuenerit festinatio in ore draconis, fiet anima nostra delibatio eius. Quam citò autem mater petit deserti solitudinem, tam citò filius conscendet cœli celsitudinem. Quo remotius secesserit mater, eo altius & remotius rapit filium pater. Nisi fugerit mater, proprii nati visceribus viscera draconis implebit. Non est timendum venire, vbi desinis timere. Nil timet, nil odit, nil refugit sic diabolus, quomodo solitudinem claustrī. Potius deligit porcorum gregem, quam sanctorum solitudinem. Sponsus ducit sponsam suam in solitudinem, & ibi loquitur ad cor eius. Isaac egressus erat ad meditandum in agro, cum ecce sponsa eius Rebecca ascensis camelis calcando vitia superbix & immunditix suæ

veniebat. In solitudine Iesus tentatus super
 aspidem & basiliscum ambulat, & conculcat
 leonem & draconem. Meritorium animarum
 est solitudo : castra domini exercituum est
 solitudo : sagena ad capiendos pisces est soli-
 tudo : paradysus deliciarum est solitudo : gym-
 nasium est cælestis Philosophiæ solitudo.
 Quid amplius ? deambulatorium Dei est soli-
 tudo. Solitudo nouit vigilias Iesu, solitudo su-
 scipit lacrymas Iesu, solitudo orationes Iesu
 audit, solitudo tempus & horam nostræ re-
 demptionis cognouit, solitudo nascentem,
 solitudo prædicantem, solitudo turbas pa-
 scentem, solitudo in transfiguratione coru-
 scantem faciem Iesu sole clarius attendit, so-
 litudo morientem, solitudo resurgentem, so-
 litudo ascendentem Dominum cōspexit. Ec-
 ce quare exultant solitudines Iordanis. Si
 qua asperitas, si qua amaritudo, si qua prius
 fuerat in solitudine formido, mitigata est san-
 guinis Iesu effusione, dulcorata est ligni cru-
 cis immissione, sublata est Iesu cohabitatio-
 ne. Socio Iesu quid times ? pascente Iesu quid
 esuris ? lauante & vngente Iesu quid doloris
 perferentis ? Vale.

EPIST. XIII.

*Frater Petrus abbas indignus Cellensis mona-
sterij P. monacho Noruicensi spi-
ritum salutis.*

68. **V**T ignotus ignoto scriberem, T. vester, immo noster impetrauit & rogauit. Iniustum namque esset, si in re tam honesta pater filium confunderet. Quia igitur vitæ, scientiæ, & professionis probatæ, profundæ, nec ignotæ estis, pallio verecundiæ vultum abscondo, & vocem vix tremulam emitto. Audite itaque si placet veritatem, non vanitatem, pietatem non falsitatem, ammonitionem non adulationem. Scio quia vnius viri filij sumus, vnius regula informamur, in domo vna vnum ab vno requirimus. Quapropter si trahimur trahamus, si vocamur inuitemus, si currimus currere moneamus. Qui audit dicat, veni. Cæterum si sequi noluerint, liberi à coniuratione qua coniurati sumus, inter innocentes manus nostras lauabimus, & sic ab introitu gloriæ Dei epulabimur. Hæc ideo dixerim, quia in nostra, credo, quod & in vestra patria non monachi, vt pace illorum dicam, sed ex monachis super numerum multiplicati, nomini sancto, quod inuocatum est super eos, contumeliam faciunt, dum turpiter viuunt, dum ventris, gulæ, & luxuriæ desideriis se exponunt; dum corpus suum, quod dici nefas

est, & negatio contra Deum, contumeliis afficiunt. Nomen itaque Dei per eos blasphematur inter gentes. Vtinam Phinees resurgeret! vtinam Helias zelo zelatus pro domo Israel recumbentes in idolio igne cœlesti consumeret! vtinam saltem Ieremias captiuitatem filiæ Sion triplici luctu, scilicet orationis, prædicationis, & exempli doceret, moneret, deflaret! Verus nempe Pharaon, qui omnia dissipat, & cum Deo non congregat, lapides sanctuarij per platearum compita disseminat, vasa templi domini in delubris suis iuxta dagon asportat, filiū virginis cum filio Veneris collocat, & in phialis & scyphis cum cōcubinis suis vsque ad mane potare non cessat. Vsquequo Domine non est qui pennam moueat & gannire audeat? Medium silentiū tenent omnia. Moyses non extendit manus ad cœlos. graues enim sunt, & plenæ sanguine. Ideo vincitur Israel, & vincit Amalech. quatuor fabri cornib. suis ventilāt vniuersum Iudam & Israël, dum residuum erucæ comedit locusta, & residuum locustæ bruchus, & residuum bruchi rubigo. hæc sunt tertia & quarta generatio, in quibus dominus reddit peccata patrum in filiis. Prima scilicet generatio est suggestio carnis, secunda primus pulsus cogitationis, tertia deliberatio vel perpetratio operis, quarta gloriatio sceleris. Felix qui his cornibus non ventilatur. Si qua itaque in vobis est misericordiæ scintilla, si qua viscera pietatis, si quis ros benignitatis, compungimini. Lacrymæ procul dubio istæ nequaquam inutiles erunt.

Aut enim illis proderunt & conuertentur, aut ad vos redient, & in sinum vestrum reuertentur. Vt redeant itaque à via sua mala, monendo transite de porta ad portam gladio potenter accinctus. Nemini parcat, sed disperdat de terra memoriam eorum, qui ad cor redire distulerint; qui iniquitatem, quæ in manu eorum est, non abstulerint. Hæc ad vos tanquam ad amicum iustitiæ, zelatorem domus Dei, odio habentem eos qui contradicunt sermonibus sancti. Ad eos verò, quibus nihil dulce præter vinum & pretium, nihil amarum præter claustrum & silentium, nihil amandum præter carnem & mundum, nihil exosum præter Dei verbum & spiritum, nubes Dei coruscant, tonitrua cœli fulgurant, ventus vehemens & ignis inuolutus accelerant. O insensati, quis poterit habitare ex vobis cum igne deuorante, aut cum ardoribus sempiternis? Nonne ibi recipietis venenum pro vino, supplicium pro pretio? Seris & vectibus ferreis porta inferni conferetur vobis, qui claustro noluitis includi: & clamor quoque & continuus luctus, qui non siluistis à facie domini. Caro, quam curiosè nutritis, sollicitè fouistis, studiosè lactastis, regnum Dei non possidebit. Mundus, cui mundi creatorem postposuistis, in quo immundè sorduistis, cuius fallaci pulcritudine oblectati patriæ cœlestis obliti estis, non eruet vos de manu inimiçi. Verbum Dei tunc vos verberabit, non liberabit, accusabit, non excusabit, damnabit, non saluabit. Quid vobis cum spiritu Dei,

cuius contumeliis non parcitis, cuius templum violatis, quem contristare non reformidatis? Ni fallor, quod in eum peccastis non remittetur vobis, neq. in hoc sæculo, neque in futuro. Sed de his hætenus. Vos autem, qui apertos habetis oculos, in viam istorum ne abieritis, actibus eorum ne assentia-
tis, neque consilijs eorum acquiescatis. Vt prolixus nimium essem, nepos vester coegit, qui iterum atque iterum rogando stylum resumere monuit. Vtinam virtus vestra amplior sit quàm fama. Vtinam vos videre, cognoscere, & dextras societatis vobiscum habere merear. Vtinam saltem, si non datur ultra, vel vnâ precem pro peccatis meis pio iudici per manum sancti Angeli offeratis.
Valete.



PETRI ABBATIS CELLENSIS

EPISTOLARVM

LIBER V.

EPISTOLA I.

*Carissimo amico suo Bernerco Abbati sancti
Crispini, frater Petrus humilis Abbas
S. Remigii semper bene valere.*

69.



Ariora mihi fortè & vtiliora sunt
spatia nocturnalia, quàm diurna.
Siquidem diurna accersitis hinc
inde & cōtra ductis copiosarum
occupationū cateruis, animam
meam de manib. meis tollunt, & me mihi tam
violēter quàm fraudulēter assiduē subtrahūt:
hyemales autē noctes sua prolixitate nō fasti-
dium, aut tædium, sed interdum duplex bene-
ficiū conferunt. Tribuunt, etenim corpori
requiem, & animæ renouant vetustatem. Ad-
dunt insuper licentiam reuisendi cœlestia, sua
penetralia inquirendi, nec non & amicorum
reminiscendi. Dicunt animæ cogitationibus

siue meditationibus, *Vacate & videte quoniam
suavis est Dominus.* Ducunt etiam sua quiete &
silentio animas usque ad tertium cœlum, dum
extra mundum, extra carnem, supra animam,
ad regales sedes omnipotentis Verbi sancta de-
sideria prouehunt. Statim filium hominis ad
abyssos humanarum infirmitatum humiliter
inclinando pacata consideratione deponunt.

Quis autem dum sua reuoluit, amici negotia
negligit? Plura de hac materia vobis libenter
scriberem, sed scriptor noster frater Hugo,
abrepta breui chartula, propter finem chartæ
finem fecit scripturæ nostræ. Volui tamē bre-
uiter tangere verbum illud, quod mandastis
per fratrem Ioannem, & sic respondere, vt di-
catis illi Dominæ & cognatæ nostræ, Terra in
conspectu vestro est, potestis bene facere &
malè. Sed melius est benefacere, quàm malè:
quia benefacere sequitur gratia & gloria, ma-
lefacere verbò pœna & pœnitentia. Dicite ei,
Melius est modicum iusto super diuitias peccatorum
multas. Dicite inquam ei, quia nobilius est
minora à deuotis gratanter accipere, quàm
ab inuitis insolenter maiora exigere. Valete,
& pro nobis orate. Boamundus dicit vias
pessimas esse. Seruate nobis litteras istas.

psal.

xxxvii.

17.

EPIST. II.

*Vnicuique amicis & fratribus Bernerredo venerabili abbati
& sancto conuentui sanctorum Crispini &
Crispiniani, frater Petrus humilis abbas
S. Remigij, dies solemnes & festi-
uitates praeclaras.*

70. **N**on est mihi datum desuper in praesenti
vobiscum sabbatizare Kalendas prae-
cipuas in natalitiis pretiosorum martyrum
vestrorum. Vnde quia non quod volo hoc
ago, sed quod odi illud facio, pene irascor
detentionum mearum funiculis, qui difficile
soluuntur contorti, nec triplici tantum, sed
multiplici connexione occupationum conca-
tenatarum. Vnum tantum quod vix residuum
est mihi facio. Scribo itaque amaritudines
meas, quas quotidie in distractione & disten-
sione spiritus mei experior, dicens Deo, *Quare*
Iob vii. posuisti me contrarium tibi, & factus sum mihi met-
20. *ipsum grauis?* Ecce nunc vitulus saginatus immo-
latur Sueffionis apud sanctos martyres Cri-
spinum & Crispinianum, ecce symphonia &
chorus, ecce amicorum ibi sanctus conuen-
tus, & vbi ego, & quid ego? Nec saltem
haec compunctionis pro peccatis meis con-
ceditur. Seruate tamen & mittite, amici ca-
rissimi, partes nobis de oleo exultationis ve-
strae, de adipe & pinguedine visitationis su-
pernae. Sufficiet enim copiosa gratia de mensa

dominorum vestrorum nobis & vobis: quia sicut animabus suis non pepercerunt propter Christum vsque ad mortem, sic Deus gratiam præmiorum exæquans gratiæ meritorum, non est quod neget orantibus pro salute animarum. Iam siquidem de se securi, pro suis veneratoribus adhuc sunt solliciti. Adsunt procul dubio passionum suarum recitatorib. & præcipuè imitatoribus. Orate ergo sicut pro vobis, sic & pro nobis: quia nullum est detrimentum orationis, si pluribus impertiatur: cuius natura est eo magis abundare in effectu, quo ampliùs se dilatauerit in affectu. Valere.

EPIST. III.

*Domino & amico carissimo Bernerredo abbati
sancti Crispini, frater Petrus humilis
abbas S. Remigij suus in omni-
bus scipsum per omnia.*

Quoties in manu sumitur chartula vobis dicanda, totiens mens repletur, & si antè fuerat bonis omnibus vacua. Cùm tumultu namque & impetu magno grex innumerabilis diuersarum materiârũ egredi accelerantium in ostio exeundi sese impingit, alia dicente, prior ego amicum salutabo, alia illam transiliente, atque ramum oliuæ præferente in ore, amici amplexus priores pertinaciter præripiente. Rebecca in vtero suo miratur duo-

71.

rum fratrum, immo gentium duarum hæc intestina & plusquam ciuilia bella. Sed quid mirum, si vbi corpus perfecti & consummati amoris, illuc congregantur aquilæ alternarum affectionum siue motuum animi, vt contendant non intrare, sed exire per angustam portam? Fortè quod ait Laban, in terra sua consuetudinis esse, vt priores licet lippæ filiæ tradantur ad nuptias, contingat vt Rachel, miræ pulchritudinis & amantissimi decoris, non agat choros saltationis, immo salutationis, ante Liam primogenitam suam, sed in vltimo sequatur cum Ioseph & Benjamin. Semper enim meliora, digniora, & saluti viciniora non tanquam fæces in fundo calicis residunt, sed tãquam cibî delicatiores, vt fastidium remoueant, & appetitum renouent, in extremis apponuntur, quia melior est finis orationis, quàm principium. Hoc in meipso, hoc in amico desidero, vt noua semper sint, & nunquam veterascant desideria vestra, & semper sequamur ad palmã supernæ vocationis, obliiti quæ retro sunt. Non enim tam quatenus perueneris pensare debes, quam quò pergendum, & peregrinationis meta figenda, atque trahendus funiculus. Sic audio te facere, & valde congratulor. Ne tamen nimis extendas & protendas funiculum, caue rupturam. Melius est enim tendere, quàm rumpere. Est modus in rebus, Ne quid nimis. An inuideo, quia citò & bene curris? Nequaquam. Amo cursum, sed timeo defectum. Virtutes non bene colligit, qui matrem virtutum spernit.

A stirpe

A stirpe virtutum degenerat virtus, quæ lineam temperantiæ non seruat. De his hæcenus. Cæterum ineptias nostras quia vt audiui intemperanter desideras, volo tibi exponere quæ sint modo negotia nostra, & cui ad præsens labori humeros supposuerim. Successor ille noster Cellensis Abbas, quia non bene multiplicauit, immò non fouit oua, quæ illic reliqueram, sed conculcauit imperfecta, destruxit autem perfecta, vltra dissimulare non possum: sed aggredior tentare & probare, vtrum Deus respicere dignetur priores meos labores, illum vel prorsus amouendo ab abbazia, vel saltem corrigendo à stultitia sua, & in melius commutando. Pene omnes Priores mecum sunt, & vt credo, triginta vel amplius de fratribus. Ora vt Deus propitiatur mihi, & domui illi. Frater Hugo ista debuit scribere, & in sero promisit, sed tandiu dormiuit, quandiu ista frater Henricus scripsit. Habet enim oculos nullos. Effert tamen bonitatem & pietatem vestram sibi exhibitam, vsque ad cælos, & vsque ad nubes. Valete, quia deficit pergamenum.

N

EPIST. IV.

Domino & patri suo carissimo B. Dei gratia Episcopo Excestriensi frater Petrus sancti Remigij dictus Abbas salutem deuotissimam.

72. **S**ententia dubia quæstionibus ventilata
 Sclarefcit, species aromatica pistillorum
 tunsione fragratcit, Ecclesia oppressione ma-
 lorum crescit. Virtus quoque bonorum ad-
 uersariorum infestatione laceffita flore vernat
 & fructu. Equus ille, qui procul odoratur
 bellum ad vocem buccinæ dicit vah, coque
 ampliùs feruet in certamine, quo acriùs con-
 citatur fuso vndique clamore. Quas enim vi-
 res collectas tempore pacis dissimulabat, fœ-
 nore multiplicato exsoluit, cùm expostula-
 uerit necessitas: vt tanquam de grano sinapis
 virtutem mireris, si speciem simpliciter mi-
 nutissimi grani intuearis. tunc igitur virtus se
 expandit propagine multa, cùm malis relu-
 ctantibus fuerit prouocata: nec ad plenum
 fides discernitur, nisi telò infidelitatis forti-
 ter impetatur. Iustus denique, qui vt leo con-
 fidens absque terrore est, quando gloriatur,
 nisi quando experimentum sui ex aliquo dis-
 crimine capìt, vt tunc se aliquid posse co-
 gnouerit, cùm locum virtutis oblato labore
 inuenerit? Gloriosos faciunt Martyres nostros
 causa cum pœna, & pœna cum causa. Diu

est quòd in terra vestra latuit, immo conso-
pita iacuit fidei virtus, vbi plures ad se euo-
cabat poculum confectionis, quàm Euange-
lium Apostolicæ prædicationis. Vnde igitur
sic effloruit & reffloruit moderna in vo-
bis religio, vt Apostolicos spiritus ebiberitis,
& tota fiducia in medium profilientes, dica-
tis, *Melius est Deo obedire, quàm hominibus?* Cer-
tè musto non sicera pleni sunt, qui concepto
robore pellem pro pelle, & cuncta quæ ha-
bent dant pro animabus suis. De his hæc-
tenus. Cæterum si magna illa bellua euo-
muerit vos de terra vestra, est apud nos do-
mus noua vobis parata, cum omni sumptu,
sine auro & argento, vbi & copiam libro-
rum, & studendi otium pro libitu inuenietis.
Valete.

A. 8. v.
29.

EPIST. V.

*Domino suo & amico carissimo Eskilo Lundensi
Archiepiscopo frater Petrus humilis
Abbas sancti Remighi salu-
tem & deuotionis
obsequium.*

SVauissimus odor miserationum vestrarum
non solum præsentibus recreat afflatu dele-
ctabili, sed etiam absentes & remotos attra-
hit ad se, spe nimirum tam dulci, quàm incon-
fusibili. quis enim vestra expetiuit suffragia, &
inconsolatus recessit? quis ad ostium vestrum
pulsauit, & non aperuistis ei? Quis de manu

73.

vestra benedictionem petens, tanquam de thesauris opulentissimis copiosam non retulit? Inter ceteros itaque, & de ceteris vnus est T. præsentiū lator, quem tot pericula itineris, tot difficultates ad vos perueniendi non exterruerunt, nec retinuerunt, compellente & instigante illum, tantum laborem insumere, fama, quæ de vobis vbique terrarum diffunditur. Non equidem rerum inopia, non abiectio & vilitas inter suos, euomuit illum in terram vestram, cum & Canonicus sancti Timothei sit, & frater Hildoini, Vicedomini & Canonici sanctæ Mariæ Remensis. Rogamus igitur, ne frustretur spe sua: ne quando apud se pœnitens, & dolore cordis intrinsecus tactus dicat, Periit opera & impensa. Ego cum toto conuentu beati Remigij vester sum, & pro vobis orationem fundimus ad Deum, vt sanctissima anima vestra thesauros, quos in cœlo posuit per manus pauperum in exitu suo reperiatur, & bonis domus Dei repleta cum sanctis Angelis æterna lætitiâ congaudeat. Valete.

EPIST. VI.

*H. venerando abbati de sancto Huberto, P.
sancti Remigij dictus Abbas salutem.*

74. **O**Mnia quæ in tempore fiunt rationem temporis cum omnibus circumstantiis suis sollicitè pensare debent, si finem bo-

num habere volunt. Idcirco, bone pater & amice carissime, si susceptam nauigationem ad portum salutis perducere potestis, non deseratis abbatiam vestram, sed in hoc tempore malitiæ & discordiæ patiendo & tolerando, donec transeat iniquitas, resumite vires, & onus diu portatum nolite proiicere, cum vestra & multorum læsione; sed paulatim ab humeris deponite. Si enim pax & vnitas Ecclesiæ redderetur, nec esset chaos inter nos & vos, fieri possent multa, quæ modo fieri non possunt. Valete.

EPIST. VII.

*Carissimis fratribus, filiis & amicis Cellensis
monasterij, frater Petrus sancti Re-
migij dictus Abbas salutem
in Domino.*

PRæsenti epistolæ delegaui supplere in sancto conuentu vestro, fratres & filij carissimi, si quid negotij est, quod ageret præsentia nostra, si adesset. Poterit enim tutius proponere sufficienter & insolenter, quod nec inutile sit acquiescentibus, nec scribenti criminosum. Vndecumque si quidem & de quocunque agere velim, oculi fascinant non desunt, peruersè interpretantes, malignè arbitantes ea, quorum nec rationem attingunt, nec finem apprehendunt. Ipse autem ego Deum constituo arbitrum & iudicem om-

75.

N iij

nium, quæ fiunt ab ipso, veraciter diffinien-
 dum quod est ambiguum, efficaciter execu-
 tioni mandandum quod fuerit sententia dif-
 finitum, & tenaciter seruandum quod ex la-
 biis eius semel fuerit prolatum. Per ipsum
 igitur contestor hunc solemnem vestræ fra-
 ternitatis conuentum, ne à memoria vestra
 elabatur difficilis ille congressus sapientiæ &
 insipientiæ, iustitiæ & iniustitiæ, in quo gra-
 uiter, sed fortiter desudastis, quidam fideliter
 proficientes & constanter perseuerantes, qui-
 dam deficientes & retro abeuntes, quorum
 gloria in confusione ipsorum, qui Deo, &
 mihi, & vobis mentiti sunt. Iam Drogo eie-
 ctus est, ne dicam draco, qui se terram &
 cælum non solum concussurum, sed etiam
 euulsurum armis Iudæ proditoris, id est, pe-
 cunia publicè minabatur. nescio si adhuc ter-
 tiam partem stellarum post se trahat: vnum
 scio, quod de prædestinatis nullum Deo
 iuuante absorbebit. In causa tamen ista, quia
 Dei est, nihil vsurpet sibi stuppa nostræ fra-
 gilitatis, insultando his qui occupati bello
 non interfuerunt, vel ex aduerso steterunt.
 Exultandum quidem cum tremore, non in-
 sultandum contumeliosè in operibus Dei:
 quia semper Dei iudicia suspecta sunt, &
 nunquam caput erigendum, dum in nubi-
 bus consignata, sollicitos non securos ho-
 mines, tam in prosperitate, quàm in aduer-
 sitate faciunt. Sit itaque timor Dei in vo-
 bis, & apponite cor in his quæ de Dro-

gone facta sunt, ne similia faciatis, quia non similia, sed peiora pateremini. Est prouerbum, Excaldatus aquam timet. Spiritui igitur paracletico totum negotium, & domini Archiepiscopi consilio, atque viris religiosis & sapientibus, salua libertate electionis vestræ, committite. De mea verò voluntate nulla sit quæstio, quia nunquam discordabit à gloria vestra, ab honore vestro, & ab utilitate Ecclesiæ vestræ. Interim refloreat in vobis ordinis sancta obseruatio, silentij virtus, lectio claustralis, capituli rigor, psalmodiæ tenor, vnitatis compago, hospitem deuota susceptio: & quicquid de iustitiæ & honestatis profapia in exterminium euanuerat, ad propriam conscientiæ vestræ sedem feliciter redeat. Scriptura enim mandatum domini sui eloquitur succinctè, constanter, & fideliter, nihil detrahens de iniuncto mandato, nihil addens, non cedens fascinatoribus, non credens adulatoribus. Pro eodem habet, si laudetur, aut si vituperetur. Quia igitur plures scio solere instanter insidiari, vt me capiant in sermone, potius elegi verba nostra scripto mandare, quàm inconsiderata elocutione profundere. Valete.

EPIST. VIII.

*Amico suo carissimo Bernerredo abbati sancti
Crispini frater Petrus Abbas sancti
Remigij salutem.*

76.

QUærenti mihi materiam, vnde tibi scribere exordiar, vix vna de grege innumerabilium se sequestrans occurrit, arridens quidem prima fronte, sed vultum demittens in secessu vel recessu præsentia nostræ. Quæris quænam sit ista materia tam blanda in exordio, tam religiosa seu timida in supremo? Certè fama gloriæ tuæ hæc est: quæ amicis tuis iocunda & exhilarata facie ciuitates, castella, vicos, & plateas discurrit & circuit vsque ad palatium regis, vsque ad reginæ thalamum, vsque ad Comitissæ nostræ cubiculum. Tempia quoque habitu religioso, vultu modesto perambulat: Archiepiscopos, Episcopos, abbates, clericos, & milites sibi concilians, & ad venerationem sui non mediocriter inclinans. Sed timendum, ne sol tanti splendoris, tantorum radiorum, vergat ad occasum, & dicatur, *Ad vesperum demorabitur fletus, & ad matutinum letitia.* Quantum enim gaudij de sanctitate & iustitia amici in amicorum animos profluit, tantum mœroris & doloris in euaporatione siue exinani-tione earundem virtutum circa eosdē residet. Video, video cogitationes tuas ad seipsas tumultuantes, & quare amicus tuus talia ti-

Psal.
xxix. 6.

bi scribat, sollicitissimè reuoluere. Timidæ enim sunt cogitationes tuæ. Ne sis sollicitus, bone amice, res salua est, signacula clausa sūt. Aquilo durus ventus non congelauit continentiam, caritatem, aut opinionem nostram. Qualem te habuimus, talem te habemus & semper habituri sumus. Huic quoque presentium latori, si quid ex his imputandum, imputa: qui nō solum scribere compulit, sed talem materiam præscripsit. Reuocauit enim ad memoriam illa magnifica præconia, quæ auribus nostris instillaueras, quando ab illa solemnitate Trecensi, quantum vacnatus propria & bona conscientia, tantum inflatus uana lætitia redisti. Dixisti enim te præ aliis exceptum & receptum à Trecensium Comitissa, inuitatum ad epulas, glorificatum in mensa, in omni postulatione exauditum, & cum longa cauda gloriæ reuersum. Caue caudam, cum tam omnis laus, quàm omne vituperium, in cauda, id est in fine terminetur. Dico autem, quem te ipsum facis? Si hæc facis, manifesta te ipsum mundo & nobis. Si enim propheta es in Israel, veni ad nos, ut ipsis rebus experiamur potentiam, prophetiam, & virtutem tuam. Signis enim quæ in patria tua facis, non credemus, nisi te virum, cuius spiritus in naribus, ex fructibus cognouerimus. Decurtata tamen est gloria tua, quia non fecisti pacem inter Archiepiscopum & aduersarios suos. Valet.

EPIST. IX.

*Dominis & patribus Basilio cum ceteris Prioribus
Carthusiensis ordinis, Frater Petrus humilis
abbas sancti Remigii, salutem cum
omni deuotione.*

77. **A**D glorificandum Christum vos conuenire, quotiescunque conuenitis, non ignoramus. De nullo itaque negotio sæculari directionem cordis vestri impedire sine dubio fas est. Commouere autem vos dignum est, ut quod facitis usque in finem facere studeatis. Virtus enim boni operis de radice procedit bonæ intentionis, & in perseverantia dilectionis perficitur, & omnis laus in fine canitur: melior quoque est finis orationis quam principium. Hæc ideo præmiserim, ut quia manum misistis ad fortia, semper ad ampliora & anteriora caritatis opera extendere contendatis, ad eius imitationem, qui dum in mundo esset, porrigendo manum, corporum lepras, oculorum cæcitates, aurium surditates, & labiorum silentia curauit. In fine verò prorsus in cruce manus extendens, cæli & terræ vniuersaliter plagas & vulnera antidoto sanguinis sui curauit, & contra omnia recidiva, validissimam medicinam in cornu crucis, omnibus posteris usque ad cōsummationem sæculi reposuit: ut quicumque crucem suam post eum baiulauerit, vitæ æternæ compos & particeps, contrariam veletudinem timere

non habeat. Frater iste, præsentium lator, per nos & per multos alios rogat mitti operarios de vobis in messem domini. Messis enim multa in Dacia iam alba est ad metendum: sed operarii pauci, sed minor numerus qui nō potest sufficere ad edendum agnum. Non sit itaque vobis pigrum, non durum, non desperabile, mittere ex vobis, qui nomen Dei & sanctum ordinem vestrum in terra illa portent, in spe percipiendi fructus centesimi, aut potius millesimi. Corona vestra & gloria, si bono exemplo vestro animas plures Deus lucratus fuerit, & in regno gloriæ de salute aliorum merces vestra amplior & gloriosior in conspectu Dei & sanctorum Angelorum erit. Valete.

EPIST. X.

*Venerando Domino & amico carissimo E. abbati
Stabulensis Ecclesiæ Petrus humilis abbas
sancti Remigij in perpetuum cum
Christo gaudere.*

NVlla negligentia bona est: non tamen 78.
omnis æqualiter culpabilis. Cumulat
namque aut minuit meritum negligentia am-
putanda dissimulatio faciendorum, aut incō-
siderata festinatio non faciendorū. Ea nihilo-
minus quæ à nobis remota sunt, & per procu-
ratores fiūt, non consimili à nobis pœna exi-
guntur, si malè administrantur, sicut illa

204 PETRI ABB. CELLENSIS
quæ manu nostra & proprio studio peragi so-
lent. Inde est, domine Abba, & amice carissi-
me, quòd aliquantam opponunt pro nobis
excusationem, si fratres nostri de Marna, non
soluendo pecuniam quam debent, molestiam
vobis fecerunt, cùm factum ab anno præteri-
to æstimaremus, quod adhuc faciendum mo-
dò cognoscimus. Ignoscite itaque culpam,
quam nec superbia genuit, nec contumacia
defendit. Dignus namque venia est, qui citò
corrigit delictum, vel qui pro polle reddit
debitum. Domini Imperatoris mandatum
vestrum & nostrum certè turbauit negotium.
Iniungimus Præposito nostro, vt citò soluat,
quod iam fecisse debuerat. Vobis gratias agi-
mus de bona patiëntia vestra, & innotescimus,
quòd nunquam vtilis nobis fuerit commuta-
tio illa.

EPIST. XI.

*Dominiis suis de Monte Dei, Simoni Priori, & toti
sancto conuentui, Frater Petrus abbas
Cellensis sanctum pascha.*

79.

Quotidianum pascha celebrare non ces-
sat anima vniuscuiusque vestrùm, dum
quali columba stat ad fenestras suas, & vocem
de cælo explorat, à Libano vocantem spon-
sam suam. Extento prorsus & retorto collo
ad caput vestrum, quod in cælis est, sine ces-
satione vitam istam vmbrosam fastidientes,
euolare super pennas ventorum contenditis,

iam ibi verum, non annua repetitione, sed continua stabilitate, celebraturi pascha cum illo, & in illo, qui pascha nostrū immolatus est Christus. Ita est. Sed adhuc ascenditur & descenditur per scalā Iacob, donec quod ex parte est euacuetur, quod fiet, quādo votū in habitum cōuertetur, & in Hierusalē hymnus Deo soluetur. Interim, fratres, in vmbra culis habitantes, & sub vmbra illius, quem desideratis, sedentes, coquite, immo assate carnes agni tota nocte, singuli in cella sua, & mane comedetis eas. Certè tota nocte debet cremari caro agni, quia toto mortalitatis tempore, accensa caldaria conscientiae, facies saluatoris desideranda, & vndis desideriorum fortiter bullientibus, ne in die iudicij semicocta offeratur, percoquenda. Habete vascula munda: iuxta namque & in oculis præterfluit aqua. Sed nunquid vanè? sed nunquid gratis? Planè supina & crassa negligentia imputanda est singulis nisi sint omnia munda, quibus & copia aquarum redundat, & temporis oportunitas superest, & amor incumbit totius munditiae, & ordinis consuetudo non refragatur. Sic est, ego vidi, ego interfui, & vtinam totiens & tã sedulò cor expurgassem, quotiens & quam indefinenter manus & faciem die & nocte rigavi, non lacrymis, sed aquis. Hoc autem feci vt hospes: quia non vltra ostium, sed in ostio tenui. Vos autem intra & vltra ostium promouistis pedem, non aduenæ, sed domestici cellæ & cœli effecti. Postquam verò vasa vacua ab ambitione emundaueritis confessione,

& scripturarum meditatione, implete aqua & ad ignem mittite, & tanquam vnguenta pretiosa bullire facite. Subintraverat buccæ meæ, & stylo iam subgerebat improuida cogitatio, scribere vt carnes agni sic decoquerentur: sed memor mandati legalis, quo prohibetur ne aqua coquantur, subiicio non vt agni, sed hædi carnes taliter coquantur. Simul enim & agnum & hædum tollere in pascha precipimur. Quid ergo? Agnus in veru, vel in craticula crucis, hædus in aqua coquitur: vt si innocens fueris, solo spiritus ardore in pascha adapteris: si verò fatore graui oppressus, per ignem & aquam expieris. Hædus etiam est corpus, quod corrumpitur & aggrauat animam, agnus qui in latitudine pascitur. Benignus ille spiritus, qui infestationibus carnis agitated non cornu ferit, sed oculo simplici liberatorem quærit dicens, *Quis me liberabit de corpore mortis huius?* In sanguine agni, id est in contritione cordis, & spiritus contribulati liberaris de Ægypto, & de manu Pharaonis, quia cor contritum & humiliatum Deus non spernit. De sanguine hædi non lego mysterium, nisi quod tunica Ioseph tincta in sanguine hædi missa est ad patrem. Ad patrem spirituum si miseris in confessione flens & eiulans tunicam Ioseph, litam in sanguine hædi, id est simplicitatis & castitatis amictum fucatum & fæcatum corruptione libidinis, & fraude diabolicæ circunuëtionis, sanguis hædi in purpuram commutabit: quia per pœnitentiam non solum indulgentia, sed etiam

Rom.
vii. 14.

gratia adipiscitur. Sed de his hactenus. Vnde namquē mihi vt tepidus feruentes, mundatos sordidus, iacens currentes, piger commoneam alacres? Deus scit, me non præsumptione, sed amoris impatientia laxasse habenas: & cū non haberem quid dicerem, dicere tamen aliquid vellem, dixi quod innotesceret affectum, & si non idoneum esset facere fructum. Adhuc impetus me trahit, & redire ad festum festorum cogit, vt quasi incipiens spiritui indulgeam currere, quousque lassetur, & sponte petat stationem, & metas silentij. Sub exemplo ergo cuiusdam pretiosi inuolucris, in quo stupendum sit, tam ipsum repositorium, quam repositum, aliquid de pascha prosequar: quasi quendam pannum pretiosum & multicolorum de diuinis thesauris assumens. Moyses in illo quadragenario ieiunio, vbi à colloquio diuino cornutam faciem reportauit, pascha illud in litteris suis prænominauit, & in illo sacrosanctas reliquias religans annuo recursum ad publicum nostrum deuoluendum constituens, diem certum præfixit. Siquidem hic pannus, id est, pascha, in exteriori facie plurimum nitoris exhibet: sed valde ampliora intrinsecus continet, & cariora pignora. Rubet igitur purpureo colore, propter passionem, rutilat hiacynthina specie, propter resurrectionem: subobscurus est, propter sputorum & alaparum & flagellorum, & ceterarum iniuriarum coaceruationem: albet vniua nube, propter innocentiae

integritatem & peccati immunitatem. Ecce colores, colores cingentes pascha gloriosum, & delicatam animę pallium, quo melius amiciuntur pauperes semicincti, quàm diuites purpura & byllo induti. Reuoluere autem illas pretiosas margaritas, quę sigillantur in sigillo isto aureo & argenteo, quis accedet, nisi mundas habuerit manus? nisi oculos columbinos? nisi labia purgata? nisi abluto toto homine interiori & exteriori sacro Iordanici fluminis baptismo? quia ergo vobis sunt manus tornatiles per obedientiam, oculi clari per pudicitiam, labia stillantia myrrham primam per accusationem reatuū vestrorum, & ad scurrilia æternam clausuram: applicate pannum paschalē, & expādate thesaurum absconditum, vt exinde captius mutuēt redemptionem, mortuus resurrectionem, peccator iustificationem, afflicti consolationē, religatus solutionem, anathematizatus absolutionem. Sanctificate ora vestra sanctis horum osculis, oculos tangite his smaragdis, singulos sensus exhilarate singulis benedictionibus. Sed quę sunt pignora tam cara pro pretio, tam efficacia pro remedio, tam rara pro numero, tam sancta pro merito, tam perpetua pro æuo, tam amabilia pro beneficio? Pignora, fratres mei, ista ore pudico & timore debito nomināda, & amplectēda sunt, caro & sanguis agni incontaminati, Iesu Christi ossa, nerui, medulla, cartilagines, cutis, corium, & quęcunque membra in corpore Iesu de sacris suis visceribus edidit virgo virginum.

Addām-

Addamne clauos, lāceam, coronam spineam, sputa, irrisiones, & illusionem, albam vestem, vestimentum purpureum, fel, acetum, myrrhā, & aloes? Quanto enim hæc in se duriora & viliora, tanto in saluatore nostro pretiosiora & appetibilia facta sunt. Quis modo Christianorum si vnum horum reperiret, nisi super aurum & lapidem pretiosum multum venerabilius coleret, ambitiosius seruaret & adoraret. Dignum est, iustum est. Si enim immundus erit, tangens morticinum & captum à bestia, id est Adam & Euam, quorum alter captus est suasu vxoris, Eua morticinum facta est suggestionem serpentis, quomodo non iustus emundatur ab operibus mortuis, qui uiuentem in sæcula sæculorum contingit credendo, amando, colendo, adorando? Nani non sicut delictum ita & donum. Pluris enim donum, quàm delictum est. Sed quod est hoc donum? Iesus Christus sanctus. Quid est, inquam, hoc donum? Natiuitas Iesu, passio Iesu, resurrectio Iesu, ascensio Iesu. Quomodo nō etiam omnia cum illo nobis donauit, clamat Apostolus. *Omnia*, inquit, *vestra sunt, siue mors, siue vita*: quia est mortuus propter peccata nostra, & resurrexit propter iustificationem nostram. Domini & fratres, detineo vos plus iusto, ad quorum ianuam stat & pulsat Iesus volens suum pascha vobiscum recolere, & de reliquiis mensæ illius magnæ partem bonam reseruauit, quam adhuc recentem & calentem denuo de arca cœli refert & profert vobis. Ne vereamini, ne caro antiquata sit & pu-

Rom.
viii. 22.
I. Cor.
iii. 22.

refacta vetustate nimia, quia annus iam mil-
 lesimus centesimus sexagesimus primus est.
 Nequaquam, fratres, nequaquam ascendat in
 cor vestrum hæsitatio ista, quia caro eius etiã
 dum esset corruptibilis, non vidit corruptio-
 nem, multo verò minus facta incorruptibi-
 lis, & genere viuendi, & loco manendi. Re-
 cens est, calida est, sana est, vitalis est, regnum
 cælorum dat, quia possidet. Non est illa caro
 & sanguis, de quo dicitur, *quia caro & sanguis*
regnum Dei non possidebunt. Quo studiosius ar-
 centur à dentibus & stomachis vestris carnes
 animalium, quæ corrumpunt & corrumpun-
 tur: eo dignius accedunt ad animas vestras
 sanctificandas carnes illæ, quæ sicut non mo-
 riuntur, ita nec corruptionem inesse patiun-
 tur, vbi cūque refectionem præstauerint. Has
 imperat religio, & quo religiosior sis, eo
 frequentius, & vt ita dicam, glutinosius co-
 medere debes. Nondum quieuisset manus,
 vel animus, sed reprimat & modus dictorum,
 & tempus alia faciendi. Orate pro nobis.
 Nouellum illum Angelum vestrum A. salu-
 tate, & Robertulum nostrum. Plurimum &
 multum singulos, & singillatim, & commu-
 niter saluto.

1. Cor.

xv. 50.

EPIST. XII.

Dominis & patribus carissimis, Basilio Priori Car-
thusiensis cum ceteris Prioribus, & sancto con-
uentui, frater Petrus abbas Cellensis,
consilium & auxilium veri-
tatis & pacis.

Refusione vberiori irrigatur hortus Dei. 80.
ille conclusus, fons signatus, quotiens in
vnum conueniunt fistulæ & canales benigni
spiritus Dei, non ad calices Babylonicos ab-
sorbendos, sed ad fæces Iacob expurgandas, &
ventres steriles fœcundandos. Spiritus Dei à
quatuor ventis cæli singulos vestrum de loco
suo euocauit, vt vnum corpus plenum gratia
& veritate efficeremini. Vos enim qui Prio-
res estis, & curam aliorum suscepistis, quasi
venæ in corpore Carthusiensis ordinis estis.
Tam itaque vnanimiter regimini vestro inui-
gilare omnes, & tam temperatè à subiectis ve-
stris mandata & cōsuetudines ordinis exigere
debetis, quanta caritate in humano corpore
venæ omnes sibi sociantur, & salubre vegeta-
tionē omnibus membris æqua distributione
sanguinis largiuntur. Eadem siquidē cautela fu-
gere debet nimiam exilitatē & subtilitatem ve-
na, qua immoderatā grossitudinem & reple-
tionem. Nimia namque repletio, nisi citò eua-
cuetur, acutam facit, & longam ægritudinem
gignit. Rursum nimia exinanitio vires de-
trahit, & bona valetudine destituit. Do-
mini & patres carissimi, ostium vestri or-
dinis & visione rara, & interrogatione

O ij

assidua iam triui: & si consilium alterius Iethro admittitis, non vsquequaque dispensationes, quæ de corde caritatis procedunt, anathematizabitis. Quam enim friuolum & inconstans est, sine ratione & autoritate meliorum mutare decreta, & statuta seniorum: tam pertinax est, & extra regulam temperantiæ, quæ est mater virtutum, velle temporibus & moribus hominum negare quæ deceant & expediant. Ignoscite quod vocem funestam quidem, quantum ad sonum, sed veram quantum ad sensum, in vestro sancto conuentu de latibulo meo ausus sum proferre. & de his hactenus. Cæterum salutat vos dominus Henricus Comes Trecensis, & vniuersitati vestræ mandat cum omni supplicatione, vt suæ petitioni acquiescatis: & nobis hoc iniunxit, vt ad vos vnum de nostris mitti eremus, per quæ voluntas & desiderium cordis vobis innotesceret. Quod autem non proprio sigillo scripsit vobis, occupationis maximæ fuit de suis & regis negotiis. Est autem petitio, vt ei concedatis locum præparare ordini vestro sumptibus suis, iuxta morē vestrum, in terra sua, vbi vi sum fuerit his, quibus hoc negotiū iniunxeritis. Petit etiam, vt Priori de mōte Dei, & Priori de Valle sancti Petri iniūgatis hanc curam. A multis enim temporibus hoc ipsum cœpit, & orationibus vestris adiutus cupit perficere. Ex parte etiam nostra hoc ipsum humiliter & deuotè petimus: quia deo iuuant se auxilium & consilium non sictē huic operi ubministrabimus.

EPIST. XIII.

*Dominis & patribus suis de Monte Dei, Simoni
Priori cum ceteris fratribus, Frater Petrus
qualiscumque Cellensis abbas, vultus
in propitiatorium semper tenere.*

V Arius rerum cursus, sæculorum volubilitati irremediabiliter innexus, nihil stabile, nihil æternum sibi inesse euidenti ratione approbat. Currit, fluit, fugit, labitur, & euanescit quicquid vnquam habere potest mūdānus vsus. Præcurrit defectus satietatem, præterfluit adeptio appetitum, effugit instantiam desiderii fumus gloriæ, elabitur, vtenti imago felicitatis, euanescit à viuentibus vita, quia *dum ordiret succidis me*. Summa itaque de-
mentia est, currere post defectum, appetere
non apprehensibile, instare fumo, vti imagine
pro veritate, velle diu ea vita viuere, quæ iuxta
Gregorium vitæ æternæ cōparata, mors potius dicenda est quàm vita. Aliàs sine dubio
cursum vestrum conuertitis, fratres & domini carissimi: alio appetitu viuitis: alia instantia
pretiosas margaritas in foro & nundinis veteris & noui testamenti quæritis: alio vsu in
carne præter carnem viuendo corpora vestra
quæ sunt super terram, Christo concrucifigitis: alia conuersatione æterna & quæ non videntur concupiscitis. quæ enim videntur, temporalia sunt: quæ autem non vidētur, æterna.
Ideo ad montem Domini sicut passer euola-

81.

Ela.

xxxviii

12.

O iij

lactis, & nidificastis in foraminibus petre, in
cauernis maceriaz, ne procella aeriarum sug-
gestionum vos inuolueret, ne diluuium car-
naliū titillationum absorberet, ne laqueus
sollicitudinū sęculariū concluderet, ne
aura humani fauoris omnem ventum à facie
terrę dispergeret. Ecce locus iste est, quem
constituit Dominus Moyſi, in quo vidit po-
ſteriora eius, dum ante eum tranſiret. Ni fal-
lor, vir ille bonus, qui Sunamiti mortuum
puerum reddidit, cui illa cum viro ſuo cœna-
culum pręparauerat, & lectum, & menſam, &
candelabrum, per vos ſępe tranſitum facit,
contemplatus à vobis in cœnaculo glorię,
inuentus in lecto mundatę conſcientię, ci-
batuſ & potatuſ in ſacramento Eucharistię
diuinę, accenſuſ per donum ſapientię & in-
telligentię. Adiuro voſ per cāpoſ, ceruoſque
camporum, vt cū tranſierit, poſt tergū eiꝯ
clametis pro pace vniuerſaliſ Eccleſię, pro
hiſ qui in ſublimitate ſunt, pro Comite no-
ſtro, cuiꝯ cor tetigit Deus, ædificare vobis
locum, in quo ſecundum genus veſtrum fru-
ctum faciatiſ, pro me peccatore ſuo & veſtro,
pro omnibuſ nobiſ commiſſiſ. Tranſite cum
illo & poſt illum, vt manentem in perpetuas
æternitateſ, vel in iſtu oculi, vel media hora,
vel momento conſpiciatiſ, donec tranſfigu-
remini à claritate in claritate. Certę qui ſe-
quitur tranſeuntem, videbit ſtanteſ, vel ſe-
dentem. Fratres mei cariſſimi, ſi delibatio
ſancta, & maſſa: ſi memoria eiꝯ vinum Li-

bani, quid præsentia, nisi inebriatio vberum, nisi obliuio præteritorum, & iubilatio interminabilis de plenitudine gaudiorum? Expectatio horum lætitia, quid fruitio, nisi lætitia sempiterna? Ad instar grani sinapis visio tua, Iesu. modico sibilolauræ tenuis aures cordis percellis, & quis poterit cogitare horam trāsitus tui? Si dormio, somniare possum, & videre non possum. Si vigilo, detentus aliis occupationibus & curis tam citò exoccupari nequeo. Si vigilo & vacauero, tunc fortè venam susurrij eius audio, sed nondum video. Quando ergo videbo transeuntem? Si mundum cor sursum habuero, si puras manus, si lotam faciem, si tota anima, tota virtute in omnibus solum Deum quæsiero, & me totum in ipsum conflauiero, vt non ego in me viuiam, sed Christus viuat in me, qui factus est nobis à Deo sapientia, & iustitia, & sanctificatio, & redemptio. De mendacio autem, venia petita, me ipsum condemno apud vos, Nec enim solui quod promisi, vel semel in anno reuifere nidum illarum sanctarum virtutum, Montem Dei, in quo plumescunt animæ charismatibus gratiarum. Fefellit me tunc ignota futurorum facies, & inuoluta plurimorum casuum series. De præsentī affectu, quo mens mea tota illa quadragesima impinguata eructabat mellis & butyri riuulos, pensabam sequentes annos. Sed eruca, locusta, bruchus, & rubigo deuorauerunt speciosa deserti, expandentes

retia quotidianarum sollicitudinum pedibus meis, vt quod egressum est de labiis meis facerem irritum. Peccaui. quid aliud dicam? Si me excuso, os meum condemnabit me. Magis autem meretur veniam culpæ humilis confessio erroris, quàm argumentosa extenuatio criminis. Veruntamen cum redditur ratio facti, rei veritas non obfuscatur, neque rei culpa si qua est dissimulatur. Distinguitur namq. falsa excusatio, & rationabilis satisfactio. Alterum culpā cumulat, alterū quatenus culpā dus, vel nō culpandus sit qui arguitur, declarat. Vterq. etiam peccat, & qui mentitur in sui accusatione, & qui dedignatur, falsa obiecta vera relatione diluere. Reproba humilitas est, plus quam in corde tuo sentias vanè te deicere: detestanda præsumptio, famam suam negligere, & suspicionis nauū non abolere. Vtreq. genere deuitans tam quod à vero deuiat, quàm quod præsumptionem redoleat, & me non venisse fateor, & innumerabilibus detentum occupationibus attestor. Factum, immo non factum agnosco: causam facti, siue nō facti, vobis diiudicandam relinquo. Quid pluri sit, vel quodlibet alteri præiudicet, idest factum causæ, aut causa facti, definite. Cedo enim sententiæ vestræ, qua credo vos de facto secundum causam, non de causa secundum facti qualitatē litem dirimere. Plus enim attendendum est, quare aliquid fiat, quàm quid fiat. Informis namque est actus ille, qui nullam habet causam quare fiat; deformis, qui malā,

bene formatus qui bonam. Vnde & bonus est omnis actus ille, qui iustam habet causam, malus qui iniustam. Indifferens verò dicitur actus ille, cuius causa parum concurrit vel ad iustificationem, vel ad corruptionem. Augu-

stinus de bona causa *Causa, non pœna martyrem facit.* De mala Dominus in Euangelio: *Si ocu-*

Matt.

VI. 23.

lus tuus nequam est, totum corpus tuum tenebrosum erit. Item in legibus de indifferenti: *Voluntas*

& propositum distinguunt maleficium. Dicit Am-

brosius, *Affectus tuus operi tuo nomen imponit.*

Subtiliter tamen ratione quorundam actuum

pensata, nulla intentione, nulla affectione

boni fieri possunt, vt crucifigere Christum,

vt adulterari, & similia. Vt ad propositum

redeam, & congrua structura cohærere pri-

mordiis extrema faciam, venire ad Montem

Dei inter illa número, quæ si bono animo

fiant remunerabilia sunt; si malo, damnabi-

lia. Fur enim ille, qui fratris illius leprosi

pannos, dum Missa celebraretur, abstulit,

præmium bonum pro tali facinore non ha-

bebit. Recipiet verò mercedem, qui pro

sancto desiderio videre castra Dei apud vos

properauerit. Satis est, si non plus satis sit.

More enim meo tardè incipio, sed & tardè

finio. Comes Henricus reaccenso spiritu

instat quærere locum idoneum, & asserit

illum alium locum non se dimisisse, nisi quia

vos noluitis acquiescere. Consulo ergo, vt

non graue sit iterum mittere aliquem de fra-

tribus, cum quo ipse videam vel per me, vel

218 PETRI ABB. CELLENSIS
nostros locum, ut iam dictum est, aptum ordini vestro. Sine mora facite hoc. Sigillatim & generaliter omnes vos saluto, quandoque venturus ad vos, si deus voluerit, & fortè cum redierit nuncius vester ad vos. Interim orate pro nobis. Robertulum nostrum saluto. Richardum, Stephanum, Rogerium, Nicolaum, & iterum omnes simul.

EPIST. XIV.

*Amicis suis carissimis M. Ioanni, & Richardo
fratri suo, frater Petrus S. Remigij dictus
Abbas perpetua pace gaudere.*

82. **S**Tylum scribendi in sepulcro beati martyris Thomæ Cantuariensis, audita eius morte, iam iam recluseram, arbitrans carissimos meos Ioannem & Richardum ei consепultos, nec interim aura libertatis fruituros. Fallax namque rumor, & nimium varius, nil nobis de vobis certi afferebat vel afferebat. Vnde quod in dubiis semper faciendum censeo, lucem veritatis patienter, sed non gratanter expectabam, ne in incertum currerem, falsum pro vero retinens; gaudens forsitam cum esset moriendum, & moriens, cum esset gaudendum. Resumebam tamen, post longam ad me ipsum disputationem, de incommutabili diuinitatis consilio spiritum, & quicquid vobis contigisset, post glorificationem sancti Mar-

tyris, in partem vertebam meliorem: quia siue contribularem in, siue consolarem in, argumentum & augmentum fidei vestræ accipiendum non dubitabam. Neque enim tam modicæ fidei scio vos esse, ut timeatis calicem domini bibere in passione, quem frequenter bibitis in Christi recordatione. Tandem ex veraci relatione status vestri, omni absoluta compage, omnipotenti & benignissimo Deo medullatas refero grates, qui non aufert à vobis solitas suas miserationes, sed ut credo, quia præmisistis dilectissimum patronum in cœlis, recipietis sine dubio alium paraclitum vice eius in terris. Ecce, mi dulcissime Richarde, proruo in osculis faciei tuæ, non sine affectu viscerali, attendens mutatum habitum, nescio si melioratum animum. Quid enim honestatis, quid maturitatis, quid pietatis, quid caritatis, quid totius religionis deerat, cum esses in oculis meis, & nostræ congregationis, speculum bonitatis, & forma integræ mulandæ imitationis? Nusquam fuisset illa præpropæ sollicitudo regressionis, potuisset tibi sufficere domicilium amicæ paupertatis, & satis caræ si recolis societatis. Sed ô cæca & futurorum nescia mens humana! extra vel ultra diuinæ moderationis gressum ne porrigas pedem: quia labi est, à Deo non regi; & per se ire, perire est. Si nobiscum mansisses, solatio contra pene omnem molestiam fuisses, nec à Deo desertum crederem, dum huiusmodi pignus suæ miserationis mecum tenerem.

Sed factum est, quod factum est. Sit stimulus maioris desiderij molesta corporis absentia, & vbi nulla subest corporalis visio, continetur oratio. Ne diutius scribam, familiares succedunt interruptiones, quæ animi quietem interrompere non cessant, & laborem perpetuare. De statu autem nostro vtrumq. amicis certifico: ac de corporali sospitate dico, quod qualem dimisistis, talem adhuc inuenire potestis. Pax in congregatione nostra est, & cursu consuetudinario adhuc currimus. Cum omnibus hominibus pacem habemus, maxime cum domino Archiepiscopo. Debitis non valde grauamur. De Marna reditus nostros habemus. Bene est amicis nostris & vestris; Cellensi abbati, sanctorum Crispini & Crispiniani, abbati sancti Nicasij, Prioribus de Monte Dei, & de Valle sancti Petri. De quaestione autem illa, quam in fine passionis beati martyris Thomæ, bone amice posuisti, credo nullatenus solutionem te latere. Forsitan tamen & meum animum in tuam sententiam trāslatum non dubitabas: sed vt recogitarem, quia quod Deus per se facere disponit, hominis auxilium vel auctoritatem nō quærit: vbi autem ministeria hominū non despicit, causa nostræ vtilitatis vel humilitatis hoc facit. Absque enim omni sacramento, id est visibilium elemētorum vel operum adminiculo, hominem saluare posset, nisi exercitia humilitatis vel fidei ad vtilitatem saluandorum vtilia procurasset. Diffinitiuè ergo teneo, nulla ratione lucernam accēsam in manu Dei posse

supprimi vel extingui : nec ibi expectandum hominis iudicium, vbi manifesta luce Dei se explanat iudicium.

EPIST. XV.

Carissimo domino & amico suo abbati sancti Edmundi Petrus humilis abbas sancti Remigij salutem & deuotum obsequium.

Non solùm scribere, sed nec nuncium 8;.mittere à multis temporibus vobis potuimus. Causa non latet, nec quidem iacet. Adhuc in pendulo est, & magis apud nos dubium quàm certum, vtrum præsentes litteræ salua re aliquo modo ad vos peruenire valeant. pereant tamen an veniāt, nostra dilectio obire non poterit : quia nec hominem timet, nec ignem, nec aquam, nec quamlibet oppressionem ex insidiis fortunæ. Mediatores illos, quorū interuētū familiaritas inter nos oborta est, penes vos habetis : de quorum amore tam vester quam noster animus pendet. in ipsis & ex ipsis faciem nostram aspiciate, & quam habeamus erga vos affectionem, pensate. Plura scriberemus, sed digito labellum compescimus, quia incultum est veritatem fines vestros perambulare, vbi recenter suffocata & strangulata est, nec iam in palam apparere audet.

EPIST. XVI.

Episcopo Exoniensi.

84.

Letus noster in gaudium vertitur, cum de terris amicus noster ad cœlum leuatur. Spem quidem bonam de ipso, si diu inter nos viueret, conceperamus: sed iam optimam in cœlo repositam habemus, Episcopo Exoniensis. Quid & de quo loquamur, nostis. Non dubito partes vestras plenissimè interpositas, ubi tantum perpetratum est nefas. Remanserunt huius aquilæ, quæ ad astra euolauit, pulli lambentes sanguinem eius, & sese quotidie inebriantes felle & absinthio. Sit eis tamen solatium spes futurorum, euidentia miraculorum, & patientia præsentium malorum. Quis dabit mihi pennas sicut columbæ, ut euolem, & visitem tumbam pretiosi martyris sancti Thomæ? Credite mihi confidenter, veniam impetraturus de peccatis meis adirem locum illum, de quo sanctissima eius anima per proprium sanguinem assumpta est ad consortium sanctorum meorum. Vos ergo vices nostras supplete, & pro nobis orate, atque dulcissimos illos amicos nostros & vestros benignè fouete.

EPIST. XVII.

*Domino Petro Abbati de Silua, Petrus abbas
sancti Remigii.*

Satis est grata nobis occasio, qua vobis scribere compellimur. Cum enim vestram presentiam, si à Deo daretur, totis semper amplecteremur brachiis, quid mirum si vel semel in anno absentiam qualicunque stylo alloqui desideramus? Nec tamen quæ, vel quantum volumus, amantissimo amico presentibus literis insinuamus: obstante illa, quæ pene cunctis affectionibus nostris insidioso nouercatur oculo, importunitate congestorum negotiorum, quæ tollit à me animam meam plus sæpe nolente, quàm volente. Est itaque petitio nostra apud vos pro Priore vestro Nouiense, viro honesto, opinionis bonæ, & famæ hilaris in partibus nostris. Electus enim in abbatem, excusat se à tãto onere, tum propter humilitatem suam, tum propter difficultatem laboris, quem nōdum expertus, iam reformidat tãquam expertus. Instillauit enim auribus nostris, se potius sæculum repetere, quàm onus istud suscipere. Non quidē approbo tantam hominis in isto negotio constantiam, ne dicam pertinaciam: quia ordinata Ecclesiæ caritas hoc exigit, vt gratiam acceptam in inuicem subministremus, & iuxta legem mosaicã, maledictionem illam fugiamus, qua dicitur, maledicta sterilis, & quæ semen non fecerit in Israël. Quia tamen alias dicitur

85.

Matt. *Quid molesti estis huic mulieri? & in Canticis. Ad-*
 xxvi. *iuro vos, filia Ierusalem, ne suscitatis, neque euigilare*
 io. *faciatis dilectam, donec ipsa velit.* Pede postula-
 Cant. tionis nostræ suspenso in ambiguitate spinosa
 U. 7. deambulans, vestra discretioni quid potius è
 duobus eligendum sit relinquo. Officium au-
 tem postulantis expleo, ut suggerens vobis
 nullomodo cogendum supra vires hominem
 discretum definiam.

EPIST. XVIII.

Abbati Latiniacensi abbas sancti Remigij.

86. **P**ROMISSIONI nostræ, & petitioni vestræ, nec
 potui, nec debui deesse. Cui enim semel
 animam nostram communicauimus, valde
 absurdum esset, si ea quæ infra animam sunt
 negaremus. Apparens etenim & euidens argu-
 mentum est, non bene animos coniunctos, ubi
 quæ possibilis sunt, & factu digna, nulla inter-
 ueniente ratione, ab amicis non præstantur.
 Et in hoc itaque & in aliis, me & mea vobis
 exhibeo, non diffidens de bonitate vestra: ut
 si quando simile quid à vobis expostulauero,
 facile mihi indulgeatur. Tamen nouerit di-
 lectio vestra, frater, nos opus nostrum incorre-
 ctum confidentissimè vobis credere, obnixè
 rogante & supplicans, ut limam correctionis
 adhibeatis, superflua confodiendo, exilia sup-
 plendo, malè ordinata ad ordinem reuocando,
 & quicquid inde vobis visum fuerit, tanquam
 de vestro faciendo. Valete.

EPIST.

EPIST. XIX.

Alexandro Papa Petrus Abbas S. Remigij.

QUæ in euidenti & manifesto sunt vera, 87:
 se ipsa loquuntur, seipsa nullo adiuncto
 adminiculo testantur. Quæ autem remotione
 loci, euolutione temporis, vel cuiuslibet im-
 plicatione caliginis profundum tenent igno-
 rantia, cum rei publicæ poposcerit utilitas,
 sub luce volunt videri. Hinc est, pater sanctis-
 sime, quòd lator præsentium, in gremio nostræ
 humilitatis coalescens, habitum religionis à
 nobis in monasterio Cellensi suscepit, diuque
 ibi vbera vino meliora sugens, in virum Epis-
 copalem gratia Dei cooperante profecit. Re-
 uera opus & onus iniuncti officij amplectens,
 non aurum robur suum ponens, nec obrizo
 dicens, fiducia mea. Quærit enim à sede Apo-
 stolica mortem per mortem, quia & in itinere
 quò pergit, mortem minatur ætas, & Impe-
 rialis potestas, & quam exposcit, si obtine-
 rit, mortem importat Barbarorum infida so-
 cietas. Habet itaque animam suam in mani-
 bus suis, offerens illam Deo per manum cæ-
 lestis clauicularij, & vestram. Excipite, si pla-
 cet, hostiam sanctam, Deo placentem, ratio-
 nabile obsequium, & beatissimi Apostolatus
 vestri autoritate exponite ouem lupis, si fortè
 beata cōuersatione nō lupo comedit agnum;
 sed agnus conuertat lupo. Quodlibet autem
 horum fiat, Deus gloriificabitur, ministerium

P

I. Thess.
v. 19.

vestrum honorificabitur, & anima fratris nullum detrimentum patietur. Præsumo enim à præteritis, quæ in eo enutriui, & multis didici argumentis, quòd in commissio fidelis erit, & à tramite fidei nullo incurfu exorbitabit, potiusque dabit sanguinem, quàm imminuat fidem. Ait Apostolus: *Spiritum nolite extinguere,* & lucernam iam in modio accensam amplioribus suffusoriis accendite: quia hæc est gloria & corona vestra, si granum frumenti per manum vestram in terram cadens multum fructum attulerit.

EPIST. XX.

*Magistro Ioanni, & fratri suo Richardo, Petrus
Abbas sancti Remigij.*

88. **S**Tatum nostrum prætermisso procæmio vobis notificare studeo: cuius nec satis bonus, nec pessimus ad præsens occurrit aspectus. Valde autè sollicitus sum de statu terræ vestræ, cuius quasi claves & columnas citra mare, Legatos scilicet Romanæ curiæ tenemus. Quid autem statuere, quid deiicere, quid aperire, quid-ve claudere debeant, tam ipsis quàm nobis incertū est. Tota siquidem clausula negotij pendet ex aduentu & responsis regis Angliæ. Tamen modestos præfensi nimis animos eorum in executione mandati, nisi fortè ex contemptu exasperati in duriorē prosilierint sententiam. De proprio ergo statu id

enuncio: quòd quātum ad personam nostram, cursu consueto valetudo procedit. quantum autem ad Ecclesiæ cōmunem pacem & prosperitatem, sic se habet quomodo solet. Vnus autem, scilicet frater Herueus, iam nobiscum non ambulat. Iuit viam suam; vtinā non post Satanam. Si ad vos venerit, equos accipite, & si quid aliud honestè ab eo auferri poterit. Super quæstione autem tua, frater Richarde amice dilectissime, nolo multiplicare superuacuos circuitus, & multorum verborum anfractus. Quæris autem, vtrum ad singulos de collegio culpa, quæ videtur respicere Oeconcomum vel Præpositum, ipsius diriuatione singulari & certa percurrat, & illicitat singulorum conscientias. Ait propheta: *Anima quæ peccauerit ipsa morietur, filius non portabit iniquitatem patris, neque pater filij.* Item autoritas: *Mala non sunt, quæ nec mentem implicant, nec conscientiam ligant.* Item Apostolus: *Quæ in macello venient, edite cum gratiarum actione, nihil interrogantes propter conscientiam.* His omnibus auctoritatibus, non mihi videtur singulorū capita percutere, si quid à Præposito malè administratum fuerit: & sufficere claustralibus, nescire vnde veniat quod edant, vel quid vestiant. Tanta enim simplicitas debet esse columbæ, quæ in foraminibus petrae & in cauernis maceræ nidificat, vt remota omni sollicitudine quicquid man⁹ eius inuenerit in lecto, siue in refectorio, simpliciter accipiat, & Deo gratias agat. Si quis autem dixerit, hoc idolothytū est,

Ezech.
xviii.
20.

I. Cor.
x. 25.

P ij

228 PETRI ABB. CELLENSIS
id est de rapina, vel vsura, vel alio quolibet
modo malè acquisitum, abstineat. Valete.

EPIST. XXI.

*Sancti Medardi, & sancti Crispini Abbatibus
Petrus Abbas sancti Remigii.*

86. **N**escit verè amicitie naturam, qui in amo-
re imitatur arundinem vento agitatam.
Sine profunda radice amicitia, accidens est
non substantia, species non virtus, fornum de
tecto, quod antequam euellatur arescit. Tres
itaque præcipuas ancillas, sine quibus viuere
non potest, comites habet & pedisequas, iu-
stitiam, patientiam, & constantiam. Iustitia
suum ius vnicuique seruat: patientia, si fortè
interuenerit, iniuriam salua integritate amici-
tiæ tolerat: constância nec qualitate nec quan-
titate pacti præuaticati expirat. Quis ergo ab-
duxit? quis seduxit? quis exturbauit funicu-
lum hunc triplicem à sacratissimis visceribus
dominorum & amicorum meorum, Abbatis
sancti Medardi, & Abbatis sanctorum Cris-
pini & Crispiniani? Moriaturne & non viuat
tam nefarium & nefandissimum scandalum
seruorum Dei, quod de radice vetustissimi
colubri, id est, ineptissimæ auaritiæ prodiit.
Subornat se quidem occasio auaritiæ vesti-
mentis iustitiæ, sicut Iacob vestimentis Esau
valde bonis, & Iacob mentitur se Esau. Pa-
ter tamen vniuersorum, qui quasi oculos
caligantes exhibet, dum ipso iudice, ipso

omnia regente, iniustitia iustitiam opprimit,
nec pœnam recipit, quasi miratur de tanta
hominum fraude, qui sub oculis eius non ti-
ment mentiri, & in inuicem fraudare, dicens:

Vox quidem, vox Iacob, sed manus, manus sunt Esau. Gen. xxvii. 22.

Præfert quisque altercâtium ius authêticum,
& regulare se habere, nostra inquiring diu sic
possedit Ecclesia, & nostra sic. Ecce Iacob
in voce. Deinde pax cordium concutitur, an-
tiqua familiaritas excutitur, obliquantur ocu-
li, castissimi amplexus soluuntur, de altero
alter conqueritur, innexi discipulorum pa-
rietes in domus scissuram partiuntur. Ecce
manus Esau. Redite, amici carissimi, redite ad
cor. Non grandis querela, grandis autem est
de hac discordia inter nos & vicinos vestros
infamia. Prædecessorum vestrorum tempori-
bus, nec in personis, nec in rebus monasterio-
rum vestrorum dicitur fuisse inuenta tanta
concordia, quantam firmo & fraterno fœ-
dere hætenus adinuicem excoluistis. Vnde
ergo tam subito valde odiosa aduenit simul-
tas? Quomodo ausa est sacra penetrare pe-
ctora execrabilis & execranda temeritas, qua
pacis cubicula inquietarêtur, & vtriusque pa-
catissima quies intempestiuè sollicitata infe-
staretur? Resarciatur repentè amoris vincu-
lum, ne caritas in alumnis suis saltem vnus
diei, ne dicam mensis vel anni, præscriptionis
incurrat dispendium. Qui enim ait, *Sol non* Ephes. iv. 25.
occidat super iracundiam vestram, regulam iuris
præfixit, quam intutum est preuaricari. Grauis
enim sumitur vindicta de illo, qui Euangelij

I. Cor. iura violat perpetua. *Quare*, inquit Apostolus,
 VI. 7. *non magis iniuriam accipitis? quare non magis frau-*
dem patimini? Sordet religio, vbi præualet am-
 bitio: fama fœdatur, si res iniuste auferatur vel
 acquiratur. conscientia molestat, si stimu-
 lo elationis quoquo modo pungatur. Oleum
 quo caput mentis impinguatur extra fundi-
 tur, si pluris pecunia quàm iustitia habeatur.
 Itaque interpono partes nostræ amicitiae, si
 forte recognita cognatione antiquæ familia-
 ritatis, reporrigant sibi hiantia corda reconci-
 liationis mutua brachia. Rogo vt dies per a-
 micos vestros accipiat, in quo de concordia
 familiariter agatur. Valete.



PETRI ABBATIS CELLENSIS

EPISTOLARVM

LIBER VI.

EPISTOLA I.

*Domino Alberto Cardinali & Romana
ſedis Legato.*



90.
Iſi tanta diſtancia locorum & multiplex occupationum impedimētum nos retineret, dilectiſſimam nobis paternitatem veſtram viſitare nullatenus tantū poſtpoſuiſſemus. Eſt enim in pectore noſtro multa de negotio vobis iniuncto & de fine eius ſollicitudo, quia honor Dei & Eccleſiæ vtilitas, & famæ veſtræ integritas, atque totius curiæ Romanæ circumſpectio ex eo accipiet apud conſcientiam omnium laudem & magnificentiam, ſi ſecundum regulam æquitatis & veritatis ſortitum fuerit effectum. Quatenus ergo res iam proceſſerit, non ſit

P iiij

vobis tædiosum amicum vestrum certificare. Habetis autē idoneum, si placuerit, per quem fideliter remandare & securè potestis, Priorem utiq. de Valle sancti Petri, carissimum filium vestrum, quem in Christo genuistis, & eius spiritum in omnib. vobis obnoxium reddidistis. Ad locum namque, qui Vallis dei appellatur profectus, ut ibi Priorem substituatur, non multum à vobis remotus, si ei mandaveritis venire ad vos, tutis auribus instillare poteritis, quæ de statu vestro grata vel ingrata vobis occurrūt. Et mihi quidem videtur, præfatum locum vestro auxilio & consilio multum indigere, quia Episcopus, ad cuius diocesim pertinet, manum benedictionis & auxilij differt apponere. Neque enim cœmeterium, neque monasterij sui cōsecrationem, fratres qui ibi manent habere possunt. Vestra itaque interest, quod de facili potestis, pauperes Christi in hoc iuare, ut in loco benedicto creatorem suum benedicant. In calce litterarum supponimus vobis commendare Priorem, qui ibi substitutus est, quem de fornace religionis, & regularis subiectionis noviter extractum, ad curam animarum regendam filius vester manum mittere coegit. Doctrina itaque & auxilio vestro instruite illum, quia scitis quàm difficilem rem arripit, qui animas suscipit regendas.

EPIST. II.

*Archiepiscopo Senonensi Petrus Abbas
Sancti Remigij.*

91.

OPus manuum vestrarum, locum utique qui dicitur Vallis Dei, nō tradatis oblivioni: quia nouella plantatio citò deficit, siue arescit, nisi frequenti irrigatione ei succurratur, & fomento multiplici foueatur. Ad suam patriam, ut credimus, euolauit spiritus filij vestri fratris R. quem sicut paternis gremiis, dum in carne esset, continuistis, sic iustum est ut orationibus & benedictionibus vestris usque ad thronum gratiæ conducatis. Quia ergo sublato pane de mensa Domini, in sabbato nouum substituendum non ignoratis, eandem dilectionem & protectionem oramus impendi bono & religioso iuueni, quem amicus & filius vester carissimus ibi ex voluntate fratrem praposuit, Prior de Valle sancti Petri. Ut scitis, domus ista domus orationis vocatur. Necesse est ergo, ut sine dilatione auxilio vestro consecretur, quatinus veraciter & non fallaciter locus ille sanctus vocetur. Quicquid enim ibi religionis, orationis, sanctificationis, mortificationis, & aliarum sanctarum obseruationum serui Dei inibi conseruando cæleste præmium promeruerint, in sinu vestro reuertetur, & ad caput vestrum defluet: quia qui recipit prophetam in nomine prophetæ, mercedem prophetæ accipiet.

Non ergo pigeat vos, cœpisse expendere in
 vsus pauperum aliquid de substantia vestra,
 quia vos recepturi sunt in æterna taberna-
 cula.

EPIST. III.

Vni Cardinalium.

92.

Mat.
xxii.40

VNa sua Christus amplissima & genera-
 lissima regula omnes tam præcedētium
 quàm subsequētiū Catholicorum patrum
 sanctissimas sanctiones cōpendiosè includit,
 dicēs de dilectione Dei & proximi: *In his duo-
 bus tota lex pendet, & propheta.* Reuocanda igitur
 sunt omnia, quę fiunt in Ecclesia Dei, ad hanc
 ornatissimam regulam: quia quicquid ab ea
 discordat, à spiritu pacis & caritatis non ma-
 niat. Inde est, pater venerande, quòd dispensa-
 tiones quarundam institutionum nō indignè
 admittuntur pro maiori & meliori recom-
 pensatione. Volumus igitur vobis notificare,
 quanta mala & quanta hominum strages in
 terra nostra ex guerris quorundam nobilium
 hominum, videlicet Comit̃s Vuischardi de
 Ruzeio, & Comit̃s Recensis,* atque Hugo-
 nis de Petriponte, diebus nostris, & anteces-
 sorum nostrorum acciderunt. Homines in-
 numerabiles tam occisi quàm capti & redem-
 pti sunt, & nouissima damna sustinuerunt.
 Religiosæ domus deprædatæ sunt, & multa
 alia mala prouenerunt. Interuentu tandem
 bonorum & sapientum & religiosorum, ma-

trimonia inter se contrahere disposuerunt, vt saltem isto nexu confœderati inter se pacem tenerent & haberent. Penset itaque vestra discretio, vt si quid de gradu consanguinitatis obstat, pro bono pacis, & pro tantorum malorum recompensatione, quæcunque fieri potest à Domino Papa non recusetur dispensatio. Valete.

EPIST. IV.

Nicolao monacho.

INiqua sorte sæcularis occupatio, & æternorum affectio, sollicitudinem nostram diuidunt. Sæqualteram namque & supra animæ nostræ portionem negotiatio temporalium actionum sibi, nullo interueniente bonæ fidei contractu, vendicat, & mihi de me vel exiguam partem non relinquit. Passam denique iniuriam in alios referre, non minus stulti quam iniuriosi est. Sumpto, siquidem probabili & noto de prope argumento, cauere quisque debet, ne de alieno ægrotet incommodo. Igitur de quantulacumque relicta mihi portione quietis, siue furtiuo-
93.
tij, subdiuidens indulgeo amico modicum de modico. Gratia quoque tui facio licitum, quod de facto, non de iure, pene redditur illicitum. Sola etenim non licent, quæ sola licere deberent. Ea vero plurima & sine licentia sese ingerunt, quæ salutem magis

impediunt quàm expediant. Vnde ergo exordiar? Quàm solemne, quàm deuotum acturus sum vicinis congratulationis conuiuium, qui quasi de morte recepi amicū? Plus falsi quàm veri rumores serere populares, in multis expertus, fallaciam eius æquitatis iudicio condemnare soleo. In hoc autem articulo mendacio runusculosæ verborum sitatis gratias ago. Iam namque à multis retro annis te in fata concessisse acceperam, quod veraciter falsum esse nuper, quasi de graui somno euigilās, gavisus sum, in eo quòd adhuc nostræ sortis & vitæ consortem te esse audiui. Equidem de numero amicorum nostrorum ex eo habere te censui, ex quo scripta tua legi. Amplius autem nostræ amicitie vincula tenacissima intexere debet, quòd ex toto corde compassus, Deo animam tuam, quam de corpore euolasse ad sinum matris misericordie credebam, non semel commendaui. Vicem ergo debes nobis, si rectè de amicitia iudicaueris. Quam idcirco obnixe exoptulo, quia nescio qua hora, quod de te falsò opinatus sū, mihi indubitanter contingat. Et video viscera misericordie Dei nostri fines vestros copiosa benedictione respersisse. Pretiosi namque martyris Thomæ Cantuariensis Archiepiscopi occasus, orientalem nobis fenestram aperuit, & de fidei atque patientie suæ splendore Angelicas tenebras illustrauit. Quæ enim terra tantum de se palmitem protulit, ministeriales cælicolas, Angelicas vtique virtutes, pro tãto fructu in sinu suo recepto, perpetuo concilia-

uit. Qua itaque ratione non sæpè & frequenter reuifitent terram, de qua tantum thefaurum fuis gazis intulerunt? Credo manum cultoris, fiue agricolæ, de quo dicitur, *Pater meus agricola eſt*, venas & valuas nubium fuarum nondum incluſiſſe, vt abſtineat benedicere terræ, quam compluit ſanguine magni ſacerdotis Thomæ. Non immeritò igitur vndecunque populi aduenientes, & tumbam illius venerantes, benedicunt genti, populo, & nationi, de qua tantus Chriſti teſtis ortum habuit. Exora itaque ſancta eius merita pro amico tuo, & ſi qua habes noua ſcripta mitte nobis. Quæro à te, memor fauoralis nō odioſæ altercationis dudum inter nos habitæ, vtrū ſicta morte emendatus, errorem qui non de odio, ſed de ſummo, aut pluſquam ſummo fauore virginis virginum venit, deleueris aut delinieris. Vellem ergo videre, ſi quid de vera morte ſimulata mutauerit, cum abſque præcipiti ambiguo vexatio inferni, & ſi non ſalubriter, tamen pœnaliter, colonum ſuum doceat vbi errauerit. Æmulanda certè, immo cumulanda imitatione, ſeria illa non ſera præoccupatione anticipat mens cauta, & prouida, quotidie aduocans cœlum & terram cum omni circumluſtratione Angelorum, hominum, & dæmonum, acta ſingulorum proferentium, & debita tormenta allegantium. Felix anima, quæ talibus allueta præludiis, fallaces & feroces tempeſtiuè præcidit malignorum accuſationes, vindictam iudicalem de ſeiſſa à ſeiſſa exigens, & ſoluens, vt ventila-

Ioan.
xv. i.

brum non inueniens, quod vexando excutiat, sola grana æternis apothecis reponat. Quid igitur de imagine ista transumpseris, rogo mandata litteris mittere amico non dedigneris. Tuus enim mihi placet & stylus & animus. Vale.

EPIST. V.

Alij Nicolao.

24. **I**Am in desuetudinem pene abierunt reciprocae salutationes, quas tu bon^o sub ouina pelle mihi solebas mittere, & ego qualisqualis tibi. Nescio utrum modo sis melior, quam tunc, vetustior tamen & nigrior es, & terræ propinquior. Expecto facetias istas nostras à te cum vsura statim solui. Prouolutus ergo pedibus teterrimi idoli, peto indulgentiam de nullo reatu. Mando tamen ut venias ad festum nostrum, quatinus tua pulcherrima & sanctissima facie tota solemnitatis illustretur, & ore illo veridico animæ nostræ à plagis & vulneribus suis curentur. Interim mando tibi negotia nostra, quæ tibi frater iste & socius tuus in colore & facie dicet. Vale, & ora pro nobis. Tua enim oratio penetrat cælos.

EPIST. VI.

*Domino & patri Alexandro summo Pontifici,
Petrus abbas sancti Remigii quicquid
filius patri.*

NVllis bona voluntas à sancto spiritu incitata coercenda est habenis, nullis à proposito retardanda dissimulationibus. Sic enim iam totius nostræ Christianitatis religio intepuit, vt vix in toto grege Christiani populi aliqui inueniātur, qui non malint sub ficu & oliua terreni honoris & delectationis delitescere, quàm procul odorare bellum, & audacter occurrere in occursum cum filiis Benjamin, & dimidia tribu Manasse, expediti armatis inimicis Christi. Ad vos itaque, Pater sanctissime, qui estis in corpore Ecclesiæ caput, de quo oleū non deficit, & qui Australe sufflatoriū habetis, respicit desides excitare, excitatos verò ad meliora & viciniora saluti iuuare & impellere. Nunquā ergo vobis molestum debet esse, quod à vobis postulatur in auxilio propagandæ Catholicæ fidei: quia & Dei & Domini nostri Iesu Christi laus inde augmentatur, meritum vestrum cumulat, salus infideli populo acquiritur. Proinde petitiones pauperis illius Episcopi Fulconis, qui hoc anno curiam visitauit, & modo nobiscum hospitatur, apud vestrā sanctitatē commendamus, scientes & pēsantes, quia vbi nulla aut rara fidei suppellectilia sunt, suffragio copiosiore indigetur. Indulgendum est ergo

95.

240 PETRI ABB. CELLENSIS
 illi in multis, qui omnibus indiget. Sic magister & Dominus vester, cum discipulos suos mitteret ut noua prædicarent, addidit eis ut mira quoque facerent. Non à vobis hoc exigitur, ut virtus miraculorum tribuatur, sed auctoritas vestra cum ipso & in ipso operans, ut facilius ei ab incredulis credatur. Nam & Moyses cum à Domino ad filios Israel mitteretur, signum rogauit dari, in quo sibi crederetur. Priuilegia ergo, quæ à vobis petit, & pro virga Moyfi, & pro miraculis discipulorum Christi suffragabuntur ei. Nemo enim Deo faciente contemnet auctoritatem vestram, vel personam illius vestra auctoritate munitam. Valeat sanctitas vestra, cui debeo quicquid sum & possum. A multis enim audio, & in multis experior magnificentissimam gratiam vestram.

EPIST. VII.

*Magistro Ioanni Cancellario, & R.
 Cantori Compendiensi.*

96. **T**Am sedula dilectissimi Domini mei Archiepiscopi in pectore meo viget memoria, ut non solum vigilans, sed etiam dormiens frequentissima visione & allocutione fruar de absente, quod modo non possum de præsentem. Nulla falsitas in sua & nostra dilectione, quia benignissimum & dilectum semper habeo illum patronum. Tam de ipso itaque, quam de vobis, & omnibus fociis vestris, habetur

habetur apud nos continua & indefessa oratio. De statu autem nostro & terræ vobis remando, quia in pace sunt quæcūque ad dominū nostrum pertinent. Vndecunq; enim bene agitur circa negotia eius, & nepotes sani sunt. Dominus quoque Galerannus strenuè agit, & dominus Thomas sacerdos, & magister Radulfus, nec non & Archidiaconus, & omnes amici vestri. Vnum solum est quod nobis deest, præsentia vestra, & domini nostri, quam rogamus, vt saluo eius honore maturetis citius nobis & patriæ restitui. Omnes socios vestros & amicos salutate; præcipuè abbates Belliloci, & sancti Petri de Montibus.

EPIST. VIII.

*Regi Sueorum, & Ducibus, & Principibus, &
eorumdem Archiepiscopo, & cunctis
suffraganeis eius.*

CVM animi Deo deuoti principale & 97.
summum debeat esse studium, ad gloriam & honorem Dei omnia componere, si fortè aliquatenus se omnipotenti Deo place-
re, vel leuiter senserit, cum latis intrinsecus
gaudiis totum se effundit, tanquam liquefactus post sponsum, acclamans & dicens: *Exultabimus & letabimur in te memores vberum tuorum.* His nostra paruitas prouocata exemplis, et si in multis, immo pene in omnibus, quotidie me sciam peccare, & non vt iustum est diuinis mancipari studiis, in hoc vno non

Cant.

1. 4.

Q

vsquequaque despero de misericordia Dei, quia de manu nostra manipulum benignè suscepit, domnum Fulconem Episcopū, quondam monachum nostrum, & in claustrali religione à nobis enutritum, ad summum prouexit sacerdotium. Recognoscimus in eo vultum nostrum, & speramus quòd non recedat cor eius à Deo nostro, & à mandatis eius. Cùm ergo opportunitas grata obtulerit, quòd tempus habere possumus adhuc eum instruendi & informandi in ampliorem Dei dilectionem, gratanter & deuotè excipimus, quia vltèrius non eum videndum, vsque ad thronum gratiæ, & ad distributionem æterni stipēdiij arbitramur. Ad hæc ipsa tēporis incommoditas cooperatur desiderio nostro. Si enim vterque nostrūm vellet, discrimina & pericula quæ habet transire non posset. Inundantia enim aquarum, vt audiuius, tanta est, vt vix serenissimis temporibus meabile sit iter quòd ad vos peruenitur. Tertia denique causa subest, quia domnus Archiepiscopus noster Romanam pergens officium suum nos supplere commisit. Nequaquam autem in dedicatione Ecclesiarum, vel ordinatione clericorum, vel confirmatione Christianorum abbatis assurgit dignitas. Per ipsum ergo, qui in omnibus noster est, implemus, quod per nos non possumus. Veniet autem ad vos plenus dei benedictione, cū tempora fuerint meliorata. Valete.

EPIST. IX.

Priori Cantuariensi.

ME debitorem vobis constituit tam obsequium dilectionis, quod omnibus ex parte nostra per vos transeuntibus impenditis, quàm carissimi nostri magistri Ioannis gratia, quam plenissimè obtinetis. Nouus quoque à Deo vobis collatus Martyr ad suę sepulturę locum attrahit & allicit. Quem enim præ aliis mortalibus virum constātem, & in fide vera fundatum cognoui, cum sanctis Angelis & martyribus iam annumeratum corde credo, & ore confiteor. Præsumo autem & ipse de orationibus eius, vtique quia dignum fecit me Deus suis benedictionibus, colloquio, cognitione, atque familiaritate. Accedit & hoc ad cumulum totius amicitię, quòd in turbine illo & tempestate per M. Ioannem saluatus & conseruatus est. Noluit Deus stellas omnes cum magno illo sole simul de terra vestra tollere. Ideo reliquię saluę factę sunt. Planè bene appellauerim stellas, doctrina & vita relucens tanti patris filios, & tanti doctoris discipulos. Vtinam radios suos libere, & absque interpolatione tenebrę noctis exercere valerent. Cæteris enim terris vestra melior & clarior appareret, si doctrinam illorum reciperet.

Q ij

EPIST. X.

Abbati sancti Eadmundi.

99. **N**on vilescat vobis nostra littera, quam commendat dilectio. Fungitur namque legatione deuoti amici, & paruis expensis supplet impossibilitatem difficillimæ peregrinationis. Illota fortè facie, & minus compta vilitate pannorum, sublimes offenderet oculos, nisi essent amicabiles. Genus itaque pensandum, non decus: quia specimen generationis pluris est, quàm forma lucratiua adulterij & fornicationis. Nostra ad vos oratio de genere Israel est, non deprehensa, vel aliquando deprehendenda macula mendacij, tanquam adulterii. Magnum mihi est religiosorum familiaritatem habere, & pretiosum firmiter retinere. Rogo itaque, vices mutux orationum nostrarum sæpe alterno recurso adinuicem præbeant columbina oscula, & duæ pennæ iungantur, quarum beneficio cœli palatia, Deo annuente, penetrentur. Valete.

EPIST. XI.

*Magistro Ioanni Salisberienſi & fratri
ſuo Richardo.*

GRande diſpendium patitur ardens deſiderium, ſi data occasione crassa & ſupina negligentia negauerit de amico reſſuere, vel ab amico recipere ſaltem litterale refrigerium. Sit ergo inter nos pactum, quod impune præuariçari non liceat, quatinus vacua manu, vel breuiſſima ſalutatione nuncius nullus accedat, vel abſcedat. Nō tamē credo aliquando ſic euacuari tempora circumuolitantia, vt non alterutrum habeamus, vnde vel de proſperitate, vel de aduerſitate aliquatenus conqueramur. Ineptiſſima planē excuſatio quorundam, qui cūm moneantur ad confeſſionem, dicunt ſe nihil habere quod in confeſſione referant. Reuera tales copia inopes faciunt, vel ſolis claritas eos excoecauit. Non ergo ſimiles eiſ efficiamur, dicendo, nihil noui nos habere quod referamus: cūm nec Francia citra mare perpetuitatem pacis & tranquillitatis adhuc iurauerit: nec Anglia veſtra vltra & iuxta mare mediū ſilentium poſt completoriū teneat. Solent enim tunc fœcundi calices tam apud vos, quā apud nos, noua & vetera dicere & facere. Sed de hiſ taceamus, ne veſtrates irascentur, qui potu viliori non minus inebriātur, quā noſtrates vino meraciſſimo. Imperator indulſit nobis bona noſtra de marina. Valete.

Q iij

100.

EPIST. XII.

Iohanni Salisberienfi.

191.

SI bene recolo iocos prioris sæculi, dum simul essemus, & ad inuicem plura iocando fereremus, occurrit inter cætera, quod quasi de magnitudine cassulæ tunc Archiepiscopi Thomæ, nunc pretiosissimi martyris, conquirebar ubi posset reperiri. Verbum illud fecit Deus, immo risum fecit nobis, & toti provinciæ vestræ & nostræ. Inde est quod vndeunque non solum Angli, sed & Galli, quasi ad solemnes epulas, & ad fertilissimas iubilationes, concurrunt ad tumbam prædicti sancti: quò & mihi miserrimo & indignissimo contingat venire, videre mirabilia Dei, & adorare Deum in sancto suo antequam moriar. Etsi enim intercipi voragine maris quod intercurrit possem, non timerem mortem cum vitam quærerem. Interim autem corde meo, ore vestro, adite præsentiam eius, & totis visceribus atque medullis, pro peccatis & miseriis nostris rogate alumnum gratiæ, ne præ ebrietate immensurabilium gaudiorum suorum, qua ab vberibus Christi & gloriøsæ virginis Mariæ repletur, nostri obliuiscatur, cum nos comparticipes compassione animi in tribulatione sua aliquando habuerit, & adhuc pro posse deuotissimos gloriæ suæ prædicatores. De his hætenus. Cæterum de oblatione vestrà vniuersitas fratrum nostrorum grates

quas potest vobis rependit, & quem cum fratre vestro Richardo ab annis prioribus in societate bonorum suorum annumerauit, cumulatius amplectitur, & iocundiùs in perpetuam commemorationem astringit. Non dum tamen reditus exinde comparauimus, quia nulla oportunitas se obtulit. Instantius autem laborabimus quærere, quo id maturius efficiatur. De glosis nostris, quas retinuistis, utcùque patienter sustineremus, nisi plusquàm granum sinapis minutissimam fidem de nobis apud vos deprehenderemus. Tanto tempore nobiscum fuistis, & miror, immo horreo, si tam exigua de nobis confidentiam ex præteritis actibus & verbis conceperitis, ut libellum paruissimi pretii à nobis gratis retinere formidaretis. Tamen quia ita egressum est de labiis vestris, ne fiât irrita vestra, prorsus sumptus reposcimus grandes & graues, ut fiat vobis iuxta fidem vestram. Pretium tamen sine taxatione & sine æstimatione est. Dominum Episcopum Exoniensem saluto, & me sanctissimis suis orationibus commendo. Fratrem vestrum Richardum, quem tenerrimè diligo, & dulcissimè amplector ab Iesu Christo & ab spiritu sancto, immo à Deo patre, vbertate gratiarum impleri exopto. Participem enim me totorum bonorum eius non dubito. Valete.

Q. iij

EPIST. XIII.

*Venerando, & utinam non verbo & lingua, sed opere
& veritate amico, Theobaldo abbati Molisimensi
frater Petrus sancti Remigii humilis
minister spiritum versatis.*

102.

VOx quidem vestra vox Iacob est, & utinam manus non essent manus Esau. Verba vestra venti sunt, litteræ cymbalum tinniens, promissiones nubes sine aqua, sermo sine voce, flores sine fructu, ignis sine calore, aqua sine humore, corpus sine anima, anima sine vita. Quotiens, dilectissime Domine, baculus arundineus mihi factus estis, dum vobis crederem, & nihil acciperem? Quotiens nuncios nostros non primò, non secundo, non tertio fatigastis, & vanis atque frustratoriis dilationibus delusistis? Vbi est ergo illud privilegiū amicitiae, ut scribitis? vbi dilectio illa specialis, vbi fides singularis? Communia vestra malè æstimo, cum specialia tam cassa & vana reperio. Homo tantæ autoritatis, abbas tantæ congregationis, monachus & sacerdos veracissimi Christi; quare non appendit in statera iusta verba sua, ut nunquam exorbitet à regula veritatis, qui regulam professus est beati Benedicti, immo Christianæ religionis? Fideliter & veraciter protestor, multa incommoda sequi mendacem, dum quisque se & sua illi cre-

dere refugit. Si meis acquiescere volueritis consiliis, mutato meliori fundamento, diutius & melius cum prosperitate in abbazia vestra durabitis, & aduersariis vestris locum aduersum vos malignandi non præstabitis. Debitum nostrum, cum Deus voluerit & vobis placuerit, habebo. Veruntamen exinde non promerui laborem & dispendium, quia bona fide & cum vtilitate Ecclesiæ vestræ mutuo centum libras ab Otranno Trecensi accepi. Sufficiunt mihi veteres molestiæ, & pristini labores, quos sustinui, ne vel vna die creditorem molestarem. Non igitur vadam vobis in occursum pro ista re. Apud nos sunt, qui sciunt quid ex debito receperimus, & quid non. Si ad nos veneritis, honorificè vos suscipiemus, & maximè cum pace, si pacem detuleritis. Valete.

EPIST. XIV.

Priori de Valle sancti Petri.

DE quaestione vestra, vtrum scilicet salua 103.
conscientia verè pœnitens possit respondere antiqua crimina sibi obicienti, nihil est, aut, nescio quid dicis, vtinam tempus & licentiam largiorem scribendi obtinerem! Tamen quod in transcurso animo occurrit, respōdeo. Vera confessio & plena satisfactio, omnes Ægyptios, tāquā plumbum, in aquis vehementibus indifferenter submergunt: adeo vt solus Israelita, id est, virtus à Deo concessa euadat,

& Ægyptij, id est peccati opprobrium tollatur à conscientia, & ab infamiæ nota. Sicut enim in baptismo, tam originaliū, quàm actualium nullæ supernatant reliquiæ; sic in confessione illustrantur tenebræ, & nox vertitur in diem, ut veraciter conuerso & confitenti dicatur, fuisti aliquando tenebræ, nunc autem lux in Domino. Et sicut idem Apostolus ait de Christo, *Et si noueramus Christum secundum carnem, sed nunc iam non nouimus*: sic & de isto dicatur, et si noueramus peccatorem, mendacem, homicidam, adulterum, iniustum, & impium, liquefactis iniquitatibus omnibus in fornace confessionis, reformetur ad sanctitatis imaginem, & dicatur bonus, verax, innocēs, castus, iustus, & pius. *Verte*, inquit scriptura, *impios, & non erunt*, utiq. impij. Ut enim tollitur nigredo superueniente albedine, sic malitia superueniente bonitate. Neminem Iesus semiplenè curauit, nemini gratiam suam modio iniusto mensurauit, ut totum se Deo exponētem non totis vlnis misericordiæ exciperet. *Sine pœnitentia*, ait Apostolus, *sunt dona & vocatio Dei*: quia nisi ab ingratis semel à Deo cōcessa gratia non reuocatur. Est namq. in illo est, nec est in illo est & non, sed est tantum in illo est. Cum ergo verè confitens & verè pœnitens his dītetur priuilegiis, quis nequam oculus audebit dicere, iudicia Dei non esse iusta, & opera reprehensibilia? *An*, inquit Dominus in Euāgelio, *oculus tuus nequam est, quia ego bonus sum*? Sic erūt nouissimi, id est, grauissimis occupati peccatis, per correptionem primi, & primi, qui se iustos

2. Cor.
v. 16

Prou.
xxii. 7.

Rom.
xi. 29.

Matt.
xx. 15.

arbitrantur, suam iustitiam constituentes, nouissimi, id est, gratia Dei vacui. His auctoritatibus non improbè asserere possumus, veraciter posse respondere verè pœnitentem exprobranti sibi antiquas & exterminatas abominaciones, immo per confessionem antiquatas & deletas, nescio ita esse vt dicis, vel, nihil est quod dicis. De præsenti enim statu vnūquemque iudicat Deus, nec alicui ad confusionem priores cicatrices peccatorū à Deo opponuntur, cuius vt aquilæ iuuentus per innouationē vitæ renouata est. Quicquid autē iudex ignoscit, aduersarius imputare non potest. Vnde Apostolus: *Si Deus pro nobis, quis contra nos?* Nō enim solū cum pœnitente, immo etiam pro pœnitēte stat deus, dicens pro ea quæ in adulterio deprehensa ei damnanda oblata fuerat: *Si quis vestrum sine peccato est, prior in illam lapidem mittat.* qua sententia illa liberata, cū ei diceretur, *nemo te condemnat* mulier? & illa responderet: *Nemo domine, nec ego,* inquit, *te cōdemnabo.* Nonne rectè dicere posset salua conscientia, non sum quæ fueram, non sum adultera? Tamen regulariūs & modestiūs impropèranti & calumniatori respondendum est taliter, Melius posses dicere, vel, Deus tibi ignoscat hoc peccatum, vel si qua talia sunt: ad exemplum Iesu, cui cū dictum esset, *Nonne bene dicimus nos, quia Samaritanus es tu, & demonium habes,* alterum simpliciter negauit dicens: *Ego demonium non habeo,* de alio prorsus tacens. De his hactenus. Abbas sancti Crispini in præsenti i nobiscum ad montem Dei venturus est,

Rom.
VIII. 31.

Ioan.
VIII. 7.
10.

Ioan.
VIII. 48

& mandat vt nobis ibi occurratis. Si ergo potestis, facite quod amicus rogat: quia de omnibus tunc melius poterimus conferre, & ad inuicem, & cum priore. Marcam argenti & dimidiam ad faciendum calicem Ellandus Canonicus sanctæ Mariæ Remensis legauit vobis. Orate pro anima eius. Valete.

EPIST. XV.

Lundensi Archiepiscopo.

104. **A** Eternas & antiquas venas misericordiarum & benedictionū suarum profusa in omni largitate diuina gratia his temporibus, licet caritas multorum refrigescat, nondum exclusit. Quamuis enim reconditos & labentes sinus gratiæ in mentibus multorū fidelium Deus in Ecclesia sua adhuc retineat: vos præcipuè tanquam lucernam super candelabrum positam, oleo multiplici perfudit, vnde multæ areolæ Ecclesiarum, Episcoporum, pauperum, viduarum, tam suauiter quàm abundanter irrigantur. A multis siquidem retro temporibus, non in vacuum siue gratiam, siue pecuniam dei excepistis, ligando illam in sudario, vel infra domesticos parietes recludendo. quis enim ad vos accedens vestram non sensit benedictionem? quis quantumlibet tepens, audiens vel videns conuersationem vestram, manum egenis expositam, ostium viatoribus patens, iudicium & iustitiam æqua lance, causam non personam discernens, omnemque

reliquam actionum & sermonum vestrorum regionem perlustrans, non calefactus, non melioratus, non bene instructus abiit? Deo gratias, qui iuxta consuetudinem suam gratiam pro gratia superabundare facit in vobis, vt melior sit finis orationis quàm principium, & vt exitus matutini & vespere delectabiles fiant. Adhuc enim stillant manus vestræ aromata Dei, quæ de thuribulis sanctorum, per manus Angelorum, in incensum suauitatis naribus sedentis super thronum gratiæ referantur: quatinus in æterna tabernacula vos recipiant, qui de bonitate & beneficiis vestris in terris sustentati, per gratiarum actionem in cœlo iam sunt recepti, vel adhuc recipiendi. Pauper iste Episcopus domnus Fulco, quē per Euangelium in Christo ego genui monachum, & vos Episcopum, de magnificentissima liberalitate vestra Deo gratias nobiscum refert, exponens quoddam sustentamentum vitæ & peregrinationis suæ vos habet, & semper habiturum confidit. Scitis, Domine pater, quàm duram prouinciam sortitus sit, & quod animam suam in manibus suis posuerit, potius mortem semper expectans, quàm longam vitam. Scitis etiam, quia qui prophetam in nomine prophete recipit, mercedem prophetæ recipit. Vnde remittimus eum ad vos, & commendamus eum Deo & vobis. Retinui-
mus eum siquidem malo tempore, remittimus autem bono & congruo, vt visitet messem, vtrum matura sit ad metendum, an immatura ad laborandum. Manum siquidem

misit ad aratrum ope vestra & opere, ad Christianitatem dilatandam, & horrea Dei fertiliiori segete implenda. Vestrum enim, vestrum est, quicquid incrementi prouenerit ex labore ipsius, quia & de vestro viuit, tanquam operarius Dei & vester: & ad gloriam vestram respicit atque coronam, quodcumque Christo acquirere potuerit. Non igitur obturandum est os boui trituranti, neq. palea subtrahenda.

EPIST. VI.

Domino Richardo.

105. **T**Anquam de sepulcro Domini species aromaticas, quibus Nicodemus & Ioseph dominicum corpus perunxerunt, in monumento litterarum tuarum excepi, & tam ori quàm odoratui apponens, spiritum super mel dulcem non semel legendo attraxi. nihil fœtidum, nihil fœdum, nihil emortuum viuis ille sermo tuus, nitidus, & sale sufficiēter respersus cōtinet. Viuit memoria accepti beneficij, re-lucet narratio cōpacti amoris, stylus climatus pondere sentētiarum & ornatu verborum re-fulget sicut sol in clypeos aureos, vsque ad diuisionem animæ & spiritus pertingens. De intimo & profundo cordis venas cœlesti vnguento repletas ad medium educit, & pulcherrimæ puellæ de terra Israel speciem spectaculo Angelorum & hominū sistit. In vestitu enim deaurato per auctoritates diuini eloquij & colores rhetoricos, in lecto eburneo propter verū & castū sermonem quiescentem hanc inueni, sine macula mēdacijs, & ruga duplicitatis. Spiritus veritatis talem solet sobolem in mente

sancta gignere, & spiraculū vitæ insufflare, ne mēs amore diuino grauida aliud possit parere, quā cōcepit. Cū adhuc esses, dilectissime, in atrio exteriori, & seculari habitu, per foramen nobis incognitū manū sub mittebat ad animā vētrem inuisibilis ille amator, & demulcebat viscera iā iam sibi legitimo matrimonio copulāda, suauitate sibi certē & tibi fortē cognita. Quales autem nunc tibi amplexus porrigat, quæ oscula offerat, cuiusmodi fœtus conferat, nemo nouit, nisi cū in sermone vel in scriptura partus latentem gratiam prodidit. Secretum tuum tibi, secretum tuum tibi. Admittendi tamen saluo silentio sunt amici illi, cum quibus omnia sunt cōmunia, qui non inuident, sed congaudēt fortunis prosperis, qui optant & dicūt, crescas in mille millia, Credo me Petrū cum Ioanne assumendum, etiam in transfiguratione, etiam in morte, etiam in resurrectione. Non me præfero Ioāni, qui recubuit super pectus, sed præsumo post Ioannem & stationem habere, & castra nostra ponere. Habeat vt dignum est Iesus cum patre suo & spiritu primam in te lessionem: habeat virgo secundā; habeant sancti in ordine suo tertiam. De incolis autem terræ m̄. Ioannes primā, ego si placet secundā, aliis quibuslibet nō inuideo tertiam, & deinceps. De his hæctenus. Si medicus essem, & medicinā qua repellerem infirmitatem tuam nossem, omnimodā curam adhiberē. Quia verò id non possum, facio quod possum. Mitto tibi species qualescūq. nostras: vtinam in nomine Iesu eis mandare possem effectum salutis & sanitatis.

EPIST. XVII.

Abbati de maiori Silua.

106. **Q**Uod me semel vestris sanctis commendaui orationibus, & vice mutua nostras qualescunque orationes repromisi, huic congratulor contractui, & perpetuandum totis viribus exopto. Scintillas in libris vestris ex-candentes & recalentes huius nostri mutui amoris cum multa lætitia excepi, & tanquam de sacro altari igne hausto thuribulum propriæ conscientiæ replens, deuotionum nostrarum incensa prout potui adhibui. Scit Deus & dominus scientiarum, quòd de propriis nihil præsumens meritis, & orationibus amicorum intercessionibus, ad illum qui adhuc longè agit legatione fungentes, securus mitto, nec aliquatenus vacuas redire spero. Iuxta itaque fidem meam vnus de mediatoribus & reconciliatoribus meæ fragilitatis ad illum qui sedet in throno gratiæ accedatis, & copiosam de plenitudine gratiarum benedictionem infelici & misero peccatori referatis. Ceterum pro Priore de Nouis valde familiari & amico nostro, vestro autem fidelissimo, paternitatem vestram supplex deprecor, quatinus sicut cœpistis paterno foueatis gremio, nec aliquid aliquando sinistri de illo suspicemini. Quod enim quasi contumaciter onus abbatiæ recusauit, non de proteruitate, aut elatione, siue inobedientia processit. Venas quidem susurrij de sacratissimo pectoris vestri arcano suscepit, quòd de facili indulgentiam

tiam vestram habiturus esset, si potius eligeret in potestate vestra & monachus vester remanere, quàm si emancipationem & abbatiam appeteret. Valete.

EPIST. XVIII.

Priori Cantuariensi.

LVgdunensem Archiepiscopum nobis aliquando scripsisse de reuelatione pretiosæ mortis sancti & gloriosi martyris Thomæ non teneo. Audiui quidem, sed à quo audierim mente excidit. Nolui ergo certa pro incertis scribere. Superflua enim sunt impendia lucernæ, vbi sol meridianus lucet in virtute sua, & denigrat maiestatem verorum admixtum modicum fermenti mendacij & falsitatis. Credo enim magis laborandum, vt plura demantur miracula, quæ meraveritate fulciuntur in gloria Dei & præfati martyris, quàm vt aliqua fictitia & emendicata supponantur. Omni supplicatione & postulatione tam vos, quàm omnes, qui posteris tradituri estis memoriam mirabilium vestri & nostri martyris exoro, vt nihil nisi septemplex examinatum, purgatum, & colatum fidelissima veritate scribatur de eo, vel de miraculis eius. De monacho Montis Dei, nomine Gaufredo, refero quæ veraciter facta partim ab ipso, plenius à quodam monacho nostro, qui tunc temporis ibi scribebat, audiui. Fortè ab Anglia charta miraculorum sancti Thomæ ad nos deuenerat, & à nobis ad fratres de Monte Dei. Iam dictus frater turgi-

107.

R

dus & inflatus toto corpore, vt verè hydropicus, cellam egredi non poterat. Accepta itaq. cū fide & inuocatione sancti nominis charta, tetigit pedes suos. & tibias, & totū corpus suū de ipsa, & in tantū conualuit vt paruo tēpore interposito ad Ecclesiam, & ad officia sua, non tamen ex toto curatus, rediret. Addo miraculum plus iocūdū, quāmvtile. In capella nostra libell^o, qui legitur in capitulo de natalitiis Sāctorū, & de recordatione defunctorū nostrorum, nescio quis fortè furatus est. Altera die cū flagitarē more solito legi lectionē ex ipso, libro, turbatis Capellanis nō est inuētus libellus. Cū vero de negligētia & de incuria malæ custodiæ eosdē capellanos increparē, vnus eorū, nomine Robertus Anglicus, qui frequēter missam ad altare, in quo reliquiæ sancti thome cōtinētur, celebrabat, in hāc vocē prorupit, Certē nunquam credā Thomā esse sanctum, nisi reddiderit nostrū libellū. Fere post mensem, redditus est nobis liber. Si hoc miraculum est, istud verum esse confirmo. Valete. Sanctum conuentum, & M. Ioannē salutate.

EPIST. XIX.

Abbati Siluæ maioris, Petrus Abbas S. Remigij.

108. **I**Am in itinere posuerant pedem Priores vestri, vt ad vos venirent, cū valefacientes nos dixerunt quid humilitas nostra remanderet paternitati vestræ. Cœpi vrgeri, vtrum in tanta festinatione nudo verbo, an qualicūque scripto salutare vos deberē. Impetrato tamen

breuissimo spatio cucurri ad scriptorem, nihil excogitatum, nihil præmeditatum, nihil emedicatum quærens: sed sicut in ore nostro & in manu scriptoris accurrebāt verba, sic ea incōdita litteris mādauī. Nec etenim aliorum thesauros, nec nostros pauperes angulos euoluere poteram. Verbū illud, quod prope est in ore & in corde, non fuit necesse diu quærere, hoc est verbum dilectionis, verbum salutationis. Semper enim stat in ianuis, & omni transeūti occurrit quòd diligā vos, & quòd vester totus sum, & de orationib. vestris apud Deum plurimū confido. Scio sine dubio ad iudicium me properare, vbi sola veritas locum habebit: sed nolo vt sola iustitia sine misericordia portas iudicij præripiat. Ad fugā enim potiùs me præpararem si possem, quā ad talē curiā, in qua malo suo merito omnis homo condemnaretur, & nullus, nisi misericordia suas partes interponeret, saluaretur. Credo vos aliquid posse apud misericordē, & iustum iudicem, siue præire, siue sequi vos contingat causam nostrā. Dedit enim apud se fideles suos multum posse, qui fideles fecit. & ianuam suæ amicitiae illis aperuit. Sit ergo fiduciæ meæ spes certa, non præsumptio vana, quòd de Dei misericordia confido, & de intercessione vestra. De his hactenus. Priores vestros amicos nostros, precipuè Nouiensem, & de Bella valle, & S. pauli, affectuosius vobis commendo, & vt eodem ad nos remittatis cum bona gratia, imploro. Valete:

R ij

*Domino Richardo regulari Canonico, Petrus
Abbas sancti Remigij.*

109. **P**Ræsentium lator bene vobis notus, viua voce quæ apud nos geruntur poterit referre, atque ideo parciùs volumus scribere. Vna enim littera, nō attramēto sed spiritu dei scripta in corde nostro & vestro, amplius sufficit, quàm multa librorum congeries, quæ est vera & firma caritas. Hæc non delebitur in diluio aquarum multarum: quia aquæ multæ non poterunt extinguere caritatem. Hæc nullo incisório sollicitudinum, siue occupationum radetur: hæc nullo igne tribulationum & malorum conflagrabit. Caritas enim nostra nunquam excidit. Hanc legere potestis sine sole in die, sine lucerna in nocte. Hanc oro vt legatis, cū sanctis altaribus assistitis, & in conspectu Angelorum atque omnium cœlestium virtutum. Lectio ista sine *Tu autem* continuetur. Nullum in auribus Domini sabaoth strepitum faciet. Non à quiete sua Christus excutitur sonitu huius lectionis, nō interrūpitur silentium cœli, non excitatur sponsa illa, quæ habēs inter vbera sponsū, læuā ipsius spōsi sub capite, & dexteram in amplexu habet. Valete.

EPIST. XXI.

Priori Vnigornensi.

110. **R**erum & temporū varietas, quæ nos vbi-que & vndiq. circumuallat, non finit nos stabili gradu in eodem stare, aliquādo quidem nostro, aliquādo alterius vitio. Nam cū in eodem proposito volentes stare pedē figimus,

frequenter irruit, & occupat propositū stabilitatis nostræ, decursus & incursus instabilitatis alienæ. Inde est, carissime amice, quòd contra propositum & volūtātē cordis vestri, fratrem P. Priorē de Lappelee cogimur amouere. Totiēs siquidem rumores malos de Prioratu illo accipimus, quotiēs transmarinos de illis partibus hospites suscipimus. Claustrales & ministeriales vno impetu concitati clamant perire domum, Prioratum ad nihilum redigi, & in summa iam paupertate detineri. Quid ultra? Nullū ibi monachū esse, solū Priorem semiuiuū palpitare. Mittimus itaq. à latere nostro fratrem Absalonem, cuius industriā in multis experti sumus, & cuius studio, si ei gratia Dei affuerit, ruinas illas reparādas & in melius cōmutādas speramus. Cōmendamus ergo illum vobis, vt cōsilio & auxilio vestro fultus, ad honorem dei, & animæ suæ salutem, ac Ecclesiæ nostræ vtilitatem, valeat commissā sibi strenuè adimplere. Valete.

EPIST. XXII.

Petrus Abbas S. Remigij Monacho de Reddinges.

III.

Litteras vestræ amicitiae ad manum nō habebā, cū nata occasione vobis scribere decreui. Frater enim vester magister Vuillelmus secū eas asportauerat. Tenorē quoq. illarum non bene memoriæ cōmendauerā. vnde nec recapitulare potui, quæ præcipua & digna erant, siue responsione, siue præconio laudis. tenuissimè siquidē reminiscor, quia tanquam in opaca sylua, tam sensuum quàm verborum grandis in eis præiacebat materia, de qua sa-

pientia excidens columnas septem, domum
 Salomonis, siue templum domini posset con-
 struere. Itaque factus tanquam vir, qui præ
 inopia racemos colligit in autumno, nō mihi
 occurrit, quod vellem præstare amico veniēti
 de via, vel animæ esuriēti, magis ex copia quā
 ex inopia. Equidē nō ignoro patere vobis spa-
 tiosa illa deambulatoria, vbi omnia ligna pa-
 radisi, vbi vitis abūdās in laterib. domus Dei,
 vbi promptuaria eructātia ex hoc in illud, vbi
 deliciæ deliciarū, vbi cantica omniū lætātium
 de spōsi præsentia & spōsæ magnificētia. Puro
 namq. pectore quid iocūdius, quid ditius, quid
 appetibilius? Ibi Deus, ibi angelus, ibi virtus,
 ibi iuge cōuiuiū, ibi solēnitas solemnitatū, ibi
 mēsa refectionis, ibi somnus quietissimæ pau-
 sationis. Potiora sunt quæ ibi præsentuntur,
 quā ea quæ dicūtur. Sic enim in psalmo lo-
 quitur talis cōsciētia: *Non est sermo in lingua mea,*
 id est, quæ corde sentio, ore nō profero. Sic de
 vobis sentire mihi persuadet fama publica, sic
 statatur cōuersatio sacta, & integra atq. inui-
 bilis propositi obseruatio, quā fortius tene-
 is proficiēdo, quā inchoaueritis arripiēdo.
 Cōtra faciūt, qui cū spiritu cœperint carne cō-
 summantur. Panes nostros, si tamē nostros, li-
 benter comeditis, & scripta nostra sublimiori
 honore quā decet excipitis. Nūquā enim de tā
 immūdo vase emanat aqua digna ad sorbēdū,
 vel de tā fursureo & cinereo clibano mundus
 egreditur panis. dilectio tamē, quæ cinerē tan-
 quam panem māducat, in vobis abūdans, vilia
 quæq. amici pretiosa reputat, & pallio hone-
 stiori ignobilia nostra circumuenustat. Sed

Psal.
 cxxxix
 4.

utinā lima correctionis vestræ omnia scripta nostra explanata essent & emendata.

EPIST. XXIII.

Petrus S. Remigij Nicolao Monacho S. Albani.

VActi & vacātis animi esset, singulis quæ in literis tuis sunt recapitulatis, singillatim ab verbum respondere. Summam itaque responsionum mearum constringens, & portioribus epistolæ tuæ dictis adstringens, pacis & bonæ patientiæ pactum prius hinc inde interpono, ne quis nostrum cuiuslibet commotionis scintilla pro quolibet verbo aduratur vel inflammetur. Sola mihi sancti Bernardi iniuria donetur, & quæcumque & vnde cumque vis iacula conglomera, siue vt meam rusticitatē confundas, siue vt de sensu meo vilissimas sententiā quisquillas excutias; siue vt thesauros tuos homini pauperi aperias, siue vt nescientē doceas, & sensus tuos fortissimis assertionum repagulis stabilias. Aggredior igitur phantasmata tua, lenocinantia quidē pulcritudinis specie, sed titubantia stabilis fundamenti egestate. quicquid enim scripturæ basib. auctoritatum non supportatur, nullius roboris stabilitate fulcitur. nec indignetur Anglica leuitas, si ea solidior sit gallica maturitas. Insula enim est circūfusa aqua, vnde huius elemēti propria qualitate eius incolę non immeritō afficiūtur, & nimia mobilitate in tenuissimas & subtiles phantasias frequenter transferuntur, somnia sua visionibus comparantes, ne dicam præferentes. Et quæ culpa naturæ si talis est

R iiij

natura terræ. Certè expertus sum somniatores plus esse Anglicos, quàm Gallos. Cerebrum namque humidius fumositatem stomachi citius inuoluitur, & quassibet imagines in seipso depingit, quæ ab animali virtute utcumque spiritali deferuntur, & ex occupatione omnium, tam naturalium quàm animalium, seu spiritalium virtutum, infra iudicii veritatem confinguntur, ut phantasmata seu somnia appellentur. Non sic cauernosa, non sic aquatica Gallia, ubi sunt montes lapidei, ubi ferrum nascitur, ubi terra suo pondere grauiatur. Quid ergo? non citò à suo sensu mouentur, & veritatis autoritatibus tenaciùs innituntur. *Meus est, inquit, dominus, Galaad, id est, aceruus testimonij, & in ore duorum aut trium testium stabit omne verbum.* Leue est ergo omne verbum, quod neque testimonio solidum, neque autoritate verum est. Nec est alicuius momenti quicquid humani sensus ingeniosa fornax commentata fuerit, si examine careat veritatis. Pondus siquidem sanctuarij, quo tam merita quàm præmia Angelorum & hominum appenduntur, clausura dispensabili penes veritatem in arca iustitiæ perpetua reconditur custodia. Vagatur itaque vanis euolationibus per aëra, qui nullius auctoritatis fundamento affixus, arūdinea volubilitate & mobilitate circumagitur, & hospes testamentorum Dei nullis detinetur certis mansionibus. Mira virtus veritatis, quæ aduersarios deprehendit nolentes & nescientes in astutia sua. Fugitiuos namque suos frequenter vrget ad laqueos ineuitabilis

Psal.
LIX. 7.
Matt.
XVIII.
16.

conclusionis , vt capiantur & illaqueantur sermonibus suis , dum inuiti vera loquuntur , & quod non sentiunt corde , exprimunt ore. Inde est , frater Nicolae , quod ridendo verum dixisti , cū me fixum , te mobilem scripsisti. Me petram vocasti , & concedo , si pro constantia , non pro duritia intellexisti. Sum quidem natura , professione , & iam ætate ac voluntate , sicut nomine Petrus , petrinus , radicatus , & fundatus in montibus sanctarum autoritatum , & in medio petrarum , vbi mater Ecclesia nidificat in foraminibus petræ , & in cauernis maceræ. Hinc non exeo , nisi ad vocem rotarum , quæ in se habent spiritum vitæ , & stant ac mouentur , tanquam volubiles cum animalibus senas alas habentibus & oculos antè & retro. Securus sequor , quia facies leonis præcedit , ne aliquid noceat : facies hominis , ne aliquid decipiat : facies vituli , ne vanitatis aliquid interueniat : facies aquilæ , ne aliquid dubietatis remaneat , vel tarditatis præpediat. Regula veritatis tornauit rotas istas in circino & orbe veritatis æternæ : quæ de mente diuina procedens tantæ apud Deum maiestatis est , vt in summo vertice lucis inhabitabilis resideat , tantæ autoritatis , vt nullus ditioni subiaceat , tantæ maturitatis , vt nunquam vultum deificum deponat , tantæ certitudinis , vt nulla mutatio aut vicissitudinis obumbratio in ea incurrat , tantæ seueritatis , vt nec Lucifero peccanti in cœlis locum relinquat , nec homini à Verbo assumpto petenti , Matt. 7
si possibile est transeat à me calix iste , crucem & xxvi. 29

mortem remittat. Hæc æterno tramite stelleras deambulans regiones, imbrem matutinum & serotinum distillauit, & sublunarem regionem arentem mediante nube virgineam de sanguine & doctrina illum perpetuis irrorauit. Collatanea eius misericordia, saluo iure priuilegij inuiolabilis, leges mitiores & iura tolerabiliora ab ea impetrauit: quatinus peccatorum remissionem & exilij relevationem speraret, qui in regno veritatis correctis erroribus & emēdatis moribus viueret. Neutra tamen sororum istarum adulationum lenocinia admittit: quin potius tanquam fila araneorum vehementissimo turbine corrumpit, & tunicam inconsutilem, tam illi quàm matri eius, fidei textura componit. Bone amice, quid facit stuppa, vbi de auro, hiacyntho, purpura, cocco bis tincto, & bysso retorta sacerdotalis contextitur vestis, & cælo, sole, ac luna pretiosior & purior summo sacerdoti aptatur cidaris? Prorsus nihil ad nos, nihil ad Angelos dignius & melius de omnibus thesauris suis protulit æterna Trinitas, quàm tēplum virginale, & holocaustum, quod ad immolandum ex eo traxit & extraxit, Verbum Deo patri coæternum & consubstantialiale. Sic corde credo, sic ore confiteor. Nonne & tu? Immo vehementiùs, ne dicam immoderatiùs tu. Totum te expendis in laude Virginis, & ego quid? Impendo planè, & expendo, & superimpendo. Tu contendis honorare conceptionem, & ego prædestinationem, ac totam eius retro progeniem. Tu rosam, ego

etiam spinā. Tu florem & fructum, ego corticem & foliū. Tu apparentia, ego latentia. Tu farinā, ego furfurem. Tu panem, ego cinerem, Tu solium, ego scabellū. Tu substantiam, ego picturam. Si cursum eius fas esset distinguere, & sequestrare in mēte diuina à collegio cunctorum creatorū, mitterem animam ab initio prædestinationis, vt sequeretur adorādo sancta & suprema veneratione colēdo eius vestigia. Repetenda tibi, immo noua & longa expectēda peregrinatio, non ad sanctū Thomam Archiepiscopū in Anglia, sed ad sanctū Thomam Apostolū in India, quia semper interero cōuenticulis, vbi dominæ nostræ digna celebratur cōmemoratio, siue nominetur Conceptio, siue Natiuitas, siue Assumptio, siue alia quęcunq. veneratio. Cū ergo vna gradiamur via, quid ad rē si diuersa sit semita? Tu sinistrā teneas semitā, quare murmuras si ego teneo dexterā? Si tua tibi displicet semita, quia & larga & caritatiua est nostra, cedo: & cōcedo tibi locū iuxta me. Prouerbiū est, Non sunt dimittendæ veteres viæ propter nouas. Quis sanctorū, quis antiquorū non ambulauit semitā nostrā? Credo & verè fateor, si in hoc errassēt, & hoc eis Deus reuelasset. quibus enim sua tam familiariter reuelauit cōsilia, vt etiā ad supplementū Euangeliorū, epistolarū, & prophetarū, perpetua stabilitate canones & decreta statuerint, pari pene obseruantia tenenda cū Euangelio, hoc solum eis tacuisset, si periculosum esset? Sed forte dices mihi. Audesne tu qualiscumq; abbas occludere puteos semper cōtinuandæ deuotionis, & profundiūs quotidie fodiēdæ

venerationis? Nonne eodem spiritu potantur moderni, quo & antiqui? Nonne, vt ait Hieronymus, in templo Dei quisque pro vili portione offert, alius aurum, alius argentum, alius lapides pretiosos, alius, vt ad viliora veniamus, pilos caprarum, & cætera? Non erat ab initio Natiuitas Virginis in Ecclesia sollemnis, sed crescente fidelium deuotione, addita est præclaris Ecclesiæ solemnitatibus. Quare igitur non similiter & diem Conceptionis obtineat sedulitas Christianæ deuotionis? Ad quod ego: Cataractas cœli & fontes, abyssi libentiùs in obsequium Virginis soluerẽ, quàm clauderem. & si filius eius Iesus aliquid omisisset in prærogatiua exaltationis suæ matris, ego seruus, ego mancipium, non quidem de effectu, sed saltem affectu supplere gestirem. Mallem certè non habere linguam, quàm aliquid dicere contra dominam nostram. Ante oligerem non habere animam, quàm vellem eius extenuare gloriam. Licuit quoque, semperque licebit, sponsam Christi Ecclesiam, quæ in terris peregrinatur, secundum mutationes rerum, personarum, & temporum, variare rationes decretorum, & noua adinuenire medicamina remediorum, & statuere sanctis adeptione gloriæ frequentiam sollemnitatum. Est tamen auro locus in quo conflatur, & habet argentum venarum suarũ principia, sedem Petri & curiam Romanam, quæ clauces cæli principaliter tenet: & clausura cõfiliorum Dei reserata dispensante Deo, vnguentum gratiæ à capite vsque in oram vesti-

menti habet compluere. Hæc sedes Petri, idest petra, in qua Moyſes reſidet, videlicet lex Dei immaculata conuertens animas, fragoſa quæque hereticorum conciliabula elidit & allidit, profanas vocum nouitates reſecat & reſcindit, ſuperflua confodit & iugulat, hiantia & ecliptica complet & illuſtrat. Vt nam ſalua veritatis auctoritate, lance communis Cõcilij, hæc domina & moderatrix totius Chriſtianitatis Conceptionem virginis libraſſet & approbaſſet, & à mari vſque ad mare hanc propagaſſet, Sole, idest, Apoſtolico, ac Luna, id est curia Romana præeunte! tam ſecurè, quàm expedite, in lumine vultus eorum grefſus meos ponerem & diſponerem, ex hoc videns vitare lubricum, & ſequi ſolidum & ſecurum. Nihil in Eccleſia peſſimius præſumptione erronea, nihil ſtultius præſumptione temeraria, nihil odibilius præſumptione noxia. Vt cūque vero tolerabilis præſumptio pia, ſed non ſatis probabilis. Abſtinere certè ab omni præſumptione volo: gradatim tamen ſeruatis diſtinctionibus præmiſſis ſecundum magis & minus. Iam deſtitifſem ultra de præiacenti materia ſcribere, non condemnans errorem tuum, ſi error dicendus eſt, qui de pietate venit, nec me opponens gloriſſimæ dominæ noſtræ, cuius non ſolùm terram, ſed & puluerem lingere ſummas diuitias reputo: præcipuè cum in calculo epiſtole tuæ aſſeras, nullatenus te poſſe moueri ab eo quod ſcripſiſti, dicens, quod dixi, dixi, quod ſcripſi ſcripſi: niſi lapidem offenſionis & petram

scandali in eadem epistola tua coniecisses. Dicis, Dominae nostrae animam non solum in passione filij gladio transfixam, sed etiam in conceptionis suae contradictione. Hic bonus dormitavit Homerus. Bone magister, nunquid non mea & tua Domina super choros Angelorum exaltata, sic omni plena & circumfusa est gloria patris, & filii, & spiritus sancti, & sanctorum Angelorum, ut nullatenus nostris indigeat obsequiis, nostris neque violetur aut molestetur negligētiis, quantum ad se, neque melioretur beneficiis? Esto, nostra placet ei obsequia, nunquid passibilis adhuc est eius anima? Fides supplet irrefragabilem conclusionem, ut vera impassibilitas & immortalitas nullas admittat molestias, ne ad supera transeant faeces malorum, quae inferos exercent pro poena peccatorum. Hic lapis est offensionis. Petra verò scandali est, quod beatissimum Bernardum debita exuis veneratione, & verborum iacula post eum emittis, tanquam famam eius possis extenuare, vel gloriam euacuare. Bona fide quae te diligo, & fidelissima caritate laudo, consulo, & rogo, ne amplius in caelum ponas os tuum: quia nisi caueris tibi, in caput tuum recasurus est lapis quo ferreum vis penetrare caelum. An excidit à mente tua omni Sancto competere, *flagellum non appropinquabit tabernaculo tuo?* Super quem certè ceciderit lapis iste incautè missus, conteret eum. Subrides, & fortè nondum correctus labia mordes, quae inquit huius Bernardi sanctitas, quae religio, quae

Psal.
xc. 10.

meritorum prærogatiua? Nullus sum ego ad illius sancta præconia referre. Vita eius, fama eius, opera, scripta, miracula, fides, spes, caritas, castitas, abstinencia, mortificatio demum in mēbris eius, sermo, vultus, habitus, & gestus eius, & his similia, ipsa sunt quæ testimonium perhibent de eo. Prætermitto ista omnia, si nondum emolliri cor tuum potuit. vnum est, in quo clavis in altum defixis arbitror me te apprehensurum, & in amorem sancti Bernardi liquefacturum. Alumnus enim familiarissimus fuit Domine nostræ, cui non vnam tantum basilicam, sed totius ordinis Cisterciensis basilicas dedicauit, ad cuius laudem politissimos tractatus & facundos composuit. Si ergo potes tangere pupillam oculi dominæ nostræ, scribe contra Bernardum suum, cui loquitur ipsa, *Qui tangit te, quasi qui tangit pupillam oculi mei.* Cistercienses quoque nugas nescio, quos præ aliis mortalibus seriis & sine fine mansuris intendere video. Hi sunt, qui monetam nostri iam in agonia positi ordinis reformauerunt. Hi sunt, qui regulam beati Benedicti pene combustam, sicut Esdras veterem legem, restaurauerunt. Hi qui cum Apostolo Corinthiis, idest agricolis & rusticis secularibus onerosi non sunt: sed propriis manibus laborantes, se & alios pauperes pro posse exhibent. Claustra illorum castra Dei sunt, vbi nocte in psalmis & orationibus parati sunt suscitare Leuiathan, qui sub vmbra dormit in locis humentibus,

Zach.
11. 8.

& in die in agro Iericho principi militiæ occurrunt, qui tenet gladium bis acutum, vt superflua refecet cogitationum & operationū.

Ios. v. 13. quærunt ergo cum Iosue dicentes, *Noster es, an aduersariorum?* Vtilis quæstio, & inefflagitabilis solutio, vtrum Deus pro nobis, an contra nos. Si autem contra nos, quis pro nobis? Ampliorem prouocat amorem, si pro nobis: sollicitudinem & timorem, si contra nos. Ponamus itaque animam nostram in manibus nostris, si contra nos: quia & si horrendum incidere in marius Dei post sæculum, melius est tamen incidere in hoc sæculo propitiabili, quàm in manus dæmonum. Dicamus itaque cum Iob, *Etiam si occideris me, in ipso sperabo.*

Iob. XIII. 15. Hæ sunt nugæ Cisterciensium. Statera tua in hoc etiam videtur mentiri, aut inæqualitate ponderis, aut iniquitate moderantis, fortè plus labiorum non bona distinctione, quàm sensus falsitate, quòd dicis, Virgo singularis vicit omne peccatum, non omne debellando, sed nullum prorsus sentiendo. Sta hic, frater, tene aciem, infige radiis solis animi intentionem, vt discas virginem nondum matrem & virginem iam matrem. Attendas domum sapientiæ inchoatam, & iam consummatam, distinguas lanam de prima gratia candidam, & purpuram de secunda sanguine conchylii tinctam: diuidas vellus non complutum imprægnatione, & vellus madefactum incarnatione. Qua enim ratione de ipsa in Ecclesia cantaretur, *Qua est ista, qua ascendit quasi aurora consurgens, vtique in natiuitate, pulchra vt luna, in sancta*

Cant.
VI. 9.

sancta conuersatione, *electa ut sol*, diuina conceptione, *terribilis ut castrorum acies ordinata*, caelesti exaltatione seu assumptione, si nullus ei virtutum fuisset profectus & prouectus? Si ab hora conceptionis nulla cum carne aut cum hoste concertatio superfuisset causa merendi, plurimum dispēdium sustinuisset, cum de ea dictum sit, quia plus est meritis & non natura, quàm virgo & homo. Concedo & credo siquidem, quòd sœua libidinis incentiua Deo præoperante nunquam senserit, vel ad modicum: cætera verò impedimenta humanæ fragilitatis, quæ naturali origine, siue scaturigine, de natura procedunt, ante diuinam conceptionem sentire potuit, sed nullatenus consensit. Et præueniente siquidem gratia, & in virgine sua præludia habente, fomes peccati anhelando extremum spiritum trahebat, solum sepulcrum ei supererat, donec veniens spiritus sanctus defunctum perpetuæ sepulturæ mandauit, & serpentem antiquum suo gladio iugulauit. Dictum nanque fuerat, *in-* Gen.
micistias ponam inter te & mulierem, & semen tuum III. 15.
& semen illius. Vnde Hieronymus: Et si ceteræ virgines imitatur illam vsque ad conceptum partus, & Gabrielis nouæ salutationis obsequium, deinceps totum diuinum est, quod operatur in ea, teste angelo, quia spiritu sancto & virtute altissimi obumbratur. Ante hoc ipsum sanè vterus virginis quamuis mundus, quamuis impollutus, & alienus à contagione peccati, quamuis sanctus, tamen adhuc vilitate humanitatis induitur, vt ita dicā, ac si lana

S

candidissima, sui que coloris dealbata. Ad quam sanè cùm accessit Spiritus sanctus, quasi ipsa eademque lana, cùm inficitur sanguine conchylij, vel muricis, vertitur in purpuram, versa est & ipsa sine coitu in matrem, ut non sit iam admodum quod fuerat, sed purpura veracissima ad indumentum & gloriam summi regis diuinitus aptissimè dedicata, ut nulli deinceps ea uti vsu fœmineo licuerit, nisi Deo. Post conceptum itaque suum meruit crystallinam soliditatem, quæ ante gratiæ plenitudinem non exuerat teneritudinem, sed puram, sed sanctam, sed immaculatā, quæ consensu vri nullatenus potuit, & si aliquatenus admota tentatione percelli potuit, non ad læsionem, sed ad probationem, nō ad mortificationem conscientiæ, sed ad confirmationem gratiæ, & ostensionem constantiæ. Ut quid enim tanta virtus latitans obdormiret? ut quid tanta gratia fructum non faciens præter consuetudinem suam vacaret? ut quid denique tanta gloria matris Domini carnem domando, hostem debellando, peccatum ex omni parte vincendo, toti mundo non se manifestaret? Tolle pugnam, tolles & victoriam. Tolle victoriam, tolles & coronam. Tolle coronam, tolles & gloriam. Ne ergo demas gloriam, noli subtrahere pugnam: quia *non coronabitur, nisi qui legitimè pugnaverit*. Si rectè offeras, & rectè diuidas. Quid est igitur, Virgo singularis omne peccatum vicit, non omne debellando, sed nullum prorsus sentiendo? Quam victricem appellas, debellatricem ap-

2. Tim.

II. 5.

gloriam, noli subtrahere pugnam: quia non coronabitur, nisi qui legitimè pugnaverit. Si rectè offeras, & rectè diuidas. Quid est igitur, Virgo singularis omne peccatum vicit, non omne debellando, sed nullum prorsus sentiendo? Quam victricem appellas, debellatricem ap-

pellare cur formidas? An times eam debellare in bello, quam non potes dicere vincere nisi in prælio, aut sine prælio? Segnior est si qua est victoria sine prælio, fortior quæ in prælio. Ad ampliorem itaque gloriam, assero, Dominam nostram peccatum omne vicisse, & debellasse. Addis, Non omne debellando, sed nullum prorsus sentiendo. Hic si distinxisses, non peccasses. Multiformiter enim peccatum sentitur. Aliquando cum peccato, aliquando sine peccato. Quod in præsentī occurrit, sentio peccatum aliquando tanquam ignem, aliquando tanquam picem, aliquando tanquam lapidem, aliquando tanquam aerem. Ignem generat delectatio, picem consensus vel ipsa perpetratio: lapidem consuetudo, vel obstinatio, aerem serpentis sibilatio, quæ virginis nostræ fores potuit pulsare, sed non penetrare. Hortus enim erat conclusus, An non eadem Domina potuit calcare super serpentes & scorpiones, ita quod nihil illam noceret? Re itaque integra potuit hoc modo sentire peccatum, non autem consentire peccato. Potuit debellare omne peccatum sine vulnere, sine pudore, sine silentij sui concussione, sine futuri partus violatione. De proposita quæstione, Deus cum omnia possit, non potest de corrupta virgine facere incorruptā: valet quidē liberare à pœna, sed nō valet coronare corruptā. Vtinā vim intelligerē verbi, & sensum tenerē hieronymi! Procul dubio neq; malignè reconderē, neque

aurarè communicarem. Ab eo igitur imploranda solutio, qui dignas inuentus est soluere signacula septem libri signati. In epistola tamè Hieronymi aliter dicitur: Audenter, inquit, loquor: cùm omnia possit Deus, virginē post ruinam suscitare non potest, &cæt. Recurrendum proinde est ad materiam locutionis, & ad intentionem loquentis. De obseruanda virginitate & cauenda corruptione tractabatur. Exaudiuit ergo, & ad præconium virginitatis eloquium suum Hieronymus inflammauit, venas susurrij sui infra Dei potentiae & virginitatis gloriae venas subinferens, & velut munditiam virginitatis rebus creatis omnibus præferens: vt facilius sit Deo cælum nouum & terram nouam, & omnem creaturæ defectum reparare, quàm virginitatem semel lapsam in priorem statum refigurare. Hoc inquam vnicum suæ imaginis & similitudinis signaculum animæ de cælo impressit, contestatus in mandatis, vt hoc fidele depositum præ aliis omnibus omni diligentia seruaret, & tanquàm irreparabile damnum intra medullas suas à latronibus & ab omni casu consignaret. Nil in possessione felicius, & Deo similius, in amissione nil miserius, & Deo dissimilius. Vt ergo tam egregium & singulare beneficium non negligeretur, durissima conditio apponitur, vt quodammodo ad id resarciendum damnum Deus infirmetur, non de potestate, sed de dispensatione. Si enim potentia eius simpliciter attendatur, & à pœna valet liberare, & quæ fuerit aliquando corrupta

tanquam incorruptam coronare. Si ad dispensationem & constitutionem æternis legibus fixam & inuariabilem, non valet: quia nihil contra seipsum valet, idest velle potest, vel debet. Cum enim simplicissimæ sit naturæ Deus, de ipso tamen secundum vsus nostræ locutionis impropriè loquimur, dicēdo eum aliquid posse, vel non posse, aliquid nosse vel non nosse, aliquid velle vel nolle. Quasi igitur in Deo parturiente in misericordia ad redintegrandum fractum virginitatis signaculum, obstetricando, immo obstando, lustritia decretorum suorum ostia ventris claudit, & ne de vulua egrediatur, aut genibus excipiat, aut vberibus lactetur, abortum facit, ne de corrupta incorrupta iteratò pariat: sicut de Baptismo legitur: *Nunquid*, ait dominus, *homo cum sit senex potest in ventrem matris suæ iterato inire & renasci?* Vicaria denique vicissitudine iustitia in partu suo, refellente misericordia, non dissimiliter periclitatur, cum volens vituli fabricatores delere, ait Moyse, *Dimitte me ut deleam multitudinem banc, faciamque te in gentem magnam.* At Moyse gladium diuinæ animaduersionis tenens, & in vaginam mansuetudinis solitæ refringens, respondit: *Aut dimitte eis banc noxam, aut dele me de libro quem scripsisti.* Sic quasi quod voluit Deus non valuit, propitiabilius se inclinans serui fidelis amicitia, quam ingratisimi populi grauissimæ culpæ. Et notandum, quia triplex est corruptio, aut corporis tantum, aut animi tantum, aut simul corporis & animi. De prima dicit Hieronymus:

Ioan.
III. 4.

Exod.
XXXII.
10.

2. Cor.
XI. 3.

1. Cor.
III. 16.

finge tempore persecutionis aliquam virginem prostitutam: corrupta est in lege, incorrupta in Euangelio. De secunda Apostolus, *Timeo ne sicut serpens seduxit Euam astutia sua, ita corrumpantur sensus vestri à simplicitate fidei.* De tertia idem Apostolus: *Templum Dei sanctum est, quod estis vos. Si quis templum Dei violauerit, disperdet illum Deus.* A nullo tamen genere corrupta mundatur, nisi Deus misereatur & ipsa mereatur. Si autem tanquam vasculi sui fracturam quancunque manus tornatiles refarcire voluerint, poteritne plus negligentia, vel impotentia, quam Dei omnipotentia? Absit. Sanè id solum non potest Deus, quod se non posse vult. quis infinitæ detrahet potentia, etiam voluntate corruptam mutata voluntate posse facere, si voluerit, incorruptam, aut coronare tanquam incorruptam? Dictum est ergo non pro diminutione diuinæ potentia, sed pro commendatione sanctissimæ pudicitia, Deus non valet, idest non vult, post ruinam coronare corruptam. Hæc spica de agro Booz sorti nostræ obuenit, saluis messorum grandiusculis aceruis. Extremam apponimus manum ad Sansonis nostri problemata multis syndonibus inuoluta, neque paruo pretio resignanda. Habeant, inquit, Galli de Anglica quæstione quod ruminant, & Angli de Gallicano haustu quod pitissent. Sicut enim potus est Dagon Angliæ, sic Baal est cibus Gallia. Malus potus, malus cibus, mala inebriatio, mala ructatio. Singulum horum suis cultoribus patrat gehennam. Quam ergo

simul inferēt pœnam? Si derefragatione conceptionis agis, aut de impossibilitate reparandæ corruptionis, fornace & sufflatorio vtcunque sufficiente, capita & membra omnia idolorum frustratim comminuta, atque in puluerem conflata, siue in cibum, siue in potum, ab Anglis & Gallis iam iam absumi possunt. An itaque sitis Anglica & fames Gallica refectæ tali cibo & potu conquiescent? Non credo: quia & sitis perpetua, & nostra fames continua. Furemur autem per disciplinam, & conflamus per abstinētiā, quod superfluum est in cibo & potu, tanquam idolum patris nostri Adæ, quod de ligno scientiæ boni & mali confectum est, vnde ipse & Eva saturati, dimiserunt reliquias paruulis suis, quas sorte missa diuiserunt inter se Angli & Galli, vt illi humidioribus resoluerētur, isti solidioribus suffocarentur. Nisi vera scriberem, meum Confiteor dicerem. Attamen quia veritas odium parit, digito compesco labellum, & interim noua tonitrua, & fulgurationes Nicolai mei humo absconditus formido. Vale, & ora pro me.



PETRI ABBATIS

S. REMIGII

EPISTOLARVM

LIBER VII.

EPISTOLA I.

Abbati sancti Richarij.

113.



N præcipuis boni pastoris sollicitudinibus non infimum tenent locum deliberatio & moderatio cunctarum suarum actionum. Præcipitatio enim & subita animi perturbatio regulam summi arbitri offendit. Qui omnia non mensura & pondere & numero disponit, malè quoque cuncta ministrat. Vtilius tamen & commodius est corrigere illicita & resecare superflua, quàm contumaciter semper ad procliuia defluere. Nam Petrus princeps apostolorum, qui est optima forma omnium prælatorum, habens, regni dicitur habere, quibus impetum cordis tanquam pullum

indomitum refrænet, & passibus ordinatis ambulare compellat. Vt ad rem veniam, sacramentum illud, quo monachum vestrum adstrinxistis, ne ad monasterium, cui præsidetis, quandiu administratio vestra duraret, aliquatenus nisi permissione vestra rediret, de sancta pœnitentia absque vlllo pudore & reatu periurij, potestis relaxare, quod aliquantisper incōsideratè factum est. Si ergo nostro consilio acquiescitis, ouem abiectam reuocabitis, & potius ad misericordiæ cornu dextrum, quàm ad iudicij sinistrum, censuram vestram inclinabitis. Misericordia enim superexaltat iudicio. Quærit etiam monachus vester, vtrum tenendum sit tale iuramentum, an non. Pro certo respondeo, non tenendum, nisi vrgentissima & exactissima subsit causæ necessitas. Valete.

EPIST. II.

Petrus Abbas S. Remigij Ioanni de Saresberia.

NVnquam pulsum tuum in litteris à te receptis inæqualem, aut citatum de superueniente febre regiæ commotionis deprehendo. Mirarer tam bonæ & optimæ animi complexionis, nisi antiqua cognitio admirationē compesceret, & olim iam notus status tuus maiora & meliora innoquisset. Certè cum illis & de illis te esse nō ambigo, de quibus dicitur quia *vbi erat impetus spiritus, illuc gradiebantur.* Ezech. 1. 12. 114.

fionibus hilarescit, suis congelationibus frondescit, suis euerfionibus excrescit, suis ægritudinibus conualefcit, suis contrariis infortuniis fortior & audacior enitescit. Quid igitur? Consolabor te? Sed non es desolatus, qui desolationem reputas consolationem. & eleuabo te? sed non es deiectus, qui dum eiiceris eleuaris. Conficiam aliquod emplastrum siue electuarium? sed neque vulneratus es, neque in passione aliqua turbatus. Tamen percussio & non vulnerato, impulso & non deiecto, concusso & non excusso, reor congratulandum de constantia, timendum de nondum finita pugna, adhortandum de perseverantia. Ecce caminus, sed non timet aurum: ecce mare, sed supernatat folium: ecce malleus, sed non confringitur adamas: ecce ventus, sed mons Sion non commouebitur: ecce prælium, sed miles tenet gladium. Superuacuis impendiis laborat, qui solem facibus nititur adiuuare. Non ista & scientia & experientia. Si qua tamen tibi ex me potest fieri consolatio, vtere vt libet, & præsens & absens, tuus sum, & omnia mea tua sunt. De gente tua & moribus, mihi satis notum est, quia vtres, immo ventres suos solent implere, quinimmo superinfundere, tam de vino, quàm de mulso, sine reprehensione: & tanquam Hebræi carnem suam circuncidunt, in signum quòd semen sunt Abrahamæ, absque opprobrij confusione.

EPIST. III.

Petrus Abbas sancti Remigij, Magistro G.

NVllum virtutis dispendium est, vbi ab
 vmbraclis eius vitium extrahitur, vt
 reuelata facie quod latebat appareat. hac æta-
 te atque his malignitatis diebus, Deus splen-
 descere facit quis sit de gente tenebrarum,
 vel de populo honorificato diei & lucis, dum
 stricto ense & vniuerso apparatu armorum
 hinc inde conglobato, bonum & malum, vir-
 tus & vitium in castris suis manu conferta co-
 minus acriter dimicant. O quàm pompôsæ
 phalanges Philistinorum, multo numero &
 propriis viribus confidentes vibrant hastas,
 intorquent sagittas toxicatas veneno sæcula-
 ris gloriæ, aduersus Israel populum humilem,
 pusillum gregem, de se nil præsumentem! Ab
 initio enim, ex quo in veritate non stetit ho-
 micida ille, qui tanquam fulgur de cœlo
 cecidit, multiplicata sunt mala super terram;
 & rarecente tam virtute quàm religione, su-
 per numerum excreuerunt mulieres, Ægy-
 ptiorum nimirum & Hebræorum. adeo vt
 vix septem mulieres apprehendant virum
 vnum, & pretiosior sit vir auro, & homo
 mundo obrizo. Quæris fortè, quid intendat
 hoc nostrum prouerbium; & quare hanc
 proposuerimus in exordio litterarum no-
 strarum querimoniam. Res ipsa sine dubio,
 & ratio temporis nodum quæstionis soluit,

115.

dum in errore schismatico, qui videbātur columnæ esse in domo Dei, procliuius elabatur, pro bucella panis & pro gloria carnis, quæ tanquam fœnum tectorum euanescebat, quod priusquam euellatur exaruit. Vident & agnoscunt homines, quod Dracō tertiam partem stellarum de cœlo secum deiecerit, nec exterriti tam fœdo & crudeli exemplo abhorrent ire post Satanam, & detinere veritatem Dei in mendacium. Vna hæc de plagis Ægypti, quæ filios Israel non tangit, sed filios huius sæculi, qui quærunt quæ videntur & temporalia sunt, non ea quæ non videntur & æterna sunt. Secunda autem similis est huic, quæ maximè debacchatur in partibus vestris transmarinis, vbi rex Angliæ omnes pene canes sic elingues reddidit, vt mutire non valeant, ne dicam latrare. Superenatauerunt tamen aliqui, qui timebant ne simili tinea corroderentur, & tabescerent fauces eorum: de quibus est Cantuariensis cum domestica familia sua, ex quibus vnum habemus catulum, Ioannem de Saresberia, qui non facit animam suam pretiosior se, sed dominæ Ægyptiacæ auferenti tunicam non renuit prius dimittere pallium, quàm stupro falsitatis corrumpi, & nudus reiecta sindone nudū sequi desiderat Christum. Bone amice, & tu de illis es: nam & loquela tua manifestum te facit. Quamuis enim cum nubevmbrosa latites, & corporaliter cum illis habites, qui de lateribus Aquilonis frigescent, tamen corde bono & optimo, tanquam veræ philosophiæ discipulus, respicis ad austrum, &

expectas inde paraclitum, qui nebulas istas aduentus sui illustratione expellat. Faciet autem hoc, cum sibi beneplacitum erit. Interim offero tibi me & mea, & rogo ut si oportu- num fuerit, & necessitas aliqua exegerit, apud Archiepiscopum bonum nobis teneas lo- cum.

EPIST. IV.

*Abbati Villarcensi, & conuentui, Petrus
Abbas sancti Remigij.*

CVM reo, & pro reo, ipse non in vno, sed in multis reus, reatus veniam postulo, causam non iustitiæ, sed misericordiæ allego, fontem Dauid resignandum & aperiendum sitienti & de via redeunti imploro. Iudæi captum à be- stia, & morticinum, atque carnem porcinam non comedunt: sed Iesus, lilium inter spinas, & captū liberat, & morticinum saluat, & por- ci immunditiam sua munditia, quæ attingit à fine vsque ad finem fortiter & disponit omnia suauiter, emundat & emendat. Fossā iuxta altare, quæ sacrificiorum & holocaustorum reliquias siue superflua solet excipere, nō no- bis oppilata sed aperta reseruetur, quia & ipsum altare concuum & in modum retis fi- eri iussu est, quatinus & cineres excipiat, & vapores ad motæ flammæ intrinsecus vsque ad animam foueat. Nostrium altare, quod est non huius creationis, sed in excelsis, paternæ tantum generationis, & in terris maternæ ni-

116.

hilominus tantum conceptionis Iesus Christus, ventrem habet eburneum quidem, sed distinctum sapphiris: quatinus & ex virtute Dei nostras deleat ignorantias & peccata, & ex susceptione humanæ naturæ nostris infirmitatibus ex his quæ passus est compati nouerit. Noluit autem plagas illas sanctas, & vulnera in cruce suscepta, ita recludi, quod meatus veniæ & indulgentiæ peccatoribus obstruerentur: sed adhuc manus habet expansas in cruce dicens, *Venite ad me omnes qui laboratis & onerati estis, & ego vos reficiam.* Quia igitur viris sapientibus scribo, de arca sapientiæ vestræ quanta sibi quisquiliis mutuare mihi concedat eadem sapientia, quæ nunquam caret affluenti bonitate & copiosa largitate. Pro fratre Ansfredo, immo pro causa eius, qui ad vos reuertitur, hæc intimare nec mihi pigrum est, nec vobis onerosum esse debet. Causa equidem suæ abscessionis differens fuit ab aliis, qui propositum sanctæ religionis irreuerenter abiiciunt, & tanquam canis ad vomitum redeunt. Effectus siquidem causæ ipsam causam probat. Non enim abiecto pudore & reuerentiā sancti propositi, cum meretricibus more aliorum lupanaribus se immiscuit, vel aliis enormitatibus sæcularis conuersationis rupto fœdere sanctitatis se immergit. Non ergo à vobis vno & indifferenti modo rerum causæ pensentur. Quamuis enim in mente diuina causa atque ratio omnium habeatur, tamen sicut fluuius, qui egreditur de paradiso in quatuor capita diuiditur, sic de

Matt.
xi. 28.

illa radice diuinæ dispositionis rami innumera-
 bilium caufarum , & in fe eadem manens
 diuerfas , propagines exuberat , vniuerfi-
 tate eorum quæ fuerunt , vel sunt , vel erunt.
 Quisq. enim euentus siue effectus de propria
 causa procedit. Inde est , quantum ad præsen-
 tem causam attinet , quòd manus moyfi , quam
 primò de sinu leprosam retraxit , secundo re-
 misit , & carni reliquæ similis apparuit. Simi-
 liter frater Ansfredus , cùm ad claustrum san-
 ctæ congregationis vestræ , tanquam ad sinum
 Moyfi , conuersus contineretur , nulla in eo le-
 pra criminalis peccati apparebat. Cùm au-
 tem de claustro exiit , tanquam leprosus appa-
 ruit. Fauente igitur & agente diuina iussione ,
 ad sinum Moyfi , tanquam ad virum priorem
 rediens dicit , Melius mihi erat tunc magis
 quàm nunc , nunquam inde postea exiturus ,
 nisi ex mandato Abbatis , vel vocatione cœ-
 lesti in exitu mortis , quando sana & integra ,
 qualis de baptismo exiuit , anima eius ad do-
 mum ipso propitio redibit. Non ergo pœni-
 teat vos ad horam illum amisisse , quem per-
 petuum fratrem & monachum recipitis. Pro-
 derit enim ei sensisse laqueos diaboli , quibus
 Dei adiutorio cōtritis , anima eius liberata est.
 Tam enim vos , quàm fratres nostri , nec non
 & clerus de castro nostro testimonium ei per-
 hibemus , quòd religiosius se habuit in sæculo ,
 quàm multi in claustro , dum fere septennio
 nobiscū cōuersatus est. Exemplum misericordiæ
 plurima supponerem , nisi viscera Ioseph iam
 in vobis mōta ad misericordiam præsentirem ,

& nisi modum epistolarem excedere time-
 rem. Breuiter tamen & compendiosè patrem
 prodigi filij ad eum reuertētis cum vitulo sa-
 ginato, stola, anulo, & calciamentis occurren-
 tem, immo accurrentem monstro : & Iesum
 æquè filium Mariæ virginis, adhuc Thomæ
 Apostolo latus & manus ostendētem, vt quasi
 petra refugium erinaciis, in cauernis & fora-
 minibus suæ passionis pullos fugientes admit-
 tat, & ab insecutione milui rapacissimi tute-
 tur. Oleum itaque de capite vestro non defi-
 ciat : quia postquam Sareptena mulier, id est
 Ecclesia, Heliam paut, id est Christum rece-
 pit, farina misericordiæ diuinæ non defecit,
 nec lecythus olei imminutus est. Itaque nec
 vbera sint vobis arentia, nec sterilis valua.
 Christus enim non de sterili natus est, sed de
 puella gratia virginitatis & fœcunditatis ple-
 na. Valete. Quidam clericus bene litteratus,
 qui in lege Domini die ac nocte meditatur,
 ianuam vestram pulsat, magister Vuillelmus,
 vt ad conuiuium siue ad cœnam Domini ad-
 mittatur. Vestem siquidem habet nuptialem,
 id est pauperem & humilem, non villosam,
 nec pomposam. Quo itaque substātia & spiri-
 tu pauperior, eo societate Christi dignior. Ro-
 go vt illum recipiatis. Orate pro nobis, quia
 ouem vestram detonsam bene vobis conser-
 uauinus, & cum multa lana remisimus.

EPIST.

EPIST. V.

Abbati Villariensi, Petrus Abbas S. Remigij.

MVnus amicabile est amico, sollicitudinem gerere. Pluris etenim est munus animi, quàm nummi. Sollicitudo autem implet animum, non manum. Vnde nec tam facile tollitur de corde sollicitudo amoris, quàm citò excutitur de sinu vel manu pignus cuiuslibet materialitatis. Cùm igitur à fratre H. diligenter de statu vestro quærerem, audiui vos in labore hominum esse & calicem sororis nostræ, quæ est passio Christi, cum his qui in torculari premunt, frequenter bibere. Amara quidem potio bibentibus illam, sed spem salutis optimam in se habet repositam. Nihil enim ad cælum euntibus tutius, quàm sequi stratam sanguine Christi tinctam, quàm vestigia clauorū impressa prospicere, & ante oculos suos Christum semper per scriptum & præscriptum inspicere. Rectissimum hoc iter ad tribunal gratiæ. Via hæc latronibus vacua, & finem suum pertendens ad illum, qui peregrinantibus est via, proficiscentibus veritas, peruenientibus vita. Duri sunt lapides ad caput Iacob in itinere quiescenti, asperi silices cacumina montium petenti, pungunt spinæ & tribuli teneros pedes, femori infiguntur sagittæ, sed nunquid non erit finis? *Finem*, inquit Apostolus, *Domini vidistis, patientiam Iob audistis.* Quid igitur post finem, quid in fine?

117.

Iac. v.
11.

T.

Pfalm. *Omnis consummationis vidi finem, latum mandatum*
 CXVIII. *tuum nimis.* In fine siquidem apprehendemus
 96. quæ sit longitudo, latitudo, sublimitas crucis Christi, & profundum. Longitudo dierum in dextera eius: latitudo, vt sit tanta cognitio de Deo quanta dilectio, tanta dilectio, quanta beatitudo, tanta beatitudo, quanta dulcedo Dei, tanta dulcedo, quantus ipse Deus. Sublimitas, in capite Nazaræi, Iesus Nazarenus rex Angelorum. Profundū, cū omnia subiecta erunt ei, præter illum, qui sibi subiecit omnia. Hæc, carissime frater & domine, carissimus filius vester. H. à nobis nolens vacuus redire sua instantia extorsit, non à nolente, sed ab obfesso multis curis & turbis. Libentissimè vidimus nouum hominem factum de veteri, reuersum de regione dissimilitudinis ad patrem clementissimi pectoris & redundantissimæ pinguedinis. Hūc vobis affectuosius commendamus, tanquam mutux dilectionis pignus, & fratrem, quem ego aliquantis per enutriui, & valde diligo.

EPIST. VI.

E. Londenſi Archiepiſcopo.

118. **V**Acillans fluctuatione inter spem & deliberationem, vltra se intra metas patiētix non potuit continere verus amicitix affectus. Suadebat spes quotidie, diligentissimum & dilectissimum dominum & amicum statum

suum renunciaturum. Urgebat deliberatio, nil immorandum ad quærendā certitudinem de incertitudine aduersi casus, qui dicebatur oppressisse tantum dominum. In his itaque procellis vsque ad lassitudinem animo laborante; & diutius pensante quid inde potius esset eligendum, communicato consilio cum dilecto filio vestro abbate sanctorum Crispini & Crispiniani, festinaui mittere ad vos nuntium nostrum, vt sciremus quomodo tentauerit vos, & probauerit dominus, tā in mari, quàm in terra. Nam parumper laxauit fræna leonis rugientis, quæ tenet in manu sua: sed nec rupit, nec soluit. Siquidem si Deus soluisset, aut diabolus rupisset, aqua nimia vos absorbuisset. Ad torporem itaque, si quis in vobis, aut in vestris erat, excitandum, iustè passus est dare fremitum: ad ostendendum erga vos filialem affectum, pie reclusit ora leonum, & maris ferocem tumultum. Non dormiuit Dei iustitia, nec se elongauit diuina clementia. Impugnari voluit diabolus, sed sola peccata purgauit dominus: fidem puram, deuotionem sanctissimam obfuscare voluit princeps tenebrarum; sed Deus qui lux est, & tenebræ in eo non sunt vllæ, de camino clariorem extraxit, & aurum suum pretiosius reddidit. Si superest dilectus noster Crispinus, attentissimè illum vobis commendamus, & filium Ioannis Burgenfis nostri, & omnes quos vobiscum duxistis. Dilectissimus vester Abbas sanctorum Crispini

T ij

292 PETRI ABB. CELLENSIS
& Crispiniani salutatur vos. De his quæ apud
nos fiunt, suggero Domino meo, quia satis pro-
spera sunt. Senonensis Archiepiscopus factus
est Remensis: magister Ioannes Saresberiensis,
quondam clericus noster, factus est episcopus
Carnotensis. Conuentus noster semper orat
pro vobis. Ioannes Burgenfis multum salutatur
vos.

EPIST. VII.

*Magistro Presbytero carissimo amico suo
Petrus Abbas salutem.*

119.

Memor temporis illius, quo seruente non
minus studio, quam ætate, in Cellensi
monasterio simul commorati sumus, attendo
plurimum detraxisse cursum interlabentem à
corpore valetudinis, ab animo lectionis &
meditationis. Inexplebili siquidem desiderio,
nec oculus visu librorum, nec auris satiabatur
auditu lectionum. Harum extremitatum deus
erat & medius, & primus, & vltimus. Saluo
namq. ordine, salua diuinæ laudis debiti pen-
sione, legebam leges, nec amittebam, vel
omitebam consuetas orationes. Nunc au-
tem, amice bone, curæ & sollicitudines, quæ
me à iuuentute decerpere non destiterunt,
quotidie accrescunt, & vt mihi videtur, ob-
sersionem perpetuam contra me firmauerunt.
Si quid rosis gratiæ, si quid pinguedinis mise-
ricordiæ raptim, & quasi furtim, de diuinis cel-
lariis interdum attraxit spiritus meus, de re-
pente subitus & intempestius totum ab-

forbet nimius æstus. Vnde clamo ad Deum, *Anima mea sicut terra sine aqua tibi.* Hoc de interiori. De exteriori verò statu, gratias ago benignissimo Deo meo, quia in omni prosperitate & pace sum: tamen qualem potest dare mundus. Libenter vos viderem, & senectutem meam vel ad tempus sub alis beati Remigij fouerem. Magister Ioannes de Anglia, quondam clericus noster, electus est Carnotensis. Munusculum vestrum accepi, & gratias ago. Valete.

Psal. CXLI. 6

EPIST. VIII.

Vnico & vnicè reuerendo patri & domino Vvillmo Dei gratia Senonensi, immo Remensi Archiepiscopo, frater Petrus humilis Abbas S. Remigij salutem & promptum cum omni deuotione obsequium.

IN insigni electione Carnotēsi de magistro 120.
Ioanne stellam matutinam produxit Deus de thesauris suis. Affuit, affuit huic prædeterminationis Dei partui vigilantissima sagacitas Domini mei, & manum obstetricantem supposuit, ne abortum pateretur incommutabilis Dei præelectio. Deus tibi laus, tibi gratiarum actio: Archiepiscopo tibi merces, tibi æterna remuneratio. Hoc opus de raritate admirabile, de singularitate incomparabile, de puritate commēdabile, de bonitate speciali omnibus imitabile. quando & vbi simile factum est in regno Franciæ, vt remotis omnibus simoniæ speciebus, nullis munerum suffragiis incumbentibus, nullis clientū vellicationibus

T iij

pruritum aurium excitantibus, solus Dei honor & populi salus in Episcopali electione quæretur? Certè hoc in rationali & superhumerali tuo, pater amantissime, stylo ferreo, vngue adamantino scribetur, quòd in vicariis Petri eligendis nulla te mouet humana gratia, nullus fauor, nullus carnalis affectus, nulla pecuniæ avaritia. Trecensem Episcopum, virum qui ministerium suum honorificat, elegisti & consecrasti. Meldensi Ecclesiæ tres viros honorificentissimos, domnum scilicet Cardinalem, Magistrum Petrum, & Simonem Archidiaconum vicissim assignasti: sed nunc superlatiuè hominem de aliâ gente, amore Dei tantummodo ductus, in Ecclesia Carnotensi substituiisti. Vbicumq. hoc Evangelium prædicabitur, dicetur quòd sis amicus sponsi, cum tam verax sis & fidelis, non iam in quærenda vxore Isaac, sed in inueniendo Ioseph virum Mariæ. Verè Maria veneratur in Carnotensi Ecclesia. Verè vir iste Ioannes, pretioso sanguine beati Thomæ pontificis & martyris intinctus, lege diuina ad plenum instructus, bonis moribus & piis actibus ornatus, Apostolico ad Timotheum catalogo virtutum bene depictus, ad Dei honorem, & ad vestram perpetuam laudem, colūna factus est in Ecclesia Dei. Reuirit in vobis antiquus Apostolicæ ordinationis ramusculus, cum pro patribus filij vngebantur, immo pro panibus omni sabbato calidi cum thure substituebantur panes.

EPIST. IX.

*Priori Vngornensi, Petrus sancti
Remigij Abbas.*

121.

NEquē subitaneus, neque repentinus soleo res magnas disponere, sed cum multa maturi consilij deliberatione, finis causarum appensione. Inde est, amice carissime, quod non statim credo omni spiritui, propter illum qui transfigurat se in angelum lucis, & sub pallio cōsultationis offert sæpe venenum deceptionis. Vitium autem est, omnibus credere, & nulli. Exemplo igitur illius, qui omnia nouit antequam fiant, & tamen descendit per angelos probare vtrum clamor Sodomorum, qui ascenderat ad cælum, opere compleretur, an non, diu substiti acquiescere rumoribus quotidianis, de fratribus nostris de Lapelee, vel meliores fructus de ficulnea sperans, vel iudicium tanquam meridiem expectans. Quia itaque crebrescit, non rarescit fumus funestæ opinionis, securim appono ad radicem arboris, non detruncans, sed releuans ramos vsque ad terram inclinatos, immo incuruatos, si fortè suspensi ferant denuo vuas, non labruscas. Mitto autem à latere nostro fratres integræ hactenus apud non opinionis, quorum conuersationem, si de præteritis futurorū præsagia apprehenduntur, bonam in terra vestra credimus futuram & honestam. Sit cum illis manus vestra & consilium, quo siquid in eis

T iij

296 PETRI ABB. CELLENSIS
minus est suppleatur ad bene regendam do-
mum nostram, & ad famam dignam reparan-
dam.

EPIST. X.

Episcopo Cestrensi, Petrus Abbas S. Remigij.

122.

Ioan.
VIII. 7.

VEstri officij est pater carissime, calamum
quassatum non conterere, & religionem
impulsam vero aut falso rumore non penitus
euertere, sed sustētare & releuare. Nihil nam-
que in hominibus cuiuscumque professionis
adeo sanctum & perfectum, quandiu in eo-
dem statu nullus reperitur, vt nulla impostura
seu scissura interueniat. Vt enim ait Grego-
rius, vera religio compassionem habet, non
indignationem. Vnde & Iesus inclinans se
scribebat in terra, *Si quis sine peccato est vestrum,*
prior in adulteram lapidem mittat. Tādem reatum
soluit, & ream absoluit; non fauēdo iniquitati,
sed commissa delendo, & non committenda
præcipiendo. Venerāde pater & domine, non
excusamus peccata nostra, siue illorum, qui in
opprobrium sui ordinis faciunt ea quæ non
conueniunt. Secretiūs tamen, non mitiūs re-
guēdas decerno illos, quorum vita specacu-
lum debet esse mūdo, & angelis, & hominibus,
si offenderint in lapidem offensionis, non suo,
sed sancti ordinis merito. Cū enim causa di-
stinguat inter personā & regulam, salua regula
tāgatur persona, ne nomē Christi blasphemetur
inter gentes. Hactenus monachi solent
iudicari in capitulo, non in consilio; inter

monachos, non inter presbyteros, ab abbate, non ab Archidiacono; corporali, non pecuniaria pœna. Scitis vt credo, quia si notificasset nobis paternitas vestra, aut sedulitas Archidiaconi, enormitates monachorum nostrorum, nec oculos, nec aures clauderemus, sed iuxta antiquorum patrum consuetudinem regulariter malè acta corrigeremus. Amouemus igitur tam Priorem illum, quàm fratrem suum à Prioratu illo, & subrogamus bonos vt credimus fratres, quos vestræ paternitati attentius commendamus, quatinus sub alis vestræ protectionis miluorum rapacitatem non timeant, & cum dei adiutorio, vestro fulti auxilio, oruinam, si qua est, in domo illa reparent.

EPIST. XI.

*Abbati de Beldevras Petrus abbas
sancti Remigii.*

IN negotiis amicorum gerendis tantundem bonæ fidei exigitur, quantum & in propriis. Nec ignoro fraternam sollicitudinem vestram operam dedisse, quatinus fidei vestræ commissum negotium, bono inchoatū principio, sine meliori clauderetur. Fortuna tamen, quæ non subiacet humano arbitrio, frequenter eludit sollicitudinem nostram, & elidit intentionem. Quis enim dominatur potestati maris, immo quis imperat motibus indomiti cordis? Vix quisque potest regere fa-

123.

miliam penetralium suorum ; alienam verò, quam adire non potest, regere quomodo potest ? Iccirco indulgentia Dei nobis non negatur, si de commissorum sollicitudine nihil omittatur. In exactione itaque amicali nemo sit durior, quam Dominum vult sentire, indebita repetendo, vel remittendo. His omnibus diligenter inspectis & appensis, ignosco vobis sterilitatem domus nostræ De Lapelee, quam ut credo bonis admonitionibus vestris circumfodistis, sed incrementum, quod solius Dei est, præstare non potuistis. Commendo rursum vobis nouellas istas plantationes, quæ genimine meliori, Deo cooperante, ut speramus, gustabiliorem referent fructum.

EPIST. XII.

Petrus abbas sancti Remigij Richardo.

124. **E**T si non est sermo in lingua mea de inopia scientiæ, tamen in manibus habeo signa de plenitudine amicitæ. Fontes qui præcedentibus annis rupti sunt & aperti, usque ad diluuium aquarum multarum, præsentī anno siccati sunt, & aruerunt usque ad defectum herbarum & virgultorum. Hæc siccitas linguam quidem & fauces tangere potuit, sed non venam dilectionis attigit, nec oleum de capite defecit. Manabit certè cum vita, immo sine dubio, & ultra. Nam caritas nunquam excidit.

EPIST. XIII.

*Londensi Archiepiscopo Petrus abbas
sancti Remigij.*

IMago vestræ dilectionis impressa & expressa stylo ferreo in vngue adamantino cordis nostri viget, & in eo vigere non cessabit. Radicem namque misit deorsum, quam irrigare non cessatiugis, & quotidiana recordatio benignitatis vestræ ad amicum, ne dicam ad seruum vestrum. Totum enim me occupat gratia, & amicitia, excluso, & expulso timore, tanquam mercenario. Inde est, pater reuerentissime, quod in oblatione primitiarum mearum Domino viuo & vero vestri quoque memoriam eius propitiationi pro posse quotidie repræsentō. Rediit ad nos Magister Crispinus, marina portione non parum amaricatus, vestro tamen beneficio aliquantulum recreatus. Inter cætera retulit nobis duram historiam naufragij vestri, in qua elatione sauiissima mare aduersum vos intumuit, ventus immoderatus nauem ferocissimè reperiussit, tempestas paulominus absorbit. Recordor, Petrum in fluctibus ambulantiem, & ventum validum contra illum venientem, Paulum tertio naufragantiem, Ionam absorptum à bellua, quæ tamen illum retinere non potuit. Domine Iesu, ubi eras? manum auxilii quare tunc subtrahebas?

125.

nisi fortè vt de reliquiis calicis tui, què cum in passione gustasses bibere noluisti ministri tui & sequaces de eodem mixto portionem, siue potionem, quæ sibi continebat, ad recuperandam sanitatem, immo hereditatem.

EPIST. XIV.

*Fratribus Molismensibus Petrus abbas
sancti Remigij.*

126.

AD monumentum ordinis nostri cum Ieremiæ lamentationibus consternatus resideo, & quadruplici alphabeto, quia iam quatruiduano madet fœtore, vehementer afficior. Fuit, fuit quondam de magno genere & nobili progenie ordo iste procreatus, etiam Angelicis virtutibus morum informator prudentissimus, rerum mundanarum contemptor perfectus, & diuinæ voluntatis amator idoneus. Hic hic brachia sua extendit à mari vsque ad mare, de omni gente, quæ sub cælo est, portans in vlnis suis vsque ad thronum gratiæ, & collocans in solis vacuatis & relictis à Lucifero, quando sicut fulgur cecidit in lacum fæcis & miseriæ. O sancti Angeli, quot palmites de hac vinea tulistis ad vos, quot ordine claustrali vobiscum confedere fecistis in cœlestibus in Christo? Heu, heu! capite vulpes quæ demoliuntur vineas: cucullatos, qui transferunt terminos patrum, & sepem regularis institutionis diripiunt. Hi sunt, qui retia Do-

mini rumpunt, qui vestimenta Domini diuidunt, qui lancea linguæ suæ latus iam pēdentis in cruce ordinis effodiunt : intestina religionis in auras exsufflant, & si quid vitalis spiritus remanserat, extinguunt. Sic armantur filij contra patrem, sic genimina viperarum viscera materna crudeliter concutiunt, sic abortu suo sepulcrum patens inordinatè viuendo ordini professo aperiunt. Credo moueri vos contra tantæ sterilitatis auctores, quoties iuxta vos aspicientes coronam sanctorum spirituum & beatarum animarum, recordamini prioris sæculi, & magnæ fertilitatis sinus vestros replentis. Si Phinees adesset, fortè pugione suo hanc iram placaret. Sed ecce quisque ponit gladium in vaginam, nec est qui accingatur ad vindicandum sanguinem patris. Inde est quòd mundus plenus est cucullatis, & pene vacuus monachis. Inde est, quòd in area Domini palea non ventilatur, sed fouetur, non extirpantur spinæ, sed multiplicantur. Ego, ego vnus de cucullatis, video iniquitatem, & quid facio? Nequeo resuscitare ordinem mortuum, & qua patientia inter patricidas exequias funeris eius celebrabo? Non valeo refrænare præcipitem cursum ad baratrum, nunquid effici debeo socius furum? Omnes quidem currunt, non ad brauium, sed ad malum, & ego quid? Optabam cum Apostolo anathema esse à Christo pro fratribus meis. Quis mihi det, vt ego moriar pro te, ordo sanctissime? in cuius præsentia quondam principes cessabant loqui, &

superponebant digitum ori suo. Iuvenes abscondebantur cùm sederet in porta, & assurgebant, nec audebant addere ad verba eius. Nunc derident illum iuniores tempore, quia senuit Isaac, & clarè videre non poterat; senuit David, & calefieri vestibus non poterat. At Moyses cxx. annorum cùm esset, nec oculorum caliginem sensit, neque dentes ei moti sunt. Etsi regulæ professores, etsi speciem pietatis habentes, sicut Isaac & David, senescendo spiritu tepefacti sunt, & oculi eorum caligauerunt; tamen Moyses, id est beatus Benedictus claris obtutibus nunc nostras respicit prauitates, & in nouissimo dentibus mordabit, accusando apud Dominum, suorum decretorum & regularis professionis contemptores. Fortè dicitis, Quid ad nos parabola ista? Abbas Remensis stylo suo vt quid tam mordaciter ex obliquo tangit nos? Quid de nobis ad ipsum? Respondeo: Christianitatis societate, ordinis germanitate antiqua, viciunitatis familiaritate noui vos, & diligo vos. Doleo itaque, quòd nimis extenuatur bonus odor Christi in vobis, tam apud vicinos, quàm apud remotos. Doleo quòd regionem, in summo religionem vestrā, coram vobis alieni deuorant: quòd tineae vsurarum, & debitorum substantiam vestram demolitur, quòd nobilis puella hactenus duplicibus vestita enormiter expoliatur. Religionis siquidē, & possessionis dotib⁹ à fundatoribus suis Ecclesia vestra ditata diu floruit: sed nūc iam exaruit. Gallina illa Molisimensis plena plumis, & bene pennata

quot & quales de vtero suo foetus produxit, dum ex se collegium Cisterciense originario germine pullulauit? Deus meus, de illo vno ouo quàm innumerabilis arena monachorum, & conuersorum faciem terræ operuit! quàm lucido splendore cutem mundi denigratam per infectam viuendi negligentiam reformauit, & illustrauit! Respice, respice Sion filios tuos, & pelles tuas emarcidas noli contemnere: sed resume spiritum adolescentiæ tuæ, si fortè cum Iacob, quasi de graui somno euigilans, audias Ioseph filium tuum in Ægypto regnare, & de manu eius famē tuam, immo infamiam possis releuare. Fratres mei, fratres mei, recolligite plumas matris vestræ, & replantati suis in membris, conuersationem vestram emendando, substantiam redimendo, odorem bonæ opinionis comparando, & ad antiquum statum omnia reuocando. Epistola hæc non contristet vos: & si contristauerit, vtinam ad pœnitentiam! Valete.

EPIST. XV.

*Theobaldo Molismensi abbati. P. Abbas sancti
Remigij salutem.*

STatum vestrum cogitans, ac recogitans
pene vsque ad nescio quid dicam ra- 127.
pior. Caligine siquidem nimia pressus an
hoc aut illud eligam, dicere confundor.

Si enim dixero, sta, casum timeo. Si dixero, suscep-
tum reiice onus, prouidentiam dei offen-
dere vereor. Proinde verum est, quod ait scri-
ptura : *Incerta & timida sunt hominum consilia.*

Sap.

ix. 14.

Quid ergo? Tacebo, & silentio abscondam ca-
rissimo amico, quid de ipso sentio? Rursus
tanquam cæcus lapidem iactabo, & feriam
ubi non video? Sed scio quia in ambiguis be-
nignius semper interpretandum est, iuxta

Rom.

xiv. 4.

Apostolum qui ait, *Tu quis es, qui iudicās alie-
num seruum? Suo domino stat, aut cadit: stabit autem.*

Consulo itaque priores & multos labores, in
ceda Cartusienſis ordinis pro Dei amore per-
pessos, semper te ante oculos habere, & tu-
tissimo loco intimi cordis reponere, & si da-
tum fuerit desuper, nouos quotidie acervos
aggregare. Nunquam enim bono negotiato-
ri quæstus sufficit hesternus. Quotidie nam-
que multa de acquisitis expendimus, & fortè
vna iactura plus amittimus, quàm per annum
lucrati fuerimus. Ideo Apostolus quæ retro
oblitus, ad anteriora semper tendit: nisi me-
liora & fortiora agat, parum pensans quid
egerit. Si ergo lucratiua sunt tibi quæ facis,
fac quod facis. Appende lucrum animæ tuæ:
appende tibi commissorum profectum: ap-
pende quid tibi accreuerit in temporalibus,
quid iterum in spiritualibus. Pensandum si-
quidem est quietis pristinæ damnum, & si re-
parat illud nouum emolumentum. Tibi, non
mihi, crede de bonis tuis: tu enim illa vides &
sentis, ego tantum audio & credo. Tibi sunt
nota, quia vicina, interiora tua. Si ventrem
doles,

doles, nescio, nisi dixeris mihi, ventrem meum doleo. Sic nemo scit hominum quæ sunt hominis, nisi spiritus hominis, qui in ipso est. Itaque cum spiritu tuo, immo cum spiritu Dei, discerne causam tuam, & appende in statera iusta, ne sis mendax in statera dolosa, sanum te asserens, cum infirmus sis, vel infirmum, cum sanus sis. Sed omnis homo mendax non solum in his, quorum non penetrat occulta, sed etiam in se, cuius priuato amore palpat molliter, quæ amputanda essent mordaciter & fortiter. Adhibendum itaque præclarissimum speculum scripturarum ad se cognoscendum & de se iudicandum. Regula veritatis apponenda, quæ nec modicum tacet fermentum, nec dissimulat minimum quoque & veniale peccatum. Si dormieris inter hos cleros, si accubueris inter hos terminos, si consulueris oraculum inter hos Cherubim productiles & aureos, rectos facies gressus tuos, nec erit necesse consilium Achitofel, quod aliquando infatuatum est. Infra hos circulos immitte vestes tuas, & semper habens arcam Dei ante oculos non timebis Philistæos tuos, siue spirituales, siue corporales. Ipsa die qua recessistis à nobis, venit frater Henricus. Persuasimus ei de reditu ad vos.

EPIST. XVI.

*Petro Cardinali sancti Chrysogoni Petrus abbas
sancti Remigij.*

128.

AMplexus vestræ familiaritatis mihi gratissimos oro non senescere : sed cum ligno vitæ dies æternos tenere. Res siquidem est familiaris amicitia, quotidianis refricanda salutationibus, immo irriganda mutuis colloctionibus, & fortè renouanda munerum compensationibus, Placuit dignationi vestræ meannumerare in amicorum vestrorum collegio, sine merito quidem meo, sed non sine vestro. Meritum nāque æquitatis est, si summus se inclinat ad infimum, magnus ad paruum, valens ad infirmum. Me vermem, me putredinem, me iam iam ad non esse tendentem reputo : vos cum senatoribus cæli thronum iustitiæ honorantem suspicio, & angelos cum Apostolo iudicantem non dubito. An irrisorium est & non verum quod dico? Plannè scripturæ auctoritate id assero. Nam *labia*
 Malac. *sacerdotis custodiunt scientiam, quia Angelus Domini exercituum est.* Amicabilia sunt, exhortatoria sunt, ne Dominus & amicus obliuiscatur, casum grauiorem de excelso, quàm de imo. Certè sollicitudo amicalis frequenter tangit me inquirere de omni statu vestro, tam de interiori quàm de exteriori : & gratias ago Deo meo, quia non nisi bona nuntiantur, non nisi honesta, non nisi ordini & officio ve-

stro congrua. Oro vt qui cœpit ipse perficiat. Magister Crispinus de vobis me lætificauit, referens vnde gauderem & Deo gratias agerem. Clericus & amicus noster est: æquè desiderat esse & vester. Ecce Parisius ad scholas vadit, sed & vbique nomen vestrum super se inuocari postulat. Vtile equidem est tanto homini, qui tanta omnium sollicitudine penè continuè vexatur, quòd sui corporis necessaria & salubria postponens, ad intemperiem corporalem sæpè delabatur. Rogo pro ipso, & cum ipso, quatinus gratiam non qualem qualem inueniat in oculis vestris, sed bonam, sed confertam, sed superagitatam & supereffluentem. Dico autem gratiam, nō pecuniam. Hæc enim iuxta Apostolum operanti reddatur secundum meritum. Præ cæteris hoc vnum ad præsens postulat, vt de manu vestra primitias clericatus, idest coronam accipiat. Hoc etenim signo accepto, magis se obligatum erga obsequium vestrum non immeritò deinceps arbitrabitur, & vos tanquam plantæ vestræ bonum iure prouidebitis. Credo per Dei gratiam quòd alter de altero gaudebit, & Deo cooperante fructum salutis faciet. Diu siquidem laboraui, & monitis induxi, vt iugum in area Domini traheret, & glebas post ipsum confringeret. Vale, & de reditu vestro cum potueritis nos certificate.

EPIST. XVII.

*Londenſi Archiepiſcopo, Petrus abbas
ſancti Remigij.*

129.

DE duobus oculis meis, alterum ad me retineo, alterum frequenter ad vos, pater & domine carissime, retorqueo. Qui meus mihi remanet, quid in me videt? Certè plura, quibus condolet, quibus illacrymatur, quibus vsque ad nimiam suffusionem turbatur. Certè reptilia, quorum non est numerus: certè gentem illam nefariam, quam Ezechiel vidit depictam in pariete domus, quam iubente domino effoderat. Ad vltimum, quædam ineffabilia non profunditate mysterij, sed enormitate corrupti animi. Sed quando ista cernit oculus? Quando incuruatur ad suas fæces reuoluendas, quando lucernam accendit & euertit domum quærens drachmam perditam, quando scissuras in muris Hierusalem & ruinas respicit, si fortè cum Zorobabel & Esdra reparare licitum sit. Occurrunt vestigia erucæ, locustæ, bruchi, rubiginis, quæ deuorauerunt vniuersa speciosa deserti, pilosi, onocentauri, vlulæ, simiæ, & omnis generis phātaſmatum grandis sylua. Si quando autem idem oculus sursum palpebras erexerit, & cælum aspexerit, videt Dominum innixum scilæ, vocantem & expectantem malè soporatum, & dicentem, *surge qui dormis, & exurge a mortuis, &, Lazare veni foras, &, adolescens tibi*

Ephes.

v. 14.

Ioan.

xi. 43.

Luc.

vii. 14.

dico surge, & puella surge. Porrigit quoque manum Petro naufraganti, occurrit in via Saulo spiranti minas & cædes in discipulos Domini: prodigo filio reuertenti, stolam, anulum & calciamenta restituit, conuiuium & vitulum immolat, & misericordiarum suarum syluam condensam fugientibus & ereptis de laqueis ferreis ad sese refouendum offert. Huiusmodi collyrio releuatur turbatus de seipso ad seipsum oculus. Iam illum conuenio oculum, qui de vobis amicabiliter sollicitus, lustrat vias nostras & studia ab adolescentia. Dic mihi, bone oculo, de amico nostro quod occurrit, quod sentis, quod intelligis. Non sine multa fatigatione, inquit, gesta eius recolo, quia aliquando vidi illum supra nubes ambulantem, & vsque in densissimam altitudinem euolantem. Quis gloriam illam, quis potestatem, quis dominationem, quis rerum omnium opulentiam, quis erogationes & donationes tam largas, tam innumeras enarrare sufficiat? Quis enauigationes, quis marina pericula, quis insidias magnorum latronum dicat? Tandem Lucifer ille, qui mane oriebatur, qui inter astra Dei solium gloriæ & Archiepiscopatus tenuerat, non sicut fulgur de cælo cecidit, sed sicut filius hominis semetipsum exinaniuit, formam pauperis assumpsit, principis mundi exuias reiecit, vt si Laban Iacob insecutus fuerit, idola sua apud illum non inueniat, & cum Domino, saltem cum beato Martino dicat, Nihil in me reperies, inimice. Ecce sic humiliatus in Clara-

310 PETRI ABB. CELLENSIS
valle spicas recolligit post terga metentium,
non glorians de labore, sed se humilians de
impossibilitate. Voluntate quidem currit, &
caritate cum prioribus & iuuenibus, sed æta-
te & infirmitate sortem habet cum nouissi-
mis, ut sit nouissimus vocatione, primus re-
muneratione: quia apud patrem familias, cu-
ius vniuersæ viæ misericordia & veritas, non
est potior remuneratione qui prior tempore,
sed prior denarij acceptione, qui posterior
labore & tempore. An non ita est? Planè hoc
probat veritas, quæ prius latronem de cruce
transtulit in paradysum, quàm principem
Apostolorum Petrum, cui tamen dederat
claves regni cœlorum. Pietatis est, parum de
meritis præsumentem suscipere: securū verò,
si necesse sit differre, & citius trepidantem à
timore excutere, quàm iam subarratum ad-
mittere. Ecce, pater amantissime, ut credo,
non me fefellit oculus meus. Hæc enim
eadem præter illum multi alij de te mihi di-
xerunt. Sit itaque pax cum spiritu tuo, sit ani-
ma tua cum Deo meo. Sit melior finis ora-
tionis, quàm principium; quia omnis laus in
fine canitur. Totus sum vester.

EPIST. XVIII.

*Petro Cardinali sancti Chrysogoni, Petrus
abbas sancti Remigij.*

Raro meus sū, cuius ergo? fortè Apollo? 13
fortè Pauli? fortè Cephæ? Vtinā! Nā bonam habent mentem, mansuetā & fructuosam disciplinam, donatium denique præcipuum, & perpetuum. Diuersorum autem subsellia & iniquam tyrānidem frequenter experior. Vtique Roboam, qui cædit scorpionibus: Pharaonis, qui affligit in luto & latere: Nabuchodonosor, qui potat vrinam pecudum suorum, quos sub iugo carnis, ventris, & gulæ inescauerat. Denique in captiuitate mea, & vniuersa vanitate sub sole, concaptiuam habeo puellam, nobilissimā ortam natalibus, videlicet pudicitiam. Huius me iniuriōsa damnatio illorum, quorum carnes sunt vt carnes asinorum, non minus aggrauat, quā propria miseria. Volui siquidem cum illa fædus amicitiae inire ab incunte ætate, propter decorem suum, & genus illustrissimum, nec non & pacatissimum atque honestissimum contubernium. Cū itaque chaos siue cohors spurcissimorum hominum, tanquam porci pretiosissimam margaritam de cælo lapsam pedibus suis conculcent, quæ pax oīsibus meis? quæ requies animæ meæ? Clamo, nolite, nolite: sed non est vox, neque sensus. Quinimmo apponunt iniquitatem super

V iij

iniquitatem, vt cum pudicitia obruant religionem. Hinc nulla parcentes miseratione oculos eruunt, conuertendo ad vanitates & insanias falsas: nasum præcidunt, discretio- nis temperantiam euertentes: aures obstruunt, obedientiam non tenentes: labia concidunt, turpiloquio & scurrilitatibus adsuescentes: linguam decapulant, malum redarguentes & mendacium semper loquentes: manus ligant, eleemosynam non dantes, sanguini & avaritiæ insistentes, pedes in neruo ponentes, Christum in carcere non visitantes. Quid amplius? neruos detrahunt religioni effem- nati, qui sanctorum patrum abstinentiam, vi- giliis, psalmodiam, silentium, regularem di- sciplinam, claustralem remotionem à sæcu- laribus negotiis dissipant & vilipendunt. For- tè dicitis, quid ad me? Certè vestra interest, & certè officij vestri est, certè debito tenemi- ni, pro posse vestro districta censura his oc- currere iniuriis, his aurem benignam accom- modare clamoribus, has dirimere quæstiones, & amputatis Dagon brachiis & capite, ar- cam Dei restituere Bethsamitis. An habetis iudicare causas pecuniarias, & non diuinas? Quis vos misit? Ad quid vos destinauit Do- minus Deus per vicarium suum Dominum Apostolicum? Ad quid? Vt solueretis asi- nam, id est religionem alligatam & pul- lum cum ea, id est, pudicitiam. *Dicite, in- quit, quia Dominus his opus habet.* Sedet enim super vtrumque, qui sedet super Che- rubin. Non negligatis dominicum præce-

Matt.
xxi. 3.

ptum, immo non extinguatis in vobis spiritum Moyfi, de quo dictum est, *auferam de spiritu tuo, & dabo septuaginta senioribus*, de quibus & cum quibus vnum vos constituit gratia sua Deus. Quis autem est spiritus Moyfi? Spiritus iniquitatem non sustinens, spiritus occidens iniuriam facientem, & vindicans patientem, spiritus defendens septem puellas filias Iethro sacerdotis madiam. Spiritus principem Ægypti decem plagis feriens, & tandem in mare demergens. Diu detineo vos, quia non possum ore proprio, saltem scripto. Dulce namque mihi super mel & fauum, vos alloqui, & vobiscum fauellare. Huius tamen causa & materia est Magister Crispinus, clericus noster, immo & vester: nam populus meus, populus tuus, amice & domine carissime. Commendo itaque vobis eum, tanquam viscera mea, quia vidi honestam conuersationem eius, & procliuem ad meliora & viciniore salutem. Noui vos, quia talium familiaritatem non respuitis. Habeat itaque vos Dominum, & signo clericatus à vobis suscepto, patronum & auctorem huius ordinis habeat.

Num.
 xi. 17.

EPIST. XIX.

*Petrus Abbas sancti Remigij monacho
de sancto Bertino.*

131. **S**ermones nostros, quos tanquam plumas
sinutiles & superfluas quatuor venti cæli
per diuersa proiecerunt, habere desideras. Si
legisti, nonne ex sanguine sensib. sententiarum
& enerues tenuitate verborum inuenisti? Si
non vidisti, quis persuasit tantopere te quære-
re, quos inuentos statim habeas respuere? Cu-
riositas, an studij assiduitas te vrgent, vilissimi
hominis herbas & cortices insipidos mendi-
care, cum sedeas ad mensas diuitis Augustini,
benigni Gregorij, pecuniosi Hieronymi, glo-
riosi Ambrosij, Bedæ omnium monetarum
nummosi, profundissimi tanquam maris ma-
gni Hilarij, suauissimi eloquij Origenis, &
aliorum innumerabilium, quorum nec micæ
sub mensa dignus sum colligere? Si noua pla-
cent, ecce magistri Hugonis, ecce S. Bernar-
di, ecce magistri Gilleberti, & magistri Petri
scripta, in quibus nec rosæ, nec lilia desunt.
Nostra verò scripta nec de profundo hauriūt,
nec de alto propinant: quia verba nostra sunt
arentia, fortè & sterilia. Intentione tamen hac
frequenter admouitabellis stylum, quatinus
vigiliis solēnitatum saltem media hora occu-
parem me contemplationi sequentium gau-
diorum, & subtraherem me à tumultibus me
opprimantium iugiter sēculariū sollicitudinū.

Idcirco imperfectos inuenies multos de sermonibus nostris, quia post horā aliquādo negligētia mea, aliquando occupatione ingrata, conceptū fœtum parturiebā infectum & imperfectū, nec saltem sicut vrsa lambendo promouebam postea ad plenum partum. Ecce hoc erit tibi signum, si quando in manus tuas venerint, qui nostri sunt, si imperfecti, si squallidi, si rusticani, si malè amicti prodierint. Tamen da veniam, quia pudibundi non se ingerunt, sed compulsi vix publicum faciunt.

EPIST. XX.

*Priori Cantuariensi, & ceteris fratribus, Petrus
Abbas sancti Remigij.*

BEata occasio, qua vobis admoneor scribere. Miserum certè me iudico de inertia, quæ detinet senectutem meam à visitatione quondam amici, nunc Domini, patris & patroni nostri sancti Thomæ pretiosi martyris Dei. Hinc arguit me conscientia, inde excusat. Si viueret in corpore Archiepiscopus Thomas, nonne, inquit cōscientia, ires & visitares illū? nonne & marina pericula postponeres, & omnem à te torporem excuterēs, vt amicum visitares, & mutua cōferres colloquia? E contra iterum talia refert, Sed monachus es, sed Abbas, sed senex, sed corpore inualidus. Monachi est, non egredi de castris Domini, immo de claustris monasterij: Abbat is est, procurare curæ suæ tēporalē & regularem sollicitudinē: senis est, inniti baculo suo

132.

sub oliua & ficu & vite sua, & cogitare dies antiquos & annos æternos in mente habere.

Rom. VII. 24. Inualidi est, conuerti in ærumna sua, dum confringitur spina, & dicere quotidie, *Quis me liberabit de corpore mortis huius? Gratia Desper Iesum Christum.* His cogitationibus disputatione sua sic me accusantibus & excusantibus, interponit se statera æquiratis mediam, sicque litem resoluit, vt neutra de conclusione erubescat; sed pace bona alteri cedat altera. Pium namque est ire, pium non ire. bona est peregrinatio, quam comitata fuerit sancta deuotio: religiosa nihilominus detentio, cui assidue adest pia commemoratio, & eo intentio flagrantior, quo suo non satiatur desiderio. Vtinam sic me deferret angelus ad sancti sepulcrum, sicut Abacuc transtulit ad lacum leonum, non vt deferrem Danieli refectio- nem, sed vt referrem peccatorum remissio- nem. Constituo autē interim absentia nostræ vicarium magistrum G. quem ad se vocauit D. Archiepiscopus Cantuariēsis. Commendo itaque vobis commendabilem amicum & clericum nostrum eundem G. qui sentit in se viscera dilectionis, misericordiæ, & pietatis, quæ ad nos habetis, non pro merito nostro, sed pro gratuito beneplacito vestro. Certè si primam familiaritatis vestræ portam aperueritis ei gratia nostri, credo quòd ex prælibatione auida subsequetur fames, & continuo dicetis, Iam nō propter tuam loquelam illum diligimus, ipsi enim cognoscimus, & scimus quia dignus est amicitia & contubernio bo-

norum. Excipite itaque illum tanquam honestum clericum & bene litteratum, vt apud vos possideam hunc ramusculum, successionem illius magnæ arboris, quæ transplantata est in Ecclesia Carnotensi. Fuit enim noster alumnus magister Ioannes : & iste. vtinam similiter!

EPIST. XXI.

R. Cantuariensi Archiepiscopo Petrus S. Remigij.

Maximum argumentum est honestatis & religionis, ad se vocare, & iuxta se statuere alumnos & cultores bonæ conuersationis. Probata namque virtus consimili gaudet reclinatorio, vires quotidianis resumens incrementis, non solum de natiuo germine, sed & de vterina propagine. Inde est, pater sancte, quod ad commendationem non modicam vestri nominis Magistrum G. aduocatis, & mundanis destitutum copiis in spe bona sub alis vestris, vt audiuius, nidificare compellitis. Nouimus eum non transitoria aut aduentitia familiaritate, sed longa & diuturna vicinitate, ac beneficiorum nostrorum communicatione. Vtinam suffecisset ei nostra paupertas, nec amouisset illum à nobis tam patriæ amicitia, quàm vestræ largitatis fiducia! Raros ei similes penes nos habemus, quos sic ornet doctrina, quàm vita. Dignus est latere sacerdotali, qui sua non inquinat vestimenta, qui sæcularia lenocinia postponit pro vera

133.

philosophia. Cum granis siquidem philosophiæ etiam quiesquilias retinet, amans sententias, nec verba respuens, legens codices & corrigens mores. Excipite pauperem, & facite diuitem. Imitetur manus vestra mundi fabricatorem; qui in creatione terræ, prius inanem & informem, fecundauit tam multipliciter, & formauit tam mirabiliter, vt fœtus sint innumerabiles, formæ incomparabiles. Sanctissimæ memoriæ prædecessor vester, Archiepiscopus Theobaldus, de gremio & sinu nostro Magistrum Ioannem Carnotensem Episcopum inopem & pauperem suscepit, sed Deo iuuante vsque ad nomen magnorum qui sunt in terra fomentis suis prouexit. Mortuus quidem est ille Archiepiscopus corpore, sed adhuc viuut in propagine, & durat in illo adhuc suauissimum memoriale. Sicut successistis ei, & sancto Thomæ in Episcopatum, sic in isto magistro G. succedat amplissimum vestrum beneficium. Valeant ei preces nostræ, quia etsi ignotissimus vobis facie, non tamen, si oportunitas se præberet, obsequio, & interim bona voluntate.

EPIST. XXII.

Ioanni Episcopo Carnotensi, Petrus S. Remigij.

134.

IN biuio dubietatis positus, vtrum conquire de me ipso ad amicum, an de amico ad amicum, vix discernere possum. Sed si vtrumque facio, alterum non omitto. Nam quia

vtrumque culpabilem inuenio, neutrum excuso. Me Abbatem, te Episcopū quis ignorat? Haftenus vnicè amicos fuisse quis dubitat? huius rei testis est aceruus epistolarū, marina pericula non timentium, cū familiarissimo recurſu & brachiali complexu nostra quōdam se se reuiſitabat amicitia. Vndè autem obtupuit, immo elanguit cōmunis ſtylus, non iam quadridianus ſtertens, immo annuali elapſu deficiens? Certè ſi Episcopaliū ſollicitudinum allegationes negligentiam iſtam excipiunt, meam æquè conſimili ratione defendūt. Eſto. Nullum fuit tempus vacuum vel veniendi, vel ſcribendi. nunquid amandi? nunquid recordandi? procul dubio quamlibet excuſationem poteſt habere omnis actio, nullam dilectio. Si dormis, dilectio non dormit. Vnde, *Ego dormio* Cant.
& cor meum vigilat. v. 2. Quibuſcunque tenearis occupationibus & neceſſitatibus, non impeditur, non compeditur vera dilectio. Vbi es vera dilectio? Certè pallio tuo hiacynthino multi ſe operiunt, ſicut falſi prophetæ, qui in veſtimentis ouium veniūt, intrinſecus autem ſunt lupi rapaces, vel amici rapaces. Nolo, nolo me vel te eſſe de illis, qui magnificant ſimbrias fictæ amicitia, profitentes & promittentes inopinabilia & incredibilia, digito autem ſuo nec quæque modica tangentes. De hoc amicorum genere vel grege nunquam te expertus ſum, nec tu me. Tardiùs enim os in promittendo moueo, quàm cor in diligendo. Vrget autem me ſuis ſtimulis hæc, de qua loquor, dilectio, redarguere

320 PETRI ABB. CEL. EPIST. LIB VII.
non superbè, neque fictè, quæ de amico audio.
Siquidem propter antiquam nostram amicitiam, qui habent aduersus Episcopum Carnotensem querelam, abbatē S. Remigij conueniunt, & quasi magistrum & iudicem proponunt. Hæc & hæc, inquit, facit Episcopus, sic loquitur, sic mouetur, sic mutabilis est in promissis, sic instabilis in verbis & consiliis suis, sic ingratus beneficiis, sic ad iram facilis, sic improuidus in disponendis iudiciis, sic totus pendet de volūtate & consilio vnus hominis, minus prudentis & multum cupidi. Ecce capitula quæ obiiiciunt Episcopo. Quid autem, o amice, respondes ad ea quæ tibi obiiiciuntur ab his? Si talis es, in alium virum mutatus es. Non te talem noueram, non didiceram, non prædicaueram. Archiepiscopus noster, vir discretissimus, & qui morum scrutator & cognitor est perspicacissimus, discipulum S. Thomæ aliter informatum, aliter institutum fide oculata ex diuturna cohabitatione acceperat. Absit, absit à me ista credere, sed rationes vellem habere, quibus vanitates istas & insanias falsas possem refellere. Ecce per amantissimum nostrum abbatem sanctorum Crispini & Crispiniani rescribite, & remandate tam de his, quæ ex parte nostra dicturus est vobis, quàm de his quæ scribo.

PETRI



PETRI ABBATIS

S. REMIGII

EPISTOLARVM

LIBER VIII.

EPISTOLA I.

*Esq̃ilo Londensi quondam Archiepiscopo,
Petrus Abbas S. Remigij.*

Requēs corporis molestia hor-
tatur cogitare de patria, vbi nul-
la est tristitia. quanto enim ista
infelicioꝝ quam patimur, tanto
illa felicioꝝ quā speramus. Vti-
nam iam littus eius attingeremus ! utinam
fluctus istius euaderemus ! Circumferimur,
periclitamur, naufragia experimur, & exire
dissimulamus ? quis non optat portum, ne in-
currat naufragium ? quis non præcidit hære-
tis in salo nauiculæ funem, ne sentiat tempesta-
tem ? quis negligit patriam, & amat exilium ?
quis fugit patrem, & sequitur hostem ? Gau-
deo quia iam tenetis portum, & sedetis ad

135.

X

portam sanctæ ciuitatis, cuius participatio in
 idipsum. Vacillat quidem adhuc nauicula no-
 stra, sed spero & expecto solatium vestrum,
 cuius per integram amicitiam possideo totum
 animum. Adiuro vos, si inueneritis dilectum,
 immo si veneritis ad eius cubiculum, nuncie-
 tis ei quia amore langueo. Credite mihi, si ve-
 nirem ad porticum Salomonis, ne dicam ad
 sanctuarium Saluatoris, loquerer pro amico,
 postularem pro domino meo, pronunciarem
 in auribus Domini Sabaoth, & quæ mihi, &
 quæ per me pauperib. fecistis. Appellare pium,
 compellerè iustum dicens, *Memor esto verbi tui*
seruo tuo. Est enim verbum tuum, *quod uni ex*
minimis meis fecistis, mihi fecistis. Ecce substantia
 domini mei Londensis quondam Archiepis-
 copi, nunc pauperis Clareuallensis, per manus
 pauperum tuorum apud te est. Repende ergo
 ei vicem, & da ei substantiam tuam, qui tibi
 dedit suam, tamen quam tu dederas, quam à
 te acceperat. Amantissime pater, non dormit,
 neque dormitat in recordatione vestra cor
 meum. Clamat, pulsat, statque ad fores no-
 stras, quando inquires videbo quem desiderat
 anima mea? quando veniam & videbo illum?
 Via longa est, pedes vix mouentur, renes con-
 gelantur, & quomodo longè positus amicis
 videbitur? Quærendum est ergo remedium,
 ubi primum deest solatium. Pergere nequeo,
 scribere saltè valeo. Cernere non potest ocu-
 lus, alloquatur stylus. Currat in membranis
 littera, quia in membris suis retardatur cor-
 poralis præsentia. Referat charta quod non

Psal.

cxviii.

49.

Matt.

xxv. 40

potest lingua. Suppleat imago mortua, quod non valet viua & vera. Syllabæ fortunam nostram nuncient, quia eloquia oris nequeunt: desidero vos videre. Pax Christi & gratia Dei vobiscum semper. Saluto Capellanos, & Priorem, domnum Gaucherium, & domnum Autifiodorensem Episcopum, & Philippum, & omnes amicos nostros. Valete.

EPIST. II.

Auinionensi Episcopo, Petrus Abbas S. Remigij.

Virtutis propago ramos gratiæ suæ semper pullulans, in Ecclesia Christi beneficio suo rigat nouellas, sicut antiquas Paradisi plantationes, quando in decessu religiosi prælati bonus nihilominus & honestus substituitur. Sic ignis in altari perpetuatur: sic in sabbato panes propositionis renouantur: sic pro patribus filij Ecclesiæ nascuntur: sic denique vectes in arca semper circumferenda infiguntur. Prædecessoris vestri gratiam, ut decet, firmiter teneamus: qui tanquam pius pastor & pater, fratres nostros, & quod in Episcopatu vestro habemus, dum vixit, seruauit, & pro posse ab infestatione defendit. Oramus ut spiritus eius duplex fiat in vobis: quatinus nec farina regimini, nec oleum mansuetudinis in lecytho deficiat. Habetis fidelem in cælo remuneratorem beatum Remigium, cuius oues sumus, & si necesse & oportunum fuerit, tam de lacte, quàm de lanis nostris, ad vsum vestrum mutuare poteritis. Mittimus itaque

324 PETRI ABB. CEILENSIS
iuuenem istum ætate, sed moribus, vt experti
sumus, maturum ad partes vestras, cui tradi-
dimus & committimus Prioratum nostrum
cum his quæ ad nos pertinent in prouincia. Vt
ergo sub alis vestris ipsum excipiat & fouea-
tis, rogamus & obsecramus.

EPIST. III.

Petrus Abbas S. Remigij, R. Canonico Meritona.

137. **A** Dipe & pinguedine spiritali refertas ex
parte tua recepi litteras, quibus cibatis
& potatis, saluo quadagesimali ieiunio, factū
est in ore meo tanquam mel dulce, & medullæ
repletæ sunt vberima exultatione. De vase
siquidem bono & optimo eructauit stylus tuus
verba bona, verba consolatoria, quæ me à di-
luuio aquarum multarum ad arcam Noe, qui
interpretatur requies, prouocant, & de clau-
strali disciplina non solum cogitare, sed &
scribere exorant. Promptum me & facilem
nostis in omni obedientia, sed vinctum & oc-
cupatum laboriosa sarcina: cui noua alluui-
o accreuit & accessit renum grauissima in-
firmitas. Non credas quòd de solito luti &
lateris penso aliquid imminuerit vrgentissima
principis tenebrarum harum exactio. Com-
ponit quotidie strues lignorum, in negotiis,
addit paleas, & stipulam siccam in nugis &
vanis discursionibus. Vexatus denique plagis
variis orationum, psalmodiarum, sanctarum
meditationū, elemosynarū, magis ac magis

cor eius induratur, negans licentiam in deserto abeundi & immolandi Deo sacrificium iustitiæ & innocentiae. quomodo itaque in manibus ferreis detentus, & supra modum fame lectionis & otij exinanitus, speciosa deserti dinumerare, & claustralem disciplinam possum funiculo prophetico dimetiri? Non potuit Iosue filiis Israel terram promissionis sorte diuidere, donec terra quieuit à praeliis. Vtinam veniret sabbatum delicatum! utinam pax requiesceret in cubili nostro! utinam iubileus annus celebraretur! ut sic rediret cor ad possessionem suam, & seruus peccati corpus mortale ad libertatem suam. Interim tamen claustralis disciplina non atramento, sed exercitio cōpingatur: quia is qui sub lege est non moysi, sed Augustini, aut beati Benedicti, si praecepta seruauerit, praeemia habebit. Compendiosè & succinctè claustralem disciplinam vno illo verbo complector, quo Pharaon vsus est ad Ioseph: *Ego, inquit, sum Pharaon, absque tuo imperio Gen. non mouebit quisquā manum aut pedem in omni terra Aegypti. Sanctissima & æquissima disciplina in claustro, ut nihil agatur, nihil dicatur, nihil habeatur, nisi cum Abbatis licentia: ut nec oculus egrediatur constituta, nec manus moueatur ad illicita, nec pes currat ad prohibita. His neruis corpus religionis compactum immobile stat, fundamentum habemus, prae-ter quod nulla firma est religio.* XLI. 44.

EPIST. IV.

Carnotensi Episcopo, Petrus S. Remigij.

138.

SI quando in mente cōstantis hominis priora mutantur vota seu proposita, considerandum est, vtrum hoc fiat leuitate, aut necessitate, aut superueniente affectione. Si leuitate, inconstantia: si necessitate, fortuna: si affectione, ratio pensanda est. Si enim vitiosa est affectio, improbitas est: si iusta, virtus, & est admittenda. Causa verò, vnde oritur affectio, forte inter bonam & malam diuidit, & nomen imponit. Bona excusat voti mutabilitatem: mala accusat inconstantiam. Non enim ab inchoatis recedendum est sine ratione, quæ inchoata sunt cum ratione. Alioquin non est in illo est, sed est & non in illo est: & de illo dicitur, quia *stultus vt luna mutatur*. Ne autem sim oneri occupatissimis auribus Carnotensis Episcopi, negotium breuiter & apertè exponam. Postulatio nostra apud vos pro Hugone cognato & amico nostro Remensi Canonico, ante fores vestras obseratas æstatē & hyemem fecit, & valde lassata & ieiuna ad sinum nostrum reuersa est, & ecce occurrit carissimus amicus & cognatus ampliori affectione suscipiendus in eadē postulatione G. Archidiaconus vester, qui vobis de latere & Ecclesiæ vestræ magis paratus est seruire. Cedit itaque ille, si iste successerit: immo vt iste succedat, cedo & ego in priori petitione, si ex-

Eccli.
xxvii.
12.

auditus fuero in secunda, quin potius vt fiat, & citius fiat secunda: ne fortè steriles anni renuntient mihi defectum imbris matutini & serotini; & desperans de messione cessẽm deinceps arare, seu aliquid à vobis petere. Valete.

EPIST. 7.

Episcopo Carnotensi, Petrus Abbas S. Reuigij.

Facile est amicorum erratibus ignoscere, qui contingunt casu, non deliberatione. 139.
Casuales quoque excessus facile corrigit, qui occupatione, non cõtemptu, delinquit. Amicum nostrum & vestrum, Abbatem sanctorum Crispini & Crispiniani, aliter quàm decuit exceperitis. In hoc circũspectio vestra oberrauit. Sed hoc debitum cum satisfactione dimittetur, cùm ad nos veneritis & culpam recognoueritis. Iam quoque nubeculam istam amouit à facie nostra relatio Alexandri amici vestri, qua de statu vestro lætificauit nos. Solet enim verum dicere. Prosperum itaque & felicem statum in his quæ erga vos sunt asseruit, & ambages circumuolantes à corde nostro abegit. Non difficile credo quod multum desidero. Verbis igitur illius credo, & valde cõgandeo. Nam à me nihil alienũ æstimo, quicquid de vobis sensero. Radix enim longæua pruina subita non arescit, neque marcessit. De his hætenus.

X iiij

EPIST. VI.

*Amico suo carissimo B. Canonico, Petrus
Abbas sancti Remigij.*

140. **V**Num quaternum iam impleueram de disciplina claustrī, & mittere per præsens-
tium latorem plurimum festinabam. Sed dis-
suasum est ab amicis, ne opus imperfectum
amico mitterem, propter rapaces curiosorum
manus & oculos. Nam si viderent, aut abiice-
rent, aut retinerent. Si abiicerent, fortè con-
culcarent. Si conculcarent, nullum delectum
habentes inter vtile & inutile peccarent. Si
retinerent, aut legerent, aut scriberent, aut
negligerent. Si legerent, aut scriberent, sca-
brosum fortè lectionem & minus cōpositam
offendentes, imperitiæ & præsumptioni, non
festinationi imputarent: quatinus mihi meri-
tò illud prouerbium adscribatur, quo dicitur,
Onos lyras, id est, asinus ad lyram, aut rescribe-
rent, & nostra vitia perpetuarent. Si neglige-
rent, quantum ad illos in vanum laborassem,
& perisset opera & impensa. Quicunque igitur
fidelis nūtiū post paucissimos dies occur-
rerit, casibus fortuitis me committens, mit-
tam quæ ad petitionem tuam de disciplina
claustrī scripsi. Valete.

EPIST. VII.

*Priori & fratribus Grandimontis, Petrus humilis
abbas sancti Remigij manus orationis
& pretium.*

Q Vanto fragiliores sumus, & de nostris 141.
minus speramus viribus, tanto si sapi-
mus ardentius validiora & ampliora emendi-
camus suffragia. Væ enim soli, quia si cecide-
rit, non habet subleuantem se. Si autem fue-
rint duo, fouebuntur mutuò. Solum æstimo,
qui nec cum Deo in simplicitate & puritate
ambulat, nec fraternum currum inuincibili
societate & inseparabili vnitate equitat, Do-
mini & fratres carissimi, ego vir videns tam
paupertatem, quàm insufficientiam meam,
vbi audio cælestes pauperibus erogari dapes,
curro, pulso, quæro, & de reliquiarum micis
offellas quas possum expecto. Vestrum est,
vestrum est, panis oleati buccellas cum Petro
Apostolo, cum conuenitis ad cœnam agni,
sumere, sed & his qui non præparauerunt sibi,
partes mittere. Dies enim domini sanctus est,
solemnitas sancti Ioannis Baptiste, quan-
do ad matrem pulli gallinæ reuolant, & de
singulis locis vestris riuuli ad locum de quo
exierunt refluunt, vt de paterna instructione
& correctione reparato meatu copiosius &
fortius iterum fluant. Seruanda & tenenda est
hæc probabilis & sancta consuetudo: quia
non tantum ab homine & per hominem, sed

etiam à lege & Deo hæc approbata est institutio. Tribus enim vicibus iubet Dominus in lege, vt Hebræus appareat ante Dominum, non tamen vacuis manibus. Nunquam autem vanum aut vacuum est, sinus paternos, tanquam suæ professionis alumnos, relambere, & novos inde sibi sapes attrahere. Procul igitur odorans ipse ego tam iocundos & festiuos sanctitatis vestre concursus, prompto animo & vultu submisso, Amen pauper inclamo, & de orationum suffragiis subleuamen exoptulo. Hæc autem nostra postulatio non vsquequaque imbecillis, & carens sustentationis baculo, claudicans sanctum conuentium vestrum ingreditur: quia fratres vestros, qui nostris in partibus commorantur, diligimus & honoramus, & etiam cellam bonam in nostro habetis patrimonio. Hac ergo securus confidentia, vestrorum rogo societatem bonorum: & cum anima soluto corpore vias ignotas aggressa fuerit, conductum vestrum vsque ad meum iudicem deposco. Rescribite si placet, & quam misericordiam facere disponitis remandate. Valete.

EPIST. VIII.

*Alexandro summo Pontifici Petrus abbas
sancti Remigij.*

Apostolicæ fedis oraculum nec sine reuerentia penetrandum est, nec sine fiducia adeundum. Tibi itaque, Pater venerande, cui datæ sunt clauēs regni cælorum, non est data potestas sine indulgentia, nec iustitia absq. misericordia. Interpellet igitur, & inclinet ad petitionem nostram auctoritatem tuæ potestatis sobria indulgentia, temperet æquè rigorem iustitiæ pia misericordia. Intutum proinde est, thronum magni regis, qui est in sæculum sæculi, aliquatenus concutere: nec minus periculosum, lectulum Salomonis, propter ambientes gladios versatiles, citrà decubantis placitum, qui dormit ut catulus leonis, excitare. Sedentem & quiescentem Deum in sanctis quis audeat dubitare? De numero & sorte istorum, teste sancta conuersatione, confratrem nostrum dilectissimum Clareuallensem Abbatem fide occulta cernimus & credimus. Fortè electus est in Episcopum Tolosanæ ciuitatis. Ut autem verè religiosus, metiēs se sibi & insufficientiā suā metuens, repudiato connubio mauult disscalciari, & sputa cuiuslibet improperij in faciē cum Iesu excipere, quàm vitis, oliuæ, & ficus assumptæ professionis dulcedinem deserere. Nec in hoc vsus est reprehensibili leuitate, cū hoc faciat ex legis latoris auctoritate: Moyse utique, qui grandis

142.

factus negavit se esse filium filiæ Pharaonis, magis eligens affligi cum populo Dei, quàm temporalis peccati habere iocunditatem, maiores diuitias æstimans thesauro Ægyptiorum, impropriū Christi. Aspiciebat enim in remunerationem. Reputat etiam, quòd in lamentationibus legitur, quia *mutatus est color optimus, postquam dispersi sunt lapides sanctuarij in capite platearum*. Timet in se fieri eclipsim solis, si de statione Hebræorum transierit in castris eorum, quorum os locutum est vanitatem, & quorum pedes currūt ad malum. Citiùs enim inficit venenum, quàm curet antidotum: & fragilis natura difficiliùs reparatur, cùm facilè frangatur. Concedat igitur Apostolica licentia hominem istum in paradiso Clateuallensi operari cibum, qui non perit, & in sudore vultus sui panem suum manducare, quia nec vult vetitum tangere, nec tunicam pelliceam assumere. Fixit namque tentorium suum de pellibus Salomonis iuxta puteum viuentis & videntis, iuxta aceruum nouarum frugum, iuxta denique propitiatorium, intra sanctuarii velum, subter alas Cherubin sancti Benedicti & beati Bernardi. Supposuit quoque humerum arcæ fœderis Dei, in qua est virga crucis, quæ floruit in Apostolis, fronduit in regeneratis fidelium turbis, & nuces protulit in martyribus, confessoribus, atque virginibus: in qua duæ tabulæ testamenti, vna asperitatem legis continens, altera Euangelii mansuetudinem & gratiam conferens. Ad vltimum manna est ibi absconditum promissæ

Thren.
IV. I.

dulcedinis Dei, quam abscondit timentibus se, & dabit diligentibus se. Habitat in medio lapidum ignitorum: quorum contemplatione visus acuitur, torpor excutitur, vitalia nutriuntur, morticina reijciuntur, religio perpetuatur. O quàm dura, quàm amara separatio religiosi affectus, cui cedit carnalis necessitudo, cui supponitur delectatio, cui ambitio subternitur. Quàm infelix commutatio, vbi pro suavi odore recipitur fœtor, pro crispanti crine caluitium, pro fascia pectorali cilicium. Nequaquam est hæc commutatio dexteræ excelsi. Non igitur audiat auris Apostolica aduersus Mariam ad pedes Iesu sedentem, Martham conquerentem, quæ sollicita est circa frequens ministerium, nec gustauit poculum ex vino condito sanctæ contemplationis, & in lege Dei assiduæ meditationis.

EPIST. IX.

*Domino Alberto Cancellario, Petrus abbas
sancti Remigij.*

PRo aliis rogare cogimur, qui pro nobis 143.
vix exorare sufficimus. Nec tamen in postulatione hæsimus, quam commendat iustitia postulationis, conscientia postulantis, & pietas postulati. Iustitia est, suum ius unicuique seruare: conscientia bona est, dilecto Domino pro conseruo fidei humiliter supplicare: pietas paterna est, propositum etiam inflexibile anxiato filio benignè remittere,

Scimus, Domine amantissime, potestati Apostolicæ subesse quod mandare voluerit, & dicere huic, vade, & vadit, & alio veni, & venit, & seruo, fac hoc, & facit. Sed iūgatur curr⁹ potestatis, & pietatis, sublimitatis & māfuetudinis vt media sternatur caritas propter filias Ierusalē. Certè, vt credo, aut nullas filias in terris habet Ecclesia, quæ est mater nostra: aut in Clareuallensi cœnobio quotidie parturit, & maternis vberibus alit matrifiantes filias. Si quidem Iesu Christi de virgine nati, in mundo religiosè conuersati, in cruce sub Pontio Pilato affixi, vera vestigia vestri Clareuallenses sequuntur, castè viuendo, patri spirituali in omnibus obediendo, carnem suam cum vitiis & concupiscentiis quotidie crucifigendo. Si Deus pro his, quis contra illos? Ecce pulli isti sub alis gallinæ, quæ se contra miluos spiritualis nequitie opponit, lambunt sanguinem Dominicæ passionis, & dormiunt sub vmbra iuniperi, labores suos consolantes dilectione protectoris sui. Quanti itaque periculi sit excitare quiescentes sub hac ficu & vinea, non carnali, sed spirituali dulcedine, discernat discretissima moderatio Apostolica, & non auferat ab eis desiderabile oculorum suorum. An non sunt alij præter istum? immo super numerum multiplicati sunt qui dicunt, *Ecce ego, mitte me*, cum iste dicat. *A, a, Domine Deus nescio loqui, quia puer sum*. Fortè dicitis, Quid ad te de Clareuallensibus, cum Samaritani non contantur Iudæis, & nigra Æthiopissæ facies

Esa.
vi. 8.
Hier.
i. 6.

& vestis differat ab illa veste & facie, quæ apparuit Apostolis in transfiguratione Domini? Ad quod ego, Ex multarum facierum personis, regina quæ assistit à dextris filij, in vestitu deaurato circumdata varietate, cantat in psalterio decachordo ante sedentem in throno gratiæ, vnde procedunt diuersa charismata gratiarum, cum sit tamen vnus, atque idem spiritus, idem Dominus.

EPIST. X.

*Alexandro Papa Petrus abbas
sancti Remigij.*

SIcut à paternitate Domini nostri Remensis Vuillelmi in mandatis acceperamus, de causa terminanda, quæ vertitur inter Episcopum Sueffionensem, & Comitem Robertum, Sueffionis accessimus, & nobiscum Abbates sancti Crispini, sancti Ioannis, & vallis Serenæ. Ibi allegationibus vtriusque partis auditis, ab Episcopo productorum testium attestaciones scriptas recepimus. Deinde aliam diem Remis vtrique parti statuentes, iterum conuenimus: & post multa, quia dominus rex super hoc negotio litteras suas Episcopo direxerat, ex voluntate & consensu eorum diffinire causam distulimus, donec cognosceremus, an dominus rex controuersiam illā inter eos pacificaret. Postea verò nulla interpellatione interueniente, nec diem sibi dari Episcopo à

144.

nobis postulante, interdicto excommunicationis nobis inconsultis terram præfati Comitum Episcopus subiecit. Proinde Comitissa ex parte sua & Comitum cōquerens de hac iniuria, ut terram suam absolueremus à nobis exegit. Consilio itaque sapientum habito, accepta cautione à parte Comitum, quod si notum damnum, vel iniuriam Episcopo fecisset, plenè resarciret, terram absolvimus. Hanc igitur huius rei veritatem vobis mandamus & testamur.

EPIST. XI.

*Alexandro summo Pontifici, Petrus abbas
sancti Remigij.*

145.

Matt.

xvi. 18.

TOcius Christianitatis onus humeris Apostolicis impositum nō ignorat, qui Christum Principi Apostolorum dixisse non dubitat, *Tu es Petrus, & super hanc petram ædificabo Ecclesiam meam.* Necesse itaque est, ut Aaron, qui penetrauit cælos in sanguine suo, pontifex à Deo patre constitutus in æternum, & Vr, qui in igneis linguis super Apostolos descendit, tam manus, quàm humeros vestros auxilio suo subleuent, & ne deficient, sustentent. Iniquitas namque, quæ sedet super talentum plumbi, geminatis quin potius iunctis alis, Ecclesiam Dei & vestram, Dei, desponsatione, vestram, procuratione, usquequaque opprimit, tam in subditis, quàm in prælatis: adeo ut iam possit dici, Sicut populus, sic

sic sacerdos, sicut oues, sicut canes. Quid dicam, & quare dicam quod patet lippis & tonsoribus? Nonne clamor tanti mali, ne dicam furor, usque ad nubes ascendit? Et quis vos dubitat ista scire, cuius est non solum morbos discernere, sed etiam quæque morbosa secare aut sanare? Tamen, summe pastor, duo mala facit populus tuus. Descende & inuenies vitulum conflatilem, lasciuientem in vaccis populorum, & lingentem herbam usque ad radicem. In altero notatur luxuria, in altero auaritia. Olim hæc tenebrarum familia tenebant valles, iam iam occupant montes. Olim fradebant templum Veneris, sed iam polluant atria Virginis, quam pater desponsauit filio suo, & Paulus tanquam vniuiro virginem castam vult exhibere Christo. Olim denique regnabant in Babylonia, nunc in Hierosolyma. Ieremias lamentatur auaritiam sedere in capite omnium compitorum, ubi concurrunt in dandis honoribus Ecclesiasticis, aut carnalis affinitas, aut pecuniaria cupiditas. Dei quidem solius est ista amputare & tollere. Vestrum autem securim ad radicem ponere, & pro posse in sententia vigilum statuam istam confringere, & arborem succidere sollicitudine non pigra. Quomodo autem fiat istud, docebit vos, qui incerta & occulta sapientiae suae manifestauit Dauid puero suo, & omnia quæ audiuit à patre suo nota fecit suis Apostolis. Lator quoque praesentium fidelissimus vester, & rotius honestatis & bonæ famæ vir insinuabit.

Y

Pungenda tamen est gladio ancipiti luxuria, quæ non solum thalamos pudicitiae, sed etiam terminos totius verecundiae transgreditur: quatinus & si stimulus eius non confringitur, saltem retundatur, & si non sepelitur, saltem recondatur. Avaritiae duo cornua in Ecclesiasticis traiectionibus prorsus anathematizentur, in saecularibus rapinis vngulae ipsius aut eradicentur aut exsecentur. Spiritus Domini, qui omnia continens replet orbem terrarum, ori & cordi vestro semper adsit, & praecipue in hac secunda generali congregatione.

EPIST. XII.

Domino Papa Petrus abbas sancti Remigij.

146.

AD generale Cõcilium, pater venerande, cum cæteris Catholicæ Ecclesiæ filii citatus excusationem præfero, non friuolam de perfunctoriis Evangelicis aliquam, quibus ad cœnam inuitati se excusando accusant: sed manifestis documētis probabilem & veram. Prompta siquidem est in me ad omnem obedientiam deuotio: sed succumbit propter inuoletudinem languida executio. Inest voluntas, sed impedit infirmitas: spiritus quidem promptus est, caro autem infirma. Apud igitur paternam clementiam & æquissimam Apostolicæ discretionis censuram, ætas annosa, longa via, brevis vita, fessa membra, sint nostræ excusationis probabilia & necessaria

argumenta. Mauult habere filium absentem viuum quàm secum semimortuum, vel certè extinctum. Percussus sum, vt fœnum, quod iam exaruit, quod hodie est, & cras non in clibanum, sed in feretrum mittetur, & quomodo tanquam plaustrum onustum fœno prosequi potero ambulantes in equis, & volantes in pennis sanitatis & robustæ ætatis? Quid enim si præsens essem, nec interesse possem? Quid faceret facula fumibunda, inter astra lucentia? Parcite ergo in hoc nunc, sicut semper fecistis, nostras preces benignè suscipiendo, & efficaciter implendo.

EPIST. XIII.

*Alberto Cancellario, Petrus abbas
sancti Remigij.*

ARca Dei Israel, arca sanctificationis, arca fœderis, quondam ex præcepto legislatoris circumtexta ex omni parte auro, antiquorum patrū sanctitate & doctrina, quā etiā Cherubim glorię obūbrantia propitiatorium desuper tegebāt, nunc in præsentiarū, abusione & negligentia filiorum Heli, vestimentis glorię suę spoliata, atque infœcundis salicibus operta, & relicta, iuxta Isaïam, sicut tuguriū in cucumerario, & vmbraculum in vinea, recordatur dierum adolescentiæ suæ, & plorans atque in maxillis suis lacrymas reponens dicit, Reuertar ad virum meum priorem, quia mihi melius erat tunc magis,

Y ij

147.

340 PETRI ABB. CELLENSIS
quàm nunc. Boues calcitrantes, videlicet do-
ctores, à semitis iustitiæ per sua desideria aber-
rantes, declinant eam, cùm deberent glorifi-
care Deum, & portare in corpore suo. Verus
itaque dolor illos tangit, qui diligunt illam
non sermone & lingua, sed opere & veritate.
Non ignoramus vos vnum esse & specialem
amicum siue filium vniuersalis sanctæ Eccle-
siæ, cuius typum & figuram illa arca tenuit.
Ad luctum itaque & compassionem maternæ
angustiæ, siue desolationis, vos aduocamus, vt
quicquid affectualis deuotio exigit, maternis
impendatis doloribus. Secundum enim lo-
cum post Dominum Papam à Deo in his cor-
rigendis tenetis: sed caute, ne in vacuum gra-
tiam Dei acceperitis. Qui enim spiritum ve-
strum & sanctam conuersationem antè mul-
tis retro temporibus viderunt & cognoue-
runt, de meliorando statu Ecclesiæ spem
optimam conceperunt, cùm factum Cancel-
larium audierunt. Nisi verò vbique essent
notoria & vobis notissima, de his lātītīs scri-
beremus. Tamen ne clausis labiis potius sin-
gultiamus quàm loquamur, declarat charta
quod non silet vita. Dilatat infernus animam
suam absque vllō termino, dum immaniter
grassatur, tam in oues quàm in pastores. Qui
enim præuij constituti sunt ad cælum, malo
exemplo suos sequaces trahunt in infernum.
Non de omnibus dico. nouit enim Domi-
nus qui sunt eius. quo autem mercede me-
liori digni sunt boni, eo amplius increpa-
tione & correptione indigent mali. Isaias,

Heremias, Ezechiel sua prophetia nostra deprehenderunt tempora. Contrapastores namque, & peruersos rectores, nuda, sed & vera retorserunt iacula, auaritiam eorum, luxuriam, gulam, rapinam, & omnem iniustitiam non in angulis, sed in plateis declamantes. Ingrediatur itaque in ossibus & medullis vestris, & impleat spiritum & os vestrum spiritus illorum zelotypus, conterens montes & petras, & efficax vsque ad diuisionem animæ, & spiritus. Gladius vester deuoret carnes inebriatus in cœlo, quatinus emendatos remittatis nobis pastores nostros, & omnibus serpentinis exuiis spoliatos.

EPIST. XIV.

*Alberto R. E. Cancellario, Petrus abbas
sancti Remigij.*

EN auctoritatis Apostolicæ gallina grandiosa & foetosa cōgregat pullos suos obedientia & subiectione sub alas benignæ protectionis & discretæ consultationis, quid futura? quid paritura? quod scribatur in generatione altera, vt populus qui creabitur laudet Domini. Ecce Iacob senex & plenus dierum, qui diu luctatus est cum angelo schismatico, expectans salutare dei, conuocat filios ad benedictionem: nunquid taciturus quid Ruben fecerit, quod cubile patris ascenderit, & stratum eius maculauerit? quid Simeon & Leui, vasa iniquitatis bellantia non prædi-

148.

Y iij

cturus, aut constituturus, quid facere habeat posteritas futura? Grandis equidē apparatus Romani Cōcilij, grandes portendit secuturas nuptias filij regis Iesu Christi. Ministeriales & officiales huius sancti Cōcilii cum cæteris, immo præ cæteris Cardinalibus, non ignoro vos à Deo prædestinatos, quorum fidem, religionem, constantiam, & æquitatem in multis iam expertus est sponsus Ecclesiæ vnicus dominus noster. Adhuc habet opus, vt obsequium vestrum sit rationabile & acceptabile in hoc Consilio: vt accincti gladio vtrimque acuto super femur potentissimè putridas amputetis carnes, & insanas superstitiones, quæ sunt quotidie in orbe Christiano. Ramosa siquidem & syluosa quotidie pullulat apud nos malitia: securis autem Euangelicæ disciplinæ, fabro dormiente & negligente, pene vbique iacet retunsa. Rarus est, qui eam, vel hebetatam apponat ad radicem arboris. Vt exprimam quod sentio, quàm irrisoria subfannatio, quàm laboriosa & lacrymosa, ne dicam tædiosa, peregrinatio, quamque damnosa expensarum iactura, & bona bonorum consumptio, si cassa & sine fructu benedictionis redierit tam solemnibus magnorum virorum & religiosarum personarum congregatio? Caute ne dicatur, Parturient montes nascetur ridiculus mus. Inueniat igitur vos Iesus amicos veritatis, vt à porta vsque ad portam transeuntes, vituli conflatilis cultoribus non parcatis. Commendo vobis præsentium la-

tores, carissimos amicos & filios nostros, abbates sancti Petri de Montibus, & omnium sanctorum de Insula, & sanctæ Mariæ Virtuenfis, vt de gratia, quam habemus in vobis, gratiam inueniant in oculis vestris. Quam citius poteritis, cum gratia Domini Papæ, & vestra nobis, eos remittite.

EPIST. XV.

*Alberto Cancellario, Petrus abbas
sancti Remigij.*

Quotiens naufragia patimur, totiens ad portum festinamus. Portum autem tutissimi refugii in littore vestræ amicitiae iamdudum fiximus. Molestiarum quidem ventos frequenter contrarios sentimus: sed portum vestrum vsque ad grauiorem non infestamus tempestatē. Leuiores enim discrimina aut patientia tolerat, aut virtus fortiter superat. Cum autē nubes magna & ignis inuoluens nauiculam nostrā inuadit, statim aut est periclitandum, aut citò enauigandum. Hoc anno Dominus Papa, vestro interuentu, priuilegiū suum Ecclesiæ nostræ indulgit: in quo specialiter expressit Canonias, seu prebendas de Marsna, & quas in vsus proprios iā à multis retro temporibus retinemus, tenendas in perpetuū confirmauit. Quæ etenim quondā fuerūt Canonico-
rum prebendæ, à longissimis retro temporibus, donatione Episcoporum Leodiensium, & confirmatione Papæ Innocētii, in proprietatē trāsierūt,

Y iiij

& possessionem monasterij nostri. Nuper vero Dominus Papa rem, vt credimus, ignorans iam secūdò scripsit Præposito nostro de marina, vt daret præbendam cuidam clerico Imperatoris, cum nec præpositus dare possit, nec sit præbenda quæ dari possit. Insinuate ergo Domino nostro, ne velit panem filiorum tollere, & dare canibus, qui non cessant aduersum nos latrare, & bona nostra auferre. Alias enim dicere compellimur, *Ecce in pace amaritudo nostra amarissima*. Nam per Imperatorem tempore schismatis instantissimè id efficere plures conati sunt, sed minimè præualuerunt.

Esa.
xxxviii
17.

EPIST. XVI.

Alexandro Papa Petrus abbas sancti Remigij.

150. **C**VM vniuersitas Christianitatis, pater sanctissime, vestro regatur moderamine, & cura vestræ sollicitudinis ad plura distendatur, quàm sit stellarum numerus, vel arenæ maris, satis mirum est, si nunquam circunueniatur. Plures enim veniuntur in curia vestra subreptione, quàm famulentur fidei deuotione. Excipio sinceritatem sanctorum Cardinaliû, quorû fides satis nota est Deo & vobis. Aduenientiû redarguo fallacem simulationem, præcipuè Teutonicorû, quorum insidias & nos experti sumus, & vos viuo carbone tactus nō ignoratis. Hi nāque toto tēpore schismatis, cum expositos nos, & quasi sine defensore

calumniis & damnis pluribus afficerent, nunquam tamen in guerra obtinuerūt, quod modo in pace vestra & sanctæ Romanæ Ecclesiæ, nituntur ab Ecclesia nostra auferre. Dominū namque Imperatorem frequenter sollicitauerunt, vt de præbendis Marsnæ aliqua subripere possent: quas olim à multis retro temporibus, concessione Leodiēsiū episcoporum, & tam priuilegio piæ memoriæ prædecessoris vestri Innocētij, quàm vestro, confirmatas habemus. Mandastis Præposito nostro de Marsna, quatinus cuidam clerico Imperatoris præbendam quæ non est daret. Petit igitur conuentus noster prostratus pedibus vestris, reuocare mandatum, & vltius nullam recipere alicuius super hac re petitionem. Deuoti enim sunt filij vestri, & exinde deuotiores efficiuntur.

EPIST. XVII.

*Abbati sancti Crispini, Petrus Abbas
sancti Remigij.*

MIra veri amoris natura: ignea siquidem est, & tamē contra ignis naturam acrius feruet in amicis remotis, quàm sub oculis constitutis. Quæris quare? Quia sollicitudo ministra dilectionis quasi iacet, dum quod amat uidet: currit verò cum assiduo impetu mordens animum propter absentem amicum, vbi est, inquiens, quem diligit anima mea? Viuit ne? sospes ne est? est ne tristis, an lætus? est

346 PETRI ABB. CELLENSIS
ne timens, an securus? est ne de me sollicitus,
an ad se intentus? estne indigens, an copio-
sus? Hac fuscinula carbones suos amor mo-
uens, & commouens, auget flammam, calo-
rem multiplicat, medullam ossium liquefa-
cit, & post dilectum longa recte sollicitum
trahit animum. Trahit, inquam, fortius, dum
longius subtrahit. Sic Tobias pater & senex,
morantem filium suspirans gemit, accusans se
non potius excepisse pecuniæ damnum, quàm
pro ipsa misisse vel amisisse filium. Silenter &
suauiter dormit dilectio, cùm nullis euagatur
excursibus quærens de statu amici amicalis
sollicitudo. Experto credendum est. Duros,
immo acutos aculeos visceribus nostris infi-
git absentia vestri: quorum punctiones non
eram expertus, dum præsentem habere, dum
viderem, dum frequenter audirem. Præ ce-
teris vnum habeo non vobiscum, sed aduersus
vos, quòd intemperanter viuitis, nō exceden-
do mensuram iustam viuendi supra, sed infra.
Sententia enim quæ dicit, Ne quid nimis,
plus & minus redarguit. Amplius edere voraci-
tatis est, minus hypocrisis vel avaritiæ. Apo-
stolus scit abundare & penuriam pati. In om-
nibus instructus est ad regulam viuere, qui ne-
que ad ima curuatur, neque ad superiora di-
stenditur, sed recto cursu bene tenditur.

EPIST. XVIII.

Priori & conuentui sanctorum Crispini & Crispiniani, Petrus Abbas S. Remigij.

SI quod consilium, si quod solatium, si de-
nique consolatio vlla in me est, sine inui-
dia vobis communicare debeo : & tam in vo-
bis nouellas plantationes, quàm frugiferas ar-
bores qualicunque stillicidio nostrarum ex-
hortationum rigare desidero. Vicarios liqui-
dem affectus erga vos absentis dilecti & caris-
simi nobis Abbatis vestri viscerali sollicitu-
dine in eius recessu me excepisse reminiscor.
Visitare itaque vos affectuosa caritate in vo-
bis habeo : sed concurrentium causarum re-
tardat concatenatio, & ægra aeris & itineris
contemplatio. Suppleat littera, quod non va-
let præsentia. Vniuersitatem igitur vestram,
filij carissimi, alloquor, & in domino com-
moneo, ne quis de vobis vapor sinistri rumo-
ris erumpat, ne odor suauissimæ opinionis
excidat, ne districtio ordinis aliquatenus te-
pore aquilonari pereffluens euanescat. Fa-
ciliùs enim potestis seruare quod tenetis,
quam recuperare quod amiseritis, vel acqui-
rere quod nunquam possedistis. Præueniente
autem & præoperante Dei gratia, & adiu-
uante boni patris vestri sancto exemplo at-
que doctrina, cooperantibusque vestris stu-
diis, triplici, immo multiplici splendore su-
pernus radius intrinsecus & extrinsecus,

152.

348 PETRI ABB, CELLENSIS
 congregationem vestram illustravit religio-
 ne, opinione, & temporalium possessione.
 Hanc Isaac benedictionem dedit Iacob here-
 di suo. *Des, inquit, tibi Deus de rore cæli, & de pin-*
guedine terræ abundantiam. De rore cæli pullulat
 claustralis religio, & sanctitatis fragrans opti-
 mē suavis opinio. De pinguedine terræ fru-
 menti, vini, & olei exuberans fœcunda posses-
 sio. Hæc gratia gratos, non ingratos, Deo fa-
 ciat. Humilia, non inflata pectora, certē gratia
 inhabitat: aut fugat, aut fugit inflationem.
Æquat inæqualia, frangit excelsa, elata tollit,
 aspera emollit, fracta consolidat, ficta respuit,
 dispersa congregat, congregata conseruat,
 hominē ad Deum eleuat, Deum ad hominem
 inclinat. Hæc decurrit à throno gratiæ ad
 thronum sanctæ conscientiæ, & facit germi-
 nare fructus tricenos, sexagenos, & centenos.
 Hanc quamuis erogare vobis non possum, ta-
 men rogare possum. Hæc ergo vobiscum &
 in vobis sit semper. Amen. Orate pro Abbate
 vestro, & pro nobis. Fratrem Ioānem, cui cu-
 ra est de omnibus, specialiter commendo.

Gen.
 XXVII.
 28.

EPIST. XIX.

*Archiepiscopo Lundensi, Petrus Abbas
 sancti Remigij.*

153. **S**piracula virtutum & odoramenta, suauia
 sunt & perpetua. Nam nec longæuitate ve-
 terascunt, nec longinquitate odorem suum
 minuunt. Ecce vestra Dacia remota est à no-

stra Francia. Distant enim & moribus hominum, & consuetudinibus, sine situ terrarum: Sed virtus, siue hîc, siue illic, nec vultum mutat, nec habitum; nec fructum, nec vsum. Species illi vna & in Dacia & in Frâcia. Quorsum hæc? quid ad materiam præsentem attinet de insolubili & immobili vigore & decore virtutis scribere, cum sufficit grates referre vobis pro beneficiis fratri & amico nostro Fulconi Episcopo collatis, & quod obsequium suum tantus Dominus tam indigno monacho litteris suis porrexit? Sed peccatum reputo falsa dicere, nihilominus & vera tacere. Sicut enim improbus incenditur, aut inflatur, si falso laudetur: sic præditus naturali & gratuita bonitate humiliatur, & fortius ad meliora accenditur, cum ad se & ante se relatione, non adulatoria, sed vera reuocatur. Timec enim, ne non sit vel minus sit, quam dicitur. A multis retro annis, pater carissime, de vestra nobilitate & industria plura audiuius, & quod feruentissimo zelo quæ Dei sunt in vobis, & in aliis augmentare studeatis. Tenui fama hoc didiceram, sed cumulum veritatis & certitudinis adiecit carissimus noster & vester, Fulco Episcopus. Phinees vtinam tam apud vos, quàm apud nos resurgeret; & filij Matthiæ antiqua pro lege Dei bella renouarent, & sibi vsque ad animas non parceret. Feruentis illius spiritus stillicidium in vobis infundat Spiritus sanctus. Satis dictum sit sapienti. Pro his quæ aguntur in partibus vestris erga nepotes & amicos prædecessoris vestri, vtinam ea

mihi esset apud vos gratia & amicitia, quæ apud illum est; & sicut illi honore, sic dilectione succedatis. Valete.

EPIST. XX.

Archiepiscopo Londensi, Petrus Abbas S. Remigij.

154. **G**Ratias diuinæ agimus gratiæ de bono odore gratissimæ famæ vestræ; cuius tam copiosa redundat affluentia, ut cælos ascendat, & terras etiam finitimas suauiter respergat. Larga Dei manus de oleo cælestis promptuarij mensuram bonam, & confertam, & coagitatam, & supereffluentem dedit in sinum, immo in caput vestrum. De hoc itaque oleo & lampas propriæ conscientiæ decenter ornatur, & lucernæ totius prouinciæ vestræ sufficienter suffunduntur. Scio & pro certo habeo, quod nisi fundamentum subesset bonæ conscientiæ, non sic dilataretur, & continuaretur vapor tam lucidæ & præclaræ famæ. Germen antiquum predecessoris vestri non sub vna nocte aruit, sicut cucurbita Ionæ. requieuit spiritus Eliæ super Eliseum, utique Esquilij super Absalonem. Rigauit quod ipse plantauit: nec sufficit rigare, nisi adieceritis & noua plantare. Deus itaque incrementum dabit, nec erit vtriusque vestrum labor inanis, ubi superaddit gratiam manus superni remuneratoris. Nunquam enim Deus fraudat operarium suum digna mercede. Utique & piè iunat laborantem, & iustè remunerat operato-

rem. Vnde & suum est opus nihilominus & suum munus. Nequaquam igitur mentitur opus oliuæ, vbi cooperatur donum⁴ gratiæ. Non cesset itaque operatio, vbi restat certissima remuneratio. Denique, pater amantissime, carbones viuos & consolatorios instantissimè animo vestro suggerat, non solùm spes futurorum, sed etiam ipsa prælibatio, qua iam nunc memoria vestri traditur & commendatur orationibus fidelium & sanctorum virorum. Interim ne miramini, quòd ego ignotus & terra remotus iam secundo scribo vobis. Habetis amicos iuxta vos & notos, Fulconem quondam monachum nostrum, nunc Episcopum, qui multis persuasionibus pulsat me, & compellit vobis scribere. Præsentium quoque lator, qui vos vsque ad angelos Dei extollit.

EPIST. XXI.

Prænestino Episcopo, Petrus Abbas S. Remigij.

PLus molesta, quàm grata & iucunda occurrit materia, quotiens ad scribendum vnico & quondam collaterali amico Abbati sumitur charta. Renouatur namque dolor meus repentina, sed & vrgenti, & vrenti corrosionem animi, dum trāsmontana remotio intercurrit, & amicos diuidit aspectus, non tamen affectus. Accedit huic seuerissima desperatio corporalis incorporationis, cùm fortè instet citissima alterutrius solutio animæ & corporis. Bone nunc Domine, olim amice dulcissime, quem constitues vicariū, qui vices

tuas suppleat in nostris exequiis, in oculis claudēdis, extrema salutatione, & æterna conclusionē? De cuius manibus saluator suscipiet spiritum meum, cū tuas mundas manus ad hoc delegissem dudū officiosum obsequium? Alius vt video amicus officij in his est substituendus. Sed quare conqueror? quare gemo? quare vultum obnubilo? Dei enim ordinationi quis resistit? An fortē tulit Deus Heliam, vt Heliseus duplicem eius reciperet spiritum? Nonne Ioseph asportatio in Ægypto fratrum eius & totius successionis fuit saluatio? Nonne Iesus ante Apostolos cælum ascendit, vt spiritum mitteret, & mansiones præpararet? Ecce iuxta latus Apostolorum locus à Deo tibi datus est. Quid ergo? Pulsa, excita: insta oportunē importunē, donec & ros & stillicidia gratiæ de sanctis ossibus, immo interpellationibus eorum, aridam nostram infundat, qui gratiam Apostolatus & benedictionem singularem ad nostram eis salutem indulsit. Hoc munus si per te collatum fuerit, amissis præponderat, & vna clausula innumera beneficia coagulat. Domino Papæ de sua gratia ad vos gratias agite. Cæcellarium, Tusculanensem, Albanēsem, dominū Hyacinthū & Ostiensē sanctum virum, & si quos habemus alios amicos in curia, salutate.

EPIST.

EPIST. XXII.

*Dominis & amicis suis de Grandi monte, Petrus
Abbas sancti Remigii salutem.*

Religioso fraternitatis vestræ conuentui & sanctissimis orationibus saltem anniuersaria reuolutione nos commendamus. Videtur siquidem mihi meatus suos fluuius paradisi quasi ad sinum originale reuocare, cum de singulis partibus orbis ad diem beati Ioannis Baptiste solemnem contingit Priores vestros in vnum conuenire. Refluxus iste pretiosarum gemmarum arena ad vtilitatem negotiatorum spiritalium redundat, & si quis pretiosas quærens margaritas ad littus hoc applicuerit studium sanctæ negotiationis, nequaquam vacuus & inanis exhibit. Ego itaque vir videns paupertatem meam, sed non negligens, bono & paucio pretio suffragium orationum vestrarum tento emere. Est autem pretium nostrum, rogare, postulare, scribere, & tenuissimas orationes rependere. Si pensatis vsum æstimationis, parum est quod datur: si votum, immo animum deuotum, multum. Æstimabile procul dubio est, quod manus legitur: impretiabile, quod animus. Vt enim ait Gregorius, non quantum, sed ex quanto offeratur considerat Deus, id est, non quantum pecuniæ, sed ex quanta deuotione. Suggestimus fraternitati vestræ supplicatione humili, quatinus benefactoribus Ecclesiæ nostræ benefi-

Z

cium sanctæ societatis vestræ indulgeatis: & præcipuè illis, qui eleemosynas suas faciunt nouo operi, quod ad honorem & decorem domus Dei & beati remigij inchoauimus. Nam caput monasterij nostri renouare volentes, cum Dei adiutorio manū ad fortia mittimus. Rescriptum itaque sigillo vestro roboratum mittite, ad excitandos fidelium animos, vestra sancta exhortatione, & orationum concessione. Valeat sancta congregatio vestra.

EPIST. XXIII.

Cluniacensibus, Petrus Abbas S. Remigij salutem.

157.

IN tanta sanctorum congregatione, & persona nostra, si adesset, vilis & abiecta appareret, & vox exigua, timeo ne & littera rusticana. Loquar tamen in medio vestrum, vt seruus Abraham, vt puer Daniel, vt senex Iacob, non vt Heliu, cuius venter est vt mustum absque spiraculo. Lego in scripturis Hieremiam lamentantem, Paulum optantem anathema à Christo pro fratribus suis. Stillicidiis tantæ caritatis inebriatus, nonne dolere debeo vsque ad medullarum compagum discretionem, super ruinam matris filiarum Sion, vtique cœnobij Cluniacensis? Nonne hæc est vrbs fortitudinis nostræ, de qua egrediebantur quondam mille per episcopatus, per abbatias, per regum & principum curias, & nunc paucissimi sunt incolæ eius? Nonne luminare hoc magnum tenebras obscuratæ religionis

per diuersas regiones illuminauit, ordinem
 reformando, honestatem docendo, caritatem
 infundendo, & cætera pietatis officia reno-
 uando? Vsq̃ue ad sedē Apostolicam nonne gra-
 dibus humilitatis ascendit? O domini! ô fra-
 tres! ô filij Cluniacēses! ego ipso apud sanctum
 Martinum de campis adolescentulus verissi-
 mis experimentis quod dico gustauī, & vidi
 vbi erat auro locus, in quo conflagabatur. Proh
 dolor! Intepuit & consenuit tantus feruor.
 Quod autē antiquatur & senescit, prope in-
 teritum est, quod absit à vobis, & ab hæredi-
 tate Iacob. Melius est certē mori vos in bello
 vitiorum & vitiosorum, qui more vulpium
 demoliantur vineam domini Sabaoth, quā
 videre vltima funera matris vestræ & nostræ.
 Repurgate igitur puteos Abrahæ, Isaac, &
 Iacob, & zizania superfeminata nocte ab ini-
 mico eradicatē: præcipuē illud originarium
 malum, de quo pessima seges ad suffocatio-
 nem monasticæ religionis suboritur. Est au-
 tem consuetudo comestationum & epotatio-
 num, quæ fiunt post completorium. Succidite
 pro hanc arborem malā in sententia vigillum.
 Adsit vobis gratia spiritus sancti, qua coope-
 rante constituatis quod Deo sit acceptabile,
 Ecclesiæ Cluniacēsi vtile, præsentibus sa-
 lubre, posteris remediabile.

Z ij



PETRI ABBATIS

S. REMIGII

EPISTOLARVM

LIBER IX.

EPISTOLA I.

Prænestino Episcopo, Petrus Abbas S. Remigij.

158.



EX multa & pene inconsolabili cordis angustia, ex multorum relatione, perpendo vos usque in conquestionem tædij vitæ vestræ prorumpere. Hoc sine dubio sciatis viri minus constantis & prudentis esse. Apostolus certè magister non gentium tantum, sed omnium Christianorum, scit abundare, & penuriam pati, & in omnibus sufficiens esse. Ad hanc formam vtinam componeremus titubantem vitam nostram. Causas tamen pusillanimitatis, immo assiduæ conquestionis, audire desidero, & tunc vel improbare vel approbare dolorem potero. Triplex siquidem occurrit mihi conquerendi ratio,

siue occasio. Aut enim propria temeritas impellit ad aliquid faciendum, quod non sit faciendum; aut aliena calliditas; aut, vt vulgo loquar, perplexa diuinæ prædestinationis necessitas. Sed propria temeritas semper culpanda; aliena calliditas cauenda: à Deo veniens iusta sententia timenda: frano indiget propria temeritas, vt inconsulta: consilio aliena calliditas, vt suspecta: superna sententia timore, vt fortissima. Non mihi ignosco in propria temeritate, accuso me in alienæ calliditatis circumuentione, gemo sub manus Dei percussione. Ne iterum præcipitet propria temeritas, rationem consulo: ne suffocet laqueus alienæ calliditatis, sapientem consulo: ne mucro supernæ seueritatis vsque ad interuersionem desæuiat, humiliter imploro. In propria temeritate fragilitatem meam cognosco: in aliena seductione spiritum discretionis aduoco: in flagellis diuinis Deo me totum committo. Quæro igitur, quam istarum magis suspectam habeas, vtrum vnā, vel duas, vel simul tres. Si vnā & tuam, propitius tibi esto. Si alienā & meam, indulge mihi: potius enim simplicitate quā calliditate vsus sum, quando vt tuo Episcopo acquiescerem, ire cum eo ad Concilium persuasi. Si te cælestis dispensatio illaqueauit, quid tibi irasceris? quid mihi? quis enim tu? quis ego? qui prohibere possem ne suo cursu curreret, quem nulla creatura declinare aut impedire potest? Quid enim Deus cogitet de nobis intra ve-

lum secreti consilij sui, eo vsque nos latet, donec ad publicum nostrum ipso actu prodeat. Tandiu est nostrum nescire, quandiu suum durauerit celare. Longanimiter quoque expectandum est, quod cum venerit, patienter est sustinendum. Non est prope- randum si differat; non est murmurandum si proferat. Iesus Christus heri & hodie. heri, antequam aperiat sacramentum voluntatis suæ, hodie, cum manifestauerit secretum præscientiæ suæ. Idcirco sic exclusa sopiatur omnis vestra conquestio, vbi nec temeritas apparet reprehensibilis, nec calliditas apprehenditur damnabilis, nec Dei sententia intolerabilis. Etsi enim priuauit solo paterno, honorauit vos sublimi folio. Miscet namque sapientia in cratere vinum suum, ne nimis sit potanti calidum, ne rursus insipidum. Infert exilium præsumptori, confert solatium exulanti. Pluris est consolatio, quam desolatio vestra. Gregem pusillum dimisistis, egregios Cardinales amicos & socios recepistis. Claustralem angulum reliquistis: urbem dominam mundi acquisistis. Abbatis gradum inferiorem Episcopali quis nesciat? Si corpora martyrum Crispini & Crispiniani Sues- sioni sepulta sunt; Petri principis Apostolorum, & Pauli doctoris gentium sacrationes reliquias in Romana vrbe haberi quis ignorat? Si paria in vestra commutatione quarantur, tam in relictis quam in adeptis longè imparia omnia inuenientur, præter affectum qui inde torquetur, vnde alius extolletur. Omnia se-

cundum se affectus moderatur. Nihil apud ipsum magnum, nisi in se de se faciat magnum. Si ergo affectus mitigabitur, pacata erunt omnia. Naturæ quidem mirabilis est animus, ex quo gignitur affectus. sed tamen quocunque suus pulsus illum tulerit, omnia ad se trahit, & suo nihilominus siue sapore, siue colore intingit. Cui turbato nihil quiescit, cui amaro nihil dulcescit, cui auaro nihil sufficit, cui vago nihil consistit. E contra, fixo nulla mobilia flectuntur, pacato tranquilla sunt etiam procellosa, benigno mansuescunt etiam ferocia. Sic Deus adduxit ad Adam cuncta animantia terræ, & volatilia cæli, vt videret quid vocaret ea. Omne enim quod vocauit Adam, ipsum est nomen eius. Procul dubio animi est omnes motus cordis & corporis iudicare, & nomina imponere. Vnde auctoritas dicit, Affectus tuus operi tuo nomen imponit. Præest enim volatilibus cæli cogitando de supernis: præest bestiis terræ, reprimendo motus carnis: præest etiam piscibus maris, moderando volubiles cogitationes mentis. Omni igitur studio est excolendus, sine quo nullus motus bonus. Laborandum ne sit malus, quia si malus est, non est in ciuitate malum, quod ipse non fecerit. Enitendum quoque vt sit bonus, quatinus gratia cooperante creet bona, faciat pacem, & formet lucem. Diu detinuit epistola amicum occupatum in suis & domni Apostolici negotiis. Proinde veniam peto. Remotissi-

360 PETRI ABB. CEILENSIS
mum namque alloquor, quem solebam non
chartis ad horam detinere, sed horis familia-
rissimo hinc inde colloquio, diebus plurimis
quandoque adiunctis & noctibus, occupare.
Valete.

EPIST. II.

*Pranestino Episcopo, Petrus Abbas
sancti Remigij.*

159. **V**ix occurro suscipere turbam cogitatio-
num siue materialium, quæ se ingerunt,
insistentes oportune importune venire ad
vos, dicendo, Ecce ego, mitte me: ecce ego,
mitte me. Inter cæteras verò adolescentulas
medullatarum meditationum, famosissima
illa & notissima atque nobilissima matro-
na, quæ ab humero & sursum omnes virtu-
tes antecedit & præcellit, fraterna caritas,
de qua ait Apostolus: *Adhuc excellentiorem vi-*
am vobis demonstro, iure sedem regiam occu-
pat, & suo splendore omnes obumbrat,
immo illustrat, & suum tenere ordinem post
se imperat. Huic obediunt omnia, non solum
terrestria, sed & ipsa cælestia. nam de eius
plenitudine omnes accipiunt nomen, & vir-
tutem, gloriam & honorem. Hanc ego licet
statura pusillus non attingam, tamen ad vnam
& minimam vestimenti eius simbriam totum
me superextendo, & de salute nullatenus des-
pero. Hanc cum amicis & inter amicos teneo
& cognosco: & prius volo putrefieri cum

I. Cor.
xii. 31.

vermibus in puluere terræ, quàm fidem semel datam & amicitiam promissam negligentia aut subreptione interrompere. Matrona hæc duas habet clauēs, vnā qua cor claudit & aperit, alteram qua atrij exterioris corbanam, id est arcam, in necessitatibus familiæ suæ similiter claudit & aperit. Cor est arca fæderis, vbi tabulæ testamenti, virga Aaron, & manna reponuntur. Tabulæ testamenti, ne ignores aut præuarices legem Dei. Virga Aaron, quæ fronduit & floruit, vt timeas offensam, quia virga; serues gratiam, quia frondosa & florida. Manna, vt per spiritum adoptionis degustes & prælibes gloriam absconsæ dulcedinis Deum timentibus: cuius stillicidium, ad quod lætatur germinans, sufficit in præsentī vita, & abundantia seruetur in alia. Exclusa itaque omni malitia & iniquitate à corde, sola deambulet in suo pomerio caritas, sola ibi pascatur, & cubet in meridie. Non videat illam ingrediētem & deambulātem oculus nequam, qui fascinauerat Corinthios, & iniquos presbyteros. Cū tamen placuerit, aduocet puellas suas de terra Israel, vt afferant ei smigmata suauissimi odoris, & oleum lætitiæ, de quibus aspergat cubile suum ad aduentum sponsi, qui de sua propagine non nisi cælestes & manituros fructus generat. Deinde egreditur ad hortum nucum, ad hortum pomorum suorum, vt videat poma conuallium, & inspiciat si floruerint vineæ, & germinauerint mala punica, ad hortum vtique nucum, eremitarum & reclusorum, hortum pomorum, in sæculari

Math.
VII. 16.

habitu religioſe viuentium : poma conual-
lium, qui elegerunt abiecti eſſe in domo Dei:
vineas, feruentes ſpiritu: mala punica, qui cru-
cifigunt carnem ſuam cum vitiis & concupi-
ſcentiis. Ponit namque ſigna ſua , pietatis
opera , caritas in exitu actionum ſuper ſum-
mum, id eſt palam. Ponit namque & proponit,
quatinus per ſigna extrinſecus apparentia
deprehendatur intus latens veritas. Vnde, *A*
fructibus eorum cognoscetis eos. Caritas enim aquas
ſuas in plateis diuidit , vt bibant homines &
iumenta , quia ſapientibus & inſipientibus,
debitrix eſt. A corde tamen regreditur , & ad
cor regreditur: quia cornua altaris ex ipſo ſunt
procedentia, & nullum bonum opus remune-
rabile , quod non ſurgit de bonæ voluntatis
radice. Ponit igitur caritas affectum cordis &
obſequium operis. Affectus latet , opus patet.
Sic habet caritas & ſecretum ſuum, & publi-
cum. In ſecreto quieſcit, in publico operatur.
Imitatur operantem ſex diebus , & ſabbato
quieſcentem. Duplex verò eſt officij ratio.
Alia enim conſideratur inter amicos , alia in-
ter extraneos. Aliud eſt munus amicale, aliud
generale. Amicale de corde exigitur, & in cor-
de ſeruatur. Generale de arca extrahitur , nec
ibi retinetur. Riuus amoris non ſiccatur lar-
giendo quod habet : ſed arca extenuatur, dum
euacuatur. Carius itaque eſt munus, quod nec
areſcit profuſione, nec æſcicit largitione. Ap-
petibilius tamen ſæpe requiritur , quod in
manu , vel ſinu refunditur , quàm illud quod
in medullis amicalibus per fidem reconditur.

Exteriora siquidem & visibilia, quia vñibus humanis necessaria sunt, ab his amplius diliguntur, quorum appetitus tenaciùs in temporalibus quàm in spiritualibus irretitur. Qui verò calcatis grossioribus carnis sæculentiis cubilia spiritus ingressi, subtiliari in spiritualibus consueuerunt, in amicis quærunt gratiam, non pecuniam, fidem, non extrinsecam possessionem, veritatem inuiolabilem, nō vtilitatem temporalem. Qui enim cor hominis habet, quid est hominis, aut in homine, quod non possidet? Hinc est quòd in Christo, quem pater de corde suo eructauit, quando vel eternaliter æqualem sibi genuit, vel temporaliter de virgine incarnari constituit, omnia nostra sunt: iuxta Apostolum qui ait, *sive Cephas, sive* I. Cor. III. 12. *Apollo, sive mors, sive vita, omnia vestra, vos autem Christi, Christus autem Dei.* Forte dicitis. Ut quid, & ad quid hæc? Quia legi in litteris vestris, vos amisisse veteres amicos, nec comparasse nouos. Concedo amisisse, si opinione aut veritate constat inueteratos esse. Vera certè amicitia puritate virginea, & caloris perpetuitate, neque adulteratur, neque refrigeratur: sed quotidiana renouatione cum sole semper oritur, nec moritur. Si vnquam ergo habuistis amicos, adhuc habetis non inueteratos, quod esset vitium, sed remotos, quod est opus diuinum. Sic enim Deus homines tanquam grana spargit & seminat. Nonne Apostolos seminans ait, *Euntes in mundum vniuersum predicate Euāgelium omni creatura.* Marc. XVI. 13.

Veniendo Euangelica prædicatione sparsit, spargendo in vniuersum mundum vnitatem fidei vnxit. Sic nostræ amicitie vinculum neque ruptum, neque laxatum erga vos, sed protractum vsque ad sedem vestram Episcopalem incorruptum & semper nouum existit. Nescio si fortiùs, scio tamen quia teneriùs absentia me vobis, immo vos mihi inuiserat, quàm fecerit præsentia. Hoc probabile & necessarium argumentum est perfectæ dilectionis, quando eo ampliùs incendit affectus, quo remotiùs separat locus. Præsentia siquidem suo visu solatiatur, & satiatur vsu: famelica verò absentia, præ inopia etiam amarior iuniperi corticibus sustentatur, & ad solitam visionis dulcedinem viuaciùs inflāmur, & nutritur tenaciùs. Duris agitur stimulis desiderium, quod semper quærit & nunquam inuenit. Vnde Psalmista: *Querite Dominum, quærite faciem eius semper.* Et in Canticis, anima liquefacta surgit, & quærit per plateas & vias ciuitatis quem diligit. Neque igitur stylo inueterato, neque animo scribo vobis. De his hactenus. De statu autem nostro significo vobis, quod guttæ nostræ quasdam recenter sentio guttas. Cætera nostra, Deo cooperante, in omni prosperitate sunt. Theobaldum concorditer in abbatem vobis substituimus, & fratrem Ioannem in omnibus ipsi obediētem effecimus: si tamen cum gratia vestra remanere poterit, quod omnino consulimus. Quid enim valeat, vbi est nobiscum, certi sumus. Quid verò apud vos facturus sit, nesci-

Psal.

civ. 4.

Querite Dominum, quærite faciem eius semper.

mus. Certa verò pro incertis non sunt relinquenda. Missale nostrum mitto vobis, & breuiarium fratris Lucae misimus. Quòd vos supra modum in cibo & potu affligitis, non approbamus. Si nobiscum viuere & mori desideratis, non festinetis ad mortem: quia nescitis quid paritura sit crastina dies. Omnia possibilia sunt apud Deum, qui desiderium pauperum frequenter exaudit.

EPIST. III.

*Theobaldo electo Cluniacensi, Petrus abbas
sancti Remigij.*

GEmebundas, & quasi intestinorum suorum tumultuosa collisione seu conquestione, & velut à fulgure & tempestate percussas, à vobis recepi litteras. Hominem siquidem redolebant satis conturbatum & exterritum, ac velut repentino superueniente tonitruo pene iacentem exanimatum. Nec mirum. Res namque noua, tam sua nouitate, quàm magnitudine, hominem audacissimum & fortissimum potuit concutere. qui ad crucem ducitur, gemens & lugens meritò conqueritur. Si crux à cruciatu dicitur, nonne in cruce cruciatur, cuius humeri importabili oneri supponuntur? Profecto amodo tot molas supportabitis, quot monachorum curam recipietis. Quid ergo? Nonne cum Apostolo dicetis, *Quis infirmatur, & ego non infirmor? quis scandalizatur, & ego non vior?* Ecce timor, ecce

160.

2. Cor.

XI. 29.

366 PETRI ABB. CELLENSIS
anxietas, ecce cruciatus. Sed quid? Vbi con-
solatio? vbi releuatio? vbi tanti doloris reme-
dium? sine dubio in Christo. Nam ipse primus
ascensor, mitigator, & sanctificator crucis, qui
suo cruciatu nostros absoluit cruciatus in cru-
ce, & de cruce dixit, *Mulier, ecce filius tuus*, & di-
scipulo, *Ecce mater tua*. Sed quid hoc ad rem?
quid ad præsentem quæstionem? Multum per
omnem modum. Nam mulier est Cluniacen-
sis Ecclesia, quæ est mater omnium nostrum:
quæ de fuctu ventris sui plures manipulos
sanctarum animarum ab Oriente & Occidente
in sinu Abraham, Isaac, & Iacob, iam collocauit,
& sponso suo poma noua nouitiorum, & vetera
antiquorum & senum, in cœlesti mensa fre-
quenter obtulit. Quis vero discipulus sit, de
quo dicitur, mulier ecce filius tuus, iam credo
animaduertitis. Tangit enim vos hæc senten-
tia: quia æterna prædestinatione, & moderna
vocatione, sollicitudinē huius matris vestræ
decreto inuiolabili gratia Dei iniungit. Teme-
rarium autem est, & inhumanum, tam diuinam
ordinationē respuere, quàm matri fidele ob-
sequium denegare. Igitur tanquā Isachar a si-
nus fortis, cervicē & humeros huic electioni
supponite, & de Dei auxilio fideliter præsumi-
te, quia spiritus adiuuat infirmitatem vestram.
Mihī autem amico & fideli vestro gaudium
est & exultatio, quod tantum amicum in tam
excellenti loco merui videre sublimatū. Nam
& ipse seruus & filius sum Cluniacensis Ec-
clesiæ. Valete, & per nos, oro, transitum facite.

Ioan.
xix. 26.
27.

EPIST. IV.

*Petrus abbas sancti Remigij, R. Canonico
de Merisoma.*

SImul mouentur & manus ad tibi scriben- 161.
dum, & nuntius ad iter arripiendum. Non
sum immemor antiquæ nostræ cōsuetudinis,
qua inuicem solebamus quamlibet informes
conceptus nostrarum meditationum com-
municare. Ego vt senex sensu exinanitus, æta-
te fessus, occupatione irretitus, iam parere fœ-
tus idoneos ad legendum deficio. Consulens
autem naturali erubescentiæ meæ, potius
abortiuos meos infra latebras suas sepelio,
quàm extrà cum pudore profero. Quis enim
ramus fronde & fructu formosus de veterno-
so & emortuo trunco pullulabit? fons aridus
& cisterna dissipata quas irrigabit areolas,
cùm nec gutta supersit ad proprias consolan-
das venas? Vetus itaque homo qui corrumpi-
tur, nouitate spiritus renouandus esset: nisi &
ipse spiritus sua negligentia inueteratus iuxta
Apostolum prope interitum esset. Altera isto-
rum vetustas apparet, altera latet. Periculo-
sior autem est latens, quàm apparens. Nul-
lum enim periculum est, cubile vitiolorum, cor-
pus animale, hospitium de impossibilitate pec-
catis nō exhibere. Optimum equidem est non
peccare, immo & nolle: sed & bonū est nō pos-
se. Fomes siquidē peccati vititur etate inuenili,

velut fornace, in qua tres pueri à rege Babylonio mittuntur, & membra puerilia, tãquam ligna flammis apta, obstinatissimè succenduntur. Cùm verò sene&º euiscerauerit medullas corporis, & omnino debilitauerit legē membrorum, quæ repugnat legi mentis, conquiescunt strepitus vitiorum, & quia non habent vbi caput reclinent, exeunt, & deserta circumcunt. Pòtius ergo lætandum quàm dolendum de ista oppressione, quæ magis operatur vitam quàm mortem, remedium quàm excidium. Hæc est apparens & parum nocens vetustas. Latens verò, quia nescitur, minimè aut tardè curatur. Vnde Isaias, *Vulnus & liuor & plaga tumens nō est circumligata, nec curata medicamine; neque foras oleo.* quis enim medicinam morbo portigeret, quem nec oculus, nec manus attingeret? Solus itaque Dei spiritus, qui omnia scrutatur, spiritum nostrum curat, viuificat, & renouat. In medio istarum vetustatum positus; spiritualem timeo, corporalem iam sperno. In fundo vitæ meæ, vbi sera parsimonia est, de reliquiis primæ præuaricationis iam iam fæces limosas exhaurio, & lutum vespere indurandum & arescendum præsentio. Iesum tamen, non minus sapientissimum quàm benignissimū figulum, expecto: qui de vase fictili, vsque ad minutissimum puluerem effracto, potest aliud in resurrectione vas facere in honorem: vt sit clemētior, ne dicam cautior, aut potentior in reficiendo, quàm in faciendo: vt sit maior gloria secundæ domus, quàm primæ, & Adam qui primus factus

factus est in animam viuentem, denuo fiat in spiritum viuificantem. Hæc spes in sinu meo reposita excitat vota mea mortem non timere, sed amare, non fugere, sed patienter expectare. Interim neque dormire neque dormire volo, sed iuxta Sapientis consiliū quæcunque possum instanter operari. Hinc est quòd nobilem Ecclesiam nostram tam in fronte quàm in ventre, cui caput secundum se decrat, fabricandam suscepimus, & vt speramus, cum Dei adiutorio perficiemus.

EPIST. V.

*Petrus humilis abbas sancti Remigi Ing.
Priori de Lapelee.*

Postulas in litteris tuis nostrum stylum recipere, non alienum. Sed hebetatus, sed retunfus, sed denique plenus squalore & rubigine qua facie transire poterit mare, cum potius sua rusticitate cachinnos moueat, quàm suos lætificet hospites? Calamus quoque noster annositate & desuetudine quassatus, nec non & terrenorum sollicitudine assidua obstructus & obstrictus, raucè sonat, nec iā auditores suos demulcet, sed malè commouet. Ne tamen filij & amici carissimi petitiūculam excludam, vel eludam, emendicatis repressis coloribus rhetoricis, & leporem sermonis postponēs, dies Dominicæ passionis præ oculis habens, moneo cum Iesu partiri suas contumelias, suas passiones, sua flagella, sua sputa,

A a

& totum cursum patientissimæ dispensationis, quæ pro nobis vsque ad inferna descendit. Reduc Iesum à plâta pedis vsque ad verticem vulneratum ante oculos tuos, aut animum deduc ad locum & focum vbi Petrus negauit, & quæ cordis medulla non liquefacta totum altare tam æneum quàm aureum sua aspersione implebit? *Holocausta*, ait Psalmista, *medulla-*

Psal.

LXV. 14.

ia offeram tibi. Medulla animæ non est nisi de infusione gratiæ. Si anima, licet macra, tamen esuriens & sitiens, magno appetitu stillicidia elâbuerit gratiæ, vespere, & manè, & meridie: vespere, complantata similitudini mortis Iesu; mane, renouata cum resurgente Iesu; meridie, translata ad dexteram patris cum Iesu: certè inebriabitur ab vbertate domus Dei, dicens, *Sicut adipe & pinguedine repleatur anima mea.*

Psal.

LXII. 6.

Quare non saginaretur de vitulo saginato? Quare non inebriaretur de flumine quod lætificat ciuitatem Dei? Habes vinum de vite vera expressum in torculari crucis, & attractum aperto ostio lateris. Sicut enim tonellus foratur, vt vinum habeatur, sic latus Christi lancea militis apertum est, vt exiret aqua baptismatis, & sanguis nostræ redēptionis. Hūc quotidie sumimus in altari sub specie vini. Altare siquidem est locus pascuæ, de quo dicitur, *In loco pascuæ, ibi me Dominus collocauit.* Et in Canticis, *Indica mihi quem diligit anima mea, vbi pascas, vbi cubes in meridie.* Quid est in meridie? In luce, in puritate, in veritate, in caritate. Qui latet vt anguis in herba, abscondens peccata sua, non est in meridie: qui impudicè viuit, &

Psal.

XXII. 1.

Cant.

I. 7.

templum Dei violat immunditia aliqua, non est in meridie. qui dolosus & fraudulentus est, speciem pietatis habēs & virtutem abnegans, non est in meridie. qui tepet odio fraterno, non est in meridie. Non ergo ipsum, vel cum ipso pascit Christus qui dicit, *Superbo & insatiabili corde cum hoc non edebam.* Non cubat etiā nisi vbi pascit. Sed de his hactenus pro tempore. De me verò si vis scire, onete tam annorum quam peccatorum quotidie more meo solito premor. Tamen benignitate & clementia Dei adhuc excedere valeo, & iniuncta officij negotia vtcumque procurare. Pacē etiam bonam cum fratribus nostris, & cum Archiepiscopo, & cum omnibus hominibus habeo. Caput monasterij nostri renouare aggredior, & cum Dei auxilio iam opus inchoatum ridet, & sequentis operis auspicia nobilia spondet. Non excidit à memoria, quod aliquando mihi quasi reprehensoriè dixeris, studere alia opera facere, & non curare de Monasterio. Hoc verbum etsi perfunctoriè fuit dictū, non transitoriè fuit auditum. Mille enim libras, adhuc simul quingētas postea pro opere Monasterij expendi. Saluto fratrem Dudonem. De bono odore vestræ conuersationis gaudeo.

Psal.
c. 7.

EPIST. VI.

*Tusculano Episcopo, Petrus abbas
sancti Remigij.*

163. **I**gnis diuinus nō minū est perpetuus, quā
in hostiis Deo dicatis sanctificandis san-
ctus. Hinc est, quōd in altari, vbi tam holo-
causta, quā sacrificia, quotidie ad expiation-
em peccatorum Deo immolantur, iugis &
perpetuus ardet. quid autem hoc est, nisi quod
I. Cor. Apostolus ait, *Caritas nunquam excidit*? Nam
XIII. 8. pura à simulatione, munda à sæculari ambi-
tione corda, Christi acceptabilia sunt altaria,
siue templa. Forcipe igitur litterarum vestra-
rum suscepi in aureo thuribulo bonorum
verborum sacras euaporationes iamdu-
dum succensæ fornacis ex mutua inter nos
visione & allocutione. Deo gratias, quia non
inueni aquam crassam imminutæ dilectionis,
sed ipsum ignem, non fumantem, sed flam-
mantem in penetralibus tantī domini &
amici. Putabam illum suffocatum cineribus
tantarum sollicitudinum, & varietate succe-
dentium occupationum. Præterea causam &
quæstionem grauissimam aduersum vos ha-
bebam, si iustum habuissem iudicem. Aquo
enim primordia cognitionis & dilectionis
cum abbate sanctorum Crispini & Crispinia-
ni piæ memoriæ habuistis, nisi à nobis? Qua-
re ergo de nostro bono opere nos lapidastis?
An non lapidastis, quem tot amaritudinibus

& afflictionibus de eius absentia concussistis? An non Iacob furtum Laban de filiabus suis fecistis? Fortè furtum non negatis, sed pium appellatis. Sed si furtum, quomodo pium? si pium, quomodo furtum? Probo autem furtum. Nam furtum est contrectatio rei alienæ invito domino. Romam certè ad Concilium non iuisset, nisi illum misissem. Præter spem, & præter voluntatem meam illum retinuistis, & fratrem & parem vobis fecistis. Hoc tamen nec illi, nec nobis placuit. Mallet cellam Montis Dei incolere, vt frequenter mihi scripsit, quàm Episcopalem cathedram tenere. quid igitur? Deus qui omnia conclusit, & meas querimonias præuenit, faciendo quod facere piè & misericorditer consuevit. Præuenit illum benedictionibus suis, & quem olim amicum & fratrem in terris habebamus, nunc dominum & sanctum in cælis veneramus. Miracula enim, quæ facit Deus, testimonia credibilia sunt sanctæ conuersationis eius. Itaque digitum superpono ori meo.

A a iij

EPIST. VII.

*Abbati sancti Egidij Petrus abbas sancti
Remigij.*

164.

V Agabundas frequenter literas ad diuer-
sos huc illucque absque emolumento
aliquo deuoluimus. Vna verò res seria plura
redimit otiosa. Columna quoque firmiter
locata sustinet in se residentia etiam tituban-
tia. Vno lucro plures iacturas compensat se-
dulus negotiator. Vt ad nostra veniamus, de-
lictum Iudæorum diuitiæ sunt mundi, & di-
minutio eorum diuitiæ gentium. Hæc idcir-
co prælibauerim, vt non sine fructu scribam
vobis. Fructum dico, non qui perit, sed qui
permanet. Permanet autem quicquid Deo
placet. Placet verò Deo vera dilectio, pura
oratio, sancta compunctio, mandatorum Dei
observatio. Suum possessorem nec auarum
nec prodigum faciunt. Auarum redderent, si
dilectionem & orationem amicis non ero-
garet. Prodigum, nisi compunctionem & mā-
datorum Dei observationem sibi propriè re-
tineret. Sic mōnet Sapientia, *Diruuntur*, in-
quiens, *fontes tui in plateis*, quod ad alios. *Sic tibi
fons proprius & non communicet ex eo alienus*, quod
ad seipsum. Bene offert, qui sic diuidit. Pro-
grediatur epistola, & demissa facie quæ sequū-
tur eloquatur. Nobilitas vestra & litteratura,
sicut de carne & sanguine sunt, sic carnem &
sanguinem, nisi condimentum religionis in-

Prou.
v. 16.

terponatur, sapiunt. Regularia tamen irregularibus ab oppositis sese obiiciunt. Claustralis disciplina in habitu & forma regularium deputantur. Carnalia & sæcularia regulam aut exuunt, aut interrumpunt. Operiat utique velamen religionis turpitudinem lubricæ carnalitatis: & in abbate monacho lateat ventosæ nobilitatis, & superfulgeat vexillum humilitatis. Dicat igitur conscientia in vestimentis ouium sepulta, *Quoniam non cognoui literaturam, introibo in potencias Domini.* Item, *absit mihi gloriari, nisi in cruce Domini mei Iesu Christi.* Vera nobilitas nunquam superbit: literatura sæcularis inflat, si illam caritas non reprimat. Ecce super candelabrum præclarum lucerna vestra superposita in abbazia sancti Ægidii, si clarè ardet, plurimas aduentantium regiones illuminat: si declinat in obscurum seu vaporem fumi, offendit videntes. Sic itaque luceat lux vestra, ut videntes glorificent patrem vestrum, qui in cælis est.

Psal.

LXX.

17.

Gal. vi.

14.

Aa iiij

EPIST. VIII.

*Petrus Carnorensis electus Capitulo
Cisterciensi.*

165. **S**ancta sanctorum studia impedire non minoris æstimo culpæ, quàm Angelica & diuina negotia interrumpere. Tanti vero reatus pœnam timeo incurrere, si vos ad diuina & in diuinis occupatos vanis & superfluis tentaue-
ro verbis retinere. Excusat tamen quando-
que vrgens necessitas ingerentem se impor-
tunitatem: quando & si reprimat ad modicum festinationem, non perimit aut deprimit pe-
nitentiam necessariam operationem. *Vtinam*, in-
quit Apostolus, *sustineretis modicum quid insi-*
2. Cor. *cientia mea!* Non arguitur insipientiæ formica,
XI. I. quæ sibi præparat escam in æstate. Non ar-
guitur insipientiæ villicus iniquitatis, qui fo-
dere non valens & mendicare erubescens, fe-
cit sibi amicos, qui reciperent illum in æterna
tabernacula. Non ad insipientiam est mihi, si
non de mammona iniquitatis, sed de suppli-
catione humilitatis, & debito fraternæ carita-
tis interpello dominos meos & fratres caris-
simos, quatinus me commemovent inter sui
gaudij socios, & futuræ expectationis amicos.
Recolat igitur sanctissimū vestrū Collegium,
vñū meū de alumnis beatissimi Bernardi,
cuius merito Cisterciensem ordinē deus vsq. ad
mare & vltra dilatauit, & vsq. ad nubes, vt istæ
quæ adhuc supersūt reliquæ testātur, magnifi-

cavit. Inter cætera sua beneficia cõtulit mihi
 superna gratia, eo viuente, adfuisse in his castrorũ
 pei cõuentib. & comendatũ, atq. receptũ tam
 beneficiis quàm orationibus. Translato etiam
 ipso ad cælestem curiam, semel adiui dominos
 meos & fratres carissimos, replicans & incul-
 cãs societatem & caritatem antiquitus indul-
 tam. Prostratus itaque licet absens, pedibus
 totius sanctæ huius congregationis, semper
 expectatum & expetitum, nec nõ etiam expe-
 tendum imploro suffragium. Vester fui, vester
 sum, vester semper ero. Alienos ad sinum suum
 colligit vestra caritas, & me leonibus, lupis,
 vrsis, & malis bestiis indefensum exponitis?
 Cellensem enutristis, Remensem amastis, Car-
 notensem proicietis? Vbi maior necessitas,
 ibi expriuabit caritas? vbi summum pericu-
 lum, ibi nullum subsidium? vbi descendens
 ab Hierusalem in Iericho semiuuius relin-
 quitur, post sacerdotis & leuitæ negligen-
 tiam, Samaritani pectus indurabitur, ne
 oleum & vinum vulneribus sauciati infun-
 dantur? Absit vt fons olei arefcat, vt lecythus
 olei in sancto ordine vestro deficiat. Certè si
 in vobis defecerit sanctus, mundus remanebit
 immundus. Non esset dolor Angelis dei, sicut
 dolor iste. Pax itaque æterna & gratia sit vo-
 biscum. Amen.

EPIST. IX.

*Nicolaus monachus sancti Albani, Petro
Abbati sancti Remigij.*

166.

INuectionis palliatz saturatus opprobrio,
& ironico crapulatus à vino, verè putabam me missionem accepisse, & fædus iam cum silentio pepigisse. Quid senserim sanè de priuilegio singularis integritatis in virginum Virgine scripseram, & metam ibi fixeram: & ecce meus Petrus de noua materia nouum suscitât ex insperato bellum, & omnes Virgini domesticos prouocat ad indignationem, & doctos in lege domini ad præsumptionis minus Catholicæ contradictionem. Quandiu tractabatur de articulis, qui sic vel aliter poterant intelligi, sana vtrimque fide, dissimulabam, & animus noster si concepit non peperit dolorem. Nunc autè cum tuba canitur, quòd Virgo peccatum senserit, & sentièdo debellauerit, non dissimulo, non patienter ago, vix manus teneo, quin in publicum hostem irruo. Sed priusquam pro communi omnium Virgini domesticorum indignatione respondeam, lapidem offensionis & scandali petram contueor, quæ in nostra epistola inuenit, qui nodum in scirpo sæpius quærit; & praua priuatæ læsionis in directâ, & aspera redigam in vias planas. Lapis itaque lapidem offendit in eo
„ quod dixi, Virginis ipsius animam pertransi-
„ uit gladius, non solum olim in filij passione,

sed etiam nuper in conceptionis suæ con-
demnatione. & ironico typo subsannans hîc
bonum dormitasse Homerum, Aristotelico
more sic logicat. Esto, nostra placent ei obse-
quia, nunquid passibilis est adhuc eius ani-
ma? Fides supplet irrefragabilem conclusio-
nem, ut vera impassibilitas & immortalitas,
nullas admittat molestias. Miror, & indignor
virum Ecclesiasticum, in diuinæ scripturæ
figuris exercitatum, has loquendi figuras
ignorare, vel earum scientiam dissimulare.
Nonne legitur Deus zelans, irascens, pœni-
tens, dolore cordis intrinsecus tactus, ante-
quam fuerit humanatus? Nunquid ideo eius
diuinitas sensit passionum molestias, quia
nostro more de ipsa loquitur scripturæ au-
ctoritas? Nunquid Angelos sollicitudo in-
quietat, quia leguntur securi de sua, solliciti
de nostra gloria? Tanta est huius tropi co-
pia in diuina pagina, quod ipsa abundantia
generat inopiam. Pauca igitur de multis sa-
pienti sufficere debent in tam plano arti-
culo. Ad petram vero scandalide corde ve-
stro tollendam plusculum est immorandum,
quia res exigit ut palam faciam quod celare
proposueram. Sanctus ille Bernardus, quem
dicis me debita exuere veneratione, & post
eum verborum iacula emittere, quondam
Sanctorum catalogo adscriptus, nuper est in
Ecclesia canonizatus, & ab humano iudicio
exemptus. Exemptus inquam est, ne de gloria
eius dubitemus: sed non ut minus de eius
dictis disputemus. De gloria beati martyris

Cypriani beatus Augustinus non dubitat, tamen in Spiritus sancti datione eum errasse verissimè comprobat. Errorem martyrio deletum scribit, & sic docuit Ecclesiam venerari martyris gloriam, vt tamen non imitaretur errorem. Ego autem, & si dissimili scientia, simili tamen conscientia, sic veneror beatum confessorem Bernardum, vt laudem & amem eius sanctitatem, qui nec amem, nec laudem eius præsumptionem in matris Domini conceptionem. Et ne putes me magis pertinaci quàm bona conscientia dicere què dico; audi quid ab ipsis Cisterciensibus vera religione præditis, & Virginem in veritate diligentibus, acceperim de sancto Bernardo. quorum nomina abscondo sub modio, ne odiosos faciam fratrum suorum collegio. In Clareuallensi collegio quidam conuersus bene religiosus in visu noctis vidit Abbatem Bernardum niueis indutum vestibus, quasi ad mamillam pectoris furuam habere maculam. Quem ex admiratione tristior alloquens, Quid est, inquit, pater, quòd nigram in te maculam video? & ille, Quia de Dominæ nostræ conceptione scripsi non scribenda, signum purgationis meæ maculam in pectore porto. Frater visà conuentui innotuit, & aliquis fratrum in scriptum redegit. Relatum est in generali Cisterciensi capitulo, & de comuni cōsilio scriptum periit incendio. maluitque Abbatum vniuersitas virginis periclitari gloriam, quàm sancti Bernardi opinionem. Non sic Paulus, non sic: qui se blasphemum & iniuriosum incla-

mitat, vt redemptoris gloriam amplius extollat. Et certè vt credo ea ratione sanctus in propria persona viro simplici & de talibus nil scienti apparuit, & culpam suam innotuit, vt totius Cisterciensis Capituli discretio deprehenderet eum velle suum errorem damnari, & virginæ conceptionis gloriam prædicari. Igitur si ego publico, quod ipse vt credo publicari voluit, hoc non est eius famam extenuare, vel gloriam euacuare, sed eius voluntatem super delicti sui pœnitentia exprimere. Porro facto leui per purgatorium transitu, intrauit in gaudium Domini sui, qui in diebus suis sanctitate venerabilis, opinione singularis, eloquentia suavis, & signorum inuocatione, immutationeque mirabilium extitit mirabilis. Hæc ego de beatissimo Abbate Bernardo. Nunc de statera mea, quæ in hoc, vt scribitis, videtur mentiri quod dixi, Virgo singularis vicit omne peccatum, non omne debellando, sed nullum prorsus sentiendo. Quod non omne debellauerit, testimonium perhibent, homicidium, adulterium, furtum, & horum similia multa peccata, quæ eius affectum nunquam memorderunt, eius memoriam, nunquam contaminarunt, eius denique opinionem nunquam læserunt. Testimonium etiam perhibet conscientia petrina: quæ etsi cotibus sit durior, hanc tamen abhorret duritiam, quam totus mundus abhorret. Os enim aliter sentiēs non solum est obstruendum fimo, sed lapide conterendū durissimo. Quod nullum, prorsus senserit peccatum Virgo peccati

destructor, hoc videtur sentire beatus Augustinus, ubi inhibet Virginis mentionem in peccati mentione. Hoc videtur sensisse & prophetico spiritu prædixisse David, ubi Verbum incarnari desiderās, dicit: *Surge in requiem*

Psal.

cxviii.

8.

tuam, tu & arca sanctificationis tuae. Surgere enim Verbi, fuit ab occulto suo prodire in nostrum publicum, inuisibilem fieri visibilem habitu carnis indutum. Incarnatum itaque desiderat surgere in requiem, quam signanter dicit suam: ut à communi hominum requie distinguat, quam idem David designat alibi, *Con-*

Psal.

cxiv.7.

uertere, inquit, *anima mea in requiem tuam.* Requies animæ humanæ in hac vita est, vel devicta, vel sopita carnis contradictione, sensualitatem rationis imperio de facili obedire. Verbi verò incarnati requies est, in carne nullam carnis contradictionem, nullam membrorum legem menti repugnantem sentire. In hac igitur requiem suam surrexit Verbum incarnatum, & non solum Verbum, sed & arca sanctificationis suæ, videlicet mater sua, de qua & in qua est Verbum incarnatum. Sicut enim in cœlo, qualis pater, talis filius; sic & in terra, qualis filius, talis mater, non dico de spiritu concepta, ut filius, sed de spiritu repleta & sanctificata ex utero matris, ut filius. Quod quidem sensit & scripsit, quem laudas auctorem in præsentī, abbas Bernardus. Inde quippe dies Natiuitatis non Conceptionis virginæ diem haberi solemnem: quia quæ in peccatis concepta est, ut uniuersum genus hominum, sine peccato nata est;

vt pauci hominum. Si igitur sine peccato nata est, consequenter sine peccato conuersata est. Si sine peccato conuersata est, consequenter sine sensu peccati ex hoc mundo ad patrem assumpta est. Sed dicis, eam sine peccato sensisse peccatum. Fateor me nescire quid velis dicere. Nam exempla sentiendi, quæ proponis, nullius sunt auctoritatis, & ideo nullius ponderis. De cetero omnia exempla quæ ponis, solis sensibus corporeis comprehenduntur. Possunt enim videri, audiri & tangi, & fortè olfactu & gustu percipi: & licet quinque sint corporei sensus, tamen non dicimus, sentio ignem quia video, nec sentio aerem quia audio, nec sentio lapidem gustu: fortè picem sentio olfactu, sed de sensu olfaciendi nihil ad sensum peccati. Proinde omnia quæ posuisti sentire te dicis, quia tangis. Si igitur Virgo sensit peccatum, cum peccatum tripliciter accipiatur in sacro eloquio, videlicet pœna peccati, culpa peccati, hostia pro peccato. Vtrum hæc omnia, an duo, an vnum tantum senserit, vellem tuo edoceri magisterio. Si enim sic intelligis; sensit peccatum, id est pœnam peccati; sic & ego intelligo. More quippe nostro esuriuit, sitiuit, friguit, & multis tribulationibus decocta, nostris calamitatibus subiacuit, & ex talium in Christo patientia, multimoda meritorum prærogatiua effloruit, absque his quibus intrinsecus quotidie proficiebat, noua videlicet virginitatis dilectione, singulari dei

contemplatione , incomparabili proximi caritate , tota virtutum omnium pulchritudine , nulla maculæ vel leuissimæ turpitudine. Nam cum meritorum nostrorum summa consistat in patiēdo pro Christo, & in diligendo Christum ; Deum videlicet , & proximum nostrum : in his duobus excitata est ad plenum agonista nostra ante aduentum Verbi in vterum eius ; vt nec ei deesset vel cum carne, vel cum hoste certatio, nec pacatissimi animi contemplatio. Proinde dispendium merendi non sustinuit , quæ tot tentationibus exposita, gratia, quæ ante obumbrationem plena, & dominus cum ea fuit, omnes debellauit, & omnes superauit. Dispendiū, inquam, merendi non sustinuit , quæ in dies operatione proficiens pariter & amore, optimam Mariæ partem adimpleuit, & Marthæ sollicitudinem per ætatis teneritudinem non exclusit. Quod si intelligis, sensit peccatum , id est, sensit culpam peccati , more nostro legem membrorum sensit, motus pudendos sensit, picem titillationis sensit , & inquinata est ab ea , quod absit. Iuō venerabilis Carnotensis Episcopus in Chronicis suis scripsit, duodecimo anno ætatis suæ Virginem ad Archangelo Gabriele salutatam , & à spiritu sancto obumbratam : infra quem ætatis annum nōn permittit natura moueri pubescentium genitalia. Terminus igitur pudendi motus in Virgine à Spiritu sancto præuentus reliquit nos dubios , vtrum à die cōceptionis, an à die natiuitatis, an certè à die superuentionis

tionis Spiritus sancti in virgine virgo liberata sit à contradictione carnis pudenda. Vnde & Augustinus dubitatiuè de Christo dixit, Quod inde suscepit, aut suscipiendum mundauit, aut suscipiendo mundauit. Sed modis omnibus constare nobis debet, quòd virgo singularis nunquam in carne, in qua & de qua Christus homo factus est, motum illicitum sensit, nunquam legem membrorum sensit, nunquam quod non voluit egit, nunquā sensit quod sentire non dequit. Cum igitur ante duodēnatum ex naturæ beneficio, post duodēnatum ex gratiæ dono peccatū sentire non potuerit; quādo sensit & sentiēdo debellauit virgo peccatum, quæ aliis temporibus in terris non vixit? Si de Salomone & Achaz das instantiam, qui vndecimo ætatis suæ anno genuerunt filios; scias quia singulare priuilegium non facit legem communem: vel cettè, quia reprehendit eos scriptura de incontinentia, potuit fieri vt obscenis motibus genitalium infirma irritarent, & pudoris claustra rumperent, & de animi sui peruersitate iura suæ naturæ inolita peruerterent, non communem hominum naturam exterminarent. Radicatus & fundatus in montibus sanctarum auctoritatum, da sanctā auctoritatem, quæ perhibeat Dominā nostram sensisse peccatū, quæ ita distinguat sensum peccati, videlicet in ignis, in picis, in lapidis, in aeris sensū; & errasse me fatebor. Quod si non occurrit, qua fronte audes fingere noua commenta in tantam virginem? qua dementia

Rom.
VII. 24.

infamare sensum genitalium, quæ Saluatorem saluo pudoris titulo fuderunt? Quæ prærogatiuæ distinctio inter singularem virginem & alias sanctas virgines, si peccatum sensit vt aliæ, sed non consensit peccato, sicut nec aliæ? Quo gratiæ merito præminuit, ante virtutis obumbrationem dico, si ipsam cum vniuerso hominum genere exclamare necesse fuit, *Quis me liberabis de corpore mortis huius?* Parcius nouas in virginem adinventiones de spiritu tuo cudere debuisses, quam de spiritu suo Deus pater tam gloriose fecundauit. Si ergo aliquid scribo de Virgine, quod non legerim in Canone, laudem tamen sapit Virginis, laudem & filij Virginis: & occasione scripturæ Canoniciæ, vel vera scribo, licet occulta, vel verisimilia & ipsa Catholica. Præsumuntur multa de Virgine, quæ nusquam leguntur: & præsumptionibus standum est, donec probetur in contrarium. Singularis Virginis priuilegium non habet similitudinis consortium. Non solum singulare est, quod Virgo concepit, sed & quod Virgo sola & prima in Israel virginitatem adamauit. Non solum inauditum, quod Virgo peperit, sed & quod Virgo citò Angelo credidit, & de facto non dubitans modum conceptionis inquisiuit. Et in hunc modum distingue inter Virginem nondum matrem, & Virginem iam matrem: vt singulari utrobique cæteris virginibus prærogetur priuilegio, quæ singulariter non-

dum mater, Angelo testante, gratia plena fuit; & singulariter iam mater Spiritus sancti sacrarium extitit: quæ nondum mater, quasi lana candidissima, nullius peccati sensu maculosa fuit, & singulariter iam mater, quasi purpura sanguine conchylij tincta, ita Spiritu sancto compluta & madefacta fuit, ut nullis de cætero vîsibus manciparetur, nisi diuinis. Multa in hunc modum occurrunt differentiarum genera, quibus Virgo nondum mater differt à se Verbi matre, licet nunquam peccatum senserit, vel nondum mater vel iam mater. Vellus quippe, cum sit de corpore, ut ait Hieronymus, corporis non sentit passionem: sic & nostræ Virginis virginitas, cum sit in carne, non sentit vitia carnis. Sed dicis, Multiformiter peccatum sentitur: aliquando cum peccato, aliquando sine peccato. Sine peccato sentitur, sicut aer. Hoc exemplum nullius est auctoritatis, ut dictum est, sed nec intelligentis expressum. Aer quippe sentitur aliquando intensius, aliquando remissius, secundum motus sui impetum, vel leniorem vel asperiores: & durior est aeris frigidi sensus asperior, quam ignis tepidioris lenior, vel lapidis, vel picis remotior. Ea propter me non mouent exempla, quæ tam remota sunt à re, ad quam explicandam sunt inducta. Recurramus itaque ad sensum Ecclesiæ, & secundum quod ipsa sentit de sensu peccati

388 PETRI ABB. CELLENSIS
proferamus in medium, & videamus quo sensu Virgo potuerit sentire peccatum, sine sensu peccati. Cum igitur peccatum Ecclesiastico sensu tripliciter dicatur, ut dictum est, videlicet pœna, culpa, hostia, iungamus primo singula singulis, deinde singula omnibus, ut experiamur qua coniunctione verum sit, peccatum sentiri sine peccato, & tandem deprehendamus, utrum veritas æquiuocæ coniunctionis obuiet clausulæ vniuocæ acceptionis, qua dicitur, Virgo vicit ex omni parte peccatum, non omne debellando, sed nullum prorsus sentiendo. Attende rogo, si virgo pœnam peccati sensit sine pœna peccati, si culpam peccati sensit sine culpa peccati, si hostiam/sine hostia sensit: & doce quomodo hæc possint fieri. Quod si non occurrit, attende si culpam sine pœna, vel sine hostia sensit, si hostiam sine pœna, vel sine culpa sensit: & doce quæ scriptura hæc doceat, & quid utilitatis in præsentis disquisitione habeat. Perpende denique, quod virgo pœnam peccati sensit sine culpa peccati: & hoc sensu fortè fieri potuit, quod peccatum sensit sine peccato, cum peccatum æquiuocè pœna dicatur & culpa peccati. Sed hic sensus in nullo derogat clausulæ, qua virgo perhibetur omne vicisse peccatum, non omne debellando, sed nullum prorsus sentiendo: quia in ea vniuocè ubique peccatum pro culpa peccati accipitur. Ipsa quippe culpam peccati, videlicet concupiscentiam, & cetera quæ simul sunt & pœ-

na & culpa peccati, ex omni parte vicit, quòd horum omnium nullum omnino sensit. Nam serpentis sibilatio foris fuit per suggestionem, non intus per titillationis pruriginem. Nec decuit illam carnem titillari, per quam meruit omnis caro à damnatione titillationis purgari. Non decuit illam carnem inordinate moueri, de cuius propagine ordinis disciplina demanauit; & omnem mundum sub iustitiæ moderamine colligens ad vitam æternam reformauit.

EPIST. X.

*Petrus Carnotensis electus Nicolao sancti
Albani monacho.*

E Pistola tua multifariè dentata, dum me 167.
 acerrimè mordere intendit, dentes suos in semet elisos non iniuria collidit. Acutos equidem formido, sed putres contemno. Subtiliter syllogizas, vel fortè paralogizas; sed fallaciter concludis. Nostram irrides simplicitatem, nec mirum: non enim tenes veritatem. Contra legem fratris tui turpitudinem reuelas, non quæ est, sed quam fingis. In humanis certè mentiri vereor: quanto magis in diuinis? Credo, dico, assero, & iuro, beatissimam Virginem nostram in æterna prædestinatione singulari priuilegio munitam, nec à sua conceptione in aliquo vio-

Bb iij

latam : sed semper mansisse & permansisse illibatam. & sicut beata ultra humanam & cæterorum hominum naturam, sic secreta & incognita manet ultra omnium notionem. Quamuis autem more veruecum adinuicem nostra tentauerimus cornua, & verborum diuersos hinc inde protulerimus sonos : tamen vnus & simplex oculus vtriusque nostrum in eius obsequio & famulatu nunquam caligauit : sed neque Deo volente caligabit. Vt autem gustus cibum discernit, & alius plus salis, alius minus exigit : sic sensus humanus quandoque austeriora, quandoque dulciora appetit auidius. Profert alius absque pondere rationis, seu auctoritatis quod ei placuerit : recusat alius quicquid sale Evangelico aut prophetico conditum non est. Est alius utilior, dulcior alius. Ego utilem dulci præpono. Solas fauces magis demulcet dulcis : omnibus membris utilis plus confert. Tu verba dulcia, ego utilia quæro. Tu lenocinantia, ego salubria & confortantia. Serijs itaque intendamus. Quædam tamen seria iocosa aliquando non respuunt, immo libenter admittunt. quædam verò sic respuunt & expuunt ; quòd etiam anathematizant & suspendunt. Reginæ Dominæ nostræ beatissimæ virginis Mariæ obsequia venerationem postulant, non adulationem : maturitatem, non scurrilitatem : cordis de-

uotionem, non oris verbositatem: secreti admirationem, non publicam discussionem. Vterque nostrum currit post ipsam, & vtinam ad ipsam. Vt credo, vna intentio animos parificat; sed varietas sermonum, vt pote linguæ diuersæ, sensus scripturæ salua fide alternat. An scientiores, an sapientiores sumus Augustino & Hieronymo? Nonne in fide vnanimes, in religione concordēs, in caritate feruentes in scientia scripturarum sublimes, in auctoritate pares, in quibusdam sententiis valde sunt dispares? In epistola ad Galatas sic legitur: *Cum venisset Cephas Antiochiam, in faciem ei restitit, quia reprehensibilis erat. Prius enim quam venirent quidam à Iacobo, cum gentibus edebat. Cum autem venissent, subtrahabat, & segregabat se, timens eos qui ex circumcisione erant, &c.* Hieronymus defendit Petrum dicens, inuitum fecisse, & dispensatoriè simulasse, ne scilicet Iudæos amitteret: nec in hoc peccabat, quia bona intentione id agebat. Augustinus è contra dicit, Petrum illa legalia seruasse non dispensatoriè, sed verè: & eum verè peccasse, non illa seruando, sed alios suo exemplo Iudaizare cogendo. Ecce cedri Libani, ecce sublimes abietes alio, & alio impulsu, aliter & aliter sentiunt, sed in caritatis radice nunquam dissentiunt. Vnusquisque autem in suo sensu abundat. Nequaquam enim

Gal. ii.
ii.

in articulis fidei, in iis, qui sunt duæ oliuæ & duo candelabra ante Deum lucentia, error innascitur, pro quo alter periclitetur. Non itaque mirum, si nos stipulam siccam ventus rapiat in diuersa. Si tu tendis honorare Virginem, hoc ego collaudo, si contendis defendere incircumcisum sermonem, istud non approbo. Incircumcisus autem sermo est, qui originale præputium trahens de ventre sensus humani arbitrij cultro petrino non amputatur ad regulam Euangelicæ auctoritatis. Si omnes sermones superfluos communicarem, & huic nostro scripto infererem, nemo iuxta altare complantarem. Saluo nomine & numine sacratissimæ Virginis, verbale duellum non recusarem, si vacaret legere, si scribere, si arma quærere in scutariis Salomonis. Si aures & oculos suos clauserit Domina nostra, & nœnias disputatiuncularum nostrarum nihili penderit, in cauernis suis Anglum Francigena conclusum & ligatum vsque ad tempus mille annorum consignabit. O magister doctissime! dormiens, an vigilans, tubam canentem audisti, quod Virgo peccatum senserit, sentiendo debellauerit? Quàm sis dolosus interpretes in occultis, patet in apertis. Nam stylum vel calamum nostrum appellas tubam. Sed tubæ officium est vocem exaltare, styli & calami in silentio scribere. Sis ergo Dauus, qui interturbat omnia. Quo autem sensu dixerim, Virginem peccatum sensisse & debellasse, & si tu arreptus in

tanto furore, quòd vix manus contines, non potes patienter audire, quinostra legerit scripta, fauore & odio postpositis, audiat, & in statèra æquitatis diligenter appendat. Ne verò auctoritate nudus circa Goliath ad bellum cōgrediar, antepono scutum auctoritatis qua dicitur, *Inimicitias ponā inter te & mulierem, &c.* Ipsa conteret caput tuum, & tu insidiaberis calcaneo eius. Quæ est hæc mulier? Virgo, quæ pro sexu, non pro corruptione, mulier appellatur. Quod est eius semen? Iesus, in quo benedicentur omnes gentes. Quæ sunt illæ inimicitia? Lege Apocalypsim Ioannis. *Postquam, inquit, vidit draco quòd proiectus est in terram, persecutus est mulierem.* Ecce virginem Mariam. Euāgelium docet, quòd draco malignus in Herode, sicut aliquando in serpente, quærebat occidere Iesum filium huius sanctissimæ mulieris. quare Ioseph cum matre & puero, monitus ab Angelo, secessit in Ægyptum, tanquam in locum desertum. Lucè clarius ad verbum exponit hoc sermo qui legitur in natiuitate eiusdem virginis, vbi dicitur, *Inimicitias ponam inter te & mulierem, &c.* Quid est fratres, inquit actor in hoc loco, serpentis caput contere, nisi principalem Diaboli suggestionem, id est concupiscentiam resistendo superare? Si ergo quæritur, quæ mulier huiusmodi victoriam operata sit: profectò non reperitur in linea generationis humanæ, donec perueniatur ad illam, de qua nunc agimus, sanctarum sanctam. Surdus es, si non

Gen.

III. 15.

Apoc.

XII. 9.

audis, cæcus, si non vides, mutus, si non clamas, infidelis, si non credis, contumax, si adhuc contendis. Vade ad natatoriam Siloe, & laua oculos, & vide quomodo verum sit, quia sensit peccatum sine peccato. Sensit equidem, non ad læsionem, sed ad probationem: sensit, non succumbendo, sed superando: sensit extrinsecus, non intrinsecus: sensit hoste suggestionem iaciendo, non carne delectando, vel spiritu consentiendo: sensit propulso, non excipiendo, vel admittendo. Quis nostrum magis honorat Virginem, qui illam prædicat absque certamine felicem, an qui in certamine fortem? *Nam mulierem fortem quis inueniet? Procul & de ultimis finibus pretium eius.* Apostolus ait, *non coronabitur, nisi qui legitime certauerit.* Spiritus in Apocalypsi dicit, *Vincenti dabo edere de ligno vite, quod est in medio paradisi.* Item, *qui vicerit, sic vestietur vestimentis albis.* Item, *Qui vicerit, faciam illum columnam in templo Dei mei.* Item, *qui vicerit, dabo ei sedem mecum in throno meo.* Virgo nostra sedens iuxta sedentem in throno gratiæ filium suum Iesum, loquitur omnes victorias, quas obtinuit non dormiendo, sed vigilando: non, otiaando, sed pugnando, non fugiendo, sed resistendo, non cadendo, sed cedendo An mater felicior filio, an sanctior? an fortior? an gratia plenior? Sed ductus est Iesus in desertum, ut teteretur à diabolo. sed dicit illum Apostolus tentatum per omnia pro similitudine absque peccato. Qui tentatur nonne sentit tentationem? Est autem modus sentiendi secundum virtutem non tētantis, sed tentati: debilis, debilior, debilissimus

Prou.

xxxi.

10.

2. Tim.

II. v.

Apoc.

II. 7.

Apoc.

III. 5.

12. 21.

effectus sentiendi, secundum affectum & virtutem sentientis. Non enim quisquam potest iudicare quid sentias, nisi tu qui sentis. Hucusque satis sit de tuba, quam fecisti & sonuisti. Nunc autē vt ad singula epistolæ tuæ capitula, quibus meam, quam & ego confiteor, arguis insipientiam, respondeam, spineta tua sicut hinnulus ceruorum transilio. Sed me non ignorare tropos diuinę locutionis assero: tuos verò in terra conculco. Denique compatior insolentię tuę, qui de excellentissimis nostrę Virginis montibus ad profundissimam vallē descendisti, nec dicā corruisti. Licet enim in illa nihil sit verecundū, vbi omnia & singula eius mēbra luna sunt puriora, & sole clariora: tamen nostrę fragilitatis teterrima memoria, cū audierit nominari genitalia, vix à sua excutietur palude, vix incipiet nō soliqua cogitare. In Virgine igitur talia sacrosanctis cortinis potius volo honorādo inuoluere, quā nudis nominibus & manibus contrectare. Virgo certē virgineis verbis & sancto velamine cōsecratis delectatur affari. Parco epistolæ meę tua inserere verba, quę tamen non parco reprehendere. Finem facere festinabam: sed nouum tuū decretum prius volo discutere, & ex quo consilio promulgatum sit requiro. Si, inquit, in cælo qualis pater, talis filius, sic in terra qualis filius, talis mater. O Domina! ignosce dicenti quod displicet tibi. Nonne tu filij tui, licet mater, tamen ancilla? Nonne sicut oculi ancillę in manibus Dominię suę, ita oculi tui in manibus

Domini filij tui? Non adæquabitur ei aurum de Æthiopia, nec conferetur tinctis Indiæ coloribus, quia non est inuentus similis ei super terram, qui vnus & vnicus est, & secundum non habet. Sufficit tibi, à dextris eius stare, non æqualitatis, vel qualitatis comparatione, sed gloriæ & beatitudinis stabili & æterna copulatione. Datis iam dextris pacem habemus ad Dominam nostram, cuius tu adiutor, ego assertor, cuius tu zelator, ego amator. Suum in laude Virginis expendere ingenium & studium nec improbabile est, nec irremunerabile. Vngulam tamen, & in hoc, & in omni actione nostra & intentione, findere auctoritas iubet & ratio suadet. Discernere autem, quid & quomodo debeas laudare, vngulam est findere. Qui alterum postponit, officium laudationis aut peruertit aut prorsus amittit. In modo erras, si supra, vel infra, aut extra metas veritatis quemlibet laudas: in persona, si laude indignum laudare velis. Vt ad rem veniam, tu effers nostrę Virginis laudes, ego verò offero. Tu in acre euolas, ego interim dum in terra sum, pedibus curro. Tu præcipitas verba, ego dispono sermones meos in iudicio, & in statera appendo. Tu acerbam & immaturam vindemiam, ego in imbre matutino & serotino iam matura poma noua & vetera ad mensam comporto. Virginem laudas, & ego laudo. Prædicas sanctam, & ego. Extollis super choros Angelorum, & ego. Dicis immunem ab omni peccato, & ego. Asferis Dei genitricem, adstruis nostram ad

Deum mediatricem, & ego. Versa & reuerſa in quolibet ſtatu venerationis & glorificationis, tecum vado, tecum ſentio. Si verò extra communis monetæ formam vis fabricare aliam, quam non approbauerit ſedes Petri, cuius eſt approbare, vel improbare ordinem vniuerſalis Eccleſiæ, pedem ſiſto, & terminos conſtitutos non tranſgredior. Credo & conſiteor plura eſſe apud nos ignota de Virgine ſacroſancta, quàm nota, quia confortata eſt & gratia & gloria, & non poſſumus ad eam. Euangelio, non ſomniis, de illa credo, & ſi aliter ſapio, & hoc ipſum reuelabit Deus, quando voluerit, & quomodo voluerit. Interim autem dum ſit vox ſuper firmamentum, nec deſcendit ad noſtrum fundamentum, pennas ſubmitto, & meæ ignorantiaæ caliginem non à te, ſed à patre luminum illuſtrandam imploro. Si ferrum de manubrio elapſum te in aliquo læſit, da veniam, eandem à me recepturus indulgentiam. Ora pro me, amice cariſſime, & vtinam facie ad faciem viderem te, quem ſcriptorum tuorum bene ornatus habitus non ſemel præſtitit audire.

EPIST. XI.

H. Abbati Cluniacenſi.

NOn omiſſis excubiis Dominicæ ſepul- 163.
turæ veſtri habens memoriam, ſancto ſabbato opus aggredior lege non prohibitum. Nec legere namque, nec ſcribere prohibet.

lex. Lugeo interim ex lege sua contra legem
 proscriptum. Iesum extra synagogam, extra
 ciuitatem sanctam tunc profanam, extra vi-
 tam. Sed Christus proscriptus meliorē adiit
 mansionem, populum cariorē, ciuitatem
 sanctiorem, lectulum gratiorem, mensam sua-
 uiorem. Quid plura? proscriptus à Iudæis ad-
 scriptus est rex & Dominus in cælis. De exi-
 lio migravit ad regnum: ab his qui odio ha-
 buerunt eum gratis, ad illos qui obsequuntur
 semper gratis, à cruce ad cælum, à patibulo
 contumeliæ ad thronum gratiæ. O benigna
 patientia, quousque sustinuiti locum contu-
 meliosum, populum iniuriosum? Certè non
 vna die, non mense, non anno, sed annis mul-
 tis, quatinus pœnitentiam de commissio age-
 rent, & indulgentiam acciperent. Dormis, Ie-
 sui in monumento nec ore, nec naribus ullos
 strepitus facis: medium noctis silentium te-
 nent omnia, donec surgas, donec euigiles, do-
 nec Apostolos dispersos reuoces. Mittat gal-
 lus vocem, & melius cantet in Christi resurre-
 ctione, quàm in Petri negatione. Raticè tunc
 cantauit dicens, rauce factæ sunt fauces meæ à
 conturbatione hominum, à tempestate pro-
 cellarum. Vbi enim in terra vox clara, quan-
 do Verbum suffocabatur, quinimmo & verbe-
 rabatur, vt veritas supprimeretur? Sed paruo
 interuallo factus est terræ motus, quia surrexit
 Dominus, & cantauit gallus, surrexit Domi-
 nus de sepulcro. Non ter, sed millies gallus
 Christianorū singulis noctibus, singulis ciui-
 tatibus, singulis sanctorū congregationibus
 cātat alleluia, cantat & Christi mortē & resur-

rectionē. Vnde, *Gallo canēte spes redit &c.* Alius psal.
 quidam ineffabilis gallus de cœlo intonuit LVI. II.
 dicens, *Exurge gloria mea, exurge psalteriū & citha-*
ra. O fili, gloria mea! nam filius sapiens gloria
 est patris: exurge, dormisti, somnū cepisti. sa-
 tis est, exurge, vltra nō dormiturus, sed mecū
 in gloria mea vigilaturus ad psallendū, ad ci-
 tharizandū vicinis & amicis meis, qui libēter,
 non impudenter auscultant vocem tuā. Con-
 centū certē cœli cantando & psallēdo dormi-
 re facis. Veni cum psalterio, veni cum cithara
 tua. In psalterio decem chordarum cantabis,
 quia super nouem ordines Angelorū cum ho-
 mine redēpto collocaberis. Citharā quoque
 passionis tuæ percutē in auribus meis: quia illū
 qui nō debuit condēnari condemnauī, & volo
 vt senior ille frater, qui in agro occidit Abel,
 meā audiat Diabolus symphoniā & chorum,
 nō vt delectetur, sed vt cōfundatur, & sit ei in
 testimoniū suæ malignitatis & meæ benigni-
 tatis, qui dedi filiū vt redimerē seruū. Hanc
 portionē mihi hodie cōtulit Dominus de sua
 passione & resurrectione, antequā ad nostrum
 capitulū accederemus. Tingite panē vestrum
 in aquā crassam vituli saginati, & sicut adipe &
 pinguedine repleatur anima vestra. De his ha-
 ctenus. Mitto fratrē Stephanum quē diligitis,
 cum fratrē suo B. quatinus eo pacto sub fratre
 suo domus nostræ de Prouincia curā habeat,
 vt vos & fratrem eius fideiussores habeam de
 indemnitate bonorū nostrorum. Est enim in
 hoc officio nouus, & necesse est vt habeat bo-
 nos adiutores & cōsiliarios, donec per se am-
 bulare didicerit.

EPIST. XII.

169.

VT breuiter tumultuosus & scrupulosus cordis vestri quæstionibus super professione facta, tam in ordine Grandimontis, quam in Cisterciensi, respondeam, id mihi videtur, quod fidem promissi non lædit qui soluit, quod promiserit, is quoque gratiæ meritum superaddit, qui plus soluerit quam ex voto debuerit. Non est meum ordines sanctorum iudicare, neque meis stateris merita illorum appendere. Suo domino stant, aut cadunt, stant autem. Opinionis tamen meæ est, plus rigoris, plus iustitiæ, plus seueritatis, plus etiam discretionis esse in ordine Cisterciensi quam in illo, qui mihi incognitus est, & de quo propter incertitudinem nullam præcipitare audeo sententiam. His omisis, ranas & muscas inquietantes penetralia cordis vestri vtinam abijcere, vel potius exterminare breui admonitione possem! Non ignoro, apud Aristotelem dubitare de singulis non esse inutile. Teneo autem apud Hippocratem, quod mutationes maximæ generant morbos. Dicit Gregorius, quod plantæ, quæ sæpe transponuntur, radices non mittunt. Paulus anathematizat qui aliud Euangelium prædicauerit, quam quod ipse prædicauit, etiam Angelum de cælo. Dominus noster Iesus Christus de Ioanne Baptista dicit, *Quid existis in deserto videre? arundinem vento agitatam?* In parabola quoque Euangelij, dum fatuar

Matt.

x. 7.

fatua virgines irent emere oleum, clausa est
 ianua? Harum auctoritatum sensus hic est: ne
 instabiles simus, ne fluctuemus, ne omni ven-
 to circumferamur, ne dicamus, ecce hic Chri-
 stus, ecce illic. Videte itaque vocationem ve-
 stram, & bases & plantas vestras statuite supra
 petram, & cum Iob dicite, *In nidulo isto moriar,*
& tanquam palma multiplicabo dies. Rogo ami-
 citiam & fraternitatem vestram, vt parcatis
 vobismet ipsis, & pro certo sciatis, quia vnum
 ad salutem sufficiens est & necessarium, Deo
 se committere, nunquam cum Deo disputare.
 Prælato in omnibus obedire, omnia sua onera
 humeris eius imponere, & sufficientem re-
 sponsalem in Dei iudicio contra omnes ad-
 uersarij allegationes tam veras quàm falsas il-
 lum constituere, in simplicitate, non in subti-
 litate, Deum querere.

Iob.
 XXIX.
 18.

PETRI ABBATIS CELLENSIS
 EPISTOLARVM
 FINIS.

Cc



ALEXANDRI III.

PAPAE AD PETRUM

ABBATEM S. REMIGII,

& alios,

EPISTOLÆ LVI.

*Alexander Episcopus servus servorum Dei venerabili
fratri Bartolomæo Beluacensi Episcopo, & dilecto
filio Petro abbati sancti Remigii Remensis
salutem & Apostolicam benedictionē.*



Relatum est ad audientiam nostram, quod monasterium de Flaiaco occasione Abbatis, qui ibidem canonicè dicitur non fuisse electus, ita sit in spiritualibus & temporalibus diminutum, quod ubi forma religionis esse consuevit, sicut dicitur, & exemplum, ibi nulla fere honestatis, vel religionis videantur vestigia remansisse. Asseritur enim, quod postquam idem Abbas per aliquot monachos claustrales & idiotas, personis inscijs & ignaris, quæ extrinseca gerebant negotia, minùs canonicè ipsius mona-

1.

C c ij

sterij fuit administrationem adeptus, non in conseruanda religione, vel in ampliandis bonis Ecclesiæ, sed in distrahēdis his, quæ à prædecessoribus suis ibidem reperit conseruata, studium & sollicitudinem non erubuit adhibere. quoniam igitur prouidendum nobis est, & sollicitè vigilandum, ne præscriptū monasterium in deterius illabatur, si ei non fuerit celeri prouisione cōsultum, discretionī vestræ per Apostolica scripta præcipiendo mandamus, quatinus infra xxx. dies post harum susceptionem, ad locum ipsum pariter accedentes, vel abbatem & monachos ante vos in alio loco congruo conuocantes, de statu monasterij diligentius inquiratis, & qualiter in spiritualibus & temporalibus valeat reformari, ipsis modum & formam præfigatis. Si verò verisimile sit, quòd per abbatem commodè restaurari non possit, eum ab administratione appellatione postposita remouentes, aliā personam idoneam & religiosam, si in monasterio ipso inuenta fuerit, aut de alio religioso loco, eidem monasterio, cum consilio religiosorum virorum, in abbatem prouideatis, per cuius studium & diligentiam spes sit idem monasterium posse in spiritualibus & temporalibus reformari: si præfati monachi ad commotionem vestram in personam qualem diximus non poterunt conuenire. Datum Tusculani 1 v. Non. Maij.

*Alexander Episcopus seruus seruorum Dei dilectis
filijs Petro abbati sancti Remigij Remensis, &
magistro Fulconi, Remensis Ecclesiae Canonico, sa-
lutem & Apostolicam benedictionem.*

Audientiam nostram peruenit, quòd 2.
Io. Sueffionensis terram pupillorum,
quorum Th. ciuis Remensis gerit tutelam,
pignori detinet obligatam: vnde sortem suam
& tantundem dicitur percepisse. Quoniã igitur
vlsurarũ crimen, & quodlibet superabun-
dantiæ genus, vniuersis Christianæ professio-
nis viris est omnimodis abhorrendum, discre-
tioni vestræ per Apostolica scripta mādamus,
quatinus si præfatũ Io. sortem suã de præscri-
pta terra, & tantundem vltra præter expensas
recepisse cõstiterit, ipsum eãdem terram me-
moratis pupillis & tutori eorũ omni occasio-
ne & appellatione cessante restituere & in pa-
ce dimittere, auctoritate nostra districtè co-
gatis. Quòd si ipsum sortem suam aut amplius
exinde nõ suscepisse noueritis, eundem sorte
sua recepta pupillis terrã, dilatione & appella-
tione postposita, reddere constringatis, & hoc
infra xl. dies post harum susceptionem dili-
gentiũs exsequamini.

*Alexander Episcopus seruus seruorum Dei, dilecto
filio Petro abbati sancti Remigij Remensis
salutem & Apostolicã benedictionem.*

Recepta conquestione T. ciuis Remensis, 3.
quod God. quondam Sueffionensis pu-
Cc iij

pillis, quos idem T. habet in custodia, domum, quæ ipsis hereditario dicitur iure competere, detineret, discretioni tuæ nos mandasse recolimus, ut eundem G. ad restituendam prædictis pupillis domum detentam, vel coram venerabile fratre nostro Nouiomensi Episcopo iustitiam exhibendam, moneres & districtius coerceres. Sed eodem G. prout dicitur, antequam ad te litteræ nostræ peruenissent, sublato de medio, cum uxorem eius commouisses, ut alterum horum exsequeretur, respondit non ad se causam filiorum pertinere, & quod filij propter minorem agere non possent ætatem. Vnde quoniam ex dilatione & expectatione ista multa possunt prædictis pupillis iuris sui detrimenta & incommoda prouenire, & nostra interest utrisque pupillis secundum commissum nobis officium prouidere, discretioni tuæ per Apostolica scripta præcipiendo mandamus, quatinus prædictam mulierem infra xl. dies post harum susceptionem moneas, & districtè compellas, ut tutori prædictorum pupillorum pro pueris suis, quorum habet tutelam, in præsentia tua super iam dicta domo respondeat, vel procuratorem, qui pro eis debeat respondere, constituat: aut ipsis eandem domum liberè & quietè dimittat. Tu verò, si experiri voluerit, utraque parte ante te conuocata causam audias, & eam iustitia mediante appellatione remota decidas.

*Alexander Episcopus seruus seruorum Dei dilectis
filiis Petro Abbati S. Remigij, & Fulconi Decano
Remensi salutem & Apostolicam benedictionem.*

CAusam quæ inter Abbatem sancti Vrba-
ni, & Abbatē Dervensem, super Ecclesia
sancti Desiderij & quibusdam aliis noscitur
agitari, vobis, de quorum prudentia & hone-
state confidimus, committimus audiendam,
& sine debito terminandam. Ideoque expe-
rientiæ vestræ per Apostolica scripta manda-
mus, quatinus exinde requisiti fueritis, in
vnum pariter conuenientes, vtramque par-
tem ante vestram præsentiam conuocetis, &
rationibus hinc inde diligenter auditis & co-
gnitis, eandem causam sublato appellationis
remedio mediante iustitia decidatis. Datum
Tusculani v. Kalend. Martij.

4.

*Alexander Episcopus seruus seruorum Dei dilecto fi-
lio Petro abbati sancti Remigij salutem & Apo-
stolicam benedictionem.*

Relatum est nobis, quòd postquã O. sancti
Theodorigi Remensis ciuis dominicam
crucē suscepit Hierosolymā profecturus, Ge-
rardus de Roseio quandam terrā eius violen-
ter inuasit, & eā adhuc detinet occupatā. Nos
autē vxoris prædicti O. lacrymabili postula-
tione, deuicti, & officij nostri debito, quo vni-
uersos qui in Dei seruitio cōmorantur, & eorū
bona attējori studio defensare tenemur, pro-
pensius inclinati, discretionij tuæ per Aposto-

5.

Cc iiij

lica scripta præcipiendo mādamus, quatinus si res ita se habet, memoratū Gerardum studiosè moneas, & auctoritate nostra sub excōmuni-
cationis districtione cōpellas, quòd prætata
terram vxori præfati O. omni contradictione
& appellatione remota, cū fructibus inde per-
ceptis restituat, & in pace dimittat. Deinde
verò si prænominatus Gerardus quicquā iuris
in eadem terra credit sibi cōpetere, cū supra-
dicto O. postquā de partibus Hierosolymita-
nis redierit, corā te ordine iudiciario experia-
tur. Datum Tusculani III. Kalend. Aprilis.

*Alexander Episcopus seruus seruorum Dei, dilectis fi-
lijs, Petro Abbati sancti Remigij, & Fulconi De-
cano Remensi salutem & Apostolicā benedictionem.*

6.

CAusam quæ inter Abbatem Ecclesiæ om-
nium sanctorū de insula Catalaunensi, &
Canonicos sanctæ Trinitatis super quodā cæ-
miterio vertitur, experientiæ vestræ audien-
dam cōmittimus, & sine debito terminādam.
Ideoq. discretionī vestræ per Apostolica scri-
pta præcipiendo mandamus, quatinus cū
exinde fueritis requisiti, vtramq; partem ante
vestram præsentiam cōuocetis, & rationibus
hinc inde plenius auditis & cognitis, eandem
causam infra xl. dies post harū susceptionem
sine debito terminetis. Nihilominus etiam
causam quæ inter ipsos eosdem super quibus-
dā terris Vicedomini noscitur agitari, studio-
sius audiat, & eam mediante iustitia decide-
re studeatis. Datum Tusculani Kalend. Maij.

*Alexander Episcopus seruus seruorum Dei dilecto filio
Abbati S. Remigij Remensis salutem &
Apostolicam benedictionem.*

Viris litteratis atque deuotis tanto propensiori studio providere tenemur, & suis commoditatibus diligentius intendere, quanto ex eorum prouisione sacris dei Ecclesiis fecundior potest fructus & utilitas provenire. Inde est quod nos litteraturam dilecti filij nostri magistri Vberti, & deuotionem quam circa te gerit, studiosius attendentes, ipsum caritati tuæ sollicitè commendamus, rogantes & rogando mandantes, quatinus pro reuerentia beati Petri & nostra, & intuitu deuotionis & litteraturæ suæ, præbendam in Ecclesia sancti Timothei, si qua nunc vacat, vel quæ primò vacauerit, ei concedas liberaliter, & assignes: ita quod ex hoc sinceritati tuæ vberès debeamus gratias agere, & prudentiam & deuotionem tuam multipliciter propter hoc in Domino commendare. Datum Tuscul. iv. Idus Maij.

Alexander Episcopus seruus seruorum Dei venerabilifratrī Siluaneſſenſi Episcopo. & dilecto filio Abbati sancti Medardi salutem & Apostolicam benedictionem.

EX parte dilecti filij nostri Abbatis sancti Remigij Remensis auribus nostris innotuit, quod cum quædam ancilla & quædam

possessiones iudicio Remēsis Ecclesiæ suo fuissent Monasterio restitutæ, quarundem litterarum nostrarum occasione, sicut asserit, exinde postea quamplurima damna sustinuit. Quia igitur ea, quæ iudicio rationabiliter terminata noscuntur, in recidiuam contētionem reuocari non debent; discretioni vestræ per Apostolica scripta mandamus, quatinus rei veritatem diligēter & sollicitē inuestigatis: & si vobis constiterit, iam dictum Monasterium de præscriptis possessionibus & ancilla rationabiliter restitutū fuisse, restitutionem ipsam ratam & firmam permanere, & damna eidem monasterio super his irrogata, omni occasione & appellatōne remota, nostra freti auctoritate restitui faciatis. Datum Tuscul. iv. Idus Maij.

Alexander Episcopus servus servorum Dei, dilectis filiis Abbati S. Remigij, & Fulconi Decano Remensi salutem & Apostolicam benedictionem.

9. **C**Um olim ex parte Vvarini & filij sui Remensium civium causa, quæ inter ipsos, Oldevvinum & Ioannem Remenses burgenses, super domo quadam vertitur, ad nos delata fuisset, eandem causam, si bene meminerimus, venerabilifratri nostro Ambianensi Episcopo commisimus terminandam. Nunc autem, sicut ex transmissa conqueſtione prædicti Oldevvini & Ioannis ad aures nostras peruenit, cū ipsi iuxta mandatum nostrum

ad eundem Episcopum accessissent, ab eo ad audiētiā nostrā appellarūt, iudicem ipsum sicut suspectū vitātes, quoniā prādictus Vvarinus & filius eius familiaritatem cum eodem Episcopo habere dicuntur, & alter eorum de mensa sua esse perhibetur. Quia igitur prādictis Bnrgensibus per responsalem suum ad nos venientibus, altera pars nec venit, nec aliquem pro se responsalem transmisit, nos attendentes, qualiter iudex non debeat in causa constitui, qui meritō alterutri partium possit esse suspectus, causam ipsam experientiæ vestræ committimus: mandantes quatinus vtraque parte ante vestram præsentiā conuocata, causam diligentius audiat, & eam, si vobis constiterit appellatum fuisse, contradictione & appellatione remota, sine debito terminetis. Datum Tuscul. ix. Kalend. Aprilis.

Alexander Episcopus servus servorum Dei, dilectis filiis Abbati sancti Remigni, & Fulconi Decano Remensi salutem & Apostolicam benedictionem.

EX litteris quas Præpositus, & Capitulum sancti Symphoriani nobis miserunt, ad audientiam nostrā noueritis esse perlatum, quòd cū controuersia inter N. clericum, & H. & E. & eorum coadiutores, super quadam domo censuali eiusdem Ecclesiæ, quam prādictus clericus in eleemosynam sibi datam asserebat, & prādicti viri dicebāt sibi iure hæ-

10.

reditario pertinere, fuisset exorta, iidem viri ad venerabilem fratrem nostrum Henricum Remensem Archiepiscopum, & prædictus N. ad nostram audientiam appellavit. Quia igitur absentibus partibus eidem causæ debitum non potuimus finem imponere, eam discretionis vestræ duximus committendam. Inde est quod prudentiæ vestræ per Apostolica scripta mandamus, quatinus eum exinde fueritis requisiti, partes ante vestram præsentiam conuocetis, & rationibus hinc inde auditis diligenter & cognitis, causam ipsam appellatione remota sine debito terminetis. Datum Verulis III. Kalend. Aug.

Alexander Episcopus seruus seruorum Dei, dilecto filio Abbati sancti Remigii, salutem & Apostolicam benedictionem.

II. **P**erlatum est ad audientiam nostram, quod Robertum & Martinum homines monasterij tui trahis in causam, quia de alterius dominio uxores duxerunt. Quia verò huiusmodi occasio friuola & vana videtur, nec decet te indebitum alicui grauamen imponere, discretionis tuæ per Apostolica scripta mandamus, quatinus præfatos homines pro causa quam diximus nullis agites molestiis, vel indebitè grauare præsumas. Veruntamen si super hoc agere secum volueris, in curia tua ordine iudiciario experiaris. Datum Tuscul. III. Idus Decembris.

*Alexander Episcopus seruus seruorum Dei dile-
ctis filiis Abbati sancti Remigij, & Ful-
coni Decano Remensi, salutem &
Apostolicam Benedictionem.*

Dilectus filius noster Abbas sancti Theo-
derici transmissa nobis conqueſtione
monſtrauit, quòd Helisendis mulier, & vir
ſuus eum ſuper quadam terra multipliciter
inquietant, & indebitis moleſtiis agitare præ-
ſumunt. Cumque ſuper hoc cauſam intraf-
ſent, demum ad noſtram audientiam appel-
larunt. Quia vero ex iniuncto nobis officio
vniuerſis Dei fidelibus debitores exiſtimus,
& cuique in iure ſuo adeſſe debemus, diſcre-
tioni veſtræ per Apoſtolica ſcripta manda-
mus, quatinus prædictam mulierem & virum
eius commoneatis, & diſtictè compellatis,
vt ab infeſtatione præfati Abbatis ſuper præ-
ſcripta terra omnino deſiſtant, & eam in pace
ſibi ac quiete dimittant: vel ſi de iure confi-
dunt, in præſentia veſtra ordine iudiciario ex-
periantur. Si autem cauſam intrare decreue-
rint, partibus ante veſtram præſentiam con-
uocatis, & rationibus hinc inde auditis & co-
gnitis, eandem cauſam, remoto appellationis
obſtaculo, mediante iuſtitia decidatis. Datum
Tuscul. II, Idus Februar.

13.

*Alexander Episcopus seruus seruorum Dei dilectis
filiis Abbati sancti Remigij, & Fulconi de-
cano Remensi, salutem & Apostoli-
cam benedictionem.*

13. **D**ilectus filius noster Humulariēsis Abbas
trāsmiſſis nobis litteris intimauit, quòd
Abbas Hamensis quendam hominem suum
cum rebus suis ad habitum regularem susce-
pit: in quo prædictus Abbas Humulariensis iu-
stitiæ suæ queritur nō modicum derogatum.
Quia igitur ex commisso nobis officio vnicui-
que in suo iure adesse debemus, discretionē ve-
stræ per Apostolica scripta præcipiendo man-
damus, quatinus præfatum Abbatem auctori-
tate nostra moneatis, & districtè compellatis,
vt prædicto Abbati prænominatum hominem
cum rebus suis restituat, vel secū amicabiliter
pacificèque componat, aut in præsentia vestra
sufficiētem exinde iustitiam, appellatione re-
mota, exhibeat. Datum Tuscul. xv. Kalend.
Ianuar.

*Alexander Papa Ambianensi Episcopo &
Abbati sancti Remigij.*

14. **C**um olim daniel presbyter ad præsentiam
nostram accedens de fratre nostro Tor-
nacensi Episcopo grauem apud nos querelam
deposuisset, asserens quòd eum idem Episco-
pus, quia sibi soluere noluerat quod ab eo fue-
rat postulatum, officio & Ecclesia sua spoliaf-

set, & eam Vvaltero presbytero concessisset, eidem Episcopo super hoc litteras nostras direximus, secundum quod officio nostro & rationi congruere videbatur. Tandem autem Episcopus proprios nuncios & scripta nobis direxit, significans quod predicto danieli prescripta Ecclesia non fuerit concessa; sed ad probationem vsque ad annum commendata: ita quidem vt si non esset idoneus, & eius conuersationis & vitæ cuius esse deberet, exinde amoueretur, & Ecclesia illa libere posset honestæ personæ concedi. Postremo verò cum idem Daniel, quod tabernam frequentaret, & quod ibi multotiens ita pernoctasset quod omissa dormitione sequenti die missam celebrasset, apud Episcopum accusatus fuisset, & in purgatione quam sibi indixerat, defecisset, ipsum ab officio suspendit, & Ecclesiam in qua ministrabat, ad repræsentationem Abbatis ad quem pertinet, Vvaltero sacerdoti concessit. Quo facto, postea ad venerabilis fratris nostri Remensis Archiepiscopi, & deinde ad nostram audientiam appellauit. Daniel verò hæc omnia inficiens, constanter asseruit, quod à prædecessore suo ad repræsentationem præfati Abbatis præscriptam Ecclesiam habuerit; & hac sola de causa cum Episcopus officio & beneficio spoliasset, quia illi noluit quod postulauerat exhibere, & ei pro se & aliis cōpresbyteris audacter prohibuit, ne tam frequentes aduersus eos exerceret extorsiones. Adiecit insuper, quod cum ipsū propter hoc appellasset, crimina superscripta postea sibi obiecit, quæ

primitus non fuerant obiecta: & cùm esset paratus se inde purgare, ei minis & terroribus suos purgatores subtraxit: nec tamen super criminibus illis vlla potuit ratione conuinci. Cùmque Daniel & Vvalterus se nostro conspectui præsentalssent, & varia & diuersa coram nobis aduersus se allegarent, quia testium & rationum sufficientiam non habebant, in causa illorum non potuimus procedere, nec eam sine congruo terminare. Quapropter de vestra honestatis & discretionis prudentia confidentes, eandem causam prudentiae vestrae committimus audiendam, & sine debito terminandam. Ideoque per Apostolica vobis scripta præcipiendo mandamus, quatinus, cùm exinde requisiti fueritis, congruo loco & tempore pariter in vnum conuenientes, vtramque partem ante vestram praesentiam conuocetis, & rationibus hinc inde plenius auditis & cognitis, causam ipsam, remoto appellationis obstaculo, mediante iustitia terminetis: ita quidem, quòd si legitime vobis constiterit, quòd saepe dicto Danieli praescripta Ecclesia non fuerit perpetuò concessa, sed ad tempus commendata, aut de violentia, & quòd ita in taberna pernoctauerit, quòd altera die nulla praecedente dormitione missam cantasset, rationabiliter conuictus, aut in iudicio, apud Episcopum videlicet, vel Archiepiscopum suum accusatus, vel ad rationem positus, sine coactione, coram pluribus fuerit confessus, ei nullius appellatione obstante super eadem Ecclesia perpetuum silentium imponatis,

ponatis, & ipsum à Vvalteri impetitione destitute compellatis. Cæterum si Danieli Ecclesia illa fuit canonicè tradita, & postea de aliquo crimine non fuit conuictus aut cōfessus, propter quod ea de iure debuerit spoliari, vel si post appellationem, sicut aliquando allegauit, Ecclesia illa fuit spoliatus, ipsam ei faciatis restitui, & pacificè ac quietè dimitti. Postmodum verò, si Vvalterus, vel alius aduersus eum agere voluerit, causam audiat, & eam appellatione remota sine debito terminetis. Datum Tuscul. v. Idus Sept.

*Alexander Papa Ambianensi Episcopo, &
Abbati sancti Remigij.*

CVM ex insinuatione Danielis presbyteri sancti Ioannis in Gandauo nostris fuisset auribus intimatum, quod fratre nostro Tornacensi Episcopo ab eo & quibusdam aliis intolerabilem exactionem pecuniæ annis singulis extorquente, & in consuetudinem deducente, illi eum suppliciter & deuotè rogassent, vt à tali exactione se temperaret; ipse vehementer commotus atque turbatus prædictum Danielem, pro eo quod verbum proposuit, ab officio suspendit, & alios ad hoc terrore minarum induxit, quod quicquid statueret de rebus eorum, pro suo nutu acciperet; & quod graue est, Abbati sancti Petri Gandauensis præcepit, vt iamdicto Daniele prorsus expulso alium loco suo presbyterum ordinaret. Verum prædictus Episcopus transmissis nobis lit-

D d

teris intimauit, quòd cùm Danieli præscripta fuisset Ecclesia ad tempus commendata, & vinolentiæ deditus frequenter in taberna pernoctasset, ita quod nulla dormitatione præcedente missam non timuisset ausu temerario celebrare, & hoc in purgatione deficiens confessus fuisset, eum ab officio suspendit; & ei Ecclesiam, quam non habebat perpetuam, sed commendatam, nihilominus abstulit. Et quoniã eodẽ Daniele omnia hæc inficiante, communis est & quasi generalis querela omnium, quòd memoratus Episcopus presbyteros & clericos suos plusquã mercenarios tractat, & ab eis annuatim graues & importabiles exactiones extorquet; discretioni vestræ per Apostolica scripta mandamus, quatinus hæc omnia diligẽter & sollicitè inquiratis, & quicquid exinde inueneritis, sine admixtione falsitatis nobis meram & puram veritatem vestris literis significetis: vt nos habita rei certitudine confidentiùs & securiùs corrigere valeamus quæ nouerimus corrigenda. Datum Tusculani xvi. Kalend. Octob.

*Alexander Papa Petro Abbati S. Remigij, &
Fulconi decano Remensi.*

16. **E**X insinuatione Villermilatoris præsentium accepimus, quòd cùm à quodam ciue Remensi pro sexaginta & nouem solidis segetem quæ sexaginta etiam solidos valebat emissset, ille non vult sortem accipere, sed vsuras immoderatas exindenitur extorque-

re. Quia verò, sicut accepimus, super hoc ad nostram audientiam est appellatum, vobis, de quorum prudentia & honestate confidimus, causam ipsam committimus audiendam: discretioni vestræ præsentium auctoritate mandantes, ut prædictum ciuem instanter moneatis, & districtè compellatis, ut pretium constitutum recipiens, eundem Vvillermum super vsurarum exactiōe nulla ratione vexare præsumat. Si autem aliam iustam & rationabilem causam prætenderit, eum audiat, & appellatione cessante sine debito decidatis. Datum Tuscul. xvi. Kalend. Iunij.

*Alexander Papa Henrico Remensi
Archiepiscopo.*

Constitutus in præsentia nostra R. presbyter lacrymabili nobis conqueſtione monstrauit, quòd R. & Vvillelmus Canonici Ecclesiæ sancti Donatiani Brugensis, quia inter ipsum & præfatæ Ecclesiæ decanum & canonicos de oblationibus Ecclesiæ eiusdem presbyteri erat suborta controuersia, in eum violentas manus iniecerunt, & post appellationem ad nos factam, ipsum à sua Ecclesia eiicientes, alium in eam intrudere non formidarunt: & Galterus prædictæ Ecclesiæ sancti Donatiani Cantor, & Gillenus Canonicus, in Dominica die, coram omni populo, vestes eius in plena processione lacerantes, illum de choro turpiter eiicere præsumperunt. Quia vero tantæ præsumptionis excessum non pos-

17.

D d ij

sumus, nec debemus impunitum relinquere, ne laici sumant inde materiam in clericos insurgendi, fraternitati tuæ per Apostolica scripta mandamus, quatinus infra quadraginta dies rei veritatem diligenter inquiras, & si ita tibi esse constiterit, præfatos viros, qui in tantam audaciam proruperunt, publicè accensis candelis excommunicatos denuncies, & sicut excommunicatos ab omnibus facias cautiùs euitari, donec iniuriam passo congruè satisfaciant, & de tanto excessu satisfacturi, cum litteris tuis rei veritatem continentibus, Apostolico se conspectui repræsentent. Illum autem, qui in prædictam Ecclesiam post appellationem ad nos factam dicitur esse intrusus, exinde cessante appellatione amoveas, & ipsam iam dicto presbytero cum fructibus inde perceptis restituere non postponas. Postea verò si quis aduersus prænominatum presbyterum super iam dicta Ecclesia agere voluerit, coram te ordine iudiciario experiatur, & tu causam audias, & sine debito decidas. Datum Tuscul. xi. Kalend. Septemb.

Alexander Papa, Petro Abbati sancti Remigij.

18. **E**X parte Guidonis orphani grauem querelam recepimus, quòd cum G. pater suus in extremis laborans ipsi domum, agros, vineas, & quicquid in mobilibus possidebat, iure hæreditario reliquerit possidendum, & in præsentia venerabilis fratris nostri Remensis

Archiepiscopi id ipsum recognouerit, nunc N. & nepotes eius prædictum orphanum in causam trahere, & super hoc indebitè molestare præsumunt. Quia igitur ex suscepti cura regiminis orphanorū patroni tenemur & defensores existere, discretionis tuæ per Apostolica scripta præcipiendo mandamus, quatinus si tibi constiterit in causa ipsa ad nos appellatum fuisse, & prædictum N. & nepotes eius moneas, & auctoritate nostra districtè compellas, vt prædictum orphanum super iam dicta hæreditate molestare desistant, & eam sicut à patre suo concessam, & in præsentia prædicti Archiepiscopi constat fuisse recognitam, in pace & quiete ipsum possidere permittant: aut si quid iuris in ea se habere confidunt, coram te sublato appellationis obstaculo ordine iudiciario experiantur. Datum Tuscul. v. Idus August.

*Alexander Papa Vpsellensi Archiepiscopo, &
vniuersis suffraganeis eius, tam in
Suetia quàm in Gothia
constitutis.*

CONstituti à Domino, licet insufficientibus meritis, super gentes & regna, ex iniunctæ nobis administrationis officio debitoque compellimur aciem nostræ considerationis ad vniuersum commissi gregis corpus extendere, atque omnium fidelium corda institutionis Apostolicæ ac doctrinæ salutaris imbre perfundere; vt sicut in omnem terram

19.

D d iij

exiuit sonus Apostolorum, & in fines orbis terræ verba eorum : ita quoque nos, qui eorum cathedræ præsidemus, qui eis non in vitæ merito, non in operum sanctitate, sed in pastoralis cura & dignitate successimus, verbum salutis, Euangelium Christiænæ atque Catholicæ veritatis annūciemus his qui lōgè, & his qui prope, nomen Apostolicum non inane neque nudum & in sola voce gerentes, sed in executione officij & veritate operis, in quantum nobis Deus dederit, adimplentes. Audiuius enim & audientes non potuimus non dolere, quòd apud vos, tam in Suetia videlicet quàm in Gothia, ex nimia & peruersa non libertate, sed abusione potius & insolentia laicorum, consuetudo pessima & omnino detestabilis inoleuit : ex qua etiam multa illicita prouenerunt, & mala non solum enormia, verum etiam intolerabilia pulularūt. Ipsi enim vobis inconsultis, sicut dicitur, aut contemptis, concedunt & conferunt Ecclesias, quibus volunt : omnia simoniacè, siue per pecuniam, siue per priuatam gratiam vel odium agentes. Ex hoc autē multa dicuntur tam ipso actu quàm exemplo nociua & perniciosa contingere. Quilibet enim & vndecunque sacerdos adueniens, licet ordinationis suæ nullum habeat testimonium, solo mandato seu nutu etiam laicorum, diuina in salutis eorum suæque periculum celebrare præsumit. Vnde nonnunquam euenit, vt monachi fugitiui vel homicidæ, seu quibus-

libet irretiti & notari sceleribus, aut in gradum sacerdotij non promoti, sacerdotio fungi nefaria nimis & damnabili præsumptione non metuât. Quilibet verò vel omnino carēs Ecclesia, vel pauperem habens & ambiens ditiores, potentioribus de parrochia, data vel promissa pecunia, alium non erubescit tā impudenter quàm illicitè supplātare. Accedit ad hæc, quòd clerici, siue ipsi aduersus laicos, siue laici aduersus eos litigātes experiri voluerint, laicorum iudicia subire, & secundum ipsorum instituta siue leges agere vel defendere se cōguntur. Nec solū inferioris ordinis clerici talibus iniuriis fatigantur: verū etiam vos ipsi, si iustitiæ rigorem zelo Dei succensali quando exercetis, aliquam contra vos causam inobedientis gregis inuidia machinante, vel ad igniti ferri examen, vel ad aliquod æquè prohibitum & execrabile iudicium prouocamini: nulla canonibus, qui id prohibent, seu pontificali dignitati exhibita reuerentia vel honore. Ad augmentum verò summamque malorum, clerici passim in eodem regno impune cāduntur, quandoque etiam occiduntur. Et quidem graua sunt ista, nec professionis opera Christianæ, sed inimici potius zizania reputanda. Ad quæ radicitus euellenda, & de medio vestrum penitus extirpanda, tanto acrius vos decet & oportet insurgere, quanto magis desides prælatos negligentesque respiciunt vitia subditorum, & eorum culpæ crimen adscribitur, quod ab

D d iij

Esa.
LVIII. I.
Ezech.
III. 18.

his quibus præfident, & pro quibus etiam reddituri sunt in extremo examine rationem, tam frequenter quàm licèter & impune committitur, maximè cùm per prophetam dicatur, *Clama, nec cesses, annuncia populo meo scelera eorum, & alibi. Nisi annunciaueris iniquitatem suam, sanguinem eius de manu tua requiram.* Et in sacris Canonibus, quos prudentiam vestram ignorare non expedit, scriptum legatur, Negligere, cùm possis, perturbare peruersos, nihil est aliud quàm fouere: nec caret scrupulo societatis occultæ, qui manifesto facinori desinit obuiare. Ex eo autem, quòd peccata ex nimia & longæua licentia in consuetudinem iam venerunt, cùm sit, iuxta quendam Philosophum, infelicitas consummata, & vix videatur locus esse remedio, vbi quæ fuerunt vitia mores fiunt; & iuxta Euangelium, qui mortuus fuerat in peccato iam fœteat: multo maiori opus est ad suscitandum cum Domino mortuum, non sine lacrymis & compassione, conamine, ne desperentur, sicut quadriduanus in monumento, quibus potest inuocato Dei nomine cum ipsius adiutorio subueniri. Vt ergo etiam in eis glorificetur Deus, & sapientia honorificetur à filiis suis, caritatem Moyse pro populo dominū obsecratis, zelum Phinees vindicatis, contritionē David oratis, misericordiam Iesu Christi super Hierusalem flentis & pro Lazaro lacrymantis assumite; & habentes secundum Apostolum scutum fidei, lorica iustitiæ, & galeam spem salutis,

accingimini armatura Dei, & pugnate cum antiquo serpente, eum de obsessis per inhabitantia peccata corporibus expellentes, & diripientes vniuersa, in quibus habet fiduciam, eos quos domum sibi facere nititur, cum gratiæ cælestis auxilio, à vitiorum sordibus emundantes, vt domus Dei, templum videlicet domini sanctum quod estis vos, dici ac fieri mereantur. Nec vos vllus terror ab officij pastoralis executione retardet, recolentes & non tantum verbo, sed opere profitentes, quod ille summus & primus pastor docuisse legitur & fecisse: *Bonus, inquit, pastor animam suam ponit pro ouibus suis.* Et quoniam per errorem, & tam diuini quàm humani iuris ignorantiam, apud vos inoleuisse videntur mala, quæ diximus, & à laicis tanquam licita impune hætenus usurpata, sanctorum patrum statutis tanquam armis vtentes, ipsis inniti debebitis, atque ea & vos cum eis his quæ illicitè committuntur opponere, vt ex eorum scientia & auctoritate dispereant, quæ per abusionem nimiam & ignorantiam succreuerunt. Sanè laicos Ecclesias, vel Ecclesiastica beneficia dignitateque concedere, seu de ipsis vlla ratione disponere, sanctorum patrum ad instar sacrilegij prohibent instituta. Clericos autem, qui ab eis, vel per eos dato pretio, siue gratis, Ecclesiam, vel inuestituram Ecclesiæ seu Ecclesiasticæ dignitatis acceperint, præter ordinis sui periculum excommunicationis etiam pœna condemnant. Nā in Synodo Symmachi Papæ statutum legitur, Non placuit laicum sta-

Ioan.
x. ii.

tuendi in Ecclesia aliquam habere facultatem, cui subsequendi manet necessitas, non auctoritas imperandi. Item. Laicis quamvis religiosi nulla de Ecclesiasticis dignitatibus aliquid disponendi legitur attributa facultas. Item Calixtus Papa. Si quis principum inquit, vel aliorum dispositionem, seu donationem, siue possessionem Ecclesiasticarum rerum sibi vendicauerit, ut sacrilegus iudicetur. Item Paschalis. Nullus laicorum Ecclesiarum bona occupet, vel disponat. Qui verò secus egerit, iuxta beati Alexandri capitulum, ab Ecclesiarum liminibus arceatur. Item Alexander. Per laicos nullomodo quilibet clericus aut presbyter retineat Ecclesiam neque pretio, neque gratis. Item Paschalis. Si quis clericus, abbas, vel monachus per laicos Ecclesiam obtinuerit, secundum Apostolorum sanctorum canones, & capitulum Antiocheni Concilij, excommunicationi subiaceat. Idē. Constitutiones sacrorum canonum sequentes statuimus, ut quicumque clericorum ab hac hora inuestituram Ecclesiarum, vel Ecclesiasticarum dignitatis de manu laici acceperit, & qui ei manum imposuerit, gradus sui periculo subiaceat, & comunione priuetur. Et in hanc sententiam alia multa canonum instituta & sanctorum patrum decreta conueniunt. Ceterum Ecclesias, vel Ecclesiastica beneficia pretij, seu cuiuscunque muneris interuentu conferre simoniacum est, & simoniacam sapit procul dubio prauitatem. Porro Simonis crimen quā sit detestabile, quā hor-

rēdum, ipsa vos eius infamis immanitas ignorare non sinit. ex quo profectò tam dantem quàm accipientem damnatio Simonis, quam sacra Actuum Apostolorum lectio protestatur, inuoluit. Ad cuius condemnationem cùm plurima præter Apostolicam sanctionem sanctorum patrum rescripta manauerint, pauca credimus ex pluribus suffectura. Inter quæ primum sit illud beati Gregorij: Presbyter, inquit, si Ecclesiam per pecuniam obtinuerit, non solum Ecclesia priuetur, sed honore sacerdotij spoliatur: quia altare, decimas, & Spiritum sanctum emere, vel vendere simoniacam heresim esse nullus fidelium ignorat. Idem alibi. Audiuius, dilectissimi, quod nos audire oportuit, sed audisse profectò non libuit: quosdam scilicet sacrorum ordinum esse professores, qui sub munerum datione, vel acceptione, Dei Ecclesias, vel earum sibi sacrificia vsurpant: quod quidem scelus vos non iam dudum acriter correxisse miramur. Iustè enim vterque corripiendus est, & à sanctæ liminibus Ecclesiæ summouendus, & qui pro Ecclesiæ ambitu munera largitur, & qui ut Ecclesiam det, quicquam præsumit accipere. Iste quippe donum Dei emere, hic autem vendere præsumit. Sacrilegio quoque hoc facinus non dispar dixerim, cùm id, quod spòte & sacro deliberationis arbitrio gratis fieri debuit, sub pecuniæ pactione caulatur. Quare, fratres carissimi, quæ taliter facta sunt curiosè refellite, infecta prohibere, vestrisque iussionibus resistentes digno anathematis vinculo

percutere non dubitate. Item, Si quis dator vel acceptor Dei Ecclesias, vel Ecclesiastica beneficia, quæ quidam præbendas vocant, sub pecuniæ interuentu, siue dando emerit, siue accipiendo vendiderit, à Simonis non excluditur perditione. Non solum autem pecunia, sed & quælibet obsequij aut muneris species in huiusmodi criminaliter intercedit. Vnde idem beatus Gregorius, Bene, inquit, cum virum iustum pro præbenda describeret, ait, Beatus qui excutit manus suas ab omni munere. Non dixit solum à munere, sed ab omni munere: quia aliud est munus ab obsequio, aliud à manu, aliud à lingua. Munus ab obsequio est seruitus indebitè impensa, munus à manu pecunia est, munus à lingua, fauor. Qui ergo sacros ordines tribuit, tunc ab omni munere manus excutit, quando in diuinis rebus non solum pecuniam nullam, sed nec etiam humanam gratiam requirit. Quod autem sacerdos, aut quilibet clericus, aliunde adueniens, vel ignotus, sine testimonio & litteris saltem Episcopi sui in aliena Diocesi recipi aut ministrare non debeat, in Calchedonensis legitur Concilio definitum per hæc verba: Extraneo clerico, vel lectori, extra suam ciuitatem sine litteris commendatitijs proprii Episcopi, nusquam penitus liceat ministrare. Item in Concilio Carthaginensi, Clericum alienum, nisi concedente eius Episcopo, nemo audeat retinere, vel promouere in Ecclesia sibi credita. Itē beatus Augustinus in sermone quodam ad populum, Hortamur, inquit, Chri-

stianitatem vestram, vt iuxta sanctorum canonum instituta, in Ecclesiis à vobis fundatis aliunde veniens presbyter non suscipiatur, nisi à vestræ fuerit Ecclesiæ Episcopo consecratus, aut ab eo per commendatitias litteras suscipiatur. Ad hoc, ne Clerici ad sæcularia iudicia pertrahantur, & Romanorum Imperatorum leges prohibent, quæ tanquam canones, vbi canonibus non obuiant, sunt obseruandæ, & sanctorum patrum ac prædecessorum nostrorum auctoritas interdicat. Scribit enim beatæ memoriæ Gelasius Papa dicens: Nemo vnquam Episcopum, aut reliquos clericos, apud iudicem sæcularem accusare præsumat. Item Alexander omnibus orthodoxis: Relatum est ad huius sanctæ & Apostolicæ sedis apicem, cui summarum dispositiones causarum & omnium negotia Ecclesiarum ab ipso Domino tradita sunt, quasi ad caput dicente, Tu es Petrus, & super hanc Petram ædificabo &c. quod quidam æmuli, eiusque sanctæ Ecclesiæ insidiatores, sacerdotes Dei apud iudices publicos accusare præsumant, cum magis Apostolus Christianorum causas ad Ecclesias deferre, & ibidem terminari præcipiat. Taliter præuaricantes præuaricauerunt in Deum suum, & non obediunt præceptis eius. Feruentis verò aquæ, vel candentis ferri iudicium, siue duellum, quod monomachia dicitur, Catholica Ecclesia contra quemlibet etiam, ne dum contra Episcopum non admittit. Vnde Stephanus Papa V. Ferri candentis, inquit, vel aquæ feruentis examinatione confessionem extor-

queri à quolibet sacri non censent canones, & quod sanctorum patrum documento sancitum non est, superstitiosa adinventione nō est præsumentum. Item Nicolaus Papa. Monomachiam in legem non assumimus, quam præceptam fuisse non reperimus: quam licet inisse quosdam legamus, sicut sanctum David & Goliath sacra prodit historia, nusquam tamen ut pro lege teneatur, diuina sanxit auctoritas, cum hoc & huiusmodi sectantes Deum solummodo tentare videantur. Præterea illud adiiciendū mandamus, quatinus populum regimini & gubernationi vestræ commissum decimas Ecclesiis fideliter & deuotē persolvere, sicut ab ipso Domino noscitur institutum, diligenter ac sollicitē moneatis, & si necesse fuerit sub districtione anathematis compellatis, iuxta illud Malachiæ prophætæ in persona Domini loquentis: *Inserte inquit, omnem decimationem in horreum meum, ut sitibus in domo mea.* Vnde in Concilio Maguntienfi: Decimas Deo & sacerdotibus Dei dandas Abraham factis Iacob promissis insinuat, & omnes sancti sacerdotes commemorant. Itē ex Concilio Rothomagenfi: Omnes decimæ terræ, siue de frugibus, siue de pomis arborum, Domini sunt, & illi sanctificantur. Sed quia multi inueniuntur decimas dare nolentes, statuimus ut secundum Domini nostri præceptum admoneantur semel, secundū & tertio. Qui si non emendauerint, anathemate usque ad satisfactionem & emendationem congruam feriantur. Nec tamen ideo ea, quæ

Malac.

III. 10.

Ecclesiis, immo Deo, ipsi, vel parentes eorum contulisse noscuntur, reuocare, vel Ecclesiasticarum personarum dispositioni subtrahere volentes erunt aliquatenus audiendi: quæ si etiam homini contulissent repetere non valerent. Vnde Ambrosius in libro de pœnitentia: Sunt qui opes suas tumultuario mentis impulsu, non iudicio perpetuo, vbi Ecclesiæ cōtulerint, postea reuocandas putant. quibus nec prima merces grata est, nec secunda: quia nec prima iudicium habuit, & secunda habuit sacrilegium. Item ex Concilio Agathensi: Clerici, vel sæculares, qui oblationes parentum aut datas, aut testamento relictas, retinere perstiterint, aut id, quod ipsi donauerint Ecclesiis vel monasteriis, crediderint auferendum, sicut sancta Synodus statuit, velut necatores pauperum, quousque reddant, ab Ecclesiis excludantur. Illos verò qui in clericos violentas manus, nisi fortè se defendentes iniiciunt, pœnam excommunicationis incurrere sacrosancta Romana iam pridem statuit, & inuiolabiliter tenet Ecclesia: nec à quoquam omnino, nisi à Romano Pontifice, vel de mandato eius absolui patitur, aut permittit. Vos itaque ipsius, quæ omnium Ecclesiarum caput est & magistra, vestigiis inhærentes, eius ac nostræ in supradictis omnibus acquiescite sanctioni: & secundum ea quæ à sanctis patribus & prædecessoribus nostris instituta prædiximus, obseruate, atque ab omnibus per Episcopat⁹ vestros quantū in vobis est, faciatis.

firmiter & inuiolabiliter obseruari. Contemptores equidem Ecclesiastica præcipimus vsque ad condignam pœnitentiam ultione percelli. Obedientibus autem sit pax Domini nostri Iesu Christi: quatinus & hîc fructum bonæ actionis percipiant, & in futuro præmia æternæ pacis inueniant. Datum Tusculani iv. Idus Septembris.

*Alexander Papa III. Vniuersis Dei fidelibus
per Daciam constitutis.*

20.

OMnes qui piè volunt in Christo viuere; & ad inbar incircumscripti luminis, & ad illam cælestem patriam, quam nec oculus vidit, nec auris audiuit, nec in cor hominis ascendit, vbi nec fures fodiunt, nec furantur, nec tinea demolitur, peruenire desiderant, diem oportet extremum misericordiæ operibus præuenire, & æternorum intuitu seminare in terris, quæ cum multiplicato fructu largiente Domino recolligere possint in cælis. Scriptum est enim: *Qui parçè seminat, parçè*
 2. Cor. *& metet, & qui seminat in benedictionibus de be-*
 ix. 6. *nedictione metet vitam æternam.* Credimus sanè vniuersitati vestræ innotuisse, qualiter venerabilis frater noster Fulco Estonum Episcopus, inopia & paupertate prematur, & ad conuertendam gentem illam sui Episcopatus, quæ Christianæ fidei ignara est, totis viribus elaboret, & quantam potest sollicitudinem ac diligentiam adhibere procuret. Quia verò particeps mercedis efficitur, qui ei ad tam
 pium

pium & sanctum opus perficiendum consilium & subsidium subministrat, deuotionem vestram monemus & exhortamur in Domino, & remissionem peccatorum vestrorum iniungimus, quatinus de bonis à Deo vobis collatis prædicti Episcopi inopiam subleuant, ei manum auxilij porrigatis, & caritatis solatia diuini amoris intuitu ministretis: ut per hæc & alia bona, quæ Deo inspirante feceritis, apud altissimum peccatorum vestrorum veniam consequi, & ad æternæ felicitatis gaudia mereamini, propitiante Domino, peruenire. Datum Tusculani xv. Kalend. Octobris.

Alexander Papa III. Regibus & Principibus, & alijs Christi fidelibus, per regna Danorum, Norwicensium, Gæsomorum, & Gotthorum constitutus.

Non parum animus noster affligitur, & amaritudine non modica & dolore torquetur, cum feritatem Estonum & aliorum paganorum illarum partium aduersus Dei fideles, & Christianæ fidei cultores grauius insurgere, & immaniter debacchari audimus, & Christiani nominis impugnare virtutem. Veruntamen laudamus & benedicimus Dominum, quod vos in fide Catholica, & in deuotione sacrosanctæ Romanæ ecclesiæ, quæ omnium Ecclesiarum caput est, & magistra à Domino constituta, super omnes alias Ecclesias cælesti priuilegio obtinet principatum;

E c

21.

immobili firmitate persistitis, & Christianæ religionis vinculum & vnitatem seruatis. Vnde quoniam expedit officio nostro, ea quæ ad corroborationem fidei, & animarum vestrarum noscuntur pertinere salutem, vobis sollicita exhortatione suggerere, & studiosius suadere, vniuersitatem vestram monemus & exhortamur in Domino, quatinus diuino cultui intendere, misericordiam & iustitiam & iudicium diligere, à rapinis & iniquis operibus abstinere, deuota Deo & accepta obsequia impendere, prædictæ sacrosanctæ Romanæ Ecclesiæ, tanquam matri & magistræ vestræ, debitum honorem & reuerentiam exhibere, Episcopis, sacerdotibus, & alijs prælatis vestris humiliter obedire, & eis decimas, primitias & oblationes, & alias iustitias suas reddere, & ipsos tanquam patres & pastores animarum vestrarum honorare modis omnibus studeatis, & iura eorum defendere, manu tenere propensius, & conseruare curetis, & armis cælestibus præmuniti, & Apostolicis exhortationibus confirmati ad defendendum Christianæ fidei veritatem spiritu fortitudinis accingamini, taliter in brachio forti ad propagandam Christiani nominis religionem intendentes, vt victoriam de inimicis possitis consequi, & coronam iustitiæ, quæ vobis reposita est, patrante Domino, adipisci. Nos enim eis, qui aduersus sæpe dictos paganos potenter & magnanimiter decertauerint, de peccatis suis, de quibus confessi fuerint & pœnitentiam acceperint, remissionem vnius anni, consili de

miserericordia Dei, & meritis Apostolorū Petri & Pauli, concedimus, sicut his qui sepulcrum Dominicum visitant concedere cōsueuimus. Illis autem, qui in conflictu illo decesserint, omnium suorum, si pœnitentiam acceperint, remissionem indulgemus peccatorū. Datum Tusculani iiii. Idus Septembris.

*Alexander Papa III. Vpschensi Archiepiscopo,
& suffraganeis eius.*

Vice beati Petri Apostolorum principis, largiente Deo & Domino nostro, qui ait *Speculatorem dedi te domui Israel*, super gentes & regna, licet immeriti, in Apostolicæ sedis specula constituti, pontificalis officij debito pro vniuersis compellimur sollicitudinē gerere, & antiquo hosti, qui tanquam sæuissimus leo circuit querēs quem deuoret, pastoralī prouidentia obuiare, ne gregem Dominicum inuadat, & diuersis eum vitiōrum moribus laceat. Inde est quōd vehementi cor nostrū doloris pulsatur stimulo, audito quōd in partibus vestris in tantum libido crudelis & turpis excreuerit, vt quædā mulieres prolis suæ procurent interitū, earumq. corruptores tā horrendo & detestabili facinori nō solum consentire, verū etiam illud persuadere præsumāt, & alij incæstūosa cōiunctione plerique cū iumentis abomināda se pollutione conmaculent: quæ quātum sint graua & creatori nostro penitus inimica, ipsa sceleris atrocitas satis demonstrat, quam nec audientium aures sine ingenti possunt horrore percipere. Si enim

22.

Ezech.
III. 17.

Ec ij

Ioan.
xviii.
31.
Ioan.
xix. 6.

qui iactato in terram semine prolem nolebat ex vxore suscipere, percussus à Domino testamenti veteris serie dinoscitur, qua pœna feriendus esse monstratur, qui natum proprium non abhorret occidere, & mauult interire quàm viuere? Cuius vtique criminis pœna illud etiam persuadentes vel consentientes inuolui beatus Augustinus ostendit dicens, Se periculosè decipiunt, qui existimât eos tantum homicidas existere, qui manibus hominem occidunt, & non potius eos, per quorum consilium, & fraudem, & exhortationem homines extinguuntur. Nam ludæi Dominum nequaquam propriis manibus interfecerunt, sicut scriptum est: *Nobis non licet interficere quemquam.* sed tamen illis mors Domini imputatur, quia ipsi eum lingua interfecerunt dicētes, *Crucifige, Crucifige eum.* Incestum verò quantum sacri abhorreant Canones, Cōcilium Ilerdēse demonstrat: Cum his, inquit, qui incestus se pollutione commaculant, quādiu in ipso detestando & illicito carnis contubernio perseuerant, nec cibum sumere vlli Christianorum, sicut Apostolus iussit, licebit. Porro scelus cum iumentis coeuntium quanta sit animaduersione plectendum, legislator Moyses declarat, cum etiam ipsa interfici animalia iubeat, quæ tali contaminata flagitio indignam retricant facti memoriam. Quia igitur abominabilem horum excessuum præsumptionem seuera satis districtione congruit insequi, prædictos propriæ prolis necatores, & tam ipsum facinus persuadentes, quàm con-

sentientes, seu quoslibet parricidas, aut cum matre, filia, consobrina, vel nepte agentes, quàm cum iumentis coeuntes, artiori pœnitentiæ iugo curetis compescere, & nisi senio confecti, vel corporis fuerint debilitate seu egestate oppressi, eos ad sedem Apostolicam compellatis venire, & beatorum Apostolorum Petri & Pauli limina visitare, vt in sudore vultus sui, & viarum labore superni iudicis iram euadere, & ipsius misericordiam valeant inuenire. Ad hæc qui dormiendo non voluntate, sed casu filios suos oppressisse inueniuntur, triennio, si iidem filii fuerint baptizati, si verò absque sacro baptismo decesserint, quinquennio pœnitentiæ disciplinis subiacent. Sacerdotes, quos ab his conuenit studiosius præcauere, officii sui perpetua executione priuentur. Verùm si qui parentum absentes fuerint, quando eorum filii suffocantur, aut si id sub aliena custodia contigerit, extra culpam erunt, si tamen eos non furiosæ, sed congruenti custodiæ ipsos se crediderint tradidisse. Præterea non sine cordis amaritudine quosdam sacerdotes contra Apostolicas institutiones, cum sicca fæce vini, vel cum micis panis vino intinctis Missam celebrare audiuius: & fideles laicos non Christiano more, absque sacerdotali benedictione & missa matrimonium contrahere. Vnde sæpe illicita contingit fieri coniugia, & inter legitimas personas diuortium interuenire. Sanè cùm omne crimen atque omne peccatum oblati Deo sacrificiis deleatur, quid de cætero pro

E e iij

delictorum expiatione Domino dabitur, quādo in ipsa sacrificij oblatione erratur? Cū enim magister veritatis discipulis suis sacramentū commendaret nostræ salutis, non siccā fecem vini, non micas panis vino intinctas accepit, sed panem & calicē, & benedicens dedit discipulis suis. Quia igitur secus agere Evangelicæ & Apostolicæ doctrinæ contrariū, & consuetudini Ecclesiasticæ penitus est aduersum, Apostolica prohibemus auctoritate, vt cum sicca fæce vini, vel cum micis panis vino intinctis, vel alio modo quā dominus instituit, nullus de cætero sacrificare attemptet: sed secundum formam sacrosanctæ Ecclesiæ Romanæ, quā vos in omnibus imitari oportet, solum panem & vinum aqua mixtum in sacrificio corporis & sanguinis Domini offeratis. Ceterū clādestina & absq; sacerdotali benedictione non debere cōtrahi cōiugia, aut nisi inter legitimas personas, quæ infra septimū gradum nulla cōsanguinitatis linea coniungātur, nec cōtracta, nisi canonicè & consensu Episcopi dissolui, multorū sanctorū patrum declarat auctoritas. Vos itaque muniti sanctorū patrum sanctionibus & Ecclesiasticis institutis, hæc quæ dicta sunt diligēter seruare, & ab alijs præcipite inuiolabiliter obseruari, dispensationis moderamine vtentes, vt qui in quinto, vel quarto gradu coniuncti sunt, eos non separetis, sed ne amplius taliter coniungantur, pontificali auctoritate & distictione prohibeatis. Datum Tuscul. v. Idus Septembris.

*Alexander Papa III. Colon. Linga-
copensi Episcopo.*

23.

EX dispensatione commissæ nobis sollici-
tudinis, & ex debito caritatis viros Ponti-
ficali officio præditos, & morum honestate
ornatos sincera tenemur caritate diligere, &
eorum vota, quæ à rationis tramite non di-
scordant, effectu prosequente complere: ut
tanto fortius ornamenta virtutum appetere,
& honestis insistere moribus studeant, quanto
se ab Apostolica sede maiore honore cogno-
uerint & gratia præueniri, Relatum siquidem
est auribus nostris, quod dilecto filio nostro
Stenar. quondam Lingacopensi Episcopō
claustralem quietem Episcopali honore præ-
ponente, & pontificalem dignitatē in manu
venerabilis fratris nostri Eskili Londensis
Archiepiscopi Apostolicæ sedis legati, & re-
galia corā rege & primatibus regni libere &
spōtanēè resignāte, clerus & populus eiusdem
loci, de assensu prædictorum Archiepiscopi &
regis atque ducis terræ, te in patrē & Episco-
pum suum vnanimiter & concorditer elegerunt.
Verūm licet ei non licuerit absque au-
ctoritate Romani Pontificis, Episcopali di-
gnitati abrenunciare, volentes tamen necessi-
tati Ecclesiæ tuæ paterna prouisione prospici-
cere, & honestati tantorū virorum deferre, id
æquanimiter supportamus, & electionem &
consecrationem tuā ratam & firmā habentes,
eam auctoritate Apostolica confirmamus,

Ee iiij

& tibi in subditis tuis corrigendi vitia & superflua resecandi plenam concedimus facultatem. Tu verò subiectorum culpas tanta redargutionis instantia insequaris, quodd & qui culpabiles sunt suos excessus corrigant celeriter, & emendent, & alii hoc videntes adcommittenda similia non aspirent. Hac tamen consideratione præhabita, ut durè & asperè, leuiter & mansuetè, secundum naturas & qualitates personarum, vitia corrigas subditorum. Decernimus ergo, ut nulli omnino hominum hanc paginam nostræ confirmationis infringere liceat, vel ei aliquatenus contraire. Si quis autem hoc attemptare præsumpserit, indignationem omnipotentis Dei, & beatorum Petri & Pauli Apostolorum eius se noverit incursum. Datum Tusculani VI. Idus Septembris.

Alexander Papa III. Guillelmo Stranensi Episcopo.

24. **F**RATRES & Coepiscopos nostros, & eos precipue, qui in medio prauæ nationis sunt positi, & in remotis mundi partibus constituti, artiori nos conuenit caritate diligere: & ut in commissio sibi amplius talento proficere valeant, & ad cultum iustitiæ & domus Dei decorem fortius accingi, eis Apostolicæ sedis gratiam & fauorem nos conuenit impertiri. Attendentes igitur deuotionis tuæ constantiam, & fidei puritatem, qua beato Petro & nobis immobili firmitate adhærere conspiceris, te sicut venerabilem fratrem

nostrum diligere & honorare, & tuis rationabilibus votis & desideriis debita cupimus benignitate fauere. Inde est quod Ecclesiam tuam sub beati Petri ac nostra protectione recipientes, ea quæ in præsentiarum pacificè ac legitimè possedit, & specialiter Neeric, sicut à rege & Metropolitano tuo, & à venerabili fratre nostro Eskilo Lundensi Archiepiscopo, Apostolicæ sedis legato, tibi confirmata est, & scripti sui munimine roborata, tibi & per te eidem Ecclesiæ auctoritate Apostolica cōfirmamus, & præsentis scripti patrocinio communimus. Statuentes vt nulli omnino hominum liceat, hanc paginam nostræ cōfirmationis infringere, vel ei aliquatenus contraire. Si quis autem hoc attentare præsumpserit, indignationem omnipotentis dei, & beatorum Petri & Pauli Apostolorum eius se nouerit incursum. Datum Tuscul. vii. Idus Septemb.

*Alexander Papa III. Vpsellensi Archiepiscopo
& suffraganeis eius, & Gutherino duci.*

GRauis admodum & difficilis est ad Apostolicam sedem querela perlata, quod Phinni semper imminente sibi exercitu inimicorum, fidem seruare Christianam promittunt, & prædicatores & eruditores Christianæ legis desideranter requirunt, & recedente exercitu fidem abnegant, prædicatores contemnunt, & grauiter persequuntur. Vnde quoniam in hoc Deo illudere, & Christianam

25.

religionem deridere videntur, & illis se duplo filios gehennæ constituentibus, salus & vita eorum tota in terrenis, neglectis cælestibus, conspicitur consistere: nec est dignum, ut eis in aduersitate Christianum nomen defensionem conferat, quod in prosperitate despicere & horrere probantur: vniuersitatem vestram monemus, atque mandamus, quatinus à fallaciis & fraudibus eorum ita prudenter & discretè de cætero caueatis, quòd si ingruerit necessitas, ad auxilium & defensionem vestram non possint recurrere, nisi munitiones, si quas habent, vobis tenendas assignent, aut aliàs adeo sufficientem cautionem exhibeant & securitatem, quòd à modo nullatenus pedes retrahere, aut vestram prudentiam valeant circumuenire: sed Christianæ fidei documenta cogantur tenere firmiter & seruare: ne amplius de eorum numero videantur, de quibus dictum est, Confitebitur tibi, cum benefeceris ei. Datum Tuscul. v. Idus Septembris.

Alexander Papa III. Trundensi Archiepiscopo, & A. quondam Staueng. Episcopo.

36. **L**Ex diuina & humana desiderat, & debitum caritatis exposcit, ut bono & vtilitati communi debeamus intendere, & ad reuocationem & cōuersionem infidelium operam omnimodam & sollicitudinem adhibere. Inde est quòd prudentiam vestram rogamus attentius & monemus, venerabili fratri nostro

Fulconi Estonum Episcopo, qui ad conuertendam gentem illam diuina gratia inspiratus ministerium prædicationis & laborem proponit assumere, Nicolaum monachum, qui de gente illa sicut accepimus est oriundus, virum religiosum atque discretum, in socium concedatis: vt tantum bonum possit perficere, & gentem illam ad agnitionem veri luminis, & ad culturam & doctrinam Christianæ fidei, verbo prædicationis auxiliante Domino reuocare, & vobis exinde valeat æternæ mercedis cumulus prouenire. Datum Tuscul. v. Idus Septemb.

Alexander Papa III. vniuersis tam clericis quàm laicis Lingacopensis Episcopatus.

DEcet vniuersitatem vestram, quæ ad perfectionem virtutum & salutem pertinent animarum, toto studio cogitare, & ea voluntario effectum perficere, per quæ gratiam possitis altissimi acquirere, & ad æternæ felicitatis gloriam cum auxilio diuini numinis peruenire. Cæterum quoniam sine obedientiæ virtute nemo Deo perfectè potest placere, aut acceptum seruitium reddere, per Apostolica vobis scripta præcipiendo mandamus & mandando præcipimus, quatinus venerabili fratri nostro C. Episcopo vestro, sicut bonæ memoriæ Giloni prædecessori suo fecisse noscimini, omnimodam obedientiam & reuerentiam impendatis, & in his quæ Dei sunt, & ad vestrarum animarum spectant sa-

27.

luteum , monitis & mandatis eius humiliter parere curetis, & ei de iustitiis suis integrè, & plenariè respondeatis: ita quòd apud Deum pro humilitate & obedientia vestra peccatorum vestrorum veniam & gloriam valeatis promereri æternam. Si qui autem vestrum ei contumaces vel rebelles extiterint, sententiam quam idem Episcopus propter hos in eos rationabiliter tulerit, auctore Domino ratam & firmam habebimus. Datum Tuscul. xv. Kalend. Octob.

*Alexander Papa III. Guidoni Abbati sancti Nicasi
& M. Radulfo Canonico Remensi.*

28. **S**Vggestum est auribus nostris, quod Galcherus de Castellione villam de Belloi, quæ ad Monasterium beati Remigij pertinet, diabolico furore accensus destruxit, & duas alias villas eiusdem monasterij ita spoliavit, quòd spolia inde abducta xl. librarum pretio æstimantur. Milo verò Malus-vicinus, cum eidem monasterio plura damna & iniurias intulisse dicatur, nec vult inibi satisfacere, neque quod ratio exigit exhibere. Simon autem de Burgo prædicto monasterio apud Vandrecicurt damna plurima & iniurias inferre non cessat. Præterea Burdinus de Besanes terram, quæ prænominato monasterio fuit in eleemosynā data, duobus hominibus, quibus eam Abbas eiusdem loci hereditario iure concesserat, auferre laborat. Sanè presbiter de Alem. in villa præscripti monasterij

quandam domum in damnum eiusdem Ecclesie ædificare præsumit. Ad hæc cum quidam homo sancti Remigij se cum quadam parte hereditatis sue, diuini amoris & caritatis ardore succensus, hospitali sanctæ Mariæ Remensis ad seruiendum hospitibus pro animæ sue remedio reddidisset, parentes eius à longè venientes, quamuis magnam partem bonorum suorum eis dederit, prælibatum monasterium & Ecclesiam Remensem super iam dicta elemosyna inquietare nituntur. Unde quoniam nostra interest, iura Ecclesiarum defendere, & eis contra malefactores suos Apostolicæ protectionis patrocinium ministrare, discretionis vestræ per Apostolica scripta mandamus, quatinus ex parte nostra prædictas personas commoneatis, & districtius compellatis, vt prædicto monasterio de damnis & iniuriis allatis congruè satisfaciant, & ablata restituant, & de cætero ab eius & rerum suarum molestatione penitus conquiescant, vel sub vestræ discretionis examine plenam exinde sibi iustitiam exhibeant. Præterea Abbas sæpe dicti monasterij de Thesaurario Laudunensi, quòd apud Creonam iustitiam suam imminuat, & penitus subtrahat, & de Vvillermo Marescalco nobilis viri Comitis Henrici, quòd cuidam homini suo x. libras abstulerit, & multa ei mala fecerit; & de Abbate de Tepaliis, qui cum dicatur multa illi damna inferre, ei exinde coram venerabili fratre nostro Remensi Archiepiscopo noluit, prout mandauimus, respondere, grauem

ad nos querimoniam transmisit. Ideoque vobis presentium auctoritate iniungimus, ut predictos viros ad refarcienda illata damna prefato Abbati, & ad restituenda ablata, & ad satisfactionem de illatis iniuriis exhibendam, vel ad complementum iustitiæ faciendum, auctoritate nostra monere & districtè compellere studeatis: & in supradictis omnibus cum ea maturitate & providentia procedatis, quod exinde diligentia & sollicitudo vestra valeat non immeritò commendari, & nos discretioni vestræ confidentiùs negotia Ecclesiastica committere valeamus. Datum Tuscul. ix. Kalend. Martij.

*Alexander Papa III. Petro Abbati, & fratribus
sancti Remigij Remensis.*

29. **R**ationabiles & honestas petitiones grantant animo debemus admittere, & vota quæ à rationis tramite non discordant, prosequente effectu complere. Relatum est siquidem auribus nostris, quod cum singulis annis duas procurationes, vnam in depositione sancti Remigij, & alteram in translatione ipsius Remensi Archiepiscopo debeatis persolvere, & singulis quibusque certis numeris & mensuris distinctis, de frescengengiarum pretio nulla æstimatio facta fuisset, venerabilis frater noster Henricus Remensis Archiepiscopus molestiam & inquietationem, quam inde habebatis, pia consideratione respiciens, vobis & monasterio vestro frescengias omni-

no remisit: ita sanè quod in depositione beati Remigij quinquaginta solidos Remensis mouet, & totidem in translatione ipsius Remensibus Archiepiscopis annuatim soluere teneamini, quam vtique remissionem, quemadmodum à prædicto Archiepiscopo facta est, & sigilli sui munimine roborata vt firmam & ratam habeatis, eam auctoritate Apostolica confirmamus, & præsentis scripti patrocinio communimus: statuentes vt nulli omnino hominum liceat hanc paginam nostræ confirmationis infringere, vel ei aliquatenus contraire. Si quis autem hoc attentare præsumperit, indignationem omnipotentis, & beatorum Petri & Pauli Apostolorum eius se noverit incursum. Datum Tuscul. viii. Kalend. Martij.

Alexander Papa III. Siluaneñtensi Episcopo, & Abbati sancti Remigij Remensis.

AD audientiam Apostolicæ sedis noueritis fuisse perlatum, monachos sancti Remigij de Brana religiosi viris Abbati & fratribus sanctæ Mariæ de Brana districtius inhibere, ne familiam Comitis & Comitissæ de Brana ad aliqua audeant recipere sacramenta. Vnde quoniam indecens est eis & inhonestum aliquos indebitis fatigare molestiis, qui in religionis habitu elegerunt Domino deservire, discretionis vestræ per Apostolica scripta mandamus, quatinus prædictos monachos moneatis, & auctoritate nostra compellatis,

30.

vt nulla ratione contra antiquam Comitum vel Comitissæ familiam, vel milites castri, aut superuenientes, siue uxores eorum, aut liberos, vel familias suas, ad Ecclesiam illorum accedere, & ibidem Ecclesiastica suscipere sacramenta prohibeant; aut in præsentia vestra quod iustitia dictauerit exequi non postponant. Nos enim eis dedimus in mandatis, vt coram vobis alterum prædictorum exsequatur. Datum Tuscul. ii. Kalend. Decemb.

Alexander Papa III. Siluaneßensi Episcopo, & Abbati sancti Remigii Remensis.

31.

Dilecti filij nostri Abbas & fratres Ecclesiæ sanctæ Mariæ de Brana transmissa nobis relatione monstrarunt, quod eis dilecti filij nostri Abbas & fratres Corbeiensis quandam non dubitarunt decimam contra ius æquitatis auferre. Vnde quoniam sicut nobis ex voluntate diuinæ prouidentię Ecclesiarum omnium sollicitudo incumbit, sic quoque unicuique in suo iure prouidere tenemur; & quæ inordinatè aut enormiter fiunt, consideratione iniuncti nobis officij, compellimur ad statum rectitudinis reuocare, discretionis vestræ per Apostolica scripta mandamus, quatinus Corbiensem Abbatem & fratres eius moneatis, & districtè compellatis, vt eidem Abbati & fratribus præscriptam decimam postposita occasione restituant, & in pace dimittant, vel sub vestræ discretionis examine plenam exinde sibi iustitiam exhibeant. Si autem causam

causam potius intrare decreuerint, quàm decimam restituere, vos in vnum conuenientes, vtramque partem ante vestrā præsentiā conuocetis, & rationibus hinc inde plenius auditis & cognitis, eandem causam, sublato appellationis remedio, concordia vel mediante iustitia decidatis. Præterea, sicut ex transmissa insinuatione eiusdem Abbatis & fratrum auribus nostris innotuit, Rodulfus quondam Abbas prædictæ Ecclesiæ, monachis sancti Leodegarij quandam decimam vendidit, propter quod eadem Ecclesia græue & enorme patitur detrimentum. Quia verò contractus ille prauus & simoniacus fuit, & principales personæ vendentis scilicet & ementis, si superstarent, perpetua deberent depositione damnari; nihilominus vobis iniungimus, vt eosdem monachos monere & districtè compellere studeatis, quòd recepto pretio illis decimam ipsam appellatione remota restituant, & in pace dimittant: quia non est conueniens, aut consentaneum rationi, vt vna Ecclesia locupletari de aliena iactura. His verò qui tam perniciosum & detestabilem contractum fecerunt, talem si supersunt pœnam infligatis, quòd alij, qui hoc audierint, metum habeant similia præsumendi. Datum Tuscul. 11. Kalend. Decemb.

Ff

*Alexander Papa III. Ambianensi & Tornacensi
Episcopus, & Abbati S. Remigii Remensis.*

32. **E**X transmissa conuestione dilectorum filiorum nostrorum Abbatis & fratrum Ecclesie de Brana auribus nostris innotuit, quod Ioannes miles de Hostel eis quatuor modios frumenti & nouem auenæ, & quinque sextarios ad mensuram Sueffionis violenter abstulit, & in curia eorum XII. modios vini, & in vinea sua duos accipere ausu temeritatis præsumpsit. Præterea quia illos vineam suam tempore suo vindemiare prohibuit, ipsis damnum intulit sex modiorum vini, & eos sextarium frumenti & dimidium, quem monachi sancti Nicolai de Nemore singulis annis eis soluebant, tribus annis amittere fecit: & in nemore suo damnum ad æstimationem lx. librarum illis inferens, terram in qua duos modios vno sextario minus seminare solebant, & terram etiam Roberti filij Vvidelæ, & vn. sextarios vinagiorum, quæ idem Robertus assensu Berneri domini terræ eis sub annuo censu vnus modij frumenti dederat, illicite auferre non dubitauit. Insuper quoque terram quandam, quam longo tempore possederant, & sumptibus quadraginta librarum extirpauerant, per violentiam occupauit; & illis multas alias molestias, iniurias, grauamina, & persecutiones, & damna irrogare non formidauit. Vnde quoniam ex parte prædicti Ioannis nobis fuit iampridem relatum,

quod cū ipse & præfatus Abbas super quibusdam possessionibus, pratis videlicet, terris, & vineis in certas pariter compromississent personas, & personæ illæ arbitratae inter eos fuissent, Abbas in parte earum recepit arbitrium, & in parte refutauit, nos vtrique in suo volentes iure adesse, tibi frater Tornacensis mandauimus, vt prædictum Abbatem moneres ad arbitrium illud inconcussè tenendum. Quia verò nobis est nunc intimatum, quòd non Abbas, sed miles ab arbitrio resiliuit, discretioni vestrae per Apostolica scripta præcipiendo mandamus, quatinus in vnum pariter conuenientes, vtramque partem ante vestram præsentiam conuocetis, ipsos monentes propensius, & mandantes, vt arbitrium super possessionibus illis, super quibus in arbitros spontaneè compromiserunt, firmiter & inconcussè obseruent. Si autem arbitrio stare noluerint, & fideiussores eos non potuerint de iure compellere ad ipsum seruandum, vos tam super iis, de quibus arbitratum est inter eos, quàm super aliis de quibus inter ipsos hinc inde quæstio vertitur, causam studiosius audire & eam amabili compositione, vel mediante iustitia, sine personarum acceptione terminare curetis. Ita quidem quòd quæcunque memoratus Ioannes eidem Abbati & fratribus per violentiam abstulit, super quibus non fuit arbitratum, ipsum ea reddere appellatione postposita compellatis. Si autem præfatus Ioannes à vobis citatus ad præsen-

tiam vestram accedere, vel iudicio vestro parere contempserit, eum appellatione & occasione remota excommunicationis vinculo innodetis, & in terra in qua habitat omnia diuina, præter baptismam paruulorum, & pœnitentias morientium, prohibeatis officia celebrari. Si qua tamen partium duxerit appellandum, vos rationes & allegationes, quæ hinc inde producentur in medium, diligenter & sollicitè audientes, testes quos vtraque pars produxerit, appellatione remota recipiatis, & eorundem iuratorum depositiones fideliter conscribere, & nobis sub sigillo vestro clausas mittere studeatis: terminum vtrique parti congruum præfigentes, quo debeant se cum ipsis attestationibus Apostolico conspectui præsentare. Ceterùm si vos tres huic negotio non potueritis simul interesse, tu frater Tornacensis, cum altero vestrùm, hæc quæ dicta sunt maturiùs exsequamini. Datum Tusculani 11. Kalend. Decemb.

*Alexander Papa III. Abbati & fratribus
Corbeciensibus.*

33. **D**ilecti filij nostri Abbas & fratres sanctæ Mariæ de Brana, transmissa nobis relatione monstrarunt, quòd vos eis quandam non dubitatis contra iuris æquitatem auferre decimam. Vnde quoniam sicut nobis ex voluntate diuinæ prouidentie Ecclesiarum omnium sollicitudo incumbit, sic quoque vnicuique in suo iure prouidere tenemur, & quæ

inordinate aut enormiter fiunt, consideratione iniuncti nobis officij compellimur ad statum rectitudinis reuocare, nos venerabili fratri nostro Siluaneſi Episcopo, & dilecto filio Abbati sancti Remigij Remensis huius rei causam committimus audiendam, & appellatione remota mediante iustitia terminandam. Ideoque per Apostolica vobis scripta mandamus, quatinus iam dictis Abbati & & fratribus præscriptam decimam restituatis, & in pace dimittatis; vel in præsentia prædictorum iudicum plenam exinde iustitiam, sublato appellationis remedio, exhibeatis, eorum super hoc iudicium suscepturi & inuiolabiliter obseruaturi. Datum Tuscul. ii. Kalend. Decemb.

*Alexander Papa III. Abbati S. Remigij, & B.
Archidiacono Remensi.*

CAusam quæ inter Vvarinum de Vvime-
Gricurt, & sororem vxoris suæ, super quodam reddito, cuius partem præfata mulier ad seiure hereditario asserit pertinere, in præsentia venerabilis fratris nostri Remensis Archiepiscopi diutius est agitata, & ad nos per appellationem delata, experiētæ vestræ committimus audiendam, & appellatione remota sine congruo terminandam. Ideoque discretionis vestræ per Apostolica scripta mādamus, quatinus cū exinde requisiti fueritis, vtramque partem ante vestram præsentiam conuocetis, & rationibus hinc inde diligēter auditis

F f iij

34.

& cognitis, eandem causam, sublato appellationis remedio, concordia, vel mediante iustitia decidatis. Datum Tuscul. x. Kalend. Nouembris.

*Alexander Papa III. Abbati sancti Remigij, &
Fulconi Decano Remensi.*

35. **S**ignificauerunt nobis dilecti filij nostri Abbas & fratres Deruenses, quod cum causam, quæ inter eos & clericos sancti Nicolai Catalaunensis super Ecclesia campi Alberti vertitur, venerabili fratri nostro Remensi Archiepiscopo commiserimus terminandam, idem Archiepiscopus causam ipsam magistro R. Remensi Canonico delegauit. Cum autem in presentia ipsius Canonici ytraque pars constituta fuisset, prædicti clerici testes minus idoneos produxerunt super decimis campi Alberti, quas sibi vindicare nitebantur. Prædictus vero Abbas alios testes idoneos coram eodem Canonico ad prænominatos testes reprobandos produxit, quos sicut asserit idem Canonicus recipere noluit: sed causam ipsam intendebat protrahere, & vtramque partem sumptuosis contentionibus fatigare. Vnde idem Abbas se credens in hac parte grauari, ad nostram audientiam appellauit, & appellationi suæ proximè præteritas octauas purificationis beatæ mariæ terminū præfixit. Quoniam igitur propter absentiam partiū nō potuimus de causa cognoscere, eam experientiæ vestræ committimus, discretionis vestræ mandantes, quatinus vtraq. parte ante vestrā præsentiam

conuocata, eandem causam studiosius audiat, & eam infra xl. dies post harum susceptionē, sublato appellationis remedio, sine debito terminetis. Si verò eadem causa alij est fortè commissa, vos duo vel vnus vestrum cum eo vel eis quibus commissa est conueniatis, & litteris istis, siue aliis, si quæ super eadem causa sunt impetratæ, diligenter inspectis, neutris litteris præiudicantibus veritati, causam ipsam cōcordia vel iudicio, appellatione postposita, terminetis. Datum Tuscul. 11. Non. Aprilis.

*Alexander Papa III. Abbati sancti Remigij, &
Fulconi Decano Remensi.*

EX parte Decani Ambianensis & S. quondam nepotis I. quondam Canonici Ambianensis, auribus nostris innotuit, quòd pecuniam, quam Prior de Abbatisvilla mutuo accepit, idem Canonicus per manum iam dicti Decani & nepotis sui Ecclesiis & pauperibus pro animæ suæ remedio distribuendam reliquit. quo defuncto cùm à prænominato Priore Decanus, & S. pecuniam prætaxatam requirerent, eam noluit reddere: sed diffugia querens ad nostram audientiam appellauit, qui nec venit, nec aliquem pro se responsalem transmisit. Quia verò periculosum esset cui libet, nedum viro religioso, pecuniam alterius, & illam maximè quæ pro anima defunctorum Ecclesiis vel pauperibus præcipitur erogari, per violentiam detinere, discretionem vestræ per Apostolica scripta præcipiendo

Ff iiij

mādamus, quatinus prædictum Priorem mon-
neatis, & auctoritate nostra districtè compellatis, vt præscriptam pecuniam, centum videlicet sexaginta libras, aut parū minus, præfato Decano & S. Ecclesiis & pauperibus, secundum quod prædictus Canonicus disposuit, erogandas integre restituat: vel sub vestræ discretionis examine infra duos menses plenam exinde sibi iustitiam appellatione remota exhibeat. Si autem legitimè monitus neutrum horum efficere voluerit, in eum canonicam non differatis exercere censuram. Datum Tuscul. xviii. Kalend.

*Alexander Papa III. Abbati S. Remigij, &
B. Archidiacono Remensf.*

37. **C**onstitutus in præsentia nostra O. subdiaconus, præsentium lator, supplici nobis relatione proposuit; quòd cū dilectus filius noster Abbas sancti Petri Catalaunensis eum ordinandum in Ecclesia sancti Medardi, quæ ad suam dicitur Ecclesiam pertinere, de assensu Capituli sui venerabili fratri nostro Sueffionensi Episcopo præsentasset, vt eum de prædicta Ecclesia inuestiret, & animarum sibi curam committeret, memoratus Episcopusea facere recusauit. Verū quia indecens est & penitus obuium rationi, vt prænominato subdiacono, nisi pro manifesta & rationabili causa, plebis cura denegetur, discretionis vestræ per Apostolica scripta præcipiendo mandamus, quatinus infra xl. dies post harum

fulceptionem, prædictum Episcopum mone-
re ac propensius inducere studeatis, ut prædi-
ctum subdiaconum de præscripta Ecclesia in-
uestiat, & animarum sibi curam committat,
aut quare id facere non debeat, coram vobis
rationabilem causam ostendat. Quòd si mo-
nitis vestris obtemperare contempserit, vos
nostra freti auctoritate sæpèdictum subdia-
conum omni dilatione & appellatione ces-
sante, de præscripta Ecclesia inuestiatis, &
animarum sibi curam committatis: ita qui-
dem, quòd memorato Episcopo de plebis
cura, prædicto vero Abbati de temporalibus
debeat respondere. Datum Tusculani iij.
Non. Februarij.

Alexander Papa III. Abbati sancti Remigij & Fulconi Decano Remensi.

EX transmissa conquestione pauperù do-
mus de Vitriaco ad audientiam peruenit, 38.
quod cùm R. mulier M. mulierem pro qua-
dam domo, quam ijdem pauperes ad se asse-
runt rationabiliter pertinere, coram Archi-
diacono Catalaunensi traxisset in causam,
& Archidiaconus pro eadem R. exinde diffi-
nitionis sententiam tulisset, præfata M. ad ve-
nerabilis fratris nostri Henrici Remensis
Archiepiscopi, R. verò ad nostram audien-
tiam appellauit. Quia verò responsali prædi-
ctæ R. veniente, altera pars nec venit, nec ali-
quem pro se responsalem transmisit, experi-
tiæ vestræ causam ipsam committimus au-

diendam, & sine debito terminandam. Ideoque discretioni vestræ per Apostolica scripta mandamus, quatinus, cùm exinde requisiti fueritis, in vnum pariter cōuenientes, vtramque partem ante vestram præsentiam conuocetis, & rationibus hinc inde plenius auditis & cognitis, eandem causam, sublato appellationis remedio, mediante iustitia terminetis. Datum Tusculani viii. Kalend. Aprilis.

*Alexander Papa III. Abbati sancti Remigii &
B. Archidiacono Remensi.*

39. **Q**uerelam I. Clerici præsentium latoris accepimus, quòd I. de Hospitio circiter vi. libras sibi contradicit exsoluere, quas in præsentia multorum ei se debere publicè recognouit, & alia plura incommoda sibi non dubitat irrogare. Vnde quia vniuersis ex officij nostri debito in suo iure tenemur adesse, discretioni vestræ per Apostolica scripta præcipiēdo mandamus, quatinus prædictum I. de Hospitio monere curetis, & auctoritate nostra districtè compellere, vt iam dicto clerico præscriptam pecuniam sine molestia & diminutione restituat, & de illatis iniuriis congruè satisfaciat, aut exinde sibi sub examine vestro, sublato appellationis remedio, iustitiæ non differat plenitudinem exhibere, & vos causam audiatis & appellatione cessante sine debito terminetis. Datum Tusculani vi. Kalend. Maij.

*Alexander Papa III. Abbati sancti Remigij &
Decano Remensi.*

40.

Dilectus filius noster A. Aquicinenfis Ecclesie Abbas, transmissis nobis litteris intimauit, quod monachi de Gardo inter alias oppressiones & iniurias, quas illi & Ecclesie sue irreuerenter dicuntur inferre, eis quandam decimam terrae Viconiensis ad ipsos rationabiliter pertinentis, iniuste auferre presumunt. Abbatissa vero & moniales sancti Michaelis Vurlensis quandam Ecclesiam suam, sancti Martini videlicet, parochianis suis spoliant, & iura ipsius illicitè sibi usurpantes, parochianos præfati abbatis pro suis excessibus excommunicatos, & ab Ecclesie liminibus sequestratos, ad diuina officia recipiunt, & defunctis exhibent sepulturam. Unde quoniam viris religiosus perniciosum existit ea committere, quæ pericula pariunt animarum, discretionis vestræ per Apostolica scripta præcipiendo mandamus, quatinus infra xx. dies post harum susceptionem prænomintas personas moneatis, & districte compellatis, ut prædicto Abbati & Ecclesie sue iura sua integra & illibata dimittant, & ablata sine molestia & difficultate restituât, vel in præsentia vestra sue iustitiæ plenitudinem appellatione remota exhibeât. Ad hæc quoniâ Ecclesiastica sacramenta eis penitus sunt deneganda, qui à communione fidelium suis peccatis sunt exigentibus sequestrati, nihilominus præsentium auctoritate iniungimus, ut præfatæ

Abbatissæ & monialibus sancti Michaelis, sub pœna ordinis & officij sui prohibeatis, ne quoslibet excommunicatos ad diuina officia vel sepulturam recipere audeant, & si quos excommunicationis vinculo innodatos sepelierunt, eos appellatione & occasione remota detumulare & de cœmiterio eiicere non possint. Datum Tusculani v, Idus Nouembris.

*Alexander Papa III. Abbati sancti Remigij
Remensis & Priori sancti Martini
de Campis.*

41. **E**X transmissa conuestione G. abbatis de Gardo ad aures nostras peruenit, quod Abbas & Canonici Ecclesiæ sancti Petri de Serenicurt monasterium suum quadam terra iniuste propter mutationem ministrantium spoliarunt, & ipsam illicitè detinent occupatam. quia vero inter viros religiosos non debet dissentionis scrupulus remanere, aut materia iurgiorum, quos quieti conuenit supernæ contemplationis vacare: vobis, de quorum prudentia & honestate confidimus, causam ipsam committimus audiendam, & sine debito terminandam. Ideoque discretioni vestræ per Apostolica scripta mandamus, quatinus cum exinde requisiti fueritis, in vnum pariter conuenientes, vtramque partem ante vestram præsentiam conuocetis, & rationibus hinc inde plenius auditis & cognitis, eandem causam infra duos menses sublato appellationis

remedio, concordia, vel mediante iustitia decidatis. Ita quidem quod si vobis constiterit prædictum abbatem à præscriptæ terræ fuisse possessione contra rationem eiectum, ei prius possessionem ipsam appellatione remota faciatis restitui. Si vero huic rei vos ambo interesse non poteritis, alter non minus in eadem causa procedat. Datum Tusculani ix. Kalend. Decembris.

*Alexander Papa III. Præposito & Decano
Remensi.*

EX transmissa conquestione Stephani clerici de Roi accepimus, quod cū pater suus quasdam decimas, quas iure hereditario possidebat, volens peccati maculam euitare, sibi in eleemosynā dedisset, Radulfus Traditor eas ausu temerario sibi vindicare præsumpsit. Cūque memoratus clericus præfatum R. in præsentia venerabilis fratris nostri Archiepiscopi vestri cōuenisset, vt coram eo iustitiam obtineret, compulsus est ad nostram audientiam appellare. Verū licet pater suus eas de iure sibi dare non potuisset, quia tamen tutius vt idem clericus ipsas habeat, quā ad laicum deuoluantur, discretioni vestræ per Apostolica scripta præcipiendo mandamus, quatinus si ita est, infra xl. dies post harum susceptionem, memoratum R. moneatis, & districtè compellatis, vt perceptas decimas prænominato clerico sine diminutione restituat, & de percipiendis nul-

42.

lam sibi molestiam inferat, vel grauamen: ita tamen quòd post decessum prædicti clerici præscriptæ decimæ Ecclesiæ, ad quam de iure pertinerenoscuntur, restitui debeant, pacificèque dimitti. Quòd si monitis nostris parere contempserit, ipsum vsque ad earundem restitutionem excommunicationis vinculo omni appellatione remota astringatis. Datum Tusculani III. Idus Iunij.

*Alexander Papa III. Abbati & Capitulo
sancti Remigij.*

43. **P**astoralis cura & sollicitudo, quam licet immeriti disponente Domino gerimus, nos admonet propensius & hortatur, pro viris Ecclesiasticis, & præsertim pro his qui nullum habent Ecclesiasticum beneficium, & sunt bonæ opinionis & famæ, sollicitos semper & studiosos existere, & Ecclesiarum prælatos vt eis in competentibus beneficijs prouideant propensius inuitare. Hac itaque ratione inducti, & de vestra nihilominus deuotione confisi, pro dilecto filio nostro M. clerico, latore præsentium, qui asserit se omnino Ecclesiæ vestræ deuotum, cuius mores & conuersationem dilecti filij nostri fratres militiæ Templi, circa quos est conuersatus, plurimum commendant, caritati vestræ preces affectuosas porrigimus, deuotionem vestram per Apostolica scripta rogantes attentius, monētes, atq. mandantes, quatinus eidem clerico, diuini amoris intuitu, & pro reuerētia beati Petri ac nostra, in aliquo Ecclesiastico beneficio sibi cōpetenti, vnde vitæ necessaria

in vestra sēper deuotione possit honestè percipere, liberaliter prouideatis: vt liberalitas & deuotio vestra exinde cōmendabilis debeat apparere: nos quoque vobis, propter hoc vberes gratiarū actiones exsoluētes, preces, & petitiones vestras, cū se oportunitas obtulerit, libentiùs & efficacius admittamus. Datum Tusculani v. Idus Augusti.

Alexander Papa III. Remorum Archiepiscopo.

44.

Dilectus filius noster Abbas sancti Petri de montibus transmissa nobis relatione monstrauit, quod Magister scholarū Catalaunensis Ecclesiæ in terra iam dicti Abbatis sibi scholarū magisterium vendicat, & nullū per Abbatem ibi regere scholas permittit. Vnde quoniā cū donū Dei scit scientia litterarū, liberum debet esse cuiq. talentū gratiæ cui voluerit erogare, fraternitati tuæ per Apostolica scripta mādamus, quatinus tam Abbati quā Magistro scholarū præcipias, ne aliquē probū & litteratū virū regere scholas in ciuitate, vel suburbiis, vbi voluerit, aliqua ratione prohibeāt, vel interdicere qualibet occasione presumant. Nō enim debet venale exponi, quod munere gratiæ cælestis acquiritur: sed gratis debet omnibus exhiberi, vt impleatur quod scriptū est, Gratis accepistis, gratis date. Verū licet idem Magister scholarum illud sibi fortè in ciuitate ipsa obtentu prauæ consuetudinis vendicat, hoc in terra Abbatis nō potest aliquatenus vendicare. Datum Tusculani. Idib. Iulii.

*Alexander Papa III. Claveuallensi, & sancti
Remigij abbatibus.*

45. **C**VM dilectum filium nostrum Deruen-
sem abbatem super dilapidatione bono-
rum monasterij sui, & dissolutione, quam per
eundem abbatem audiueramus iampridem
factam fuisse, ad rationem posuissimus, ipse se
super his coram nobis & fratribus nostris pru-
denter & laudabiliter excusauit, asserens quod
cum multitudo Brebentionum partem quan-
dam terræ monasterij sui hostiliter inuasisset,
& ad reliquam occupandam intenderet, coa-
ctus est debita plura contrahere, ut terram
ipsius monasterij posset ab illius iniquæ gen-
tis manibus liberare. Adiecit insuper, quod
reditus eiusdem monasterij quibusdam per-
sonis assignauit, ut ex his eadē debita persol-
uantur, & quod nec in his culpa sua grauatum
sit idem monasterium, nec in aliis dissolutum.
Cæterum quoniam hæc nobis non constant,
horum cognitionem & correctionem expe-
rientiæ vestræ, de qua plenè confidimus, duxi-
mus committendam, discretionis vestræ præ-
sentium auctoritate mandantes, quatinus ad
monasterium ipsum pariter accedentes, rei
veritatem diligenter & sollicitè inquiratis, &
quæ in abbate, vel monachis inueneritis cor-
rigenda, auctoritate nostra, sublato appella-
tionis remedio, adhibita grauitate & mode-
stia corrigatis. Quod si noueritis monasterio
expedire, ut aliqui ex monachis ipsius loci
amo-

amoveantur, eos inde auctoritate nostra, appellatione cessante, amovere minimè differatis, & alios de religiosis illic institutis: ita super his diligentes & providi existentes, quòd studio & diligentia vestra in meliorem statum iam dictum monasterium auctore Domino reformetur, & sollicitudo ac vigilantia vestra præconio multæ digna commendationis existat. Reditus verò ipsius monasterii personis, quibus pro solutione debitorum sunt assignati, in solutioni debitorum convenienter non intendunt, nec eosdem reditus benè dispensant, auctoritate Apostolica auferatis, & eos personis aliis cum consilio Abbatis & fratrum monasterii, qui magis providi sint & discreti, assignare curetis: per quorum studium & providentiam celerius & convenientius eadem debita persoluantur. Si qui autem ex ipsis Abbas & monachi vobis in his contumaces fuerint, vel rebelles, quominus mandatum nostrum in hac parte adimplere possitis, in eos auctoritate nostra, sublato appellationis remedio, canonicam sententiam proferatis: quia nos sententiam, quam in ipsos canonicè protuleritis, auctore Domino ratam & firmam habebimus. Datum Tusculani v. Kalend. Iunij.

*Alexander Papa III. abbati sancti Remigij, &
Falconi Decano Remensi.*

46. **C**onstitutus in præsentia nostra Constantius subdiaconus lator præsentium suarum nobis conquestione monstravit, quod G. de Poegni quandam domum suam sitam in villa de Poegni violenter sibi abstulit, & iniuste detinet occupatam. Vnde cum uterque esset propter hoc in præsentia dilecti nostri R. Canonici Remensis constitutus, prædictus subdiaconus timens se prægrauari, ad nostram audientiam appellauit. Verum quoniam eo veniente altera pars non venit, nec aliquem pro se responsalem transmisit, causam ipsam experientia vestra, de qua plene confidimus, committimus audiendam, & sine debito terminandam. Ideoque discretioni vestrae per Apostolica scripta præcipiendo mandamus, quatinus cum exinde requisiti fueritis, utramque partem ante vestram præsentiam conuocetis, & rationibus hinc inde diligenter auditis & cognitis eandem causam infra xl. dies post harum suspensionem sublato appellacionis remedio concordia vel iustitia terminetis. Datum Tuscul. vi. Kalend. Septemb.

*Alexander Papa III.**

47.

EX transmissa conquestione Euronij meminimus nos causam quæ inter eundem Euronium & Rolandum vertitur, experientia tue commisisse. Sed quia sicut accepimus nondum in eadem causa iuxta tenorem mandati nostri processisti, prædictus R. falsa suggestionem ab Apostolica sede litteras obtinuit: Magister Ioannes verò prædictum Euronium vinculo excommunicationis innodavit. Quoniam igitur sententia non potest, sicut non debet, tenere, discretionis tue per Apostolica scripta præcipiendo mandamus, quatinus præfatum Euronium nostra fretus auctoritate, absolutum publicè denuncies, & præfatum R. de cetero non audias, neque appellationem eius ad præsentiam nostram vlllo modo recipias, & rei veritate à venerabili fratre nostro Catalaunensi Episcopo diligenter inquisita, R. & Sussannam uxorem eius instanter commoneas, & districtè compellas, ut infra viginti dies post harum susceptionem, omni contradictione & appellatione remota, supradicto Euronio res & expensas suas restituat. Si autem monitis tuis obtemperare contempserint, eos vinculo excommunicationis astringas. Postea si idem R. aduersus Euronium agere voluerit, coram venerabili fratre nostro Catalaunensi Episcopo ordine iudiciario experiatur, & ipse causam audiat, & debito fine decadat. Datum Tuscul. vi. Idus August.

G g ij

*Alexander Papa III. abbati sancti Remigij, &
Fulconî decano Remensi.*

48.

FX parte cuiusdam mulieris filiastræ nobilis viri R. militis de Vilario, nostris est auribus intimatum, quod cum ipsa quosdam redditus, qui terragia dicuntur, G. auunculo suo Canonico Ambianensis Ecclesiæ pro xxx. libris iam pridē pignori obligasset, idem Canonicus redditus ipsos sibi restituere contradicit, licet vltra sortem suam pleraque deductis expensis receperisse dicatur. Quoniam igitur in laicis, ne dum in clericis, detestabile & horrendum existit vsurarum crimen, utpote vtriusque testamenti pagina condemnatum, discretioni vestræ per Apostolica scripta mandamus, quatinus vtraque parte ante vestram præsentiam conuocata, exinde rei veritatē diligenter inquiratis, & si ita vobis cōstiterit, memoratum Canonicū moneatis, & nostra auctoritate districtē cōpellatis, ut præscriptos redditus supra dictæ mulieri, dilatione & appellatione cessāte, sine qualibet exactione restituat, & in pace dimittat. Querelas verò alias, si quæ hinc inde vertuntur, studiosius audiatis, & eas concordia, vel mediante iudicio decidatis. Datum Tusculani, IIII. No. Maij.

*Alexander Papa III. abbati sancti Remigij, &
Fulconi decano Remensi.*

49.

CAusam quæ inter R. de Vilers, & An-
lium militem de Becloi super dote vx-
oris prædicti R. diutius est agitata, & ad nos
sicut dicitur per appellationem delata, expe-
rientiæ vestræ, de qua plenè cōfidimus, com-
mittimus audiendam, & sine debito termi-
nandam. Ideoque discretioni vestræ per Apo-
stolica scripta mādamus, quatinus postquam
exinde requisiti fueritis, vtramque partem
ante vestram præsentiam conuocetis & ra-
tionibus hinc inde plenius auditis, & cogni-
tis, eandem causam, si vobis constiterit,
eam ad nos per appellationem delatam fuis-
se, sublato appellationis remedio, concor-
dia, vel mediante iustitia decidatis. Nihilo-
minus etiam præsentium vobis auctoritate
mandamus, vt alias querelas de quibus vo-
bis aduersus se proposuerint audiat, & eas
concordia, vel iudicio terminetis. Si autem
huic causæ ambo non potueritis interesse,
alter vestrum eidem causæ, prout dictum
est, finem imponere non postponat. Datum
Tusculani IIII. Non. Maij.

G g iij

*Alexander Papa III. Abbati S. Remigij, &
Falconi Decano Remensi.*

50.

EX litteris quas nobis venerabilis frater
Enoster Henricus Remensis Archiepiscopus
destinavit, euidenter accepimus, quòd
Balduinus de Aigne hierosolymam profectu-
rus cuidam sorori suæ viduæ Agneti nomine,
quæ in domo sua manebat, tres modios fru-
menti & vnum auenæ de decima sua annua-
tim percipiendos concessit. Mortuo vero eo-
dem B. in peregrinatione, Girardus de Lan-
das, qui eiusdem Balduini filiam duxerat in
uxorem, præfatæ Agneti iam dictos modios
frumenti & auenæ violenter auferre non du-
bitavit. Vnde cum idem Girardus ad curiam
ipsius Archiepiscopi appellatus, & mulier pa-
riter in eiusdem Archiepiscopi essent præsen-
tia constituti, mulier testes legitimos & ido-
neos produxit, & adiudicatis sibi prælibatis
quatuor modiis, de quibus controversia ver-
tebatur, ab eodem Archiepiscopo in eorun-
dem fuit possessionem inducta. Præterea sicut
ex eisdem litteris intelleximus, prænominata
Agnes aliam aduersus eundem Girardum quæ-
stionem proposuit: videlicet quòd pretaxatus
Balduinus quendam habebat filium de non
legitimo matrimonio susceptum, cui cum he-
reditatem suam non posset cōferre, quandam
terram de pecunia sua comparauit, quam ei-
dem filio suo donauit, qui cum patre suo iter
arripiens eam sæpeditæ Agneti, si fortè non

rediret, habendam & perpetuò possidendam concessit: quam postmodum memoratus Girardus illi impudenter auferre præsumpsit. Conquesta est insuper eadem mulier, quòd super terra nepotis sui sibi dimissa indebita sibi violètia fuit illata. Super quibus cum idem Girardus summonitus & mulier ad diem prefixam in præsentia Archiepiscopi cõuenissent, & eadem mulier suos vellet testes producere, Girardus ad nostram audientiam appellauit. quia verò muliere ad nostram præsentiam veniente, altera pars nec venit, nec pro se responsalem transmisit, vobis, de quorum prudentia & honestate confidimus, causam ipsam committimus audiendam, & sine debito terminandam. Inde est quòd discretioni vestræ per Apostolica scripta mandamus, quatinus vtramque partem ante vestram præsentiam conuocetis, & rationibus hinc inde plenius auditis & cognitis, super capitulis, de quibus vobis cõstiterit ad nos appellatum fuisse, controuersias & quæstiones sublato appellationis remedio ita studeatis mediante iustitia terminare, quòd neutra partium pro iuris sui defectu debeat meritò querelari, nec prælibata cogatur vltius ad nos exinde laborare. Datum Tuscul. xvi. Kalend. Decemb.

*Alexander Papa III. Petri abbati sancti Remigij,
& Fulconi decano Remensi.*

§1.

AVdiuimus ex transmissa conuestione quorundam scholarium, qui in Burgo sancti Remigij consistunt, quod cum I. presbyter de Burgo sancti Remigij in die Dominico coram clericis & laicis, postposita modestia clericali, choreas duceret, scholaribus ipsis eundem presbyterum exinde increpantibus & deridentibus, idem presbyter quorundam fauore cum furore & impetu ostium & fenestras scholarum ausu temerario fregit, & in quosdam ex ipsis scholaribus violentas manus iniecit, & his iniuriis non contentus absque conscientia venerabilis fratris nostri Henrici Remensis Archiepiscopi & officialium suorum, in ipsos non citatos nec confessos proxime sequenti die excommunicationis sententiam promulgauit, quam idem Archiepiscopus fecit prout debuit relaxari. In quo utique iidem scholares libertatem suam plurimum fuisse lesam proponunt: cum eam se asserant libertatem habere, ut nullus in eos violentas manus iniicere, aut Ecclesiasticam sententiam audeat promulgare, donec coram magistro suo velint iustitiam stare. His siquidem & aliis iniuriis predicti scholares prouocati, eundem presbyterum, sicut asserunt, ad nostram presentiam appellauerunt, sed per se vel per alium nostrum se conspectui minimè presentant. Quoniam igitur idem presbyter, in hoc, si verum est, multipliciter excessisse videtur, nos excessus eius nolentes, sicut non debemus,

incorrectos relinqui, discretioni vestræ per Apostolica scripta præcipiendo mandamus, quatinus partibus ante vestram præsentiam conuocatis, super his rei veritatem studiosius inquiratis, & si inueneritis prædictum presbyterum choreas in conspectu clericorum & laicorum duxisse, & pro tali causa tantam præfatis scholaribus iniuriam intulisse, aut ipsos ita incautè anathemati subiecisse; ipsum auctoritate nostra, sublato appellationis remedio, de tanta leuitate, præsumptione, & audacia durè & asperè puniatis: & si vobis constiterit eum, vel complices suos, in aliquos prædictorum scholarium, qui essent clerici, violentas manus iniiecisse, ipsos auctoritate Apostolica freti, omni contradictione & appellatione postposita, publicè excommunicatos denunciatis, & faciatis sicut excommunicatos cautiùs euitari, donec passis iniuriam congruè satisfaciant; & cum vestrarum testimonio litterarum Apostolico se conspectui repræsentent; & prohibeatis omnibus, ne præfatos scholares contra libertatem eorum in aliquo molestare audeant vel grauare, quandiu coram magistro suo parati sunt iustitiæ stare. Datum Tuscul. vi. Idus Nouemb.

*Alexander Papa III. sancti Remigij, & sancti
Dionysij Remensis Abbatibus.*

CAusam quæ inter G. Remensem & A. mulierem super quadam domo coram dilecto filio nostro B. Archidiacono Remensi diu-

52.

tius est agitata, & sicut dicitur ad nos per appellationem delata, experientia vestra committimus audiendam, & appellatione remota sine congruo terminandam. Ideoque discretioni vestrae per Apostolica scripta mandamus: quatinus cum exinde requisiti fueritis, utramque partem ante vestram praesentiam conuocetis & si cognoueritis causam ipsam ad nos per appellationem fuisse delatam, rationibus hinc inde diligenter auditis & cognitis, eandem causam, sublato appellationis remedio, concordia vel iudicio terminetis. Datum Tuscul. xvi. Kalend. April.

*Alexander Papa III. presbyteris & aliis clericis
parrochialium Ecclesiarum ad monasterium
sancti Petri de montibus
pertinentium.*

53. **P**ERuenit ad nos, quod cum habitatores parrochiarum vestrarum ex antiqua consuetudine apud monasterium sancti Petri de montibus consueuerunt sepeliri, vos contra consuetudinem illam corpora defunctorum in vestris Ecclesiis sepelitis. Quoniam igitur non decet vos praescripto monasterio quicquam iuris subtrahere, cui iura sua sicut deuoti filij integra conseruare debetis, per Apostolica scripta vobis praecipiendo mandamus, quatinus si ita est in Ecclesiis vestris neminem de habitatoribus ipsis ad sepulturam recipere praesumatis, nisi apud vos elegerint sepeliri: nec

quemquam de cetero laicum infra muros Ecclesiarum uestrarum sepelire tentetis, quia id indignū esset & ab institutione Ecclesiastica penitus alienum. Datum Tuscul. Non. Febr.

Alexander Papa III. V. villermo Senonensi Archiepiscopo & suffraganeis eius.

Redolet Anglia fragrantia & virtute signorum, quæ per merita illius sancti & reuerendi viri, Thomæ quondam Cantuariensis Archiepiscopi, omnipotēs Dominus operatur, & vniuersa lætatur vbique fideiū Christiana religio: pro eo quod ille, qui est mirabilis & gloriosus in sanctis, sanctum suum post mortē clarificauit: cuius vita laudabilis multa fulsit gloria meritorum, & tandem martyrio cōsummata est certaminis gloriosi. Quamuis autem de sanctitate ipsius dubitare nō possit, qui eius vitam & laudabilem conuersationem attendit, & gloriosam considerat passionem; voluit tamen Saluator & Redemptor noster eius sanctitatis insignia post mortem suam magnificis irradiare miraculis: vt qui pro ipso insuperabilis virtutis constantia necessitates & pericula pertulit, sui laboris & certaminis in æterna beatitudine cognoscatur ab omnibus suscepisse triumphum. Nos autem auditis innumeris & magnis miraculis, quæ iugiter per illius sancti viri merita fieri vniuersitas narrat fidelium, & super his non sine magno gaudio per dilectos filios nostros

54.

Albertum Tit. sancti Laurentij in Lucina,
 & Theodinum Tit. sancti Vitalis presbyteros
 Cardin. Apostolicæ sedis legatos, qui eadem
 miracula tanto perspicacius didicerunt, quan-
 to amplius sunt loco vicini, præcipuè certio-
 res effecti, & plurium aliarum personarum te-
 stimonio fidem sicut debuimus adhibentes,
 prædictū Archiepiscopum solemniter in Ec-
 clesia, magno ibidem clericorum & laicorum
 collegio præsentē, in capite ieiunij deliberato
 fratrum nostrorum consilio canonizauimus,
 ipsumque decreuimus Sanctorum catalogo
 adscribendum. Vniuersitatem itaque vestram
 monemus, & auctoritate qua fungimur distri-
 ctè vobis præcipimus, vt natale prædicti glo-
 riosi martyris die passionis suæ solēniter annis
 singulis celebretis, & apud ipsum votiuis ora-
 tionibus satagatis peccatorum veniam pro-
 mereri: vt qui pro Christo in vita exilium, &
 in morte virtutis constantia passionis mar-
 tyrium pertulit, fidelium iugi supplicatione
 pulsatus pro nobis apud dominum inter cedat.
 Datum Tuscul. iv. Non. April.

*Alexander Papa III. Abbati sancti Remigij,
 & Decano Remensi.*

55.

Dilecti filij nostri I. sanctæ Mariæ Virtu-
 ensis Abbatis, de quibusdam grauamini-
 bus Ecclesiæ suæ illatis, nuper querelas acce-
 pimur, quas tanto citiùs sine debito volu-

mus terminari, quāto & Ecclesia maiori paupertate laborat, & Abbas Ecclesiæ negotia minus potest pro imbecillitate virium sustinere. Questus est enim quod Man. presbyter Ecclesiam de Aluesiolo, à bonæ memorie B. Catalaunensi quondam Episcopo Ecclesiæ Virtuensi concessam, violenter ei præsumpsit auferre; & de restitutione conuētus ad appellationis diffugium se dicitur contulisse: sed nec per se, nec per alium præsentiam suam exhibere curauit. Ab Eur. etiam de Coloneio decimas laborum suorum, & censum annuum domus suæ, & à R. de Coloneio & fratribus eius terras ad ius eiusdem Ecclesiæ pertinentes conqueritur iniuste teneri. G. præterea de Bergeriis in molendino apud Clamangiam duodecim annonæ sextarios eidem præsumit auferre, & sæpe commonitus reddere contradicit. Vnde quia plurimum de vestra discretione confidimus, & præfatus Abbas non parum indiget Ecclesiæ præsidio confoveri, per præsentia vobis scripta mandamus, quatinus supradictos viros, & partem eiusdem Abbatis ante vestram præsentiam conuocetis, & querelis Ecclesiæ ac rationibus partium inquisitis diligenter & cognitis, ita eis finem debitum imponatis, vt prænominatus Abbas laborare diutius pro defectu iustitiæ non cogatur. Si autem illi aut copiam suffacere, aut iudicio vestro stare contempserint, censura eos Ecclesiastica compellatis, Episcopo eorum ex parte nostra denunciand-

tes, vt latam in eos sententiam, vsque ad condignam satisfactionem, faciat obseruari. Porro quia supranominatus M. presbyter appellationem suam, vt dicitur, prosequi non curauit, causam illam, si hoc ita constiterit, appellatione remota terminari mandamus. Datum Beneuenti v. Idus Febr.

*Alexander Papa III. sancti Remigij, & sancti
Nicassij Abbatibus.*

56.

EX transmissa relatione E. mulieris accepimus, quod cum G. ab ea quinquaginta quinque solidos Remensis monetæ instanter exigeret, illa proponente quod marito suo, dum esset in patria, idem G. iam dictam pecuniam condonasset, super hoc ad audientiam venerabilis fratris nostri Remensis Archiepiscopi causa fuit deducta: à cuius examine mulier ad nostram audientiam appellauit. Quia verò muliere nuncium suum destinante, altera pars nec venit, nec aliquem pro se responsalem transmisit; experientiæ vestræ, de qua plenè confidimus, causam ipsam committimus audiendam, & sine debito terminandam. Ideoq. discretioni vestræ per Apostolica scripta mandamus, quatinus cum exinde fueritis requisiti, viris discretis & honestis vobis ascitis, vtramque partem ante vestram præsentiam conuocetis, & rationibus hinc inde plenius auditis & cognitis, eandem causam appellatione remota mediante iustitia decida-

tis. Si autem aduersarij G. legitimè citati ad præsentiam vestram venire, vel iudicio vestro parere contempserint, eos auctoritate nostra Ecclesiastica censura compellatis. Datum Tusculani XIII. Kalend. Iunij.

FINIS.



INDEX.

Quæ supra 400. sunt numerum, in
Alexandri epistolis re-
periuntur.

A	B B A T I S- villa Prior 455 Absalon Ar- chiepiscopus Lundensis 348.	<i>Ambianensis Episcopus</i> 411. 414. 417. 450. Decausn & • Canonici 455 <i>Ambrosius gloriosus</i> 314. cita- tur 217. 431
350	<i>Absalon monachus</i> S. Remi- gij 261	<i>Amelius miles de Becloi</i> 469
<i>S. Aegidij Abbas</i>	374	<i>Amici accidentales</i> 44
<i>Aeruginamentum</i>	100	<i>Amicitia comites tres</i> 228
<i>S. Aigulsi Ecclesia</i>	25. 166.	<i>Amicis quidam vtuntur vt ho-</i>
<i>Prior.</i>	82. reliquæ 171	<i>spitij</i> 68
<i>Alanus Episcopus Antisiodo-</i>	33	<i>Amicis quatenus communi-</i>
<i>rensis</i>	33	<i>canda infortunia</i> 24
<i>Albertus Cardinalis Legatus</i>	231. 476. Cancellarius. 333.	<i>Amicorum possessio præstantis-</i>
339. 341. 343. 352.	339. 341. 343. 352.	<i>sima</i> 68
<i>Alexander Papa</i>	426. 429	<i>Amicus nec simulat, nec dissi-</i>
<i>Alexander III. Papa.</i>	1. 3. 4. 5.	<i>mulat</i> 26
42. 43. 225. 229. 231. 235.	42. 43. 225. 229. 231. 235.	<i>Amor in oculis crescit</i> 126. ig-
344.	344.	<i>nea natura</i> 545
<i>Aluesioli Ecclesia</i>	477	<i>Amoris elementa inter amicos</i>
		<i>crebro replicanda nō sunt</i> 22.
		23
		<i>Anastasius Papa</i> 176

Hh

INDEX.

<i>Angeli simpliciter simplices</i>	<i>Belderras Abbatia</i>	297
145.149	<i>Belle vallus Prior</i>	259
<i>Angli, Anglia</i> 129.263.278.	<i>Belliloci Abbas</i>	241
282.	<i>Bello villa</i>	444
<i>Anglia rex Ecclesia pastoribus</i>	<i>Beluarenfis Episcopus B.</i>	403
<i>infestus</i> 284	<i>Beneficio superari turpe est</i>	30.
<i>Ansfredus monachus</i> 286	<i>G. de Bergerijs</i>	477
<i>Appellatio ad Papam</i> 5.176.	<i>Bernardus abbas SS. Crispini</i>	
454. &c.	<i>& Crispiniani</i> 188.190.191.	
<i>Aqua feruentis iudicium</i> 429	200.220.	
<i>Aquicinenfis abbas</i> 459	<i>S. Bernardi obitus</i> 22. laudes	
<i>Arca testamenti Ecclesia figu-</i>	271.381. canonizatio 379.	
<i>ra</i> 339.340	<i>eius in B. virginem affectus</i>	
<i>Arremarenfis abbas</i> 57	271. Cisterciensem ordinem	
<i>Aristoteles citatur</i> 400	<i>amplificat</i> 376. <i>cum furua</i>	
<i>Auenionensis episcopus</i> 323	<i>macula apparuisse dicitur</i>	
<i>Augustidunensis Episcopus</i> 90	380. citatur 382	
<i>Augustinus diues.</i> 314. citatur	<i>Bernerus</i> 450	
119. 158. 160. 217. 380.	<i>S. Bertini monachus</i> 314	
428.436. ab Hieronymo dis-	<i>Boamundus</i> 189	
<i>sensit de loco B. Pauli.</i> 391	<i>Boetius cit.</i> 147. 148. 150. 151	
<i>Autisiodorensis Episcopus</i> 323	<i>Brana comes & comitissa</i> 447	

B

B <i>Alduinus de Aigne</i> 470	<i>Breventiones grassantur</i> 464
<i>Balduinus Nouiomensis</i>	<i>Bullencurtis Abbas</i> 75
<i>Episcopus</i> 41	<i>Burdinus de Besanes.</i> 444
<i>Basilus Prior Carthusiensium</i>	

C

<i>Beastudinis arra bonitas</i>	76		
<i>Beda omnium monetarum nū-</i>		<i>Callistus Papa</i>	426
<i>mosus 314. citatur</i>	120	<i>Campus Albertus</i>	454

INDEX.

<i>Cancellarius Anglia secundus</i>	454.	<i>Ecclesia s. Trinitatis</i>
<i>post regem</i>	44	408.
<i>Canonice</i>	343	<i>Causa in omnibus spectanda</i>
<i>Canonum & decretorum auctoritas</i>	267	216
<i>Cantamerula Prioratus S. Sereni</i>	176.	<i>Caziacenses monachi</i>
<i>Canonici regulares</i>	5. 176	91. 94.
<i>Cardinalium fides erga Pontificem</i>	344	<i>Cellenses monachi</i>
<i>Cardinalatum sibi impositum</i>		197. 225.
<i>dolet Bernardus</i>	356	292
<i>Cantuariensis Prior</i>	243. 257.	<i>Cellensis Abbas</i>
315		193. 220
<i>Caritatis excellentia</i>	360. & seqq.	<i>Cestrensis episcopus</i>
<i>Caritas modum nescit</i>	132. 133.	296
<i>non excidit</i>	260	<i>Cistercienses in Dania</i>
<i>Carnotensis episcopus</i>	26. 292.	38. anteponuntur
320. 326. 327. 376. 383.		<i>Grandimontensibus</i>
<i>Carnis voluptas naturam laedit</i>		400
51. 52. castigatio qualis esse debeat	74	<i>Cisterciensium laudes</i>
<i>Caro edomanda</i>	101	271. Basilica omnes B. Maria dedicata
<i>Carthusienses laudantur</i>	37. in Dania expetuntur	271. Capitulum
37. item a Comite Trecenti	212. 214.	376
217. eorum laus	38. conventus generalis	202. 211.
202. 211.		<i>Cassala</i>
<i>Cassala</i>	246	
<i>Catalaunensis episcopus</i>	2. 467.	<i>Clerici laicorum iudicia subire</i>
<i>Ecclesia magister scholarum.</i>	463.	non debent
<i>Ecclesia S. Nicolai.</i>		423. 429
		<i>Clerici ignoti sine testimonio</i>
		non admittendi
		428. 429
		<i>Clericos percutientium poena</i>
		431

H b ij

I N D E X.

<i>Cluniacenses</i> 354. hortus Do-	<i>bas</i> 188. 220. 228. 251. 291.
<i>mini</i> 49. reprehenduntur ob	320. 327. 345. 372. <i>Conuen-</i>
<i>esum carnum</i> 52. item ob	<i>tus</i> 347
<i>comessationes post completo-</i>	<i>M. Crispinus</i> 291. 299. fit cle-
<i>rium</i> 355. tumultuantur in	<i>ricus</i> 307. 313
<i>electione abbatis</i> 54. 95. co-	<i>Crucis Christi meditatio &</i>
<i>rum antiquus splendor</i> 354	<i>fructus</i> 172. 173. 202. 509.
<i>Collateralis Comitiss</i> 67	<i>imitatio iter in cœlum</i> 289
<i>Coloneium</i> 477	D
<i>Comitissa Trecentis</i> 201. <i>Sues-</i>	
<i>sionensis</i> 376. <i>Brana</i>	
447	D <i>Aemonis & hominis pa-</i>
<i>Compendiensis Cantor & Can-</i>	<i>gna dispar</i> 111. 129
<i>cellarius</i> 240	<i>Dacia</i> 348. 432
<i>Complexio cholericæ & cœlestis</i>	<i>Dani</i> 433
182.	<i>Daniel presbyter S. Ioannis in</i>
<i>Concilium Romanum generale</i>	<i>Gandaui</i> 414. 417
338. 341. <i>Agathense</i> 431.	<i>Decima fideliter soluenda</i> 430
<i>Calchedonense</i> 428. <i>Car-</i>	<i>Deruensis Ecclesia</i> 1. <i>abbas</i>
<i>thaginense</i> 428. <i>Ilerdense</i>	407. 454. 464
436. <i>Maguntienſe</i> 430. <i>Ro-</i>	<i>S. Desiderij Ecclesia</i> 417
<i>tomagenſe</i> 430	<i>Dei simplicitas</i> 146. 159
<i>Concordia inter Abbates ser-</i>	<i>Dei ordinationi non repugnand-</i>
<i>uanda</i> 229	<i>dum</i> 357
<i>Constantius Subdiaconus</i> 466	<i>Dei ad gloriam omnia referen-</i>
<i>Corbeiensis abbas & monachi</i>	<i>da</i> 241
448. 452	<i>Dei dona non celanda</i> 39. 149
<i>Corona primitiæ clericatus</i> 307	<i>Deus hominum ministerio cur</i>
<i>Credere omnibus & nulli vitium</i>	<i>utatur</i> 220
<i>est</i> 295	<i>Dies passionis & resurrectio-</i>
<i>Creona</i> 445	<i>nis Domini</i> 86. 87. 369.
<i>S. Crispini abbas</i> 335	397
<i>SS. Crispini & Crispiniani ab-</i>	<i>S. Dionysij Remensis abbas</i> 473

I N D E X.

Dispensatio in matrimonio 334
 Dispensationes religiosis non vs-
 quequaque reijcienda 212
 S. Donatiani Brugensis Cano-
 nici 419
 Drogo abbas Cellensis eieetus
 198
 Dudo monachus 371

E.

S. E Admundi Abbas 221.
 244
 Ebrietas vitium ignobile 128.
 129
 Ecclesia Dei desponsatione, Pa-
 pa procuratore 336
 Ecclesia nunc ferre non debet
 quod primitiua patiebatur
 15
 Ecclesia à laicis conferri non
 debent 422. 425. 426
 Ecclesia data repeti non debent
 491
 Ecclesiasticorum luxuria & a-
 uaritia taxatur 337
 Ellandus Canon. Remensis
 252
 Electiones Ecclesiastica 55. 199
 Electus abbas recusat 223. 256
 Episcopi officium 10. 20. 424.
 425. 440
 Episcopia obedientia & reue-

rentia debetur 443
 Episcopus sine Papa licentia
 Episcopatum relinquere non
 potest 439
 Eskilus Lundensis Archiepi-
 scopus 35. 195. 290. 350.
 Sedis Apostolica legatus
 441. liberalis 252. 399.
 naufragiū passus 308. 322.
 Clarenallensis fit mona-
 chus 308. 322. 439
 Estonum feritas 433
 Eugenius III. Papa 7
 Euranius 467
 Excaldatus aquam timet 199
 Excestrensis Episcopus. 194
 Excommunicati ad sacramenta
 non recipiendi 459
 Exoniensis Episcopus. 222. 247

F

F Amam negligere præsump-
 ptio est 216
 Ferri candentis iudicium 429
 Finni seu Phinni populi 442
 Flaiaci abbas monasterium di-
 lapidans 403
 Fontisebraldi abbatia 7. abba-
 tissa Matildis 77
 Frescengia 446
 Fulco Episcopus Estonum 225.
 299. 242. 252. 349. 432.

Hh iij

I N D E X.

443. olim monachus 351 Guido abbas sancti Nicasi
 Fulco Canonicus Remensis 405. 444
 Decanus 407. &c. Guillelmus Stranensis Episco-
 pus 446

G

G. de Bergeris 477
 Gallica maturitas 263.
 264

Galcherus de Castellione 444
 De Gardo abbas 460. mona-
 chi de Gardo 459

Gancherus monachus Clare-
 uallensis 323

Ganfredus monachus. Montis
 Dei 257

Gelasius Papa 429

Gerardus de Roseio 407

Cerardus Puella 283

Gilo Lingacopensis Episcopus
 443

Girardus de Landas 470

Gilleberti scripta 314

Gloria vana scabies 88.89

Gothia, Gothi 421.422.433

Gratia Dei 77.78.181

Grandimontenses 124. Prior

329. capitulum 329. 353

Grandimontis ordo 400

Gregorius benignus 314. cita-

tur 12. 213. 296. 313. 400.

417. 428

Gueteri populi ~ 433

H

H Amensis abbas 414
 Hamulariensis abbas 414

Hato Episcopus Trecentis 5

Harvidis neptis Petri Cellensis
 180

Henricus Bellouacensis Episco-
 pus frater regis 39.42. Re-
 mensis Archiepiscopus 29.
 412. 446. 457. 470.
 472

Henricus Comes Trecentis 2.
 632.67.212.217.445

Herueus monachus S. Remigii
 227

Helisendis 413

Hieronymus pecuniosus 314.
 citatus 161. 163. 273. 275.
 276.387

Hilaris profundissimus tan-
 quam mare magnum, 314

Hilduinus Vicedominus &
 Canonicus S. Maria Remen-
 sis 196

I N D E X.

<i>Hilduinus de Vendopera</i>	57	<i>Ioannes Episcopus S. Maclouij</i>	
<i>Hippocrates citatur</i>	400		7.20.22.24.26.29
<i>S. Huberti abbas</i>	156	<i>Ioannes Saresberienfis</i>	165.
<i>Hugo Cluniacensis abbas</i>	54.		167.169.171.178.181.218.
	57.59.65		243.281.284.318.exulat
<i>Hugo de Petriponte</i>	234		71.177. cum Petro Cellense
<i>Hugo Canonicus Remensis</i>			habitat 165.175. fit Episco-
	326		pus Carnotensis 292. 293.
<i>Hugo Archiepiscopus Seno-</i>			294.317.318. taxatur 328
<i>nensis.</i>	9.11.16	<i>Ioannes Miles de Hostel</i>	450.
<i>Hugo scriptor Petri. Cellensis</i>		<i>de Hospitio</i>	488
	189.193	<i>Isidorus citatus</i>	159
<i>M. Hugonis scripta</i>	314	<i>Iuo Carnotensis</i>	384
<i>Hyacinthus Cardinalis</i>	352	<i>Iuramenti relaxatio</i>	281

I

L

I dololatria est Deo debitam		L ac multiplex	103
homini rependere glo-		Lapelee Prioratus	251.
riam	70		295.298.369
<i>IESV nomen</i>	61	<i>Latinsacensis abbas</i>	224
<i>Imago Dei & similitudo quid</i>		<i>Laudunensis thesaurarius</i>	
	115. & seqq.		445
<i>Indulgentia vnus anni concedi</i>		<i>S. Laurentij abbas Leodij</i>	
<i>solita sepulcrum Domini vi-</i>			66
<i>sitantibus.</i>	435	<i>Laus sua cuique grata</i>	88
<i>Ingeniorum triplex gradus</i>		<i>Legatus Domini Papa</i>	165. Ro-
	156	<i>mana curia</i>	226. <i>Romane</i>
<i>Innocentius II. Papa</i>	343	<i>sedis</i>	231
<i>Interdictum in terra militis</i>		<i>Leges citantur</i>	217.429
	452	<i>Leges vbi canonibus non ob-</i>	
<i>Inuadiare</i>	58	<i>uiant tanquam canones ob-</i>	
<i>S. Ioannis Abbas</i>	90.335	<i>seruanda</i>	429

Hh iiij

I N D E X.

<i>S. Leodegarij monachi</i>	449	<i>positus</i>	204.344.345
<i>Leodiensis Episcopus</i>	343	<i>Materia commune subiectum</i>	
<i>Liberalis Dei imitator</i>	36	<i>transformationis</i>	151
<i>Lingacopensis Episcopus</i>	439.	<i>Matildis abbatissa Fontisebraldi</i>	81
443			
<i>Lingomensis Episcopus</i>	90	<i>Matrimonij impedimentum ex</i>	
<i>Lucius Papa II.</i>	7	<i>consanguinitate</i>	12. 13. 235.
<i>Lugdunensis Archiepiscopus</i>		438	
257		<i>Matrimonij supputatio</i>	35
<i>Lundensis Archiepiscopus</i>	35.	<i>Matrimonium sine sacerdotis</i>	
348.349		<i>benedictione celebrari non</i>	
		<i>debet</i>	437

M

M <i>Aclouiensis Episcopus</i>		<i>S. Medardi Abbas</i>	228
<i>pauper</i>	29	<i>S. Medardi Ecclesia.</i>	456
<i>MARIAE Virginis laudes</i>		<i>Mel multiplex</i>	104
266.anno xy. etatis salutata		<i>Meldenses Episcopi</i>	294
<i>Iuonis sententia</i>	384.	<i>Mercurij aceruus</i>	60
<i>multa eius singularia</i>	386. ei	<i>Meridies quid significet</i>	370
<i>dicata omnes basilica Ci-</i>		<i>Meritona Canonicus</i>	324. 367
<i>stercienses</i>	271. quomodo om-	<i>S. Menenni abbas reiectus ob</i>	
<i>ne peccatū debellarit, diuer-</i>		<i>negligentiam</i>	7
<i>sa sententia Petri & Nico-</i>		<i>Milo Malus-vicinus</i>	444
<i>lai</i>	272. 378. 392. &c. festū	<i>Miracula non fugendo</i>	257
<i>Conceptionis sine sedis Apo-</i>		<i>Misericordia commendatio</i>	285
<i>stolica decreto non probat</i>		<i>Missam cum facibus vini, &</i>	
<i>Petrus aduersus Nicolaum</i>		<i>micis panis vino tinctis ce-</i>	
268		<i>lebrantes Sueci reprehenduntur</i>	437. 438
<i>S. Martini de capis Prior</i>	355.	<i>Missæ non præcedente dormi-</i>	
460		<i>tione</i>	416
<i>Marsne prabenda S. Remigij</i>		<i>Molismenses laudantur</i>	300.
19. 220. 245. 343. 345. Præ-		<i>degenerant</i>	ibid.
		<i>Molismensis abbas</i>	68. 90. Prior

I N D E X.

86. à Molismensibus oris Cister-
cienses 304

Monachi in Anglia depravati
184

Monachi à quibus iudicandi
296

Monomachia canonibus vetita
429. 430

Montis Dei monachi 96. 100.
108 121. 122. 204. laudan-
tur 100. 113 204. 213. 214.
Prior 220

Mulierum prolem necantium
pœna 437

Mundi vanitas 166

N

Neric loci nomen in Sue-
sia 441

Negligentia omnis non aequè
culpanda 203

S Nicasii Abbas 220

S. Nicolai de Nemore Abbatia
450

Nicolaus Papa 430

Nicolaus S. Albani monachus
235. 263. eius epistola pro
Conceptione B. Mariae 378

Nicolaus Clareuallensis mona-
chus 142. 156. 161. de nigro
factus albus 155. taxatur
357. eius sermo de S. Victo-

re 160

Nicolaus Cartusienſis Montis
Dei 218

Nicolaus monachus Esto patria
443

Nocturni temporis commoda
188

Nonienſis Prior 223. 256. 259

Noviomenſis Episcopus 41.
406

Norwvegenſes 433

Norwvicenſis monachus 184

O

Ottavianus Antipapa
42

Omnium Sanctorum de Insula
Catalaunenſi abbas 343.

408

Origenes ſuauiſſimi eloqui 314

Oſienſis Episcopus 352

Otrannus Trecentſis 249

P

Papa caput Eccleſie 239.
Cathedra Apoſtolo-

rum præſidet 422. iura

Eccleſiarum defendere de-

bet 445. omnibus in ſuo iu-

re adeſſe 445. pupillis pro-

videre 406. 421

I N D E X.

Papa omnium Ecclesiarum sollicitudo imposita. 1. 3. 7. 8.
 336. 344. 421. 429. 448
Parisiensis describitur 177
Paschalis Papa 426
Patientia cum humilitate 12
S. Pauli Prior 259
Peccata expiata an dissimulare liceat 249
Peccati gradus quatuor 185.
triplex significatio 388
Peccatum multis modis sentitur 275
Perseuerantia virtutem perficit 202
Petitionis dignitas supplet insufficienciam postulantis 3
S. Petri de montibus abbas 241.
 343.
S. Petri Catalaunensis 436.
 463. 475
S. Petri Gandauensis abbas 417
Petrus Cardinalis S. Chrysgoni 306. 311
Petrus Cluniacensis abbas 45.
laudatur 48. 57
Petrus abbas Cellensis sermones scribit pro Episcopo Parisiensi 51. *Henricum Episcopum Bellouacensem hortatur, ut Alexandro adhaereat contra Octavianum*

42. *de amicitia rogatur à Thoma Cancellario Angliae*
 44. *sententias componit pro Matilde abbatisa Fontu-ebaldi* 81. *Montis Dei habitationem quanti fecerit* 100. 123. 203. 215. *ut communitarium scribat rogatur à R. Clarenallensi* 135. *S. Thoma eumbam visitare cupit* 222. 243. 246. *opus quoddam suum mittit Abbati Latiniacensi* 224. *eius scripta magni sunt* 262. *sermones expetuntur* 314. *scribit de disciplina claustrali* 324. 328. *Inuitatus ad Concilium generale excusat* 338. *S. Remigij Ecclesiam restaurat* 354. 369. 371. *electus Episcopus Carnotensis* 376. *Cisterciensium preces implorat* 377
Petrus Meldensis Episcopus 294
Petrus abbas Silae maioris 223
M. Petri scripta 314
Petrus de Tornella 12
Petrus de Viuaris 30
Philippus Colonienfis Archiepiscopus 18
Philippus Clarenallensis mona-

INDEX.

chus 323
Philosophus quidam citatus
 424
Phinni populi 442
Pictauiensis Episcopus 4
Pignoratitia actio 65
Plato citatur 147
G. de Pœgni. 466
Prænestinus Episcopus 351. 356.
 360. eius mors & miracula
 373
Prælati officium 56. 71. 73. 74.
 424. 425. præcipua virtus
 moderatio 280. græve onus
 56
Prælatorum periculo fiunt trans-
gressiones subditorum 52.
 423. 424
Præpositi culpa an ad singu-
los monachos deriuetur
 227
Præmonstratenses in Dania
 38
Propositi mutatio 326
Præliaci abbas 73
Præuinenfis Ecclesia S. Petri
 125
Purgatorium 381

Q

Q *Vintiacensis abbas*
 90

R

R *Adulfus canonicus Re-*
mensis 444. 466
Radulfus Traditor 462.
Recensis Comes 234
Reddingensis monachus 263
Regalia Episcopatus 439
Remensis Archiepiscopus 2.
 445. 447. 453. 478. *Ar-*
chidiaconus B. 453. *Præpo-*
situs & Decanus 462
Remense hospitale S. Mariæ
 445
S. Remigij monasterium 196.
 409. 444. 462. *copiali-*
brorum instructum 195. *cum*
Archiepiscopo transigit de
frescengius 446. *Domum*
habet in Provincia 375. 399.
in Anglia 261. 291
S. Remigij Burgus 472. *Ca-*
strum 287
Responsalis 401. 411. 457. 471
Richardus Cantuariensis Ar-
chiepiscopus 317
Richardus frater Ioannis Sa-
resb. 218. 247. *Canonicus*
regul. 219. 254. 260. 298.
passionem B. Thomæ scribit
 220
Richardus mon. Montis Dei
 210. 218

I N D E X.

- | | |
|--|---|
| <p>S. Richarij abbas 280</p> <p>Robertulus mon. Montis Dei 210. 218</p> <p>Robertus Comes 335</p> <p>Robertus filius Videla 450</p> <p>Rodulfus abbas S. Mariae de Brana 449</p> <p>Rogerus Cartusienfis 37. 218</p> <p>Rosa 461</p> <p>Rolandus S. R. E. Cancellarius</p> <p style="text-align: center;">9</p> <p>Romam ire iubentur qui grauiora commiserunt 437</p> <p>Romana Ecclesia omnium caput & magistra 431. 433.</p> <p>Romana curia est dies festos in Ecclesia instituere 268. subreptiones 344</p> <p style="text-align: center; margin-top: 20px;">S</p> <p>Sacramentum Eucharistia 104</p> <p>Sanctorum intercessio 22. 191. 222. 243. 476. Natalitia feria 190. 476. veneratio 246</p> <p>Schismaticus error 284. Angelus 413</p> <p>Scholarium priuilegium 472</p> <p>Scholarum munus liberum esse debet & gratuitum 463</p> <p>Scriptura sacra speculum no-</p> | <p>strum 305</p> <p>Scriptura sensus peruersus abominabilis 135. sensus diuersi 116. lectionis fructus 138</p> <p>Scriptura non nitentis doctrina nullum robur 263</p> <p>Seneca 51. 68. 88. 150</p> <p>Senectus spiritus & corporis 367. 368</p> <p>Senonensis Archiepiscopus 2. 233. translatus ad Reimssem 292</p> <p>Serenicurtis Abbas 460</p> <p>Sermones Ecclesiastici quales esse debeant 32</p> <p>Sermonis boni utilitas 108. 109</p> <p>Siluanectensis Episcopus 447. 448. 453</p> <p>Simon Archidiaconus, Meldensis Episcopus 294</p> <p>Simon Prior de Môte Dei 204. 213</p> <p>Simon de Burgo 444</p> <p>Simonia vitium 426. 427</p> <p>Simpliciter simplex quid dicatur 145</p> <p>Solitudinis fructus & laudes 84. 182. 183</p> <p>Stabulensis Abbas 203</p> <p>Stauengarenfis Episcopus 442</p> <p>Stephanus mon. Montis Dei 218</p> |
|--|---|

I N D E X.

Stephanus Papa 429
Sueonum Rex 242.450
Suefionis 194. *Episcopus* 335.
 456. *Præpositura* 6. *mensura*
 450
Suetia 421.422.435.437
Sylva maioris abbas 223.256.
 258
Symmachus Papa 425
S. Symphoriani Præpositus &
Capitulum 411

T

T *Empli militia fratres*
 462
Tenaliensis abbas 445
Terragia reditus 468
Tentonici 344
Theobaldus Cantuariensis Ar-
chiepiscopus 318
Theobaldus Cluniacensis ele-
ctus. 365
Theobaldus Comes 5. *Comes*
Dapifer regis 6
Theobaldus abbas SS. Crispini
& Crispiniani 364
Theobaldus Molismensis abbas
 248.304
Theobaldus Parisensis Episco-
pus 31
Theodinus Cardinalis Lega-
tus 476
S. Theoderici abbas. 413

Thomas Anglicus mon. S. Re-
mig 258
Thomas Cantuariensis Ar-
chiepiscopus, *Ecclesia sue*
ablata repetit à rege Anglia
 14. *Apostolica sedis legatus*
 17. *Cancellarius regis An-*
glia 43. *exulat* 284. *eius*
martyrium 218. 220. 222.
 236. 243. 246. 294. 315.
miracula 222. 257. *sepul-*
cum frequenter 237. 246.
 267. 315. *reliquia in altari*
 258. *canonicatio* 475
S. Timothei canonicus. 196.

409

Tornacensis Episcopus 415.
 417.450
Transgulare IIII
Trecensis Episcopus 294
Trecensis curia 5
Trinitatis mysterium 161
S. Trinitatis Canonici Cata-
launi 408
Trundensis Archiepiscopus 8
Tusculanus Episcopus 372

V

V *Allis Dei Prior* 232
Vallis S. Petri Prior. 212.
 220. 232. 233. 249
Vallis serena abbas 335

I N D E X.

<i>Veritas in Anglia suffocata</i>	192.212	<i>Vitriaci domus pauperum</i>	
221			
<i>Veritatis amatores aliquando</i>	457	<i>Vnum querendum, non multa</i>	
<i>extra veritatem loquuntur</i>			
178			
<i>Veritatis vis & dignitas</i>	264.	<i>Vpsellensis Archiepiscopus</i>	461.
265			
<i>Viconiensis terra.</i>	459	<i>S. Urbani abbas</i>	407
<i>R. Miles de Vilario</i>	468. de	<i>Vsura Christianis abhorrenda</i>	
<i>Vilers</i>	469		
<i>Villa Mauri Canonici</i>	9. Eccle-		
<i>sia</i>	67	<i>Vvandrecicurt</i>	444
<i>Villariensis abbas</i>	285.289	<i>Vvarinus de Vvimericurt</i>	453
<i>Vinagia</i>	450	<i>Vvigornensis Prior</i>	260
<i>Vini bonitas calicis accrescit</i>		<i>Vvillhelmus clericus</i>	288
<i>idoneitate</i>	59	<i>Vvillhelmus Marefcalcus Hen-</i>	
<i>Virginem corruptam quo sensu</i>		<i>rici Comitis</i>	445
<i>Deus incorruptam facere nō</i>		<i>Vvillhelmus Remensis Archi-</i>	
<i>posse dicatur</i>	275. & seqq.	<i>episcopus</i>	293.335
<i>Virtuensis abbas S. Maria</i>	333.	<i>Vvillhelmus Senonensis Ar-</i>	
476		<i>chiepiscopus</i>	475
<i>Virtus iacet sine palastra</i>	75.	<i>Vvintoniensis Episcopus</i>	65
194		<i>Vvischardus Comes de Ru-</i>	
<i>Virtutum odor perpetuus</i>	348	<i>zeio</i>	234.
<i>Virtutum mater temperantia</i>		<i>Vvrlenses moniales S. Michae-</i>	
		<i>lis</i>	459

F I N I S.



NOTÆ
AD EPISTOLAS
PETRI ABBATIS
CELLENSIS.

AD LIBRVM I.

MONASTERIUM Cellense, cui Petrus Abbas præfuit, in suburbio situm est Tricassinæ ciuitatis, loco qui olim insula Germanica dicebatur. Vnde vetus quoque monasterij nomen duplex. Nam & monasterium S. Petri ab eius tutela & patrono appellabant, & à prisco loci vocabulo monasterium insulæ Germanicæ. quo sanè modo Nicolai Clareuallensis epistola xxiv. in codice nostro inscribitur, *Petro Abbati insula Germanica*. Dictum est etiam Cœnobium Cellæ Bobini, vt rectè in antiquitatibus suis obseruauit vir eruditus & diligens Nic. Camuzatius. At vulgus hodie patria lingua *Monstier la Celle*, hoc est monasterium Cellæ vocat. Interdum verò absolutè monasterium Trecense, & Abbates Trecenses dicti sunt, qui Cellenses. Sic enim Petrus ipse loquitur lib. i. epist. vii. & lib. iii. epist. viii. ob hanc nimirum causam, quia omnium Tricassinæ vrbis cœnobiorum antiquissimum erat Cellense.

LIBER PRIMVS] Epistolas omnes in libros ix. partiti sumus. In antiquo enim exemplari nulla erat librorum distinctio: sed vna omnium epistolarum series, quam perpetui ad earum initia numeri ostendunt.

AD EPIST. PETRI

EPIST. **EPISTOLA PRIMA**] Hanc alieno scribit nomine, ut sextam item: reliquas proprio.

ECCLESIA N. DERVENSIS.] Monasterij Deruensis, quod in saltu Deruensi positum est in diocesi Catalaunensi. Gallis vulgo *Monstier-en-der*, quasi monasterium in Deruo. Huius nomen sæpius infra recurret in epistolis Alexandri III. corruptè verò apud Gerbertum epist. VIII. *Terdonensis* editum est pro Deruensi.

HENRICVM TREC. COMITEM] Ad quem lib. II. epist. VI.

III. ABBATISSAM COGIT PROFESS.] Vetus hæc inter illos controuersia, ut docet Sugerij Abbat-
tis epistola ad Eugenium III. Hadriani sanè IV. extat in tabulario Fontisebraaldi rescriptum, quo statuit, ut Abbatissa professionem Episcopo Pictauiensi & obedi-
entiam ea lege præstet, ut Episcopus monasterio nihil oneris imponat. Ex quo quidem apparet, aut moniales decreto Pontificis non statim paruissè, aut epistolam hanc non Alexandro scriptam fuisse, sed Hadriano ante eius rescriptum.

IV. PRIORATVM APVD CANTVMERYLAM] cui titulus à S. Sereno, lib. IV. epist. IX. Inde & Prior de Cantumerulæ apud Saresberiensem epist. CXV. Sita est hæc Cella, (sic enim appellant) propter Cantumerulæ castellum in pago Tricassino. In castello autem ipso monasterium regulare S. Augustini, quibuscum hæc Cellensibus de cæmeterij iure contentio.

COMITE THEOBALDO] Magno, de quo epistola sequenti, ad quem D. Bernardus complures.

V. DOM. GVILLELMO] Quartus hic Theobaldi Magni Comitis Campaniæ filius, & regij sanguinis nexu, & rerum gestarum gloria clarissimus. auunculus enim, tutorque fuit Philippi regis Augusti. Huic verò Ecclesiasticarum dignitatum, quas plurimas & maximas gessit, exordium non fuit præpositura Suffonensis. nam alias superstite patre iam attigerat, ut docet epistola CCLXXI. Bernardi. Posthæc Episcopus fuit Carnotensis, tum etiam Senonensis, denique Remensis, ac S. R. E. Cardinalis & Legatus in Gallia.

COMES

ABBAT. CELL. NOTÆ.

COMES DAPIFER THEOBALDVS] Comes Blesensis, Dapifer Ludouici Iunioris, ac postea Philippi Aug. regum. quo munere in aula functus est post Radulfum Comitem Viromanduorum. In diplomate Ludouici eiusdem pro Cœnobio S. Dionysij. *Actum publice Meloduni anno dominica incarnationis M. C. LII. adstantibus in palatio nostro quorum nomina subtitulata sunt & signa. Signum Theobaldi Blesensis Comitum Dapiferi nostri. S. Guidonis Buticularij, S. Matthæi Camerarij. S. Matthæi Constabularij. Data per manum Hugonis Cancellarij.*

EUGENIO PAPAE] Eugenius III. non solum VI. ante Alexandrum III. sedit, ad quem epistolæ superiores: verum etiam ante Anastasium & Hadrianum, quos Alexander secutus est. Quare qui has epistolas digessit, ordinem temporum non vsquequaque retinuit. quod multis deinceps exemplis patefiet.

CONVENTVS S. MEVENNI] Cœnobium est ordinis S. Benedicti apud Maclouienfes in Armoricis. Itaque qui in hac epistola nominatur Ioannes Episcopus, Episcopus est Maclouienfis, ad quem noster epist. xvi.

LVCIVS PRAEDEC.] Lucius II. Cœlestini II. successor, decessor Eugenij.

ROLANDO CANCELLARIO] Illi ipsi qui Pö- VII. tiffex postea renuntiatus Alexandri III. nomen gessit. Scripta igitur epistola Hadriani IV. pontificatu. proinde series interpolata, vt monuimus.

ECCLESIA DE VILLA MAURI] In qua Prioratus alter monasterij Cellensis in eodem pago Tricassino.

HUGONI SENONENSI] Qui vir, quantusque VII. fuerit, declarat epistola Cleri Senonensis de eius electione scripta Episcopo Carnotensi. *Elegimus, inquit, nobis in pastorem & pontificem dominum Hugonem pracentorem nostrum, à parentibus Christianis & Deum timentibus nobiliter editum, virum strenuum, modestum, mansuetum, disciplinis Ecclesiasticis compenter eruditum, religiosis personis amoris & honoris exhibentem officium, & quæ sequuntur.*

PRO PETRO DE TORNELLA] Desponderatis IX.

AD EPIST. PETRI

sibi Havvidem, neptem Petri Cellensis. Quod matrimonium nonnulli, atque in his Hugo Archiepiscopus, quasi inter consanguineos initum improbabant: Petrus contra impedimentum coniugij nullum agnoscebat. Qua de re iterum hoc libro epist. xxii. & lib. iv. epist. xi.

- x. THOMÆ CANTVARIENSI] Cum adhuc exul, esset in Gallia & de ipsius cum Henrico rege Angliæ reconciliatione tractaretur.

SVA REPETERE A REGE ANGLIÆ] Rex enim ablata restituere abnuebat. Mauricius Parisiensis Episcopus Alexandro III. Præterea requirebat D. Cantuariensis partem ablatorum sibi restitui: alteram vero partem in sustentationem dimitti, donec vestrum super hoc & religiosorum virorum haberet consilium. Inconueniens enim & sibi valde damnosum, & perniciosum sanctæ Ecclesiæ exemplum videretur, si ipse omnia ablata, sicut Rex Angliæ postulabat, penitus remitteret, cum per eius absentiam adificia Cantuariensis Ecclesiæ diruta essent, & ad possessiones dissipatas tenuē haberet refugium, & ipse gravissimo alieni aris debito adstrictus teneretur. Ceterum peruicit tandem, ut restituerentur. quod ipsemet testatur in epistola quam de re ditū suo scripsit ad Alexandrum.

- xii. APOST. SEDIS LEGATO] Legatus per vniuersam Angliam excepto Episcopatu Eboracensi creatus est vii. Idus Octobris anno M. C. LXVII. Post hunc igitur annum hæc scripta oportuit.

- xiii. PHILIPPO COLON. ARCHIEP.] Hæc etiam epistola multo inferius collocanda erat. Nam Abbas S. Remigij erat Petrus, cum hæc scriberet, & Philippum constat Coloniensem cathedram non inisse ante annum M. C. LXVI.

PRAEB. DE MARNÆ] Rectius MARSNA, ut lib. viii. epist. xv. Sic enim in capitalis regum, quæ anno dcccli. edita feruntur, quando tres fratres Hlotharius scilicet, Hludonicus, & Karolus secus municipium Treiectum penes locum, qui dicitur Marsna iterum conuenerunt, & in Fragmento Gallici scriptoris apud Pithœū de Gisleberto: Recepit itaque Traiectum, Luppilam, Haristallum, Marsnam, Littam, Capramontem,

ABBAT. CELL. NOTÆ.

qua à defunctis derelicta vacabant. Ex his patet Marsnam locum fuisse Traiecto vicinum. quod verum est. Nam tribus ferè passuum millibus distat, & Maersena vocitatur. De præbendis autem Marsnensibus S. Remigij monasterio attributis, & in vsus monasticos conuersis, iterum ager epistola superscripta.

HENRIGO REM ARCHIEP.] Qui regis frater & Episcopus Bellouacensis, epistola xxiv. Frater enim fuit Ludouici Iunioris. Sed ad Remensem cathedram translatus est à Bellouacensi. Quare hinc quoque præposterus est ordo epistolarum.

IOANNI EPISC. S. MACLOVII] Ordinis xv. Cisterciensis monacho. Hunc Maclouienfes vt Sanctum venerantur, inditòque à clatris ferreis, qui tumultum eius ambiūt, cognomine, S. Ioannem de Craticula vocant. Extat eius nomine ad D. Bernardum epistola inter epistolas Nicolai Clareuallensis, in qua *Fr. Ioannes Episcopus Aletensis* inscribitur, hoc est S. S. Maclouij.

P. N. BERNARDI] Pertinent hæc ad annum M. xvi. c. lxi. in quem incidit mors S. Bernardi.

B. AIGULFI ECCLESIA] Sub oppido Pruino in Senonum diocesi, à Theobaldo Tricassium Comite prouentibus aucta, & accitis è Cellensi cœnobio monachis addicta sub annum Christi M. xlviii. Hinc Prior S. Aigulfi lib. ii. epist. xi. Hoc Prioratu fortuitis flammis deformato, missæ sunt pro illorum temporum more in varias oras S. Aigulfi reliquæ ad stipem pro Ecclesiæ restoratione corrogandam. ea enim est Aigulfi peregrinatio, quam designat iterum lib. iv. epist. v.

THEOBALDO EPISC. PARISIENSI] Qui Prior antea S. Martini, ordinis Cluniacensis. Huic sermones Petrus noster componebat quo modo Saluianus Presbyter homilias Episcopis multas fecisse dicitur à Gennadio.

ALANO AUTISIOD. EPISCOPO] Flandro Insulensi, ordinis item Cisterciensis. Hic Aripatorij antea monasterij prius Abbas fuerat in agro Tricassino. Inde ad Cathedram Autisiodorensem prouectus cum fuisset, post aliquot annos sponte abdicatus.

AD EPIST. PETRI

uit, & ad claustrum rediit Clareuallense, vbi situs est.

XXIII. **ESKILIO LVNDENSI ARCHIEP.]** Esquilus dicitur lib. viii. epist. xx. sed Eskilum etiam legimus in epistola Bernardi ad eundem scripta numero cccxiv. Hic cum ex Vrbe in Daniā rediret, captus spoliatusque fuit in Germania. Quæ res dum iniuriam missis ad Fridericum Imp. legatis acrius persequitur Hadrianus i v. Pontifex, cui Eskilus priuato etiam nomine carus erat, exacerbatis hinc inde animis, ansâ præbuit schismati quod inter eos erupit, vt docet Radeuicus lib. i. de gestis Friderici cap. viii. & sequentibus. Sed apud Radeuicum *Londonensis* vitiosè scriptum est, scædus etiam apud Innocentium iii. epistola cccxi. *Lugdunensis* pro *Lundenſi*. Est autem Lundenſis ciuitas Daniæ Metropolis.

XXIV. **HENRICO EPISC. BELVAC.]** Fratri regis, de quo dictum epist. xiv. monachus fuerat Clareuallensis. Monacho itaque, nondum Episcopo, scribit Nicolaus Clareuall. epist. i. & xxxix. Inde verò ad cathedram Bellouacensem prouectus est anno, vt Sigeberti supplementum notat, m. cxlix. Extat Henrici ipsius ad Petrum Cluniacensem expositatoria, in qua de eo tanquam huius dignitatis conciliatore conqueritur.

XXV. **BALDVINO NOVIOM. EPISC.]** Duo huius nominis Ecclesiam Nouiomensẽ ordine rexerunt. Prior Simoni Episcopo successit anno, vt idẽ Sigeberti continuator obseruat, m. c. xlviii. abbas antea Castellionis, vir religiosus & honestæ vitæ, vt testantur cleri Nouiomensis litteræ de eius electione ad Suggerium Abbatem scriptæ. Alter successorem habuit Rainoldum, qui Synodo Lateranensi interfuit anno m. c. lxxix. Ad priorem opinor hoc loco scribit Petrus: item Bernardus epist. cccxxxix.

XXVI. **OCTAVIA NVS.]** Nomen adiectum ex coniectura: Nam in scripto exemplari, quo vſi sumus, vacuum erat spatiũ. Neque enim de alio intelligi hæc possunt, quàm de Octauiano Antipapa, qui aduersus Alexandrum iii. stetit, & Victor appellatus est. Saresberienſis epist. xlviii. *Ecclesia Gallicana recepit Alexan-*

ABBAT. CELL. NOTÆ.

drum, ob Octauiano recessit. Huic quidē post quatuor annos mortuo suffectus à schismaticis est Vvido Crementis, quem Paschalem nominarunt. Sed Henricus eo tempore Archiepiscopus Remensis iam erat, non Bellouacensis. Quare in Vvidonem ista non quadrant.

THOMAE CANCELLARIO] Cancellarius ab xxvii. Henrico rege creatus est anno, vt Rogerus Houedenus scribit, M. C. LVII. quinto post anno, Archiepiscopus Cantuariensis.

IN QVATVOR REGNIS] Regna dicere videtur quatuor Prouincias quibus reges Anglię tunc imperabant, Angliam, Normanniam, Aquitaniam, & Andegauiam, quarum titulis insigniri solebant. In litteris Thomę ipsius apud Rogerum eundem: *Henrico Dei gratia illustri Anglorum regi, Duci Normannorum, & Aquitanorum, & Comiti Andeganorum.* In aliis Vvillelmi regis Sicilię: *Henrico Dei gratia illustri Anglorum Regi, Duci Normannia, & Aquitania, & Comiti Andegauia, Vvillelmus eadem gratia Rex Sicilia, Ducatus Apulia, Principatus Capua.* Ita enim & reges Sicilię trium quoque Prouinciarum sese reges appellabant, tametsi Sicilia sola regnum esset.

SERMONES ILLOS MAG. G] Gilleberti, opinor, vniuersalis, de quo lib. vii. ad epistolam xix.

AD LIBRVM II.

PETRO VENERABILI] Quod illi proprium ^{r.} quasi cognomen factum est. Nam Petrus venerabilis appellatur, Cluniacensium Abbas viii. & suis ipsius & aliorum scriptis notissimus. Decessit Kalendis Ianuar. anno M. C. LVIII.

SINE LICENTIA COM. CARNES] Monachi vetere instituto à carnibus abstinent, ne, quod de seipso scribit Bernardus, dum nimis nutriunt carnem, nutriant vitia. Edere tamē interdum licuit, sed infirmis duntaxat, Prælatorum permissu. Goffridus Vindoc. lib. iv. epist. xlii. *Carnis comestio sicut mona-*

AD EPIST. PETRI

chis pro corporis infirmitate conceditur, ita eis in carnis voluptate negatur. & post alia, sed quia paucorum vel nullorum istam virtutem esse cognoscimus, ut videlicet à carne omnino abstineant, cum alicui carnem comedendum tribuimus, rationabilis est consideranda necessitas, non carne carnis nutrienda cupiditas.

- II. HUGONI ABB. CLUNIAC.] Petri venerabilis successor, eius nominis tertio. Post Petri excessum monachi Cluniacenses tumultuaria electione Robertum quendam semilaicum, sed Comitis Flandriæ cognatum, reclamantibus multis elegerant. Quo postea deiecto ac mortuo, Hugonem hunc ex Priore Abbatem renuntiarunt, ut est in supplemento Sigeberti ad annum M. C. LVIII. Hæc igitur est commotio magna quam vocat: Hugo, filius veteri Cluniacensis: Robertus, is qui per vim regnare conabatur.

ABBATE ARREMARENSI] Monasterium est ordinis S. Benedicti. cuius originem, auctoremque Adremarum docet epistola Leonis I V. ad Prudentium Tricassium Episcopum, in cuius situm est diocesi. Conditoris nomen retinet etiam in vernacula. Nam *Monstier ramey* vocant, hoc est monasterium Adremari.

HULDVINVM DE VENDOPERA] Gentilium id familiæ cognomen ab agri Campani castello, quod possidebant. Hunc verò ipsum Hilduinum de Vendopera puto, quem aliquot Aripatorij cœnobij tabulæ testem ad scriptum habent cum Theobaldo Comite, Bernardo Clareuallensi, & Guidone Arremarensi Abbatibus, qui omnes ætatem hanc prodant.

- III. A DEBITORE DETENTVM] Sensus exigit, ut legatur à creditore, quod etiam declarant quæ de eadem re scribit sub finem epistolæ sequentis.
- IV. D. VVINTONIENSIS] Henricus frater Theobaldi Magni, & Stephani regis Angliæ. Is Vvintoniæ quidem Episcopus erat in Anglia, sed in Gallia hoc tempore versabatur: Cluniaci nimirum, quò

ABBAT. CELL. NOTÆ.

randem ex Anglia rediit. Monachus enim erat Clu-
uiacensis.

ABBATI S. LAURENTII LEOD.] Nobile v.
hodièque Benedictinorum est Monasterium in sub-
urbano Leodiensi.

HENRICO COM. PALATINO] Comiti VI.
Campaniæ, Theobaldi Magni filio, cui liberalitas
Largi seu munitici nomen fecit. Vnde autem & quan-
donam Palatini vocari cœperint Comites Trecen-
ses, accuratè more suo doctèque disseruit P. Pi-
thœus.

ECCLESIA DE VILLA MAVRI] De qua
cum Canonicis litigabant, lib. I. epist. VII.

A. MOLISMENSIVM ABBATI] In diœcesi VII.
Lingonensi ordinis sancti Benedicti. Perænctica
est nouo Abbati, qui ex Priore creatus nuper
erat.

H. ABBATI PRULIACI] Nouo item Abba- VIII.
ti, sed ordinis Cisterciensis in diœcesi Senonensi.
Abbatis Pruliacensis haud scio an eiusdem, meminit
Stephanus Tornœcensis epist. CLXXII.

ROBERTO ABBATI DE BULLENCURTE] IX.
Bullencurtis, seu Bullencuria, ordinis item Cister-
ciensis cœnobiū est in diœcesi Tricastana, ubi Ca-
nonici olim fuerant Augustiniani: quoad Henri-
cus Episcopus locum sancto Bernardo, Clareuallen-
sibusque concessit. *Vallecurtensis abbas* pro Bullen-
curtensi perperam legitur apud Saresberiensem epist.
CXV.

ABBATISSÆ FONT. MATILDI] Sub finem X.
epistolæ Comitis Andegauensis filiam fuisse docet.
Hæc igitur est Matildis, Fulconis v. Comitis, Hiero-
solymorū postea regis filia, quam Guillelmo
Henrici primi Anglorū regis filio desponsam vtriuf-
que gentis historiæ narrant, & legere est in No-
tis ad Goffridum lib. v. epist. XVII. Cæterum Guil-
lmo sponso marinis fluctibus ante nuptias absum-
pto, Matildis intactā virginitatem inter Fontisebraldi
sanctimonialis Deo deuouit, & pro rege Anglorum,

AD EPIST. PETRI

ut Cellensis noster loquitur, regem commutavit Anglorum. Nunc Abbatissa iam erat, ut in epistola sequenti.

- XII. PRIORI SVO] Monasterij Cellensis.
- XIII. T. PRIORI MOLISMENSI] Theobaldo fortasse, qui post hæc Abbas eiusdem cœnobij lib. vi. epist. xiii.
- S. IOHANNIS QUINTIACENSIS] Multa sunt in Callia cœnobia, quæ S. Ioannis nomen gerant. Hic verò Reomensis S. Benedicti Abbatiam in diœcesi Lingonica designari puto. Quintiacensem verò, alteram Cisterciensem haud procul Ternodoro sitam in eadem diœcesi.
- XIV. CAZIACENSIBVS] Pro Abbate Caziacensi ad Eugenium Papam scribit Bernardus epist. cclxiii. & in litteris Hattonis Episcopi Trecentis nominatur Simon Abbas Caziacensis. Apud Nicolaum quoque Clareuallensem legitur epistola xix. ad Abbatem Cazeiensem, hoc est, ut codex noster habet, Caziacensem. ex qua cœnobium ordinis Cisterciensis esse constat. Situm autem est in Sueffionum diœcesi.
- XV. IN PROX. CLUNIACENSIS] In electione Roberti, de qua dictum epist. ii.

AD LIBRVM III.

- I. **D**E MONTE DEI] Pulcherrimum, multisque nominibus clarissimum Carrusiensis ordinis cœnobium, ab Odone S. Remigij Abbate fundatum in diœcesi Remensi, præfectura Mosomenfi. Tertius ab Odone S. Remigij Abbas fuit Petrus noster: ut vel hinc satis causæ fuerit, cur fratres de Monte Dei tâto studio & amore complexus sit. Sed aliæ præterea vetustiores fuerunt: atque in his Stephani monachi Cellensis ad illos emigratio, de qua hoc loco. Stephani nomen docuit index seu titulus epistolæ, quem his verbis conceptum meminimus, *Epistola Petri Abbatis Cellensis ad Stephanum quendam monachum suum, sed postea monachum Montis Dei.* Sed hanc hætenus nan-

ABBAT. CELL. NOTÆ.

cisci non licuit.

PRIORI] Simoni, viro sanctissimo, lib v. epist. xi.

FRATRIBVS ET FILIIS] Cellensis monasterii monachis. VII.

DE GRANDIMONTE] Id caput & sedes est VIII. non obscuri in Gallia ordinis clericorum, qui Grandimontenses inde appellati, in diœcesi Lemoitensi, haud procul Mureto. Vnde & Stephanum religiosæ familiæ ducem ac principem, Stephanum de Mureto appellat Stephanus Tornacensis epistola i. quia sedem ibi fixerat, cum alioquin Auernus patria esset, non Lemouix.

SACERD. HASTINGIARVM] In Anglia, ideo x. transmarinum sacerdotem vocat. Locus conferto inter Vvilelmum & Haroldum prælio memorabilis. Malmesburiensis Hastings scribit, & bellum Hastingsense, quod dixi.

AD LIBRVM IV.

SVO SVVS] Nicolao monacho Clareuallensi, qui & i. Sipse ad Petrum nostrum scribens, eadem vitur in inscriptione epistola xli x. Nicolai epistolis insertæ sunt mutux epistolæ Cellensis, & quidem recto ordine, quæ hîc præpostero leguntur. Prima enim fuit Nicolai quam dixi epistola xli x. *Nuper cum Aquilonaris*, cui noster ea rescripsit, cuius initium *Vestis qua tetigerit mentem*. Tum secuta est Nicolai altera numero lii. *Anxietatem mihi generat*, ad quam Petrus hac epistola respondet, quæ apud Nicolaum quoque edita est, sed dimidiata.

HIS NOSTRVM] Deest membrum, quod apud Nicolaum antecedit hoc modo: *Ista proculdubio continent epistola tua prima, media, & ultima. His nostrum torpens*, &c. Sunt & diuersa quædam alia non aspernanda: tum maximè sub finem epistolæ sequentis.

A CLAUDIANO] Mamerto Claudiano Presby-

AD EPIST. PETRI

hytero Viennensi, cuius verba ex libro III. de statu animæ ad refellendum Cellensem produxerat Nicolaus epistola LII.

NICOLAUS DE NIGRO F. E. ALBUS] Ex Cluniacensi monacho Cisterciensis. Nicolaus ipse epistola XVII. ad Theobaldum eiusdem olim consilij participem: *Vno denique consensu reliquimus omnia, & de veteri Testamento & umbra Cluniacensium, ad Cisterciensium euoluimus puritatem.*

- V. SVO SVVS] Ioanni Saresberienfi, ad quem & scriptam proximæ, atque alia passim complures. Huic enim arcta & vetus cum Petro Cellensi necessitudo, à quo exul olim monasterio receptus, benignèque habitus, & multis postea beneficiis auctus est: quibus obnoxium se Ioannes variis ad eum litteris proficitur, sed præcipuè epistola xxv,

RETRO P. LAQUEARIA] Ecclesiæ S. Aigulfi Pruiuenensis, quæ conflagarat, ut dictum est lib. I. epist. XVIII.

- X. SVO CLERICO] Eidem Saresberienfi. quem clericum item suum nominat libro VII. epistola VI.

ANASTASII PAPAE] Quarti, qui post Eugenium III. sedem obtinuit anno M. C. LIII. De hac porro cæmeterij controuersia iam antè scripsit libr. I. epist. IV.

- XI. CINERES B. AIGULFI MITT. D.] Sacras reliquias, quas ei promiserat. Saresberienfis epist. xcvi. *B. Aigulfi mihi pignora promissisti.*

IN NEGOTIO HAVVIDIS NEPTIS N.] Eius nempe matrimonio cum Petro de Tornella, de quo supra lib. I. epist. IX.

- XIII. MONACHO NORVVICENSI] Ecclesiæ Norvvicensis in Anglia, in qua Ioannes Prior Norvvicensis, ad quem Saresberienfis epistola ccli.

AD LIBRUM V.

BERNEREDO ABB. S. CRISPINI] Apud i.
Suessiones, vt sequens epistola docebit. Duo sunt
in ea ciuitate sancti Crispini cœnobîa, Benedictinæ
familiæ vtrumque. Vnum S. Crispini maioris appel-
labant, de quo hic sermo: alterum S. Crispini in ca-
uea. De Berneredito autem Abbate plura lib. viii. epi-
stol. i.

SUCCESSOR ILLE NOSTER] Drogo, qui iii.
Cellæ Abbas Petro ad S. Remigij præfecturam mi-
granti suffectus, gradu postea ob rem malè admini-
stratam deiectus est, vt scribit epistola vii.

EXCESTRENSI EPISCOPO] Excestre Dom- iv.
noniæ ciuitas in Anglia, sedes Episcopalis esse cœpit
ante annos plus minus d. l. Cathedra illuc per Lifr-
icum Episcopum translata, cùm Cridiæ antea esset.
Iidem itaque Episcopi Excestrenses, qui olim Cri-
dieneses.

CANON S. TIMOTHEI] Basilicæ SS. Timo- v.
thei & Apollinaris, in vrbe Remensi, cuius sæpe
mentio apud Flodoardum. Huius Ecclesiæ præben-
das concedebat Abbas S. Remigij, vt docet Alexan-
dri epist. vii.

ABBATI DE S. HVBERTO] In Arduenna syl- vi.
ua, diœcesi Leodiësi. Scripta feruente adhuc schisma-
te, quod tempus malitiæ & discordiæ vocat.

FRATRIB. CELLENSIBVS] Prioribus & Mo- vii.
nachis, qui eiecto Drogone conuenerant ad noui Ab-
batis electionem. Quare Archiepiscopum, cuius con-
silio agendum monet, Senonensem intelligit. Electus
porro est post Drogonem Abbas Girardus.

COMITISSÆ NOSTRÆ] Quæ paulo post viii.
Trecensis Comitissa. Maria nimirum Ludouici regis fi-
lia, vxor Henrici Comitissæ.

INTER ARCHIEPISCOPVM ET ADVERS.]
Henricū Remensem, & Canonicos. Graues nāque in-
ter eos discordiæ fuerunt: ad quas sedandas suam

AD EPIST. PETRI

quoque operam contulit Alexander Pontifex: cuius de ea re binas epistolas ad Henricum Archiepiscopum, & ad Ludouicum regem illius fratrem vidimus in Bibliotheca Ecclesiæ Remensis. De iisdem etiam turbis Remensibus agit & Saresber. epist. ccxiv.

- IX. **BASILIO**] Maioris Carthusiæ Priori VIII. vitæ sanctimonia, doctrinâque illustri. Huic iterum, vniuersique ordinis comitiis, quæ quotannis haberi solent, scribit epistola XI. nec dissimili argumento. nunc quidem pro Monasterio in Dacia Esquili Archiepiscopi rogatu erigendo: tum verò pro Trecensi, quod Henricus Comes meditabatur.
 - X. **ABB. STAVLENSI**] In diœcesi Leodiensi, in qua præbendæ erant Marsnenses S. Remigij. De his verò, & de Friderici Imper. mandato, quod innuit, plura lib. VIII. epist. xv.
 - XI. **SIMONI PR. DE MONTE DEI**] Quem virum sanctissimum, laudatissimumque non semel appellat Saresberienensis. Missam epistolam indita Christiæra indicat anno M. C. LXI. Post aliquot dehinc annos delectus ab Alexandro Papa Simon, cum Bernardo Grandimontensi, qui ad regem Angliæ Pontificias litteras deferret, eumque ad redintegrandam cum B. Thoma gratiam hortaretur, ea legatione strenuè perfunctus est: cuius acta Saresberienensis idem exponit lib. IV. collectaneorum historiæ S. Thomæ.
 - XII. **PRIOR DE VALLE S. PETRI**] Ordinis item Carthusiensis insigne est monasterium in diœcesi Laudunensi, cuius Priorem aliis etiam locis commemorat, eique scribit, sed nusquam nominat. Is autem erat Ingelbertus, vt didicimus ex epistolis Saresberienensis.
 - XIV. **IOANNI ET RICHARDO FRATRI SVO**] Ioannis quoque Saresberienensis ad Richardum fratrem epistolæ tres leguntur. Richardus autem hoc tempore, id est sub annum Christi M. C. LXX. quo exeunte interfectus S. Thomas, habitum mutarat, regulari suscepto. Quare eidem posthac, vt Canonico regulari scribit libro VI.
- ABBATI S. NICASII**] Remensium id cœnobium, Remigiano situ proximum, atque ordinis eius-

ABBAT. CELL. NOTÆ.

dem. Abbas autem tunc erat Guido II. monachus olim sancti Remigij , ad quem Alexandri epistola xxviii.

ABBATI S. EADMONDI] Hugoni, ad quem xv. Saresberienfis epist. cclvi. & aliæ. De S. Edmundi monasterio in Norwicensi Orientalis Angliæ diœcesi multa Vvillelmus Malmesb. lib. ii. de gestis Pontificum Anglorum.

EPISC. EXONIENSIS] Bartolomæo , vt liquet xvi. ex epistolis Ioannis Saresb. & Petri Blesensis xxiii. Eundem ergo intelligi oportet lib. v. epist. xii.

PETRO ABB DESILVA] Siluæ maioris dicitur libro vi. Sic enim appellant Benedictinorum cœnobium in diœcesi Burdegalensi , de quo eiusque auctore B. Gerardo in Sanctorum album tunc recens adscripto Stephanus Tornacensis epist. cccxxxi. Aliud est Grandis-syluæ monasterium ordinis Cisterciensis in Tolosana.

ABBATI LATINIACENSIS] Quod S. Petri, xviii. de Latiniaco ordinis item Benedictinorum est cœnobium in diœcesi Parisiensi. Extat D. Bernardi epistola ccxxx. pro Abbate Latiniacensi.

LATOR PRÆSENTIVM] Fulco Episcopus in xix. Suetia designatus pro quo iterum eidem Alexandro scribit lib. vi. epist. vi. Fuerat hic Cellensis primum monachus, dein etiam S. Remigij, Petrum opinor Abbatē secutus. Sanè in diptychis S. Remigij, inter alūnos eius cœnobij, qui Petro Abbate vita excefferunt, nominatur Fulco Episcopus.

LEGATOS ROMÆCVRIÆ] Albertum & Theodinum Cardinales ad Henricum Angliæ regem missos, vt de cæde S. Thomæ cognoscerent. vtriusque mentio in epistola liv. Alexandri.

S. MEDARDI ABB.] Apud Sueffiones. Vetus ac xxi. nobile S. Benedicti monasterium, vel S. Gregorij Patris priuilegio clarissimum.

AD LIBRUM VI.

- I. **A**LBERTO CARDIN. LEGATO] S. Laurentij in Lucina. Sic enim apud Rogerum appellatur in litteris absolutionis, quas Henrico regi, cum se de B. Thomæ nece purgasset, cum Theodino collega dedit. Atque hic nimirum fuit exitus legationis, de qua audire auct hoc loco, & de qua scribit Alexander epist. LIV.

VALLIS DEI] Cartusienſium cœnobium ad diœceſim pertinens Episcopi Carnotensis. Hunc enim Episcopum significat. Aliud est Vallis Dei monasterium, ordinis Præmonſtratenſis, in Remenſium diœceſi, quod ad rem nihil facit.

- IV. **N**ICOLAO MONACHO] Anglo, monacho sancti Albani, quocum de conceptione Beatæ Virginis altercatur epistola XXI. huius libri, & x. libri IX.

- VII. **I**OANNI CANT. ET R. CANT. COMPEND.] Videntur in comitatu fuisse Archiepiscopi Remensis, qui Romam profectus erat, ut sequens epistola docet.

ABBATES BELLILOCI ET S. PETRI DE MONTIBVS] Vtrumque monasterium ordinis S. Benedicti: illud quidem in Argona pago diœceſis Viridunensis: hoc verò Catalauni, de quo iterum lib. VIII. epist. XIV.

- VIII. **R**EGI SVEONVM] Carolo fortasse Suerconis regis filio. Is enim Sueconibus seu Suecīs, Gothisque per hæc tempora imperabat. Fulco autem Eltonum Episcopus, qui Sueciæ tum regno adhærebant.

- IX. **P**ER M. IOANNEM] Saresberienſem, qui notarius & familiaris fuerat B. Thomæ. Itaque illo incolumi non totus obiisse B. Thomas videbatur.

MARTYRIBVS IAM AD NUMERATVR] Adnumerandum haud multo post Apostolica auctoritate decreuit Alexander Pont. anno M. c. LXXI. die primo Quadragesimæ, ut est in eius epistola LIV.

ABBAT. CELL. NOTÆ.

IMPERATOR INDVLST] Fridericus Ahenobarbus. Non semel, vt in remotis possessionibus accidere solet, in Marlinæ bonis vim passi sunt monachi Sancti Remigij. Nam & paucis ab hinc annis in eorum possessionem, qua deiecti per annos complures caruerant, Regis nostri auctoritate postliminio restituti sunt.

E. LVNDENSI ARCHYEP.] Eskilo, de quo ad xv. libr. i. epist. xxiii. Is etsi Archiepiscopus erat in Dania, Sueciæ tamen etiam Ecclesias procurabat: quia Archiepiscopus Lundensis ex Hadriani iv. Papæ decreto, quod Eskilo ipsi concessum est, primas erat regni Sueciæ. Propterea ergo & Fulconem Estonibus Episcopum crearat.

D. RICHARD.O] Canonico regulari, fratrique, xvi. vt dictum est, Ioannis Saresberienfis, ad cuius nomen & suum, hoc est Petri, alludit.

PRIORI CANTVARIENSI] Huic antè scripsit epist. ix. Quod de mortis B. Thomæ reuelatione initio epistolæ ait, eo spectare videtur, quod à multis prodigium est, atque in litteris Vvillelmi Archiepiscopi Senonensis ad Alexandrum Papam legitur his verbis: *Dicitur namque & constanter asseritur. post passionem suam multis apparuisse in visu, quibus perhibet se non mortuum esse, sed viuere, & non vulnera, sed vulnorum tantum cicatrices ostēdit.* De miraculorum autem fama, quæ B. Martyris occasum mox secuta est, in litteris Ludouici regis ad Alexandrum eundem: *Et ecce ad tumultum agonista, ut reuelatum est nobis, diuina in miraculis reuelatur gratia, & diuinitus demonstratur, ubi humatus requiescit, pro cuius nomine decertauit.*

PRIORI VVIGORNENSI] Radulfo, ad quem xxi. Saresberienfis epist. ccv. & noster lib. vii. epist. ix. in qua & sequentibus duabus iterum agit de Lapelecafi S. Remigij Prioratu in Anglia.

MONACHO DE REDDINGES] Ordinis Cluniacensis. Radingense in Anglia monasterium inter Kenetam & Tameſim fluuios ab Henrico primo rege collocatum, Cluniacensibusque monachis traditum docet Malmesburiensis lib. v. de gestis regum Anglorum.

AD EPIST. PETRI

XXIII. NICOLAO MONACHO S. ALBANI] Vetus & nobile apud Anglos S. Albani monasterium, ab Offa rege cōditum haud procul Verolamio, vbi sanguinem pro Christo fuderat S. Albanus. Cæterum eadem hic Petro Abbati de festo Conceptionis B. Virginis cum Nicolao concertatio, quæ D. Bernardo fuerat cum Canonicis Lugdanēsis epistola CLXXIV. eadēque sententia: nihil videlicet in ea re nouandum videri ante sedis Apostolicæ decretum. Quod quidem si eorum æuo prodiiisset, quale postea secutum est, haud dubium quin pro eximia vtriusque erga Virginem reuerentia æquissimis lætissimisque animis accepissent.

AD LIBRVM VII.

- I. ABBATI S. RICHARII] Centulum olim loco nomen, & monasterio. postea auctoris nomen sumpsit, hodiēque retinet, S. Richarij in Pontino, pago diœcesis Ambianensis.
- II. SUPERVACVIS IMPENDIIS] Verba sunt Ennodij Ticinensis lib. II. epist. XXII. cuius & alia quædam hinc inde imitatur.
- III. M. G. PVELL.] Hoc est *M. Girardo Puella*. Id enim viro cognomen, qui postea Episcopus fuit Cestrensis. Supplementum Sigeberti anno M. c. xxi. *M. Girardus cognomento Puella, vir magna litteratura & honestatis, electus est in Episcopum Cestrensem*. Scripta est epistola superstiti S. Thoma, cum exul esset in Gallia. Duo enim Ecclesiæ mala deflet, schisma Germanicum, & persecutionem Anglicanam.
- IV. ABBATI VILLARIENSI] Celebre est in diœcesi Metensi monasteriū de Villariis: est & in Leodiensi alterum de Villari, vtrumque ordinis Cisterciensis. Vtrius horum, an alterius fortasse cognominis Abbati seribat, incertum.

CLERVS DE CASTRO NOSTRO] Castro S. Remigij, in suburbio scilicet Remensi, in quo situm monasterium, & aliæ basilicæ complures. Nunc etiam
samerū

ABBAT. CELL. NOTÆ.

tametsi mœnibus vrbis inclusum, Burgum S. Remigij
cam partem vocant

E. LONDENSIS] De Eskili naufragio, quod in Da- VI.
nica nauigatione passus est, scribet denuo epistola
XIII.

SENONENSIS ARCHIEP. F. E. REMEN-
SIS] Vvillelmus Theobaldi Magni filius. Vetus
Chronicum anno M. C. LXXVII. *Vvillelmus Seno-
nensis Archiepiscopus à clericis Remensibus postulatus,
mortuo Henrico Ludouici regis germano, qui per annos
XIII. Remensem Ecclesiã palatiis, turribus, & aliis mu-
nitionibus insignissimè illustrauit, regendam Papa Ale-
xandro assensiente suscepit.*

M. IOANNES SARES. F. E. EPISC. CAR-
NOTENSIS] Anno M. C. LXXVII. vt est in supple-
mento Sigeberti. Castigandus ego Episcoporum Car-
notensium catalogus, qui Vvillelmum Ioanni & Pe-
tro nostris postponit, cum præire debeat. Nam Ro-
berto, qui obiit anno M. C. LXIV. successit Vvillel-
mus. Hic quarto post anno Archiepiscopatum Se-
nonensem adeptus, Carnotensem quoque retinuit,
consecratusque est anno M. C. LXVIII. de cuius ordina-
tione tacito nomine Saresberienfis sub finem epist.
cxxxiii. & Robertus S. Mariani monachus in Chro-
nico. Idem denique ad Remensem cathedram, vt pau-
lo ante dictum est, translatus, Carnotensem Ioanni
hoc anno reliquit. Ioannis successor fuit Petrus noster
anno M. cxxciii. Petri Reginaldus anno M. C. xxcvii.
Ad Reginaldum electum extat epistola Stephani Tor-
nacensis cxxxvi. quæ hæc omnia confirmat. *Vt sicut
prædecessores vestri Carnotenses Episcopi, præcipuè Domi-
nus noster, id est Vvillelmus Reginaldi auunculus, tum
Remensis Archiepiscopus superstes, & post eum bona
memoria Ioannes & Petrus Episcopi nobis beneuolè deta-
lerunt, & vos aqvis passibus, si non maioribus deferatiz.*
Item supplementum Sigeberti an. M. C. LXXVII.

TRACENSEM EPISC.] Matthæum, cuius ex- VIII.
tat in collectaneis Saresberienfis epistola ad Alexan-
dram Papam pro S. Thoma, quinto eius exilij anno
scripta, initio Episcopatus, hoc est anno M. C. LXIX.

AD EPIST. PETRI

D. CARDINALEM] Petrum tit. S. Chrysogoni. Rogerus Houedenus anno M. c. LXXVII. *Eodem anno Petrus Tituli S. Chrysogoni Presbyter Cardinalis, Apostolica Sedis Legatus, quondam Meldensis Ecclesia electus venit in Franciam.* In tabulis Episcoporum Meldensium, post Stephanum, cuius etiam leguntur apud Saresberiensem epistolæ aliquot pro S. Thoma, subiicitur Simon, Archidiaconus antea Senonensis, de quo nondum Episcopo Saresberienensis epistola ccxc. At ex verbis Cellensis hoc loco liquet duos alios ante Simonem electos Episcopos fuisse.

X. EPISC. CESTRENSI] Auctor est Malmesburiensis lib. iv. de gestis Pontificum Anglorum, Petrum Episcopum Licefeldensem, Guillelmi senioris temporibus, sedem Cestram transtulisse, quæ olim ciuitas legionum à militari in ea colonia vocitata. In eo tractu positus videtur fuisse Prioratus Lapeleensis, nec procul à Monasterio Beldevvas, ad curus Abbatem epistola quæ sequitur.

XVI. EX SE COLL. CISTERCIENSIS] Robertus enim Abbas Molismensis, ut Sigebertus narrat anno M. xcvi. in Cisterciensi eremo cœnobium primum exstruxit, in eoque cum aliquot monachis suis habitauit. Itaque Molismensis monasterij colonia Cisterciense.

XV. MOLISMENSI ABBATI] Ad quem lib. vi. epist. xiii. Ex hac verò discimus, illum aliquando inter Carthusienses versatum.

XVI. PETRO CARDINALI] Legato Sedis Apostolicæ, electo antea Meldensi, ut dictum est ad epistolam viii. Legationem innuit epistola viii. in qua & de Crispino eodem.

XVIII. E. LVNDENSI ARCHIEP.] Qui tum monasticam vitam inierat in Claraualle, abdicato post annos xli. Archiepiscopatu. In Gestis Danorum: *Anno M. c. LXXVII. Eskilus secundus Archiepiscopus Dacia recessit factus monachus Clareuallus. Absalon fit Archiepiscopus. Anno M. c. xcii. obiit Eskilus Archiepiscopus in Claraualle.* Quadriennium ergo inibi vixit. De hoc excessu scribit etiam Saxo Grammaticus Historiæ Danicæ libro xiv.

ABBAT. CELL. NOTÆ.

MONACHO DE S. BERTINO] Sithiuensis ^{xix.} monasterij, quod Tarauanensis olim diœcesis, nunc S. Audomari.

M. GILBERTI, ET M. PETRI] Petrum, ni fallor, Trecentem intelligit, qui appellatus est Comestor. Gillebertum vero illum fortasse S. Stephani Autisiodorensis canonicum, qui glossas edidit in utrumque Testamentum, & propter eximiam doctrinam vocatus est vniuersalis, Londinensisque postea creatus Episcopus.

R. CANTUAR. ARCHIEPISCOPO] Richar- ^{xxi.} do S. Thomæ successori: S. Thomæ autem decessor Theobaldus, qui Ioannem Saresberiensem postea Episcopum, in familiam suam primus ascieuerat.

AD LIBRVM VIII.

ESKILO QVONDAM ARCHIEPISC.] Nunc i. Emonacho Clareuallensi. lib. vii. epist. xvii. Autisiodorensis Episcopus, quem extrema epistola salutatur, est Alanus, qui relicto item, ut antè monuimus, Episcopatu ad Clareuallenses iam pridem redierat, anno, ut Chronicum S. Mariani notat, m. c. lxxvii. Gaucherij etiam ac Philippi monachorum Clareuallensium fit mentio in epistolis Nicolai.

AVENIONENSI EPISCOPO] Pontio, ut con- ^{ii.} iectura est, successori Gaufredi.

CANONICO DE MERITONA] In Anglia. Sa- ^{iii.} resberienensis epist. xxviii. *Sanctorum fratrum qui apud Meritonam Deo famulantur, & luce bonorum operum illustrant Insulam nostram, vexationibus & iniuriis iure compatiatur.* Regulares erant S. Augustini, eoque nomine illos Hadriano iv. eiusdem olim ordinis Canonico commendat. Pro Meritona *Mintona* vitiosè apud eundem Saresberiensem legitur epist. cxxxix.

DE CLAVSTRALI DISCIPLINA] Hoc enim argumento ac titulo librum scripsit ad Henricum Comitem Trecentem, cuius etiam meminit episto-

AD EPIST. PETRI

la VI. Vetus Index Bibliothecæ Montis Dei. *Petri Ab-
batis S. Remigij De disciplina claustrali. Incipit, Domi-
no & amico suo H. illustri Trecentium Comiti Pala-
tino.*

- IV. CARNOTENSI EPISC] Ioanni Saresberienfi.
item & epistola v.
- VI. SOLEMNITAS S. IOANNIS B.] Quo die
anniuersaria Ordinis sui comitia celebrare solebant
Grandimontenses. lib. ix. epist. ii.
- VIII. CLAREVALLENSEM ABBATEM] Henri-
cum. Hic paulo antè, hoc est anno M. C. LXXVIII.
cum Petro S. Chrysogoni Cardinale, & Episcopis ali-
quot, Tolosam legatus fuerat aduersus hæreticos Al-
bigenses. Qua de re præclara extat Henrici ipsius
epistola apud Houedenum. Nunc mortuo Gocelino
Episcopo Tolosano ad eam Cathedram poscebatur.
QVORVM OS LOCVTVM EST VAN.] Tolo-
satum, quos ea labe præ aliis infecebat. Henricus
ipse in Epistola: *Tolosam, qua sicut erat ciuitas maxi-
ma multitudinis, ita etiam dicebatur esse mater hæresis,
& caput erroris.*
- IX. D. ALBERTO CANCELLARIO] Cardinali, ad
quem lib. vi. epist. i. Eidem Romanæ Ecclesiæ Can-
cellario & noster posthac sæpius, & Stephanus item
Tornacensis, ac Petrus Blesensis epist. xxxviii.
- X. COMITEM ROBERTVM] Comitem Sueffio-
nensem. Episcopi verò nomē Neuelo: qui Lateranensi
Concilio subscripsit. De S. Crispini monasterio apud
Sueffiones dictum est superius. Apud eosdem est mo-
nasterium S. Ioannis, quod de vincis vocant, ordinis
S. Augustini. In pago autem Sueffionico Vallis fere-
na, Præmonstratensium cœnobium.
- XI. ALEXANDRO SVM. PONT.] Anno M. C.
LXXIX. cum instaret Synodus Lateranensis, quam
propterea secundam generalem Alexātri congrega-
tionem appellat, quia priorem ante annos xvi. Tu-
ronis celebrarat. quod generale etiam Concilium di-
citur Neubrigensi lib. ii. cap. xiv. & aliis.
- XIII. QVI E. SPIRITVM VESTRVM] Vir enim
fuit Albertus Cardinalis, qui & postea Pontifex Gre-
gorius viii. insigni pietate ac religione, de quo in vc-

ABBAT. CELL. NOT.Æ.

tere Chronico huiusmodi est elogium. *Albertus de Benevento Cancellarius vir magna sanctitatis ac laudabilis parsimonia in omnibus actibus suis religiosus fuit. Ecclesiam B. Martini in qua habitum religionis sumpsit, semper cordi habuit, qua etiam ei annuatim vestes secundum regulam procurauit.*

CVM ANGELO SCHISMATICO] Tripligi Antipapa. Nam post Octavianum & Guidonem, de quibus dictum epistola xxv i. lib. i. contra Alexandrum stetit etiam Ioannes Abbas Strumensis, qui Callisti nomen usurpauit anno. M. c. lxxviii. Addunt alij quartum Landonem, qui dictus sit Innocentius. xiv.

ABBATES S. PETRI DE MONTIBVS] Monasteria sunt diœcesis Catalaunensis. duo quidem priora in vrbe ipsa, tertium in oppido non ignobili. Sed monasterium omnium sanctorum, cuius etiam mentio in epistola vi. Alexandri, ordinis est regularium S. Augustini, duo reliqua S. Benedicti.

CANONIAS SEV PRÆSB. DE MARSA] xv. Quæ monasterio S. Remigij ita fuerant tributæ, ut decedentibus canonicis in vsu cederent monachorum. Diploma Cōradi Imp. Odoni Abbati concessum. anno M. c. xlv. *D. Odo venerabilis Abbas S. Remigij confessoris & Francorum Apostoli, nostram presentiam apud Traiectum ulterius visitauit, & possessiones Ecclesie sue, qua in regno nostro adiacent, nostro petiit priuilegio confirmari. Marsnam videlicet cum omnibus appenditiis suis, Herta, Cluma, Litta, Angledura, Becca. Prabendas quoque Marsnenses in vsus monachorum decedentibus monachis transmutatas. Nos itaque tam religiosi viri petitionibus diligenter obtemperauimus, & tam possessiones supradictas, quàm prabendas in vsus monasticos conuersas regia maiestatis sigllo corroborauiamus. Diploma itē Friderici Imp. quod hugo Abbas Aquisgranii obtinuit anno M. c. lxi. Hoc etiam eidem B. Remigij Ecclesia regali munificentia adicientes confirmamus, ut prabenda clericorum Marsnensis Ecclesia in vsus monachorum decedentibus clericis sine ullius contradictione de cetero cedant.*

TEMPORE SCHISMATIS] Ante annum
Kk iiij

AD EPIST. PETRI

M. C. LXXVII. quo Imperator in gratiam rediit cum Pontifice.

- XIX. ARCHIEP. LVNDENSI] Absaloni, ad quem & proxima, & Stephani Tornacensis multæ. Is Episcopus antea Roskildensis in Dania, Eskilo Archiepiscopo abdicanti successerat, ut adnotatum est ad epist. XVII. libri VII. Inde maximus Danorum pontifex dicitur Saxoni grammatico qui se Absalonis huius horatu Danicam historiam aggressum testatur in proœmio. Daciam vero pro Dania scribit, recepta plerisque etiam illius ævi scriptoribus consuetudine.
- XXI. PRAENESTINO EPISCOPO] Berneredo, qui ex Abbate SS. Crispini & Crispiniani Cardinalis Romæ ab Alexandro creatus est. lib. IX. epist. I.
- CANCELLARIUM TVSCVL.] Romanæ curiæ Cardinales quinque. Ex his Albertus Cancellarius iam notus est. Petro Tusculano scribit lib. IX. epist. VI. & Stephanus epistola I. & XXIX. Albanensis est Henricus, abbas antea Clareuallis, huius libri epist. VII. I. quem in Synodo Lateranensi Cardinalem nuper crearat Alexander. Hyacinthus postea Pontifex, Cælestinus III. appellatus est. Ostiensis item Episcopus Hubaldus, qui mortuo Alexandro succedens Lucij III. nomen tulit.
- XXII. NOVO OPERI] Ecclesiæ S. Remigij, quam fabricandam susceperat, libro IX. epistola IV. & V. sub finem.
- XXIII. VSQVE AD SEDEM APOSTOL.] Ad quam euectus Urbanus II. qui ante Pontificatum Prior fuerat Monasterij Cluniacensis.

AD LIBRVM IX.

- I. PRAENESTINO EPISC.] Berneredo Cardinali. Iam monuimus ad epist. XXI. libri superioris, quod hoc loco fusius narrat, Abbatem S. Crispini, cum Romam ad Concilium profectus esset cum Episcopo Sueffionensi, Cardinalatus insignibus or-

ABBAT. CELL. NOTÆ.

natum fuisse, donatumque Episcopatu Prænestino. Sed hunc Bernardum appellat Panvinus: nos Berneredum apud Cellensem, in cuius codice prima tantum littera notabatur, edidimus, Alexandri III. diploma pro monasterio nouo apud Pictauos secuti, cuius antigraphum quod vidimus Berneredum inter Cardinales qui subscribunt exhibet Episcopum Prænestinum. Cæterum Bernaredus & Bernardus idem nomen est, vt Medaredus & Medardus, Gildaredus & Gildardus. Felicem porro huius obitum miraculis illustrem describit epistola v. i. ad Cardinalem Tusculanum.

THEOBALDVM VOB. SVBSTITVIMVS] II. Abbatem scilicet Monasterij SS. Crispini & Crispiniani, cui ante præfuerat.

THEOBALDO ELECTO CLVNIAC.] Anno III. M. C. XXC. Anno vnico fuit Abbas Cluniacensium. Postea Cardinalis Ostiensis à Lucio III. Pontifice, creatus est. Itaque in Urbani III. & Clementis III. priuilegiis ad Hugonem Abbatem Cluniacensem, Theobaldi huius successorem, subscribit ipse Theobaldus Episcopus Ostiensis & Veliternensis.

ING. PRIORI DE LAPEL.] Ingelberto fortasse, aut Ingelranno, quem Lapeleensi S. Remigij in Anglia Prioratui præfecerat.

TVSCVLANO EPISCOPO] Petro, vt dictum VI. lib. VIII. epist. XXI. Petrum de Pauiā, hoc est Ticinensem, vocat Rogerus Houedenus, de absolutione agens Vvillelmi regis Scotiæ per Lucium III. anno M. C. XXCII.

ABBATI S. AEGIDII] Viro nobili & litterato. VII. Monasterium est in Septimania, haud procul à Rhodani confluentibus, quod oppido etiam nomen fecit, sui primitum iuris, in Cluniacensium postea disciplinam potestatemque translatum.

PETRVS CARNOTENSIS ELECTVS] Post VIII. Ioannem Saresberiensem, vt dictum est lib. VII. epistola VI. Supplementum Sigeberti anno M. C. XXCII. Obiit Ioannes Carnotensis Episcopus, & successit ei Petrus, qui fuerat Abbas S. Remigij Remensis. Antè hæc

AD EPIST. PETRI

autem Abbas fuerat Cellensis, superstitē adhuc S. Bernardo.

- IX. NICOLAVS MON. S. ALBANI] Refutat Petri Cellensis epistolam, quæ fuit vltima libri VII. pugnarque pro immaculata B. Virginis Conceptione.

NUPER CANONIZATVS] Ab Alexandro III. Anagninæ anno M. C. LXXIV. post ipsius obitum XXI.

IVO IN CHRONICIS SVIS] Non extant hæc Chronica Ivonis. Et quidem veterum fere omnium, recentiorumque est sententia, Mariam Virginem non duodecimo, sed decimoquinto ætatis suæ anno Christum Dominum concepisse.

- X. PETRVS CARNOT. NICOLAO] Respondet epistolæ præcedenti. atque ita de B. Virginis laudibus differit, vt satis appareat illum, quamvis in dispari de festo Conceptionis sententia, non impari tamen erga illam venerationis studio fuisse.

- XI. H. ABBATI CLUNIACENSI] Hugoni IV. qui Theobaldo Cardinali successerat. Quæ sequitur epistola, anepigrapha erat in nostro exemplari.

A D E P I S T O L A S ALEXANDRI III.

MONAST. DE FLAIIACO] S. Geremari de ^{I.}
Flaiiaco. Sic enim hodie nominant partim à
loco, partim à primo eius conditore. Monasterium
Flaiiacum appellat Nicolaus I. in epistola ad Odo-
nem Episcopum Bellouacorum, in quorum finibus
situm est. Huius porro loci monachus fuit Radulfus
Flaiiacensis, qui scripsit in Leuiticum.

ABB. S. VRBANI] Eiusdem est ordinis cœno- ^{IV.}
bium cuius Deruense, atque in eadem Catalauno-
norum diœcesi: sed in oppido Iouisuillæ, siue vt vo-
cari postea cœpit Ioinuilla. Ecclesiâ verò S. Deside-
rij ea est, quæ non ignobili eius tractus oppido no-
men imposuit, ac iuris est monasterij Deruensis.

CANON S. TRINITATIS] Horum colle- ^{VI.}
gium in ipsa est ciuitate Catalaunensi, in qua & Insulæ
omnium Sanctorum monasterium esse monuimus.

REMENSES BURGENSES] Vtrique erant Re- ^{IX.}
menses. sed Burgenfes à ciuibus distinguit, quia ci-
ues eos vocat, quibus intra vrbis mœnia domicilium
erat: burgenfes, quibus in Burgo seu Castro S. Re-
migij, de quo dictum est lib. VII. epist. V. & infra dicet
epist. LI.

S. SYMPHORIANI] Clarum etiam nunc Remis ^{X.}
Canonicorum Collegium. Flodoardus lib. II. c. VI. de
Basilicis quibus Lando Archiepiscopus diuersa lega-
uit. *Item ad Basilicam S. Symphoriani, qua vocatur ad
Apostolos.*

AB. HAMVLARIENSIS] Qui nunc de Hum- ^{XIII.}
bleriis, in diœcesi Nouiomensi, in qua & Hamense
S. Mariæ cœnobium ordinis S. Augustini.

DANIEL PRESBYTER] Presbyter S. Ioannis ^{XIV.}
in Gandauo: quod oppidum cum Monasterio S. Pe-
tri, de quo epistola sequenti, eo tempore diœcesis erat
Tornacensis. nunc enim proprium habet Antisti-
tem.

A D E P I S T O L A S

- XVII. ECCLESIAE S. DONATIANI]** Archiepiscopi Remensis, cuius eò delatæ reliquiæ. Flodoardus lib. i. cap. v. *Hinc Donatianus extitit Episcopus, cuius etiam pignera maritimas in partes Episcopi Nouiomagensis vel Tornacensis perlata vario signorum memorantur splendore decorata. Brugæ quippe Flandrorum, quæ suum quoque nunc habent Episcopum, ad diocesim tum pertinebant Tornacensem, quæ adnexa erat Nouiomenfi.*
- XIX. VPSELLENSI ARCHIEPISCOPO]** Vpsalensem alij vocant, & Vpsaliam ciuitatem regni Suetiæ, Gothiæque metropolim. Ad hunc vero, eiusque suffraganeos scriptæ item epistolæ xxii. & xxv.
- XX. FULCO ESTONYM EPISC.]** De Fulcone dictum sapius. Estones populi regno Suetiæ attributi. Auctor enim est Saxo Grammat. lib. i. Frotonem Danorum regem Erico Suetiæ regi Estiam & Finnam annuo stipendiorum iure concessisse,
- XXIII. LINGACOPENSI]** Lingopensi, Vpsallensis suffraganeo. Nota est ciuitas Suetiæ, in qua Synodum celebrasse legitur Nicolaus Anglicus Cardinalis Eugenij iiii. Legatus, anno M. C. XLVIII. Lingacopensis Episcopatus iterum mentio epist. xxvii.
- XXIV. STRANENSI]** In Suetia item, sub Episcopo Vpsallensi, quem metropolitani eius nomine significat. In notitia Episcopatum Straginienfis appellatur.
- XXV. GUTHERMO DVCI]** Sueonum. Guthermus dicitur Saxoni Grammatico libro xiv. vbi de baptismo agit Kanuti filij Vvaldemari Daniæ regis. *Quod religiosa, inquit, executionis officium Sueonum ducis Gutharmi, qui neptem Vvaldemari eorumdem regi Karolo desponsam adducendi causa legationem attulerat, presentia venustabat.*
- PHIINNI]** Finni Boreales Suetiæ populi, qui Finnam seu Finningiam incolunt.
- XXVI. TRVNDENSI ARCHIEPISC.]** In Noruegia, Noruegiæ Metropolim alij Trondemum nominant. Saxo lib. x. extremo. *Corpus eius, Magni regis, Noruagiam velatum Trondemi in regiorum monumentarum*

ALEXANDRI III.

arca sepulturam possedit. Eiusdem etiam metropolis suffraganeus est Episcopus Stauengarensis.

GVIDONI ABB. S. NICASII] Lib. v. epi. xxviii. stolarum Petri Cellensis epist. xiv.

FRESCENGIARVM] Friscingæ dicuntur libro xxxix. iv. capitul. lxxii. quanquam ibi etiam codices nonnulli friskingas legunt. Variè enim scribitur hoc nomen. Quid uero significet, docuit Fr. Pithæus in Glossario.

DE BRANA] Oppidum est ad Vidulæ amnem in xxx. pago Sueffionico. Ibi ergo cœnobiaz quæ commemorat, & honor Comitatus, quem præcipuè illustravit Ioannes de Brana, rex Hierosolymitanus.

CORBEIENSIS] Nobile in primis est Monasterium ad Somonam fluuium in Ambianensium diocœsi. Antiquam Corbeiam vocant, ut distinguatur à Saxonica, quæ multo recentior originem duxit à Gallica.

MONACHIS S. LEODEGARI] Ordinis S. Augustini apud Sueffiones.

PRIOR DE ABBATISVILLA] Villa Abbatis xxxvi. initio dicta est, quæ possessio erat Abbatis S. Richarij, titulo Prioratus in agro Pontiuo Ambianensis diocœsis ad Semonam. Nunc priscum etiam nomen retinet, postquam ad iustæ amplitudinis oppidum excreuit.

A. AQUICINENSIS ABBAS] Alexander. Auctarium Sigeberti à Miræo editum. Anno M. c. lxx. obiit Balduinus iv. Comes Haginoensis, & ab Alexandro Abbate Aquitinenſi in Ecclesia S. V. valde rudis sepelitur. Monasterium est ordinis S. Benedicti in diocœsi Atrebatensi, in qua & ager Viconiensis.

ABBATIS DE GARD O] Ordinis Cisterciensis in xli. diocœsi Ambianensi, ad quam etiam pertinet Abbatia Serenicurtis ordinis Præmonstratensis.

LIBERV M ESSE DE BET] Quod de Magistris xliiv. hoc loco censet Alexander iii. id ipsum de Scholaribus statuit Alexander iv. pro Dominicanorum scholis in hæc verba scribens Episcopo Parisiensi: *Insuper statuimus, ut scholares omnes tam religiosi de Pralato-*

AD EPIST. ALEX. III. NOTÆ.

rum suorum licentia Parisiis gratia studij quandolibet commorantes, quam etiam saculares, ubicumque voluerint lectionibus vel predicationibus audiendis, siue questionibus disputandis liberè valeant interesse.

XLV. **MULTITUDO BREBENTIONVM]** Qui vel sua spõte, vel alienis auspiciis conducti, per hæc tempora incurstantes omnia populabantur, nec Ecclesiis, nec monasteriis parcentes, vt est in Concilio Lateranensi Alexandri Papæ cap. xxvii.

XLIV. **SANCTI THOMÆ]** Pertinent hæc ad annum Christi M. C. LXXII. quo anno relatum in album Sanctorum fuisse S. Thomam monuimus lib. vi. epist. ix. De Alberti item & Theodini Cardinalium legatione dictum eodem libro epist. i.

Summa privilegij Regis.

LUDOVICI XIII. Galliarum & Navarrarum Regis diplomate cautum est, ne quis in regno Franciarum aliisque locis eius ditioni subiectis, intra proximos annos sex, à die impressionis perfectæ prima inchoandos, excudat, vendat, excudendum, vendendumque quovis modo, ac ratione curet, Librum qui inscribitur, *Petri Abbatis Cellensis Epistolarum lib. I X. item Alexandri III. Papa Epistole LVI.* præter SEBASTIANVM CRAMOISY Bibliopolum Parisiensem iuratum, aut illos quibus ipse concesserit, sub pœnis originali diplomate contra delinquentes expressis. Datum Parisiis 26. Nouemb. 1612.

Sic Signatum,

De mandato Regis,

PASTORREL.

Errata.

Pag. 14. 31. specie veri

19. 11. eis concessam

38. 18. impetratu diffic.

39. 2. *Fr. Petrus Cellensis*

44. 2. humilitatē seu mod.

46. 32. iam excruciat

48. 16. nummum gratiæ

50. 16. ex gratia: eligo

52. 3. in ore vestro

73. 9. Ab ipsis igitur

86. 11. manus mea ad

87. 23. de præda pretiosiss.

97. 33. non tamen vanas

98. 14. taueris, in sep. ista af.

105. 11. mortificatione carn.

108. 18. cum ipsi sint

20. sed sale

109. 12. humiliatis

115. 28. Nō magis abomin.

182. 3. liatus insidiis, præ

4. ficulneis: venit

134. 9. Solet nimia

140. 5. Cepisti

142. 26. vera sint, falsa sint
phil.

152. 33. corporeæ subst.

156. 14. Nam tuus

158. 27. maior, sed

182. 16. delibatum

202. 9. commonere

206. 16. mam. agnus. q. i. l.
pascitur, benignus

224. 26. rogans &

233. 18. fratrum

242. 18. *Sueconum*

252. 9. *E. Lundensi*

256. 7. in literis vestris

264. 1. natura terræ?

15. inquit Dominus,

265. 26. vt nullius

283. 2. *G. Puella.*

284. 2. elabuntur

285. 9. *Villariensi.*

287. 27. Tam enim nos,

297. 15. auxilio, ruinam

307. 28. Valet,

308. 2. *E. Lundensi*

312. 2. Huic nulla

328. 2. *R. Canonico*

330. 15. conuentum

342. 12. Concilio

350. 30. pie iuuat

381. 15. sign. innouatione

382. 3. quippe dicit Nat.

383. 12. percipi. Et

22. peccato: vt tūc

31. proficiebat: noua

398. 17. Iesv, in

439. 15. honori

441. 22. *Guthermo*

446. 26. frescengiarum

447. 3. monetæ

448. 26. Corbeiensem

450. 20. & vii.

005653002

